

ДРУГИЙ (ВОЛИНСЬКИЙ) СТАТУТ ВЕЛИКОГО КНЯЗІВСТВА ЛИТОВСЬКОГО 1566 РОКУ

[Статут Вялікага княства Літоўскага 1566 года. — Мінск, 2003. — С.35-263. За виданням 1855 року.]

РЕЕСТРЪ

ПРИВІЛЕЇ

Привилей Року 63

Привилей Бѣльскай. прынятыя унея рокъ 64

Привилей Виленскій рокъ 65

Лѣта Божьего нароженія 1566 мѣсяца Іюля 1 дня, артикулы Поправы статутова

СТАТУТЪ ВЕЛИКОГО КНЯЗСТВА ЛИТОВСКОГО

РЕСТРЪ РОЗДѢЛУ 1-ГО

О персонѣ господарской.

Артикулъ 1. Все обыватели Великого Князства Литовского однимъ правомъ писанымъ, отъ насъ данымъ, сужоны быти мають

Артикулъ 2. Мы Господарь обѣцуюемъ никого не карати на заочное повѣданье, хот бы се дотыкало ко ображенью маестату нашего господарского, и хто тежь што на кого вель, а не довелъ, тымъ самъ каранъ быти маеть

Артикулъ 3. О ображенье маестату нашего господарского

Артыкуль 4. Ображенье маестату нашего господарского

Артыкуль 5. О обораженье маестату нашего господарского такій доводъ а не инакшій маеть быти

Артыкуль 6. Кто бы кольвекъ съ панства нашего до земли непріятельское утекъ

Артыкуль 7. Хтобы съ пригоды до земли суседь наших втекъ

Артыкуль 8. О зквалченье и зламаные кглеити

Артыкуль 9. О мандатѣхъ, въ которихъ речахъ мають быти мандаты съ канслеріи наше даваны

Артыкуль 10. Хтобы кому имѣнье заставиль або продалъ первой нижли зъ земли утекъ

Артыкуль 11. Если бы отецъ отъ дѣтей утекъ до земли непріятельское такъ тежъ которій близшій

Артыкуль 12. Кто бы листы або печати наши фалшоваль, чимъ маеть быти каранъ

Артыкуль 13. О фалшованью монеты и о мындзѣхъ и золотарехъ

Артыкуль 14. Не маеть нихто за чій колвекъ выступокъ учинокъ терпѣти, одно каждый самъ за себе

Артыкуль 15. Кто много за мало упросиль, а безъ данины побраль

Артыкуль 16. О речъ земленую межи имѣньями нашими князскими панскими шляхецкими, мы Господарь тымъ правомъ судитисе маемъ

Артыкуль 17. Все въ томъ панствѣ нашомъ Великомъ Князствѣ Литовскомъ однимъ тымъ правомъ сужоны быти мають

Артыкуль 18. О листѣхъ заповѣдныхъ, ижъ не иають быти съ канцлеріи наше выдаваны

Артыкуль 19. Листы отвороны мають каждому ворочаны быти

Артыкуль 20. О збитью носланца нашего господарского, и тежъ посланцовъ отъ пановъ радъ нашихъ при листѣхъ нашихъ господарскихъ и пановъ радъ и старость нашихъ судовыхъ и суду земского

Артыкуль 21. О листѣхъ заручныхъ

Артыкуль 22. О одновѣдникахъ неосѣльныхъ

Артыкуль 23. О листѣхъ желѣзныхъ, кому мають быти даваны

Артыкуль 24. Кому бы шло о честь, къ рыхло справедливость учинена быти маеть

Артыкуль 25. О мытѣхъ новыхъ

Артыкуль 26. О неданье мыта шляхтѣ

Артыкуль 27. Хтобы напротивко выроку нашего господарского мовиль

Артыкуль 28. Хто бы подѣ кимъ што упросиль, а тому бы напередѣ дано и въ привилыи нашомѣ господарскомѣ напередѣ описано

Артыкуль 29. Хто бы на што листы упросиль, а того въ держанью не былъ

Артыкуль 30. Абы се въ домѣхъ въ дворехъ нашихъ господарскихъ никто не становиль

РЕСТРЪ РОЗДѢЛУ 2-ГО

О оборонѣ земскои.

Артыкуль 1. О повинности, яко вси обыватели Великого Князства Литовского, водлѣ уфалы сойму вального Великого Князства Литовского, службу земскую служити мають

Артыкуль 2. О постановенью обороны земское толко на сеймѣ

Артыкуль 3. О невызволенье листы нашими, и тежѣ кого вызволить волно

Артыкуль 4. О имѣнья заставные, хто зѣ нихъ службу земскую служити маеть

Артыкуль 5. О хоружыхъ

Артыкуль 6. О збиранью и тягненью шляхты на войну

Артыкуль 7. Уси шляхта повѣтвые повинны становитися Юдѣ хороговью повѣтвоею

Артыкуль 8. О шляхтѣ, которіе въ розныхъ повѣтѣхъ имѣнья мають

Артыкуль 9. О духовныхъ, якъ мають службу земскую служити

Артыкуль 10. Абы се пошыхованью не родѣждчали до домовъ своихъ

Артыкуль 11. Которіе для немоцы своее на войну ѣхати не могутъ

Артыкуль 12. О сынѣхъ и заступованью войны одинъ за другого

Артыкуль 13. Хто бы замѣшкаль, на рокъ положоный до войска не пріѣхаль

Артыкуль 14. О такомъ, хто бы зъ битвы утекъ

Артыкуль 15. О тыхъ, которіе на войнѣ зброй коней и броней своихъ кому иному позычаютъ

Артыкуль 16. Почому отъ попису брати

Артыкуль 17. О старшихъ, которіе надъ людомъ войска нашего послани бывають

Артыкуль 18. О хоружыхъ, абы землянь дома не осажывали ани одпущали

Артыкуль 19. О сторожы военной

Артыкуль 20. О наѣздъ на домъ и гумна на войнѣ шляхецкіе

Артыкуль 21. О стацѣи на войнѣ, кому бы не доставало

Артыкуль 22. О бранью вижа на стацею отъ гетьмановъ

Артыкуль 23. О квалтъ або о находъ военный у въ обозѣ

Артыкуль 24. О людехъ ненежныхъ, якъ мають зъ имѣней своихъ службу земскую служыти

Артыкуль 25. О чужоземскіе прыбылые люди, якъ се мають заховать въ тегненью

Артыкуль 26. О шкоды въ тегненью такъ тубулцовъ яко и чужоземцовъ

Артыкуль 27. О блудягы на войнѣ

Артыкуль 28. О указанью и пописованью шляхты повѣтовое у воеводствахъ або у староствахъ головныхъ

Артыкуль 29. Яко войнѣ новинные у войску отъ гетмана далеко становитися не мають

[РЕЕСТРЪ РОЗДѢЛУ 3-ГО](#)

[О вольностяхъ шляхецкихъ и розмноженью Великого Князства Литовского.](#)

Артыкуль 1. О розмноженью Великого Князства Литовского

Артыкуль 2. О вольностяхъ шляхецкихъ

Артыкуль 3. Мы Господарь обяцуемъ розмножати Великое Князство Литовское, а што бы разобрано и отышло, зась ку нему привернути

Артыкуль 4. О неданье шляхты и ихъ имѣней и крѣпостей и всякихъ вольностей и тежъ неданье листовъ и привилеевъ противъ сему статуту

Артыкуль 5. О соймиковъ повѣтовыхъ и о выправенью и посланью зъ нихъ пословъ земскихъ на валный соймъ

Артыкуль 6. О соймѣ валномъ

Артыкуль 7. Абы шляхтичъ безправнѣ не былъ иманъ ани сажонъ

Артыкуль 8. Абы панове шляхту о почтивость ихъ сами не судили

Артыкуль 9. Ижъ достоинствъ и врядовъ въ дѣдицтво чужоземцомъ дано быти не маеть

Артыкуль 10. Достоинства и вряды давные не мають быти нарушоны

Артыкуль 11. Достоинства и врядовъ на заочное обмование не маемъ одѣймвати

Артыкуль 12. О держанью старыхъ уставъ, а новыхъ безъ сейму валного не встановляти

Артыкуль 13. О вольности выѣханья нашего изъ земли кромъ земель иепрѣятельскихъ

Артыкуль 14. По смерти отцовъ и матокъ и йныхъ кровныхъ, и близкихъ ихъ дѣтей и потомковъ отъ каждого дѣдицтва спадкомъ выслуги и всякого набытья не отдаляти

Артыкуль 15. Людей простыхъ надъ шляхту не повышати

Артыкуль 16. О зводъ шляхецтва.

Артыкуль 17. О чужоземцу наганеномъ о шляхецтво

Артыкуль 18. Если бы хто кому приганилъ, а самъ не былъ шляхтичъ

Артыкуль 19. О наганенье шляхтича забитого

Артыкуль 20. О шляхтѣ которе бы вмѣстѣ осѣлость мѣли

Артыкуль 21. О простыхъ людехъ кгдажъ повышенья чести и становъ за годностями заслугами могутъ мѣти

Артыкуль 22. Кгда бы шляхтичъ шляхтичу примовку учинилъ якую

Артыкуль 23. О примовку, ижъ хто бы не былъ чыстого ложа сынъ

Артыкуль 24. О вызволение отплатовъ новыхъ и одъ подводъ кромѣ стародавного обычаю якъ тежъ по дорогамъ

Артыкуль 25. Если бы который съ подданныхъ нашихъ на князехъ панохъ або на комъ иномъ выслужылъ имѣнье лежачое

Артыкуль 26. О позыванье свѣцкихъ въ духовное право

Артыкуль 27. О мѣщанехъ мѣста нашего Виленского, якимъ правомъ шляхту зъ мѣщаны судити мають

Артыкуль 28. О мѣщане, ижъ селянь не мають на торгу грабить

Артыкуль 29. О слуги и люди шляхецкія и о челедь неволную, которіе до мѣствъ входять

Артыкуль 30. О мѣрахъ абы были равны

Артыкуль 31. Кнегинь паней дѣвокъ вдовъ не маемъ за кого кгвалтомъ давати

Артыкуль 32. Отець за живота своего змушенья не повинень имѣнья дѣтемъ поступовати, лечь подоброй воли его

Артыкуль 33. Всимъ станомъ народу шляхецкаго, якъ хотя, волно имѣньями шафовати

Артыкуль 34. О волности шафовати выслугою своею

Артыкуль 35. О волности шляхтѣ имѣнья лежачіе и иные маетности свои намъ Господару записовати.

Артыкуль 36. Кто чога за Короля Казимера и за Олександра и за отца нашего Короля его милости Жикгимонта былъ въ держанью, тотъ вѣчнѣ маеть держати.

Артыкуль 37. Кто бы имѣнье отъ насъ Господара кому даное въ кого отыймоваль

Артыкуль 38. Што бы кому черезъ листы дано або упрошоно, а онъ бы того не вживаль и въ молчанью былъ черезъ давность земскую, десеть лѣтъ, и тежь о лѣта дѣтиные, которые бы въ чужой земли были

Артыкуль 39. Мы Господарь обѣцуюемъ еднакую снраведливость чинити всимъ, а пересуды мы и панове рада наша брати не маемъ

Артыкуль 40. О тыхъ, которіе ѣдучы въ дорогу на поляхъ се становятъ, а збожью шкоду чинятъ

Артыкуль 41. О вывоженью приправъ военныхъ и всякого желѣза до земли непріятельское.

РЕЕСТРЪ РОЗДѢЛУ 4-ГО

О судьяхъ и о судѣхъ и о выбиранью судей въ повѣтѣ

Артыкуль 1. О судьяхъ и о судѣхъ и о выбираенью судей въ повѣтѣ

Артыкуль 2. О моцы и владности судей, ижъ кождый кождога стану повиненъ передъ нами становитесе, и о томъ хтобы передъ нами не сталь

Артыкуль 3. О пересудѣхъ и доходѣхъ судьи подсудка и писара

Артыкуль 4. О возныхъ присязѣ и о ихъ врьдѣ

Артыкуль 5. Справа и урядъ вознаго

Артыкуль 6. Хтобы вознаго за посланьемъ и за листы врьду замкового земского на справѣ збилъ, або листь у его отнявши содраль

Артыкуль 7. Абы особы врьдовые сами судили, а никто иншый на мѣстцу ихъ

Артыкуль 8. О судьяхъ, яковые мають быти выбираны

Артыкуль 9. Яко и при комъ позвы позыватися мають, къ и гдѣ то свѣдчыти и што возному за переѣздъ и працу его давати

Артыкуль 10. О печати нашей господарской земской тежъ печатехъ врьдовыхъ, которыми што маеть быти печатовано

Артыкуль 11. О книгахъ земскихъ, въ кождомъ повѣтѣ гдѣ будутъ хованы

Артыкуль 12. Хтобы за позвы напершіе и другіе и третіе роки не сталь безъ прычины слушное

Артыкуль 13. Хтобы за хоробою або за послугою нашою або земского за позвы стати не могъ

Артыкуль 14. Хтобы кого позваль на роки судовые, самъ безъ слушное прычины несталь

Артыкуль 15. Хтобы кого черезъ судъ або черезъ еднанье ку праву позваль

Артыкуль 16. О позвѣхъ не маеть никто ни на кого речей не вчтивыхъ и образливыхъ доброй славѣ писати

Артыкуль 17. Хто имѣнья въ разныхъ повѣтехъ маеть и до колка судовъ зъ имѣней разныхъ на одны роки будетъ позванъ

Артыкуль 18. Што бы се трафило або стало пры бытности нашей господарской и при дворѣ нашемъ, которимъ обычаемъ маеть быти сужоно, и хтобы черезъ заказъ уѣхаль и о гостяхъ чужоземцахъ

Артыкуль 19. О тяхъ, которые бы не маючы въ которомъ повѣтѣ або врьдѣ нашомъ осѣлости, а тымъ пріѣхавшы зъ стороны або изъ инога повѣту збытокъ або якую шкоду учынилъ

Артыкуль 20. Што маюць судить воеводове старостове и державцы наши, и о ихъ позвехъ въ тыхъ речахъ

Артыкуль 21. О судьи замковомъ

Артыкуль 22. О роки завитые въ которыхъ речахъ быти маюць складаны

Артыкуль 23. О збитью позвовъ

Артыкуль 24. О позвѣхъ, якъ долго тривати маюць

Аршыкуль 25. Кто бы кого отъ суду земскаго съ повѣту своего до иного права позваль

Артыкуль 26. О таковыхъ, которые не маючи въ которомъ повѣтѣ осѣлости, другаго осѣлого позывають, а идетъ имъ обѣюмъ сторонамъ обѣ одну речъ

Артыкуль 27. О рокахъ, на которіе судья подсудокъ и писарь маеть зѣждчатис и позваные передъ ними новинни становитис

Артыкуль 28. О позвѣхъ и о року, якій за позвы будетъ складанъ, а каждый жалобу свою на позвѣ меновите описати маеть, и о збиванью позвовъ

Артыкуль 29. Которымъ бы се дѣели кривды отъ урядниковъ слугъ и подданныхъ чиихъ колвекъ

Артыкуль 30. Яко стороны у суду за позвы заховатися маюць

Артыкуль 31. О заступованью въ суду одному за другого

Артыкуль 32. О злеценью речей и отдаванью моцы инымъ за себе у права мовити

Артыкуль 33. Кто бы самъ не могъ або не вмѣль у права мовити

Артыкуль 34. О прокураторахъ якіе маюць быти и якихъ тежъ судъ не маеть пріймовати

Артыкуль 35. О скаранью фалшывыхъ прокураторовъ а подступныхъ, и къ тому жъ вольно сторонѣ прокуратора своего у права подпирати и самому мовити и другаго прокуратора на его мѣстцу установити

Артыкуль 36. Прычины нестанья прокуратовъ, ижъ то имъ и сторонамъ ихъ шкодити не будетъ

Артыкуль 37. Чого прокураторъ безъ стороны своее справовати не можетъ

Артыкуль 38. Ижъ никто зъ оборонами передъ судъ приходити не маеть

Артыкуль 39. Хтобы на кого передъ правомъ словомъ або рукою с торгнуль, пхнуль, або раниль

Артыкуль 40. Хтобы на судѣ судью и писара такъ враду замковаго яко и земскаго соромотиль, билъ, раниль, або забиль

Артыкуль 41. О томъ гдѢ бы судья подсудокъ и писарь такъ замковый яко и земскій у радѢ сѢдечи кого на судѢ изсоромить, або се на кого рукою торгнуль

Артыкуль 42. Если бы хто пріѢхавши до суду земскаго або замковаго кого другаго часу роковъ зраниль або кгвалтъ и шкоду якую кому учиниль

Артыкуль 43. Ижъ позванный не маеть розривати права речми непотребными

Артыкуль 44. Яко братью недѢленую або учасниковъ позывати

Артыкуль 45. Ижъ врьдниковъ нашихъ зъ ихъ врьдовъ ниhto судити не маеть, одно мы сами Господарь

Артыкуль 46. О мѢщанѢхъ о людѢхъ нашихъ и о кривдахъ ихъ отъ шлхты

Артыкуль 47. О мѢщанехъ права Майдеборского

Артыкуль 48. О участникахъ, якъ мають облизкости имѢнья доходити лежачаго

Артыкуль 49. О заповѢди и о заруки о речъ сужоную

Артыкуль 50. Хтобы послѢ права и присеги тогожъ искаль што нередъ правомъ утратиль

Артыкуль 51. О свѢдкахъ якіи мають быти у права пріймованы

Артыкуль 52. О доводѢхъ и отводѢхъ которіе ку свѢдцеству мають быти припущоны

Артыкуль 53. Которые ку свѢдцеству мають быти припущоны

Артыкуль 54. О свѢдкахъ, которымъ бы хто што ку нимъ хотѢль мовити

Артыкуль 55. На своихъ свѢдкахъ по правѢ ниhto ничого искати не можетъ

Артыкуль 56. СвѢдцествомъ двохъ або трехъ свѢдковъ маеть сторона речъ свою одержати, и хто бы тежъ оставившы доводъ пустиль сторонѢ на присегу

Артыкуль 57. О доводѢхъ листовныхъ

Артыкуль 58. О комисияхъ нашихъ господарскихъ, въ которыхъ речахъ мають быти даваны

Артыкуль 59. О роки заплатѢ пенежной

Артыкуль 60. О полюбовномъ суду

Артыкуль 61. О отзыванью суду до насъ Господара

Артыкуль 62. О тозвехъ, гдѢ бы колко братьи або участниковъ позвали кого ку праву, а потомъ отъ суда отозвавшись по сказаньи естли бы зъ нихъ одинъ зъеднался, а другіе которые се не еднали могутъ отозву пилновати

Артыкуль 63. Въ чомъ отозву судъ допустити не маеть

Артыкуль 64. За апеляцыями рокъ завитый маеть быть

Артыкуль 65. Котораго часу отъ суду земскаго и замковаго отъзовъ до насъ . Господара маеть быть

Артыкуль 66. О давностяхъ земскихъ

Артыкуль 67. О отправахъ речей сужонныхъ

Артыкуль 68. На имѣнью лежачомъ отправа сумы пенезей

Артыкуль 69. О квалтовное выбитье спокойнаго держеня

Артыкуль 70. О подкоморыхъ и о ихъ врьдѣ

РЕЕСТРЪ РОЗДѢЛУ 5-ГО

О оправе посагу.

Артыкуль 1. Которимъ обычаемъ отецъ выдаючи дѣвку свою за мужъ маеть обваровати впеvннати записанья вѣна отъ зятя

Артыкуль 2. Якъ маеть жонѣ вѣно заисати

Артыкуль 3. По смерти отцовской дѣвки якъ мають зъ имѣнья выправованы быти

Артыкуль 4. О вдовѣ вѣнованой, якъ се мають пропивко ей дѣти лѣта маючіе обходити

Артыкуль 5. Вдовы безплодные, которіе дѣтей не мають

Артыкуль 6. Которій бы кольвекъ осѣлый и неосѣлый оженился въ Литвѣ

Артыкуль 7. О дѣвкахъ, которіе безъ воли родичовъ замужъ идутъ або бы мѣли пойти

Артыкуль 8. О дѣвкахъ, которіе по смерти родичовъ своихъ безъ воли братьи або стреевъ замужъ идутъ

Артыкуль 9. Хтобы съ двѣма або съ трема жонами дѣти мѣль

Артыкуль 10. О вдовѣ, которая застанеть зъ дѣтьми недорослыми лѣтъ своихъ

Артыкуль 11. О дѣвкахъ и вдовахъ, которіе за простыхъ людей замужъ идутъ

Артыкуль 12. О вдовѣ, которая бы по смерти мужа своего за другаго хотѣла пойти

Артыкуль 13. О спадки, которые заровно на сына и до дочки приходять, и о внесенью матчиномъ, если бы кому не записала

Артыкуль 14. О поровнанью внесенья розыхъ женъ передъ роздѣломъ дѣтиного имѣнья

Артыкуль 15. Если бы которая вдова замужъ пошла

Артыкуль 16. О имѣнью, на которомъ мужъ жонѣ отпаву чинить

Артыкуль 17. О бесплодной жонѣ

Артыкуль 18. О разводѣхъ малженскихъ передъ судомъ духовнымъ

РЕЕСТРЪ РОЗДѢЛУ 6-ГО

О опекахъ.

Артыкуль I. О дѣти недорослые лѣтъ

Артыкуль 2. О опецѣ отцовской

Артыкуль 3. Которіе опекунами мають быти

Артыкуль 4. Наука опекуномъ, якъ мають на себе опеку брати

Артыкуль 5. Если бы што опекунь несправую або недбалостью своею дѣтемъ што упустилъ

Артыкуль 6. Опекунь можетъ дѣтиное кривды у права доходити, але не моцонъ ничего утратити

Артыкуль 7. Кто бы дѣти недорослые до права позвалъ

Артыкуль 8. Ижъ дѣти недорослые не мають у права отновѣдати въ чотырохъ причинахъ

Артыкуль 9. О братьи недѣльной

Артыкуль 10. Старшій опекунь не можетъ имѣнья дѣтиного продавати, утратити

Артыкуль 11. Старшій сынъ dorosлый не можетъ братьи недорослое имѣнья отдаляти або завести окромъ части своее, лечь бы для долговъ родичовъ своихъ

Артыкуль 12. Въ опецѢ тоє имѢнѣ держечи не маєть ничего зѢ него за свою вину платити

Артыкуль 13. Коли бы се трафило екекуторови або оборонцы почавши которіє sprawy тестанентовъ справовати, а не доконавши змерли

РЕЕСТРЪ РОЗДѢЛУ 7-ГО

О записѢхъ и продажахъ.

Артыкуль 1. О записахъ на имѢнью

Артыкуль 2. Если будутъ кому потреба запись чинити кромѢ роковъ земскихъ отъ лежачихъ книгъ

Артыкуль 3. Кто бы хотѢлъ имѢнѣ свое отчизное продати або завести

Артыкуль 4. О волности продати третью часть на вѢчность

Артыкуль 5. О записѢхъ имѢней купныхъ

Артыкуль 6. Если бы отецъ и matka отъ дѢтей своихъ або братъ отъ братьи которое имѢнѣ кому записати хотѢлъ

Артыкуль 7. Не маєть никто никому жадного спадку записовати, чого въ рукахъ не маєть

Артыкуль 8. Кто бы кому записалъ имѢнѣ або землю по своемъ животѢ, а тотъ, кому записано, того смерти не дождалъ и передъ умеръ

Артыкуль 9. Кто бы на которую кольвекъ речъ доброволнѢ далъ запись, тотъ маєть при моцы зостати

Артыкуль 10. О имѢнѣ должное и давность земскую

Артыкуль 11. Хтобы подѢ кимъ искалъ близкости, а тотъ держалъ имѢнѣ записомъ слушнымъ

Артыкуль 12. О долги двохъ або колка на одномъ имѢнью

Артыкуль 13. О речъ заставную, въ большой сумѢ хто заведеть

Артыкуль 14. Каждая застава давности мѢть не можетъ

Артыкуль 15. О откладанью пенезей на заставу

Артыкуль 16. Рокъ нраву о заставную речъ маеть быть положонъ завитый

Артыкуль 17. Хтобы што запродаць на рокъ

Артыкуль 18. О имѣнье заставное, безъ року не окуповати

Артыкуль 19. О отнятьѣ имѣнья заставного

Артыкуль 20. О речъ рухомую въ заставѣ

Артыкуль 21. Хтобы кому зоставилъ коня або вола безъ року

Артыкуль 22. О речахъ заставныхъ, штобы згнуло въ чьемъ схованью

Артыкуль 23. О заповѣданью речей рухomyхъ чужыхъ

Артыкуль 24. О листы на долги на имѣнья згнулые

Артыкуль 25. Якъ много безъ листу вызнаного маеть позычити

Артыкуль 26. О позычкахъ купецкихъ

РЕЕСТРЪ РОЗДѢЛУ 8-ГО

О тестаментѣхъ.

Артыкуль 1. Кто можетъ и не можетъ о речахъ своихъ рухomyхъ тестаментъ чинити

Артыкуль 2. О тестаментѣхъ на речи рухомые на имѣнья набытыя, яко мають чынены быти

Артыкуль 3. О свѣдкохъ, которіе мають быти при справованью тестаментовъ

Артыкуль 4. Никто не можетъ неволнику своему ничего записати, волнымъ его не вчинившы

Артыкуль 5. Каждый слуга путный и мѣщанинъ мѣсть непривилеваныхъ и тежъ человѣкъ простой якъ маеть тестаментъ чинити

Артыкуль 6. Если бы тестаментъ въ чомъ не былъ достаточнѣ справованъ

Артыкуль 7. Причины для которе отецъ сына можетъ отъ имѣней выдѣлить або отдалити

Артыкуль 8. О человѣку слѣпомъ

РЕЕСТРЪ РОЗДѢЛУ 9-ГО

О правахъ земскихъ.

Артыкуль 1. О отнятьѢ имѢней въ границахъ

Артыкуль 2. О рокъ завитый на землю выѢхати

Артыкуль 3. Въ свѣдѣствѢ жадного закону не маеть быть, кромъ хрестіянского Рымского закону або Греческого

Артыкуль 4. Кто бы кому свѣдки ганиль

Артыкуль 5. Коли бы хто свѣдковъ наганеныхъ передъ судомъ неочистиль

Артыкуль 6. О землю обрубную и тежъ о сумѣстные земли, якъ мають доводъ чинити

Артыкуль 7. О рокъ завитый шесть недѣль

Артыкуль 8. Кто бы мѣль вести право о землю зъ воеводо старостою и державцомъ, а тотъ бы мѣль имѢнне въ томъ же повѣтѢ, гдѢ есть врдникомъ

Артыкуль 9. Кто бы кому границу або межу сказиль

Артыкуль 10. О лѣсъ сумѣсный и о проробки

Артыкуль 11. О рѣки гдѢ граничатъ

Артыкуль 12. Коли бы хто своимъ ставомъ инший ставъ або сѣножать затопиль

Артыкуль 13. Хтобы на чьей земли посѣяль збожье, тежъ коли бы хотѣль сѣно косити або бы покосиль, якъ маеть заповѣдати вознымъ, абы не звозиль до права

Артыкуль 14. Кто бы земли въ держаню былъ тры годы, а другій правомъ не преконавши жыто пожалъ, албо жатое побраль, або бой учынилъ, або соху зрубаль борону и колеса

Артыкуль 15. О увезанье въ имѢнне за долги албо за иншую причину, якъ се мають справовать

Артыкуль 16. О имѢнне, которое зволившысе дадутъ до рукъ нашихъ господарскихъ

Артыкуль 17. О имѢнне нероздѣльное межы братьею

Артыкуль 18. У чужого человѣка не маеть нихто земли закуповати безъ воли пана его

Артыкуль 19. Которые люди приходять на волю и засѣдѣвши волю утекають

Артыкуль 20. О найденю скарбу захованого въ земли або въ якомъ положеню

Артыкуль 21. О портехъ водныхъ и о товарехъ стонулыхъ на водахъ

Артыкуль 22. О дорогахъ старовѣчныхъ

РЕЕСТРЪ РОЗДѢЛУ 10-ГО

О ловы о пущы и о дерево бортное.

Артыкуль 1. О ловы о пущы, хто бы ихъ половиль

Артыкуль 2. Цѣна звѣромъ дикимъ

Артыкуль 3. О борти и озера и сеножати, хто маеть въ чіей пущы

Артыкуль 4. Хтобы чужое озерѣ въ своей пущы поволочыль

Артыкуль 5. Хтобы засталъ чіего человѣка у своей пущы и пограбиль

Артыкуль 6. Хтобы мѣль споръ о борти або о входы въ пущы

Артыкуль 7. Хтобы кому озера або ставъ сажовку зволочыль або млынъ изжогъ

Артыкуль 8. О гнѣздо соколье и лебединое и о перевѣсъ

Артыкуль 9. О бобровые гоны

Артыкуль 10. О хмелища

Артыкуль 11. О принадахъ пташыхъ

Артыкуль 12. Хто бы кому прынады злодѣйскимъ обычаемъ показиль

Артыкуль 13. Устава дереву бортному

Артыкуль 14. Цѣна пчоламъ

Артыкуль 15. О порубанье гаю

Артыкуль 16. О покраденье саду

Артыкуль 17. О пожарохъ въ пущы

РЕЕСТРЪ РОЗДѢЛУ 11-ГО

О квалтехъ и о головщызнахъ шляецкихъ.

Артыкуль 1. Кто бы на чый домъ або на господу умыслнѣ наѣхалъ, хотечи его забити

Артыкуль 2. О доводъ квалту, якъ мають освѣдчати и обжаловати

Артыкуль 3. О квалтъ костелу закону Хрестіянского.

Артыкуль 4. О квалтовнику, который забивши зъ земли утечеть

Артыкуль 5. Кто бы злочинцовъ, розбойниковъ, злодѣевъ явныхъ и людей выволаныхъ въ дому въ себе переховаль

Артыкуль 6. Кто бы забиль квалтовника въ дому своемъ помочниковъ его

Артыкуль 7. Кто бы наѣхалъ або нашолъ на чужое имѣнье або на село квалтомъ, а въ томъ боронечи кгрунту своего кого забиль

Артыкуль 8. О квалтованье дѣвки и невѣсты

Артыкуль 9. О квалтовное взятъ въ малженство дѣвки, вдовы и каждое невѣсты

Артыкуль 10. О мужу и жонѣ о замордованью до смерти

Артыкуль 11. О похвалку за которою бы се стала шкода и одповѣдь на горло

Артыкуль 12. Естли бы колько парсунъ шляецкихъ о забитье одного шляхтича обвинено было

Артыкуль 13. О звадахъ шляецкихъ

Артыкуль 14. О указане шляецтва за всказанемъ навезки

Артыкуль 15, О мѣщанинѣ который бы раниль шляхтича

Артыкуль 16. О забойцахъ отца и матки

Артыкуль 17. Если бы хто брата або сестръ забиль

Артыкуль 18. Который бы слуга забиль або раниль пана своего

Артыкуль 19. Хтобы на кого на дорозѣ засѣлъ, а въ томъ бы самъ забить былъ

Артыкуль 20. Если бы шкода або кгвалтъ кому сталсе, такъ въ чьемъ дому яко и на дорозѣ, за вѣдомостью домового господаря

Артыкуль 21. Кто бы на чые имѣнье на село и на люди наслалъ, або самъ наѣхавшы кгвалтомъ побилъ поранилъ

Артыкуль 22. За кгквалтъ посполитый сусѣдскій

Артыкуль 23. Если бы шляхтичъ шляхтича розбилъ на дорозѣ

Артыкуль 24. Которой братъи рожоной будеть отца забито, або зъ нихъ самихъ которого кольвекъ

Артыкуль 25. Кто близшый головчизны искати маеть

Артыкуль 26. О звадахъ.

Артыкуль 27. О звадѣ вечерней

Артыкуль 28. Хтобы кого умыслнѣ ранилъ, а до суду былъ позванъ

Артыкуль 29. Слуга, которій боронечы пана своего коли бы кого забилъ албо ранилъ

Артыкуль 30. Если бы чій слуга, учинивши кому кгвалтъ домовый або головщизну, прочъ утекъ

Артыкуль 31. О забитье человѣка переѣжджаго и безплеменного

Артыкуль 32. Промолчанью кгвалту або злодѣства

Артыкуль 33. Который злочынца будеть на смерть сказанъ, а отъ того ся откупилъ або отпрошонъ былъ

Артыкуль 34. Хтобы послѣ ранъ по пиромъ або по корчмомъ ходечи пилъ

Артыкуль 35. О забитью такъ званого гостя яко и незваного

[РЕЕСТРЪ РОЗДѢЛУ 12-ГО](#)

[О головщизнахъ и навезкахъ людей посполитыхъ.](#)

Артыкуль 1. О головщизны и навезки людей посполитыхъ

Артыкуль 2. Головщизна и навезка тивуномъ ключникомъ войтомъ, старцомъ

Артыкуль 3. Головщизны ремесныхъ людей

Артыкуль 4. О ношенью жыдовскомъ.

Артыкуль 5. Жыдь, татаринъ и кождый бесурмянинъ на врьдъ преложонъ и хрестіянъ въ неволи мѣти не маеть

Артыкуль 6. Навезка татаромъ.

Артыкуль 7. Человѣкъ волный за жадень выступокъ внѣволю выданъ быти не маеть

Артыкуль 8. О человѣку отчызномъ

Артыкуль 9. Хтобы на человѣка волного права дати не хотѣль

Артыкуль 10. О челядь невольную, которая втечетъ отъ пана своего

Артыкуль 11. О вольныхъ людехъ которыхъ въ голодъ продають

Артыкуль 12. Хтобы въ голодъ челедь свою выгналъ

Артыкуль 13. Неволницы мають быти троякихъ причинъ

Артыкуль 14. Еслибы хто до кого слугу приказаль, а тотъ слуга зашкочившы втекъ отъ его прочь

РЕЕСТРЪ РОЗДѢЛУ 13-ГО

О грабежахъ и навезкахъ.

Артыкуль 1. О пограбенъе стада свирѣпскаго

Артыкуль 2. Якимъ обычаемъ мають се заховати о испашъ и грабежъ на испашахъ

Артыкуль 3. Хтобы подъ шляхтичомъ або подъ шляхтянкою грабежъ учинилъ

Артыкуль 4. О грабежъ коня князского панского и шляхецкого

Артыкуль 5. Яко челядь неволная втекла маеть быти заповѣдана и выдана

Артыкуль 6. О грабежъ человѣка князского панского и землянского

Артыкуль 7. Цѣна рабочимъ конемъ

Артыкуль 8. Цѣна быдлу малому и великому

Артыкуль 9. Цѣна птахомъ домовымъ

Артыкуль 10. Цѣна птицамъ на мысливство хованымъ

Артыкуль 11. Цѣна збожью

Артыкуль 12. Цѣна собакомъ

Артыкуль 13. Если бы кого песъ непривязаный укусилъ

Артыкуль 14. Которое бы быдля або песъ въ сусѣдствѣ шкоду учинилъ

РЕЕСТРЪ РОЗДѢЛУ 14-ГО О злодѣйствѣ вского стану.

Артыкуль 1. Хтобы въ кого лице зосталъ

Артыкуль 2. О зводѣ на злодѣя

Артыкуль 3. Для покою посполитого застановенъе отъ злодѣйства

Артыкуль 4. О важности лица, за што злодѣй маеть быти каранъ

Артыкуль 5. Якъ маеть лицо зостати

Артыкуль 6. О гоненъе слѣдомъ всякое шкоды покраденое и отбитъе лица

Артыкуль 7. Хто бы шляхтича першый разъ о злодѣйство безъ лица обвинилъ

Артыкуль 8. О шляхтичу лѣтъ зуполныхъ немаючому

Артыкуль 9. О поволянью

Артыкуль 10. Хтобы злодѣя приличного въ себе въ дому ховалъ або вѣдомость о немъ мѣлъ

Артыкуль 11. О покраденъе свирна або клети князское и шляхецское и тежъ мужыцкое

Артыкуль 12. О лицѣ которое найдетъ въ дому человѣка неподойзреного

Артыкуль 13. О злодѣю которого поймають на злодѣйствѣ

Артыкуль 14. О знаки злодейскіе на неподойзреного

Артыкуль 15. Три кротъ злодѣя приличного одного дня можетъ мучити

Артыкуль 16. О злодѣхъ и розбойникохъ, которые бы владника своего поволали

Артыкуль 17. О человѣка неподозренного

Артыкуль 18. Поволаномъ шляхтичу

Артыкуль 19. О забитью злодѣ при лица

Артыкуль 20. Кто што вкралъ на дворѣ нашомъ

Артыкуль 21. О жонахъ и дѣтехъ которые ужывали речей краденыхъ

Артыкуль 22. О лица важномъ што будетъ дано до двора нашего князского панского
земянского

Артыкуль 23. О слугахъ безъ приказу и тыхъ што безъ службы

Артыкуль 24. О блудягы

Артыкуль 25. О покраденю збожья вского, иле на поли зложоного въ стырткахъ

Артыкуль 26. О покрадене ставу и сажовки

Артыкуль 27. О небезпечность отъ огня

Артыкуль 28. Хтобы кого обвинилъ, а передъ врьдъ привелъ, маеть тогожъ часу описатися,
на которій рокъ маеть доводити

Артыкуль 29. О человѣка отчызнаго и человѣка хто его выкралъ

Артыкуль 30. Кто кого обвинить въ томъ выстунѣ которихъ кривавою виной або горломъ
карають

ФОРМУЛЯРИ

Даровизна речей рухомыхъ отъ мужа жонѣ правомъ доживотнымъ

Способъ запису и замѣны добръ

Мужъ жонѣ, жона мужови може сполне доживотье учинить тымъ способомъ

Запись отъ мужа жонѣ на суму

Отъ тогожъ той же на доживотье

Запись на вѣчистую продажу

Даровизна вѣчистая сумъ записаныхъ и речей рухомыхъ отъ мати дѣтемъ

ПОПРАВЫ СТАТУОВЫЯ

Артыкулы поправъ статуту Литовскаго на соймѣ валномъ въ Варшавѣ 1578

О поправахъ артикула 27 въ роздѣлѣ 4

Поправка артикула 23 въ роздѣлѣ 4

Артыкулъ поправы Статуту Литовскаго на сойму Варшавскомъ, о земскихъ рокахъ

А что ижъ описано въ артикулѣ первомъ

Поправка артыкулу 9 въ роздѣлѣ 12 о подданныхъ отчизныхъ и невольникахъ и слугахъ приказныхъ, которые отъ пановъ своихъ втекають

Шкрутеніумъ

КОНСТИТУЦІИ СЕЙМУ ВАРШАВСКАГО РОКУ 1578

Артыкулъ 1. порядокъ до обирания судей

Артыкулъ 2. О выбираню судей

Артыкулъ 3. Присяга судей

Артыкулъ 4. Яко судити мають

Артыкулъ 5. Што судити мають и якъ

Артыкуліе поправы статутовые на соймѣ Берестейскомъ року 66

Артыкулъ 9. въ роздѣлѣ 3 около неданя чужеземцомъ достоинствъ

Артикулы справъ судовыхъ зъ статуту Польского презъ пановъ Коронныхъ ухвалены и постановлены

ПОЧИНАЮТСЯ ПРИВИЛЕЯ ДО СТАТУ ВЫДАНИЕ И СПРАВОВАНИЕ,
ГДѢ И ВЪ КОТОРОМЪ МѢСТѢ ПРЕЗЪ ДОЗВОЛЕНЬЕ КОРОЛЯ ЕГО
МИЛОСТИ И ПАНОВЪ РАДѢ ИХЪ МИЛОСТИ ЗДѢШНЕГО ПАНСТВА
ВЕЛИКАГО КНЯЗСТВА ЛИТОВСКОГО,

Привилей Виленский року 63.

Во имя Божье стан се ку вѣчной памяти тое то речы, кгдажь вси sprawy съ часомъ съ паметей людскихъ сплывають и въ забытіе приходятъ, для того то есть вынайдено, абы писмомъ обьяснены были ку вѣдомости потомъ будущимъ.

А про то мы Жыкгимонтъ Августъ, Божью милостью Король Польскій Великій Князь Литовскій, Рускій, Прускій, Жомоитскій, Мазовецкій, Инфлянтскій и иныхъ панствъ дѣдичъ, чынимъ знаменито симъ листомъ нашимъ нинѣшнимъ и на потомъ будущимъ, кому будетъ потреба того вѣдати. Ижь кгда есмы вызвали черезъ листы наши на сеймъ валный, въ столечномъ мѣстѣ нашомъ у Вилни зложоный, пановъ радѣ нашихъ духовныхъ и свѣцкихъ, княжатъ и панятъ, врядниковъ помененыхъ, дозволили есмы и дозволяемъ привилей правъ и волностей земскихъ въ статутъ новописанный вложить и вписати, по томужъ обычаю якъ въ Корунѣ Польской привилей и вольности шляхецкіе въ статутъ уписаны суть; за што вси станы, чынечы дяки съ чоломбитьемъ намъ Господарю пану своему прырожоному, донесли намъ въ томъ прозбу свою, ижь въ тыхъ же привилейхъ земскихъ нѣкоторые артыкулы потребуютъ шыршого обьясненья ку латвѣйшому вырозуиѣнью. А въ томъ на первой, яко се стало обдарованье и наданье отъ прадѣда нашего, святое памяти славное Яггела Короля Польского наивышшого Великаго Князства Литовского, въ которыхъ то есть описано: за злученьемъ панствъ подъ онимъ часомъ Коруны Польское зъ Великимъ Князствомъ Литовскимъ, за выданьемъ того жъ привилей тамъ же въ Корунѣ Польской въ Городлѣ, ижь панове шляхта бояре земль нашихъ Литовскихъ дарованьемъ привилейми и наданьемъ имъ данымъ узычнымъ и подаными только повшехное, то есть соборное вѣры Християнское къ Рымскому костелу поданыи, мають се тыхъ вольностей веселити и учасниками быти и ужывати, яко панове шляхта Коруны Польское свое вольности держать и ихъ ужывають. А другій артыкулъ ижь на достоинства и преложенства не мають быти обираны, едно если были бы повшехное вѣры Християнское и подданые Рымскому костелу, а ни тежь уряды которые земскіе, одно людемъ вѣры Християнское и до радѣ нашихъ не мають быти припущоны, а ни въ нихъ бывать, яко жъ послѣ того тотъ привилей на вольности наданный утверженье дѣда нашего Казимера и стрія Александра и отца нашего Жыкгимонта першого, славное памяти Королей Польскихъ и Великихъ Кня-Литовскихъ, и потомъ и наше потверженье тыми жъ словы уписанъ, О чомъ вси одностайнѣ били намъ чоломъ, абыхмо то въ потверженье слушное приведешы нашимъ листомъ и привилейемъ достаточнѣ обьяснили. Мы съ паны радами нашими обачившы, ижь передъ тымъ, нижь тотъ привилей въ Городлѣ выданъ, станы а народы шляхецкіе знакомитыми Речы Посполитое и продкомъ нашимъ заслугуючыся значнѣ вывышонны и учтены были, яко то и въ иномъ томъ привилей на пачатку его меновите описаны, таковые станы на тотъ соймъ до Городна пріѣхали. А къ тому ижь тежь бываючы, и не толко Рымского костела послушныи, але и Греческого въ лавицы рады продковъ нашихъ и наше также и иншіе вси станы, на розныхъ службахъ нашихъ бываючы, вѣрность и сталость свою ку службамъ продковъ нашихъ и нашимъ охотнѣ, яко добрымъ и вѣрнымъ подданнымъ належить, завжды и зо всякою сталостью показовали. А такъ ужываючы вси тые зацные слуги, и бачечи же въ томъ привилейю

нѣкоторому уваженью, хто гербовъ не бралъ, также и тыхъ хто вѣру Греческую держечи, противко продкомъ нашимъ и намъ Господарю вѣрность свою сталѣ показываютъ, одно ижъ на томъ сеймъ не вси были, а звлаща станы Рускихъ земель, про то не уймуючы и ни въ чомъ не нарушаючы оныхъ першихъ привилъевъ, отъ продковъ нашихъ и отъ насъ Господаря наданыхъ, але во всемъ при моцы зоставуючы и заховаючы; только тые два члонки и артыкулы вышеописанные объясняючы и ровняючы съ порадою и призволенъемъ пановъ радъ нашихъ духовныхъ и свѣцкихъ уфаляемъ и хотимъ мѣти. Ижъ отъ того часу, не только тые панове шляхта и бояре або потомкове ихъ всихъ земель нашихъ того панства всего нашего дарованья привилъевъ и наданье всѣхъ вольностей и справъ земскихъ уживати и съ нимъ се веселити мають, которые суть подданы Римскому костелу и которихъ тежъ продкове клейности и гербы въ Коронѣ Польской пріймовали; але тежъ и вси иные стану рыцарского шляхецкого, якъ Литовского такъ и Русского народу одно бы были вѣри Хрестіянское, и тежъ которые продкове клеинотовъ або ли гербовъ съ Коруны Польской не брали, однако и заровно того всего вѣчными часы уживати и тыхъ вольностей веселитись, яко перед тымъ здавна и до того часу тыхъ всихъ вольностей стану рыцарского и шляхецкого обоего народу якъ Литовского такъ и Руского уживали и съ того се веселили. Такъ тежъ и на достоинства и преложенства всякіе и до рады наше и на уряды земскіе и дворные, не только подданы костелу Римскому отъ того часу обираны и прекладны быти мають, але однако и заровно вси рицарского стану зъ народу шляхецкого люди вѣри Хрестіянское, якъ Литва такъ и Русь, каждый водлѣ заслугъ и годности свое отъ насъ Господаря на мѣстца зацные преложенства зъ ласки наше браны быти мають. А жадень зъ стану рицарского и шляхецкаго зъ стороны закону своего, будучы вѣри Хрестіянское человѣкъ, не маеть быти отъ того отдалень и отлучонъ для которыхъ двохъ артыкуловъ и члонковъ въ тыхъ первыхъ привилъяхъ описаныхъ. Вѣджо и тое наданье вольностей и правъ земскихъ, у привилъи Короля Яггела Князя Витолта сполномъ описаный, поставлено и справлено есть въ Корунѣ Польской такъ, якъ тотъ помененый привилей свѣтчитъ, про то на першомъ близко пришломъ валномъ соймѣ, которій отъ насъ зложонъ есть, обоимъ тымъ панствамъ Коруны Польской и Великому Князству Литовскому тое поровнанье, будетъ ли потреба еще съ большимъ примноженьемъ волности, иншимъ листомъ нашимъ взновити, за сполнымъ зволенъемъ обоего панства нашего Коруны Польской и Великому Князству Литовского пановъ радъ своихъ станомъ, хотимъ обѣцуюемъ не мѣшкаючы а ни уймуючы вжо ни въ чомъ сему листу нашему, и о вшемъ при моцы не порушно зоставуючы его на вѣчные часы. Якожь на утверженье тое речы печать нашу маестатную казали есьмо привѣсити къ сему нашему листу подписавши его рукою нашою господарскою. При томъ были панове рада наша ихъ милость: Князь Валеріанъ, бискупъ Виленскій; Князь Янушъ Андрошевичъ, бискупъ Луцкій и Берестейскій; Князь Миколай, бискупъ Кіевскій; панъ Миколай Радивиль на Ольсцѣ и Несвижу Княжа, воевода Виленскій, маршалокъ земскій, канцлеръ нашъ наивышшій Великому Князству Литовского, справца староства Жомойтского, державца Кормяловскій; панъ Григорей Ходкевичъ, воевода Кіевскій, маршалокъ земли Волынского, староста Володимирскій; Князь Костеитинъ Костентиновичъ Острозскій, воевода Новгородскій; панъ Павелъ Ивановичъ Сапега, воевода Витебскій; Князь Стефанъ Андреевичъ Збаразскій, воевода Подляшскій, староста Менскій, державца Лысаковскій Межирецкій и Винскій; панъ Василей Шишкевичъ, маршалокъ дворный, подскарбій земскій Великому Князству Литовского и писаръ нашъ, староста Могилевскій; панъ Остафей Воловичъ, подчашій нашъ Великому Князству Литовского, староста Дорогицкій; панъ Миколай Кишка съ Техановца, крайчій нашъ Великому Князству Литовского, староста Бѣльскій; панъ Щасный Александровичъ Ходкевичъ, столникъ нашъ Великому Князству Литовского, староста Плотельскій, державца Тельшовскій; панъ Янъ Ходкевичъ, староста Житомирскій; Князь Романъ Ѳедоровичъ Санкгушковичъ, конюшій нашъ дворный Великому Князству Литовского, староста Мелницкій, державца Кгереноивскій;

пань Ярошь Коряцкій, подскарбій нашъ дворный Великого Князства Литовского, державца Пунскій и Жижморскій, пань Станиславъ Захарьяшевичъ Влошинъ, мечникъ нашъ Великого Князства Литовского; пань Щасный Скрутьевичъ, хоружій зеискій, державца Радунскій; пань Щасный Герцыкъ, маршалокъ и писарь нашъ, староста Тикотинскій; пань Янь Шимковичъ, писарь нашъ конюшій Городенскій, державца Ошменскій Вилкейскій и Красносельскій, пань Янь Миколаевичъ Гайко, писарь нашъ, державца Марковскій и Мядельскій; пань Миколай Нарушевичъ, и иные панове маршалки, старостове, державцы и врядники наши земскіе и дворные. Писанъ у Вильни лѣта Божьего нароженья тисеча пять сотъ шестьдесятъ третего, мѣсяца Іюня осмага дня. Подпись руки господарское, подпись руки пана канцлера.

Привилей Бѣльскій, принятъе Унѣи, рокъ 64.

Жикгимонтъ Августъ Божію милостию Король Польскій, Великій Князь Литовскій, Рускій, Прускій, Жимоитскій, Мазовецкій, Ифлянтскій и иныхъ.

Чинимъ знаменито симъ нашимъ привилеємъ всѣмъ посполите нинѣшнимъ и на потомъ будучимъ, кому того потреба будетъ вѣдати, або чтучи его слышети; паметаючи то ижъ речи и sprawy людскія, бы тежъ и наименьшіе на свѣтѣ оказовалисе, съ часомъ споломъ зъ людьми съ паметей людскихъ сплывають и въ забытіе бы приходити мусели, гдѣ бы писмомъ на пришлый часъ всѣмъ по насъ будучимъ ознаймены и утвержены не были; а естли меньшіе речи въ звычай отъ початку вѣковъ для помененыхъ причинъ писмомъ опатровати звыкли, тогда большъ таковую, которая зъ обудву сторонъ подлѣ воли и приказанья Божьего, што Господарю и пану Христіянскому противко вѣрныхъ подданныхъ ку пану, подлежить полнится. А про то мы досвѣдчивши не одного черезъ весь часъ панованья нашего, але зъ давныхъ часовъ вѣковъ щастливого панованья продковъ нашихъ Королей Польскимъ и Великихъ Князей Литовскихъ, велебныхъ въ Бозѣ велможныхъ шляхетнѣ врожонныхъ князей пановъ шляхты боярь и всего рицерства обывателей Великаго Князства Литовскаго и всѣхъ земель того панства, не только зъ особъ теперешнихъ, але и зъ вѣчныхъ продковъ цѣлое вѣры статечное цноты правдивыхъ значныхъ и пожиточныхъ заслугъ ку намъ паномъ ихъ, отъ ихъ же самыхъ волиѣ яко отъ людей волныхъ выбранныхъ, и ку Речи Посполитой того панства не въ частехъ особливыхъ але во всемъ чиненыхъ и выполненыхъ, не виличаючи траченья маетности, а што болшого выливанья крове, выношенья горль и животовъ противко дому непріятелеви мужнѣ а сталѣ, яко належало на правыхъ рыцеровъ шлякецкого народу и крове въ потребахъ Речи Посполитое того панства и въ службахъ насъ Господарей ихъ, немней тежъ не опускаючи але ни въ чомъ стороны наше и продковъ нашихъ Великихъ Князей Литовскихъ, а звлаща зъ особы наше досыть звыклости добротливости пристойное, а присяжонный зъ милостью повинности наше ку тому панству нашему и обывателей вышей менованымъ, межи которою повиностью тая ижъ меньшая естъ справедливость чинити постерегати и розмножати ее звирхностью а належностью вряду нашего господарскаго. Про то отецъ нашъ, славное памети Жикгимонтъ Король Польскій Великій Князь Литовскій, часу щастливаго панованья своего и при подношенью парсуны нашего маестату на тое панство, за валнымъ обраньемъ тыхъ же всѣхъ пановъ и обывателей

Великого Князства Литовскаго, зъ уфалы постановенья и прозбы ихъ же всѣхъ выдати и утвердiti рачиль ку справованью и захованью, то есть справедливости светое, статуть правъ и поступковъ Хрестіянскихъ, которая справедливость ачь и предъ тымъ въ томъ панствѣ нашомъ Великомъ Князствѣ Литовскомъ звычайемъ стародавнымъ была, вѣдже писмомъ не объяснена была а ни утвержена. Который статуть тотъ же светое годное и фалебное памети отецъ нашъ и мы по вдорослыхъ лѣтѣхъ нашихъ не толко привильями споможенъемъ иныхъ вольностей хрестіянскихъ, здавна тому панству наданыхъ, але присегами нашими утвердили; и тымъ жо статутомъ парадокъ правный шоль и теперь идетъ въ томъ панствѣ межи всѣми, ажъ до сихъ мѣстъ, то пакъ же въ справахъ бѣгу правного мало не шкоденъ на розныхъ мѣстцахъ и урядѣхъ поправляють речи и артыкулы новые а розные, которые въ томъ статутѣ не были, и не суть описаны, одно противные статуту а ку понетью и уфалѣ годные, другихъ тежъ якъ часъ и потреба принесетъ надобѣсть есть поправити и еще новыхъ прибавити згожаючи и примножаючи ихъ правъ выббранныхъ и уфалы годныхъ Хрестіянскихъ, а зъ добрыхъ лепшихъ обираючи допустивши. А вдячнѣ съ пофалою и съ позволенъемъ нашимъ принявши прозбу и жадливость тыхъ же премененыхъ становъ Великого Князства Литовскаго, посвѣдчаючи и видечи прозбу ихъ слушную, допустили есмы имъ того статуту першого, тыхъ то прыпадковъ а потребъ наверху назначоныхъ, поправити прибавити разширати уняти, а доложити подлѣ наилѣпшаго напотребнѣйшаго skutku и доконалости. Якожъ за волею и допущенъемъ нашимъ а позволенъемъ радъ нашихъ обраны на то были черезъ нихъ же самихъ и съ посродку тыхъ же становъ особы певиые, рады наши маршалкове земскіе, хоружіе и иные особы роду и народу шляхецкого, справъ чужоземскихъ, которіе засѣдши не одно поправили тотъ статуть старый, але тежъ повымъ кшталтомъ нѣкоторые роздѣлы звлаща судовые за засаженъемъ новымъ обычаемъ суду и порядку судового то становили и написали. А ижъ ку ровной а однакой справедливости всѣмъ была того потреба, абы стародавний обычай владности суду воеводъ старость и иныхъ владовъ старыхъ уступилъ судомъ новымъ порядкомъ въ семь часѣ учиненыхъ постановеныхъ и въ статутѣ описаныхъ; а къ тому за се противно было и забѣгло звѣчные звыклы и упривильеванные врьды достоенства и належности судовъ пановъ воеводъ маршалковъ земскаго и двориаго, и земли Волинское и ихъ старость и державецъ врьдовъ. Про то сами тые панове воеводове, а меновите на тыхъ достоенствахъ теперь и на весь часъ будучи: воевода Виленскій маршалокъ земскій, канцлеръ нашъ Великаго Князства Литовскаго, староста Берестейскій, панъ Миколай Радивиль; воевода Троцкій, гетманъ нашъ наивышній Великаго Князства Литовскаго, староста Мозырскій, державца Лидскій, Бѣлицкій, панъ Миколай Юрьевичъ Радивиль; староста въ земли Жомоитской панъ Янъ Еронимовичъ Ходкевичъ; воевода Кіевскій маршалокъ земли Волинское, староста Володимерскій, князь Костентинъ Костентиновичъ Острозскій; воевода Новгородскій, панъ Павелъ Ивановичъ Сапега; староста Луцкій и Вѣницкій, князь Богушъ Ѳедоровичъ Корецкій; воевода Витебскій, Князь Стефанъ Андреевичъ Збаразскій; воевода Подляшскій, староста Менскій, панъ Василей Шишкевичъ; маршалокъ дворный, подскарбій земскій Великаго Князства Литовскаго, писаръ нашъ, староста Могилевскій, панъ Остафей Воловичъ, и иные владники земскіе и старостове и всѣ державцы, и которихъ колвекъ владности судовые въ томъ панствѣ нашомъ Великомъ Князствѣ Литовскомъ переказали и впередъ переказати бы могли тому статуту и порядку и засаженью судовному постановену и списаному, пришедши и постановивши передъ нами обличнѣ по доброй воли своей, маючи напродь Пана Бога и справедливость светую передъ очима своими, важили большъ тую а нижли которое въ томъ по воли звирхности владности и пожитки свои, надъ все наслѣдуючи приказанье Божое, которое учитъ миловати ближнего своего яко себе, а съ тогожъ показуется абы одинъ другого ничего не пожадалъ, а если чого иного тогды надо все справедливости инакшей мѣти не хотѣль, милуючи Речь Посполитую а въ ней братью зо всиии владностями свою молодшую народъ шляхецкій а рицерскій, а суды свое зо

всими владностями и пожитки, которые по звирхности судовъ нашихъ господарскихъ немней на нихъ належали, обычаю первого мененого и водлугъ статуту старого выступиль, и зо всеми пожитки таковыхъ ихъ милость панове врадниковъ слугъ и дѣцкихъ пересудовъ и винъ а отозвовъ, а въ теперешнемъ новомъ статутѣ апеляцыи, то есть отбыванья, и тежъ звычайю права корунного судовъ и справъ всѣхъ воеводскихъ отступили и выреклись. Наконецъ не только ихъ милость панове воеводове и иные врадники владности и всякихъ пожитковъ своихъ судовыхъ и за владностью и поступкомъ судовыхъ належачихъ отступили; але тежъ посполъ князи, панове, маршалки, панята, и якимъ кольвекъ обычаемъ названные врадники нашими, и вся шляхта никого не выймуючы, почавшы отъ старшаго по насъ Господаря ажъ до наименшаго такъ духовный яко и свѣцкй Великаго Князства Литовскаго, на томъ сеймѣ великомъ вальномъ Бѣльскомъ въ одно ровное право въ однакй а не инакшй судъ моцъ и поступки судовые и послушенства, а порадокъ вравдовъ на суды выбранныхъ и высажоныхъ, сами и потомками своими поддали и поддаютъ; а себе при нихъ тому досыть чинечи вѣчншы часы обѣцали, яко въ томъ статутѣ зъ уфалы всѣхъ, а черезъ особы отъ тыхъ обраные и высажоные, описано постановено и розмножено и над то сполнѣ и одностайнѣ вси жадали и били намъ чоломъ, абыхмо мы Господаръ на то позволивши, а гдѣ бы тежъ въ чомъ переказало што стороны звирхности наше господарское, яко великаго стародавнихъ судовъ нашихъ тому статутуви порадку и артыкуловъ въ немъ описанымъ, зложивши и поступивши то и не допускаючи тымъ тому, и такъ светобливой справѣ переказати утвердити имъ въ посполитости оный статутъ нашъ листомъ. А такъ кгдажъ початокъ тое побожное справы въ становенью того статуту былъ зъ воли Великаго Князства и за доконаньемъ его, на него зволивши и подъ него въ шафованье справедливости своее поддавшисе, намъ о то съ чоломбитьемъ своимъ просили. Мы знаючи тотъ народъ того панства быти годными всякихъ вольностей налепшихъ и справедливости, которая за справою и порадкомъ правнымъ слушнымъ задерживаетъ и еще примножаетъ, не одно вольностей и пожитки плодечи, але тежъ способляючи розшираючи панства, а надо все полничы волю и учинность нашу, къ тому прихилиючи и утверженье всимъ обывателемъ здѣшнимъ, шлюбуемъ и обѣцуемъ и прирекаемъ, подъ тоюжъ присегою Великаго Князства, тотъ статутъ новый не только симъ привильемъ, а тежъ словомъ нашимъ господарскимъ за насъ и всѣ потомки наши, Короли и Великй Князи Литовскй тому панству Великому Князству Литовскому и всимъ чинили держати ховати, водлѣ того ихъ радити судити и справовати и отъ кождого насилья моцы квалтъ и наменшее образы въ томъ статутѣ боронити и не допускати ни въ чомъ никому. Такъ тежъ паномъ воеводамъ и всимъ врадникомъ, гдѣ хотѣли чого они держати засе старые владзы судовъ отозвовъ и пожитковъ своихъ, вдавати и ихъ попирати и выламоватися мѣли зъ ровности судовъ, въ которую се теперь передъ нами вызнаньемъ своимъ поддали, иы сами и потомки Короли и Великй Князи Литовскй не допустимъ и не дозволимъ, але боронити и стеречи будемъ, абы во всемъ и во всѣхъ артыкулѣхъ цѣль тотъ статутъ былъ захованъ. Вѣджо если бы въ чомъ потреба была того статуту и артыкуловъ которихъ въ немъ поправити; тогды на сеймѣ тыхъ, которые на сесь часъ при становенью унѣи Великаго Князства Литовскаго съ Коруною Польскою захованъ есть, впередъ при моцы Великому Князству Литовскому за волею нашою господарскою можно и волно будетъ, сполнымъ а одностайнымъ намышленьемъ радою и позволеньемъ всѣхъ становъ родичовъ и обывателей оного панства Великаго Князства, тотъ статутъ и артыкулы въ немъ поправляти прибавити розширати, будь тежъ чего и доложити албо уняти, штобы одно зъ лѣпшимъ ку досконалшому захованью и порадку справедливости светое вынайти и постановити могло; а мы то все впередъ въ томъ статутѣ таковымъ обычаемъ, яко верху доложено, зъ полного зволенья всихъ обывателей поправено и уфалено будетъ, утвержаемъ симъ жо нашимъ привильемъ, и хочемъ и обѣцуемъ то во всемъ мощно держати и ховати подъ обовязками нашими вышей менеными. А къ тому тежъ дозволили есьмо и допускаемъ теперь заразомъ тотъ новый порадокъ и росправовъ

засаженю судовъ и обираню на то врадниковъ и розложеня мѣстцъ на судъ и на положенъе и хованъе книгъ судовыхъ учинити и постановити; а которимъ способомъ они вси станове панове рады ихъ милость княжата панята врадники земскіе и дворные и все рицество шляхта обыватели того панства и Великаго Князства, сполнѣ на то позволившия и згодивши, тотъ порадокъ и кшталтъ засаженъе судовъ обранъе и становенъе на то врадниковъ розложеня повѣтовъ и мѣстцъ и роковъ на судьи и на хованъе книгъ судовыхъ учинити и постановити, то вжо въ той мѣрѣ таковымъ обычаемъ впередъ трывати но и справовано быти маеть. А маеть ся тотъ статутъ и вси справы поступки порадки и вступъ а початокъ его зачати отъ дня свята светаго Мартина въ року теперешнемъ тисеча пять сотъ шестьдесятъ четвертомъ, и владностью мощью а описаньемъ артыкуловъ, яко се вышей въ семь привилыи нашомъ поменило, ити и дѣятись и полнити вѣчными часы непорушно. Одножь што се дотычетъ речей изъ розницы и долеглостей прошлыхъ, кому бы того о што кольвекъ лѣло было, и хто бы право которое свое водл угъ першаго обычая и бѣгу права посполитого статуту уфаль соймовыхъ обварованъе мѣлъ; тогды о то все ачь колвекъ одинъ другого вже отъ часу замереного до суду кшталтомъ теперъ новымъ постановенымъ и передъ судьи и иншіе влады судовые тымъ новымъ порядкомъ засажоный росправлений и постановлений притегати маеть; вѣдже таковые давные и прышлые речи розницы и долеглости всяко стану мають быти сужоны и росправованы черезъ тыхъ же судей новыхъ повѣтовыхъ водлугъ старого статуту и обычая права, а тотъ новый статутъ и артыкулы его не будутъ мочи мощью и владностью своею у жадного суда прошлыхъ речей и справъ, а справедливости людское водлугъ першаго статуту и бѣгу права посполитого слушиѣ обварованыхъ и опатреныхъ, касовати и казати. Вѣдже што се дотычетъ правъ и судовъ духовныхъ костеловъ Божіихъ, которіе водлѣ стародавнего обычая и поданья привилевъ продковъ нашихъ и нашихъ господарскихъ княземъ бискупомъ архіепископомъ владыкомъ ихъ милости судьямъ въ томъ панствѣ Великомъ Князствѣ прислушаетъ; то при mocy zostавуемъ и заховаемъ тежь вѣчными часы. Къ тому тежь права и обычай въ судѣхъ земель Великаго Князства Литовскаго стародавнихъ Подляшскихъ, Дорогицкихъ Бѣлско-Мелницкое заховываемъ во всемъ, подлугъ наданья привилевъ, ихъ ни в чомъ не нарушаючи; над то права Майдеборскіе яко въ мѣстѣ нашимъ столечномъ Ви ленскомъ, такъ и во всихъ иныхъ мѣстехъ того панства нашего Великаго Князства Литовскаго въ цѣлости заховываемъ. А на утверженъе и мощность сего нашего привилыя, подписавши его власною рукою нашою, печать нашу къ нему привѣсити есьмо казали. При томъ были и того добрѣ свѣдоми: Князь Вадеріанъ, бискупъ Виленскій; Князь Юрей Юрьевичъ Слуцкій; Князь Янушъ Андроновичъ, бискупъ Луцкій и Берестейскій; Князь Станиславъ Кгабрыяловичъ, бискупъ Жомойтскій; панъ Миколай Радивиль, воевода Виленскій, маршалокъ земскій, канцлеръ Великаго Князства Литовскаго, староста Берестейскій, панъ Виленскій, гетманъ нашъ дворный Великаго Князства Литовскаго, староста Городенскій; панъ Григорей Александровичъ Ходкевичъ, воевода Троцкій, гетманъ нашъ наивышій Великаго Князства Литовскаго, староста Мозырскій, державца Лидскій Бѣлицкій Сомилашскій, панъ Миколай Юрьевичъ Радивиль, староста Жомотскій, державца Плотельскій; панъ Янъ Еронимовичъ Ходкевичъ, воевода Кіевскій, маршалокъ Волынское земли, староста Володимерскій, Князь Костентинъ Костентиновичъ Острозскій, воевода Новгородскій; панъ Павелъ Ивановичъ Сапега, воевода Витебскій; Князь Стефанъ Андреевичъ Збаразскій, воевода Подляшскій, староста Менскій, державца Литовскій и Межирецкій; панъ Василей Тишкевичъ, маршалокъ дворный, подскарбій земскій Великаго Князства Литовскаго, писаръ нашъ, староста Шавленскій; панъ Остафей Волович; Князь Александръ Ѳедоровичъ Чорторыйскій; Князь Миколой Андреевичъ Збаразскій, староста Кременецкій; Князь Андрей Ивановичъ Вишневецкій; Князь Иванъ Любецкій Бабына; Князь Андрей Петровичъ Масальскій, подчашій нашъ Великаго Князства Литовскаго; панъ Янъ Шимковичъ, писаръ нашъ староста Бѣльскій; панъ Юрей Александровичъ

Ходкевичъ, маршакъ нашъ Великаго Князства Литовскаго; панъ Янъ Шимковичъ, писарь нашъ староста Тыкотинскій; панъ Петръ Богдановичъ Загоровскій; панъ Юрей Васильевичъ Тишкевича, державца Волковыйскій; панъ Григорей Гринковичъ Воловичъ, староста Слонимскій; панъ Александро Ѳедоровичъ Владычка, державца Бирштянскій; панъ Григорей Есифовичъ Трызна; панъ Михайло Тишкевичъ Козинскій, городничій Володимерскій; панъ Янъ Гайко, писарь нашъ, державца Ошменскій Винскій Красносельскій, а писарь и секретарь нашъ, державца Марковскій и Мядельскій и Куренецкій; панъ Миколай Павловичъ Нарушевичъ, мечникъ нашъ Великаго Князства Литовскаго; панъ Матей Петчевичъ, державца Скерстомонскій и Росенскій; и иные панове врадники, державцы, тивунове земли Жомоитское, хоружіе послове зо всихъ земель и повѣтовъ того панства Великаго Князства и иножества шляхты рыцерства нашего и обывателей здѣшнихъ, яко на соймѣ великій вальный отъ насъ листы нашими позванными и обраныхъ, а иныхъ пановъ радъ нашихъ князей пановъ паняты, врадниковъ старость и иного рицерства, ачъ на тотъ часъ для собранья у войско противъ непріятелиа нашего Великаго Князя Московскаго пры насъ ихъ не было, вѣдже на то все што вышей въ томъ привилью нашомъ описано, черезъ пословъ своихъ позволили. И на то есьмо дали всѣмъ станомъ обывателемъ Великаго Князства Литовскаго сесь нашъ привилей. Писанъ у Бѣльску лѣта Божьего нароженья тисеча пять сотъ шестьдесятъ четвертого мѣсяца Іюля перваго дня.

Привилей Виленскій, рокъ 65.

Чинимъ явно симъ листомъ нашимъ нинѣшнимъ и на потомъ будучимъ, кому будетъ потреба того вѣдати, альбо чтучи его слышети. Ижъ будечи намъ Господарю на великомъ соймѣ валномъ въ мѣстѣ нашемъ столечномъ Виленскомъ съ паны рады нашими духовными и свѣцкими князи паны, врадниками земскими и дворными, и зо всимъ рыцерствомъ земель всего панства Великаго Князства Литовскаго, гдѣ прикладаючи потребности Речи Посполитое того панства нашего донесли просьбы свое межи иными речми покорнымъ чоломбитьемъ ку намъ Господарю вси станы сполнѣ и одностайнѣ; ижъ быхмо для способу лѣпшого и отправки поспѣшнѣйшое въ справедливости людской статуть новый, отъ насъ Господаря на сеймѣ валномъ у Бѣльску року прошлого выданный и привильемъ нашимъ утвержоный, въ скупечное уживанье привели. А съ тымъ статутомъ судовымъ отправити казали, а приводечи ку болшому порадку Речи Посполитое, што быхмо на выбранье пословъ соймоу вальнымъ и инымъ потребамъ земскимъ належачихъ дозволили и допустили въ повѣтѣхъ, то есть гдѣ кольвекъ вяды судовые засажоны, и гдѣ потомъ черезъ насъ Господара засаженье вядовъ судовыхъ зъ ихъ прозбы и зволенья доидеть, соймѣ малы ку бранью всѣхъ обывателей въ каждомъ повѣтѣ мевати; и на тые соймы повѣтовые всимъ паномъ радамъ нашимъ княземъ паномъ вядникомъ земскимъ и дворнымъ и всимъ станомъ народу шляхецаго и стану рыцерскаго, гдѣ въ которомъ повѣтѣ оцѣлость маеть, на часы черезъ листы наши назначоны повѣтовыхъ справъ поступокъ и обычай заховыванъ есть въ панствѣ нашомъ Коруны Польское. Ино мы Господарь дознавши неоднo черезъ весь часъ панованья нашего, але ку памети и вспоминаяню годному приводечи, же зъ давныхъ вѣковъ, за щастливаго панованья славное памяти продковъ нашихъ Королей ихъ милости и Великихъ

Князей Литовскихъ, собрали яко предковъ велебныхъ, въ БозѢ вельможныхъ пановъ радъ ихъ милости духовныхъ и свѣцкихъ князей пановъ вранниковъ земскихъ и дворныхъ, и всего рыцарства родичовъ и обывателей земель всихъ Великого Князства Литовского, цнотливыхъ и вѣрныхъ а пожиточныхъ послугъ въ Речи Посполитой, такъ жо на тотъ часъ и всѣхъ будучихъ ку намъ Господарю пану своему прырожоному и ку каждымъ потребамъ земскихъ, которыми не только за страченьемъ маетности але въ немствованьемъ здоровья и горль своихъ мужнѢ сталѢ заставляючись, такъ радами мудрими, яко и каждою ростропностью а мощною учинностью противко каждому неприятелю нашему намъ Господарю и Речи Посполитой добрѢ заслугуючи, подобали и подобатися не переставаютъ; а для таковыхъ вѣрныхъ цнотливыхъ къ намъ милѢ вдячныхъ заслугъ умыслили есмы, не толко таковыхъ потребъ Речи Посполитое належачихъ не отмовляти, але еще завжды щодробливе, яко есмы звыкли причиняти и примножати хочемъ и обѣцуюемъ, а бы вжо тымъ статутомъ новымъ судили и справовалися вси станы однакимъ порядкомъ въ повѣтѣхъ и на мѣстцахъ головиѣйшихъ, повѣтомъ и судомъ повѣтовымъ розложоныхъ, зѣждчатися и збирати княземъ паномъ радамъ нашимъ вранникомъ земскимъ и дворнымъ и всему рыцарству, хто въ которомъ повѣтѢ оселость маеть, дозволяемъ за обосланьемъ и листы нашими господарскими, зѣхавшисе въ потребахъ Речи Посполитое, радити обмовляти и обмышляти, о чомъ имъ отъ насъ Господаря ознаймено будетъ, и съ того жъ такового зобранья намовъ сполныхъ пословъ обирати, и на сеймъ великій вальный звыклый въ томъ панствѢ нашомъ, кгда листы нашими господарскими мѣстце такому сойму ознаймено и зложено будетъ, выправляти и черезъ листы пословъ потребности Речи Посполитое и каждого зособна повѣту до насъ Господаря приносити, во всемъ справуючись потому, яко въ панствѢ нашомъ КорунѢ Польской обычай около таковыхъ зѣздовъ соймовъ повѣтовыхъ отправление пословъ и отношенья потребъ Речи Посполитое на сеймъ вальный передъ насъ Господаря заховывается. А то все такъ справы судовые у повѣтѢ, яко тежъ и соймы въ тыхъ же повѣтѣхъ, яко вышей описано маеть отъ насъ Господаря заховываться и потомковъ нашихъ великихъ Князей Литовскихъ вѣчнѢ и непорушаѢ держано быти, а съ того права и пороадку не маемъ никого вызволити и ничимъ отмѣняти. Якожъ на утверженье и мощность того привилья нашего, подписавши его власною рукою нашою господарскою, печать нашу къ нему привѣсити есмы казали. Дано и дѣялосе на валномъ соймѢ у Вильни пры бытности пановъ радъ нашихъ духовныхъ и свѣцкихъ, и тежъ князей пановъ вранниковъ земскихъ и дворныхъ, лѣта Божьего нароженья тисеча пять сотъ шестдѣять пятого, мѣсяца Декабря тридцатого дня.

Лѣта Божьего нароженья тисеча пять сотъ шестдѣять шестого, мѣсяца Юля, первого дня.

Артыкулы поправки статutowое, которые за волею вѣдомостью Короля его милости Великого Князства Литовского Жикгимонта Августа, съ потребности правъ земскихъ панства его Королевское милости Великого Князства Литовского, за зволениемъ пановъ радъ ихъ милости того панства духовныхъ и свѣцкихъ, также князей и пановъ вранниковъ его королевское милости, пановъ пословъ земскихъ и всѣхъ становъ сейму належачихъ, на соймѢ валномъ Берестейскомъ поправленые. Которые ихъ милость панове рада и вси станы на соймѢ въ Берестью поправивши, черезъ старосту Жомоитского, маршалка

земского Великого Князства Литовского, державцы Плотельского и Тельшовского, пана Яна Ходкевича ку его Королевское милости до Люблина прислати были рачили. Гдѣ Господарь его милостть тыхъ артыкуловъ огледавши и ихъ уфаливши, моцью сойму Берестейского до статуту правъ новыхъ вписати росказать рачиль, умоцняючи то, ажъ хотя бы въ статутѣ што были тымъ артыкуломъ ниже описанымъ было противного, тогда вжо тые артыкулы первой въ статутѣ о такихъ справахъ выписаные, ни которое моцы вжадного права мѣти и держаны быти не мають, але тыми артыкулами на соймѣ Берестейскомъ уставленными вси станы Великого Князства Литовского, и вси земли тому панству належачіе, радити и справоватися мають.

СТАТУТЪ ВЕЛИКОГО КНЯЗСТВА ЛИТОВСКАГО

Жикгимонтъ Августъ Божьею милостью Король Польскій, Великий Князь Литовскій, Рускій, Прускій, Жомоитскій, Мазовецкій, Ифлянтскій и иныхъ. Чинимъ явно всимъ вобецъ и каждому зособна нинѣшнимъ и на потомъ будучимъ, ижъ тотъ статутъ Великому Князству Литовскому, панству нашему и всимъ землямъ къ нему прислухающимъ, упривильеваный въ Бѣлску черезъ насъ Господара на соймѣ звыкломъ великомъ валномъ, который зъ стародавнихъ часовъ звыклый бывати въ томъ панствѣ нашомъ Великомъ Князствѣ Литовскомъ, зложеный и справленый и постановеный черезъ обранье певное парсуны зъ роду и народу шляхецкого становъ соймомъ належачимъ родичомъ и обывателемъ того Великого Князства, лечъ ижъ ку ужыванью не пришлоль ажъ и до сихъ часовъ не выданъ. Тогда то съ тыхъ причинъ сталосе, ижъ черезъ насъ и презъ пановъ радъ нашихъ также и всихъ тыхъ становъ Великого Князства Литовского сойму належачыхъ не былъ еще прогляданъ и ревидованъ про войну уставичную, которую есмо вели по вси тые часы зъ Московскимъ, а такъ на теперешнемъ валномъ соймѣ Виленскомъ важными справами затруднени. Вѣдже яко въ часъ мѣль знести, видечи бытъ потребную справедливость всимъ про то съ паны рады нашими и зо всеми станы сойму належачими на поправованье и прегляданье того статуту заседшы и скорикговавши вже на тотъ часъ на вси потомные часы ку ужыванью, водлугъ привильевъ господарскихъ Бѣльского и Виленского въ тотъ статутъ вышей вложеноыхъ и описаныхъ, прыложывшы къ нимъ третій привилей, въ тотъ же статутъ казавшы вписати на поровнанье и объявенье всихъ становъ, ижъ ровно ку достоенствамъ такъ Литовскій яко и Рускій народъ приходити маеть, выдали есмо и выдаемъ, пры бытности и зъ уфалою и позволеньемъ радъ нашихъ и всихъ становъ сойму належачыхъ, всимъ въ посполитость, водле которого вжо вси обыватели того панства нашего Великого Князства Литовского и вси земли ку нему належачіе будутъ се радити и судити, поправуючы и прибавляючы водлѣ часу потребы артыкуловъ въ томъ статутѣ на соймехъ валныхъ Великого Князства Литовского, такъ яко около того поправованья артыкуловъ шырей доложено и въ привильи Бѣльскомъ. А выданъ есть сесь статутъ на соймѣ Виленскомъ великомъ валномъ, року Божьего нароженья тисеча пять сотъ шестдесятъ шостого, мѣсяца Марта, первого дня.

РОЗДѢЛЬ ПЕРВЫЙ О ПЕРСОНѢ ГОСПОДАРСКОЙ

АРТКУЛЬ 1.

Вси обыватели Великого Князства Литовского оунымъ правомъ писанымъ и отъ насъ данымъ сужоны быти мають.

Напередъ мы Господарь обѣцуюмъ и шлюбуемъ подь тоужь прысегою, которую учинили есмы всимъ обывателемъ всихъ земель того панства нашего Великого Князства Литовского, ижъ всихъ княжатъ, пановъ радъ духовныхъ и свѣцкихъ, пановъ хоруговныхъ, шляхту, мѣста и всихъ подданныхъ нашихъ и всихъ становъ въ томъ панствѣ нашомъ Великомъ Князствѣ Литовскомъ, также и земель Русскихъ Кіевское, Жомоитское, Волынское, Подляшское и иныхъ земель прислухающихъ къ тому панству нашему, почоншы отъ вышнего стану ажъ и до нижнего, тыми одними правы писаными отъ насъ даными судити исправовати.

АРТКУЛЬ 2.

Мы Господарь обѣцуюмъ и шлюбуемъ никого не карати на заочное повѣданые, хотя бы се дотыкало и о ображенъе маестату нашего господарского; и хто тежъ што на кого вель, а не довелъ, тымъ самъ маеть каранъ быти.

Тежъ предъречонымъ прелатомъ княжатомъ, понятомъ, паномъ, радамъ духовнымъ и свѣцкимъ, паномъ хоруговнымъ шляхтамъ и мѣстамъ земли Великого Князства Литовского, Руское, Кіевское, Жомоитское, Волынское, Подляшское, Смоленское, Полоцкое, Витебское, Мстиславское и иныхъ земель Великого Князства Литовского, обѣцуюмъ словомъ нашимъ господарскимъ, ижъ надъ жадного человѣка выданые албо осоченъе явное таемное и подозрѣнъе тыхъ становъ вышешмененыхъ карати не хотимъ ани винити которою кольвекъ виною пенезною, кривавою, везеньемъ, або достоенствъ врядовъ або имѣнъя отнятьемъ; нижли ажъ бы первой у суду явнымъ рядомъ и поступомъ права, коли жалобникъ то есть поводъ и отпоръ обжалованный очивистѣ стануть, и достаточнѣ на конецъ будутъ поконаны, которые по судѣ и таковомъ поконанью винни, мають быти караны виною у артыкулахъ нижей описаныхъ меновите назначоною. А хто бы тежъ кого колвекъ, обмовляючи вчинилъ къ соромотѣ и зелживости, а шло бы о честь або о горло або о которое кольвекъ скаранъе; тогды тотъ, хто на кого мовить и ведеть, а не доведеть, тымъ каранъемъ самъ маеть быти каранъ.

АРТЫКУЛЬ 3.

О ображенъе маестату господарского.

О ображенъе маестату господарского такъ се разумѣеть, колибы хто змову албо спикненъе албо бунтъ учинилъ на здоровье наше господарское, хотя бы панъ Богъ уховаль, ижъ бы оная змова не была учынкомъ пополнена; таковой за слушнымъ доводомъ, якъ о томъ ниже описано, честь и горло и имѣнъе стратить. Тежъ кгда маестатъ нашъ ображонъ бываетъ съ тое причины, кгда бы хто бунтоваль покой посполитый врушаючы противъ насъ Господара ку шкодѣ и Речи Посполитое, и мынцу безъ воли наше билъ явне; а чого Боже уховай на насъ смерти, такъ тежъ и на потомки наши Великіе Князи Литовскіе, по зешстяхъ ихъ хотечы хто осѣсти и опоновати тое панство Великое Князство и Господаремъ быти на немъ, войско людъ служебный сбираль и выводилъ; хто бы тежъ зъ неприятели порозумѣнъе мѣль, листы до нихъ або послы противъ намъ Господарю и Речи Посполитое або остерегаючы слалъ, тымъ неприятеlemъ якужъ кольвекъ помочъ даваль, хотя бы тежъ замокъ нашъ неприятели подаль; хто бы тежъ люди неприятельскіе въ панство наше Великое Князство Литовское зрадливе привель, а то бы на него слушнѣ и справедливѣ было переведено такимъ же доводомъ, яко ниже описано: таковой с права зъ розсудку нашего съ паны радами нашими Великого Князства Литовского честь горло тратить, и такового зрадцы дѣти сынове за таковой выступокъ отца своего безецными будутъ, а имѣнъя того зрадцы отчизные выслужонные которымъ кольвекъ обычаемъ набытые мимо дѣти и близкіе на насъ Господаря приходять. Вѣдъжо жоны таковыхъ зрайць которіе не будутъ ли вѣдали тое зрады мужовъ своихъ, а съ того се выведутъ пресегами своими, таковые имѣней своихъ отчизныхъ и матерыстыхъ и вена предъ учынкомъ тое зрады имъ отъ мужей ихъ описаного не тратять * але до имѣней отчизныхъ не прійдутъ, хйба по смерти матокъ своихъ только до четвертое части имѣней матерыстыхъ пріходити будутъ.

АРТЫКУЛЬ 4.

О ображенъе маестату господарского.

Тежъ коли бы хто якого кольвекъ стану былъ найденъ явно подозренный, ижъ маестатъ нашъ господарскій образилъ, таковому жаденъ привилей ани зацность ани достоинство не маеть помагати ани се имъ щытити можетъ, абы се не мѣль справовати, и гдѣ будетъ правомъ поконанъ, абы не мѣль каранъ быти. А хто бы въ часъ ** милуючы пана Бога и пана своего и Речь Посполитую справедливѣ перестерегъ або объявилъ, повышенья годенъ будетъ. А за обмовенъе славною о парсунѣ нашей господарской за доводомъ слушнымъ справа и суду маемъ карати ведлѣ важности выступу и словъ, вѣдже ласкою нашою господарскою, а честью и горломъ ани имѣнъя отнятьемъ за то карати не будемъ; вѣдже въ томъ выступѣ коло ображеня маестату нашего господарского, гдѣ кому идетъ о честь и о горло, таковыхъ шляхту подданныхъ нашихъ нигдѣ индѣй, одно у здѣшнемъ панствѣ нашомъ Великомъ Князствѣ Литовскомъ на соймѣхъ валныхъ тутошного

панства, мы Господарь съ паны рады нашими судити водлѣ выступку ихъ тымъ каранемъ, яко вышей описано, карати маемъ.

АРТЫКУЛЬ 5.

О ображенъе маестату господарского такій доводъ, а не инакший маеть быти.

Яко въ кождомъ учынку, за которій гордомъ карають, потреба доводовъ явныхъ и ясныхъ, такъ во ображенъю маестату нашего неледа за осоченемъ або вымовеньемъ маемъ се на подданныхъ нашихъ сквапляти; але хто на кого ображене маестату ведеть, маеть довести свѣдѣцтвомъ вѣры годными и неподозренными людьми шляхтою и ихъ своею присегою. А если бы хто кого обмовилъ въ томъ учынку, а звлаща ижъ бы на него менилъ, же памъ Господару на здоровье стоялъ або Речь Посполитую зрадити и ку прудкому упадку привести хотѣлъ, и на тое се важилъ и готоваль; такій повѣдачь, если бы такимъ же яснымъ свѣдѣцтвомъ не довелъ, самъ отсуженемъ почтивости и горломъ маеть быти каранъ.

АРТЫКУЛЬ 6.

Хтобы колвекъ съ панства нашего до земли непріятельское утекъ.

Тежъ уставуемъ, хтобы колвекъ съ подданныхъ нашихъ съ панства нашего утекъ до земли непріятельское умысломъ злымъ на зраду ку шкодѣ намъ Господарю и Речи Посполитой, такій честь тратить; а если бы поиманъ былъ, тогды и горломъ маеть быти каранъ. А дѣти ачь колвекъ для того выступку отца своего почтивости свое не тратять, але имѣнья вси отцовскіе тратять, нижъ бы што мѣли власного набытъя своего, або передъ тымъ учынкомъ отца своего отдѣлены были, тогды при томъ застати мають. Такимъ же обычаемъ и жоны если будутъ не вѣдали зрады мужовъ своихъ, таковыя въ томъ будутъ захованы, яко въ третемъ артыкулѣ сего роздѣлу о такихъ есть описано.

АРТЫКУЛЬ 7.

Хто бы съ пригоды до земли сусѣдъ нашихъ втекъ.

Уставуемъ тежъ, если бы хто зъ якое пригоды припалое кромъ ображенъя маестату нашего и Речи Посполитое зѣхаль до земли якого сусѣда нашего, выймуочы земли Московскіе;

таковый почтливости, горла и имѣнья не тратить, одно маеть справоватися тому отъ кого будетъ обвинень и ласки наше господарское перенайдовати за кклейтомъ нашимъ, а тотъ кклейтъ нашъ на врадехъ, и ввездѣ гдѣ ся оборочати будетъ, а особливе по мѣстомъ торгомъ и при костелехъ, маеть давати обволывати и прибываньемъ цедуль ознаймованьемъ и рокъ выйстя кгдейту оповѣдати, а то для того абы собѣ лѣпшую безпечность мѣти могъ. А если бы въ томъ часѣ не переправиль собѣ ласки наше господарское и тому кому завиниль не справилсе; тогда мають такового за се изъ границъ панства нашего за кклейтомъ нашимъ пропустити, лечъ не до земли неприятельское, и то мають чынити передъ выйстемъ кклейту, а намъ Господарю волно будетъ кклейтомъ далшимъ водлѣ воли и зданья нашего господарского.

АРТЫКУЛЬ 8.

О зквалцене и зламане кклейту.

Тежъ уставуемъ, если бы мы Господаръ кклейтомъ своимъ кого убезпечили, а тотъ бы кклейтъ яснѣ и значнѣ былъ обволанъ, за которымъ бы онъ обвиненный на справу до насъ прѣхаль; и хто бы такового подъ тымъ часомъ раниль або забиль безъ его початку и причины, таковый самъ маеть быти горломъ каранъ, яко тотъ которій кклейтъ нашъ господарскій зквалтилъ. Тымъ жо обычаемъ хтобы зъ кклейтомъ прѣхавшы, а самъ неспокойнѣ и нескромнѣ се заховаль, и кого раниль або забиль и якій кольвекъ кквалтъ учиниль; тотъ самъ собѣ кклейтъ зламалъ и горло тратить.

АРТЫКУЛЬ 9.

О мондатѣхъ, въ которыхъ мають быти мандаты съ канцеляреи наше даваны.

Напервей мандаты мають быти даваны о ображенъе маестату нашего господарского; тежъ хто бы при дворѣ нашомъ господарскомъ кого забившы або кквалтъ якій учинившы утекъ; хто бы тежъ покой посполитый взрушилъ, яко естъ вышей о ображенъе маестату нашего господарского вышей и шырей описано; хто бы на имѣнью своемъ новое мыто вымышляль, або тежъ мытникъ нашъ господарскій и тежъ хто съ подданныхъ нашихъ маючи стародавние або отъ насъ даное мыто на имѣнью своемъ або въ державѣ своей надъ уставу такъ тежъ и отъ подданныхъ шляхецкихъ што бралъ; такъ тежъ листы и мандаты мають быти даваны въ речахъ и въ пожиткахъ столу и скарбу нашего господарского належачихъ и о иншыя нѣкоторые речи. Кромъ вышей мененыхъ артыкуловъ мандаты никому съ канцеляреи наше не мають быть даваны; а если бы были даваны, тогда сторона оную * речъ, кромъ тыхъ мандатовъ нашихъ, будучы позвана и

ставши очевисто неповинна будеть отказовати, а за мандатомъ нашимъ маеть зложонъ рокъ завитый.

АРТЫКУЛЬ 10.

Хто бы кому имѣнье заставиль а продалъ первой, нижли зъ земли утекъ.

Тежь если бы хто которій человѣкъ, передъ тымъ нижли утечетъ до земли непріятельское, будучы еще въ панствѣ нашомъ, продалъ або запродалъ имѣнье якое або люди або землю кому, а будетъ ли онъ тое рады его не вѣдалъ, и на то право поднесеть и окажетъ на то листы и держанья своего доведеть; тогда маеть онъ тое купленное або закупленное имѣнье спокойнѣ держать, а пакъ ли бы не хотѣлъ присегати, тогды тое купленное або закупленное имѣнье тратить.

АРТЫКУЛЬ 11.

Если бы отецъ отъ дѣтей втекъ до земли непріятельское, такъ тежь который ближшый.

Тежь уставуемъ, если бы отецъ отъ дѣтей утекъ до земли непріятеля нашего Московского и до иныхъ земель непріятель нашихъ, а дѣти бы на имѣньи зоставиль по себѣ; тогды имѣнья его на насъ Господаря спадывають, бо за выступъ отца ихъ власного вже суть отдалены отъ имѣней. Вѣдьже которій бы сынъ былъ дѣлный отъ отца своего и первой тое части своею въ держанью былъ, нижли утекъ отецъ его, и мѣшкаль бы на томъ кромъ отца своего не у въ одномъ мѣстцу зъ нимъ, а не за однимъ плотомъ *, а тое рады и учынку отца своего не вѣдалъ, а не былъ подозренный и вывелся того присегою своею; таковыя тогды сыны и дочки отъ почтивости своею отъ части имѣнья своего не отпадывають. А если бы которій приржоный братъ або дѣвка ** або который будъ зъ роду утекъ до земли того непріятеля нашего Московского и до земель непріятельскихъ поганскихъ; тогды дѣлница, то есть часть невыдѣлена не будетъ выдѣлена была, будъ не выдѣлена ***, спадываетъ на насъ Господаря, и ближній жадень не будетъ ку тому и не маеть мѣти ничего; а вѣдьже то братья и близкимъ яко въ почтивости такъ и частемъ имѣньямъ ихъ шkodити не маеть. А хтобы такового здрайцу утекающою забиль, або живого до насъ и до вряду нашего привель, и то на его слушнымъ доводомъ перевель; такового почтивости то шkodити не маеть, але еще за то будетъ годень ласки нашего господарское, а если бы не довелъ, тогды самъ маеть быть каранъ, яко вышей описано.

АРТЫКУЛЬ 12.

Хто бы листы або печати наши фалшоваль, чымъ маеть быти каранъ.

Коли бы хто листы або печати наши фалшоваль, або на кшталть руки наше также съ канцлярейныхъ писаровъ нашихъ того панства подписоваль, або хтобы тежь печати наши соберывъ и въ себе ховаль и ихъ ужываль; таковой за оказаньемъ слушнымъ явностью певною и доводомъ слушнымъ ничимъ инымъ толко огнемъ каранъ быти маеть. Ку тому если бы тежь хто печати и выписы владовые переправоваль, тестаменты на заставу фалшоваль, або одбираючи печати отъ листовъ къ другимъ прикладалъ ку поиочы и ку пожитку собѣ а ку шкодѣ стороны своее противное, а то бы се на праве нашло и оказало; тотъ тую речъ, о што тые листы идуть и о што за ними право ведеть, тратить и горломъ каранъ предсе маеть быти. А хтобы листы фалшывые на якую речъ набытую показаль, которіе бы по чіей смерти зъ имѣньемъ або съ чимъ кольвекъ до рукъ его пришли, за кими листы чого вжываль тотъ ближшый *; на томъ присегнути, ижъ такіе листы по смерти тыхъ, отъ которихъ се ему достали зъ имѣньемъ або которою кольвекъ речью, и за тымъ тое стороны почтивости и горлу шкодити не будетъ, а о тую речъ, о што право идетъ, предся мовити можетъ и правомъ поступовати и ку листомъ мовити, если противъ праву але недотливе **.

АРТЫКУЛЬ 13.

О фалшованью монеты о мындзехъ и о золоторехъ.

Тежь хтобы монету нашу фальшоваль и безъ воли наше переправоваль и обрѣзоваль, такъ тежь мындзаре наши, которіе золото и серебро и иншую речъ матерей *** належачую и прислухающую мындзѣ фалшовали бы зливали и мѣшали ку пожитку своему а ку шкодѣ Речи Посполитое, а то бы на нихъ досвѣдчано; тые мають огнемъ караны безъ иилосердыя. Потомужъ золотари, которіе золото серебро фалшуютъ и межи того мѣшаютъ медь цынь або олово, и въ томъ бы были дознали; тогды сами мають огнемъ быти караны, а ихъ маетность тому, кому шкоду учинили, маеть быть плачоно. Вѣдьже работа тая и матерей, безъ которое бы тое ремесло ихъ справовано быти не могло подлѣ звыклости ее, то фалшемъ розумено быти не маеть.

АРТЫКУЛЬ 14.

Не маеть никто ни за чій кольвекъ учинокъ терпѣти только каждый самъ за себе.

Тежь уставуемъ, ижъ нихто ни за чій кольвекъ учинокъ не маеть каранъ и сказанъ быти, толко которимъ виненъ, кгдажь того право божое и справедливость хрестіянская учить, якожь такъ хочемъ мѣти: абы ани отецъ за сына ани сынъ за отца, кромъ ображенья маестату нашего, яко вышеи около того есть описано, ани жона за мужа, ани мужъ за жону, такъ тежь братъ за брата, и жадный приржонный, и слуга за пана, панъ за слугу, нихто ни за чій выступъ учинокъ, толко каждый самъ за свой выступъ маеть терпѣти и каранъ быти.

АРТЫКУЛЬ 15.

Хтобы много за мало упросиль а безъ данины побралъ.

Тежъ хто много за мало упросиль, а то бы на него устнѣ и съ права было переведено, вышей нижли просиль, таковой тую выслугу свою отъ насъ даную тратить. А хотя бы и добрѣ упросиль, а безъ данины наше што и къ той выслугѣ своей взялъ и къ тому привернулъ; предъся тую выслугу и забранье тратить и спадываетъ то за се на насъ Господаря. А хто ку отчызному своему имѣнью взялъ чоловѣка, або и десети, або колко колвекъ и съ землями, або земли пустое; тогды маеть каждого чоловѣка, колко будетъ взялъ, своими отзычнами навезати зъ земли, або каждую землю землею, а вѣдже не на голуую повѣсть и обмову, але за огледаньемъ и вывѣданьемъ слушнымъ и справедливымъ правнымъ поступкомъ и доводомъ черезъ людей цнотливыхъ и вѣры годныхъ комисаровъ тубулцовъ. Ровностью права одинакими доводами вдаючи се * въ ровное право и зъ шляхтою, яко о томъ ниже написано.

АРТЫКУЛЬ 16.

О речъ земленую, межы имѣньями нашими князскими панскими шляхецкими, мы Господарь однимъ тымъ правомъ судитисе маемъ.

Тежъ мы Господарь обѣцуюемъ и хотимъ, абы тое черезъ насъ и потомковъ нашихъ споры розница межы кгрунтами нашими шляхецкими вѣчно было держано, гдѣжъ бы се трафило въ имѣньяхъ нашихъ споры розница межы кгрунтами нашими * шляхецкими и межы тыми имѣньями, которые вышли зъ данины наше, ижъ въ той речы земляной маемъ мы и потомкн наши Великіе Кязи Литовскіе тымъ же однимъ правомъ яко и подданные наши Великого Князства судитися а не иначе, чій доводъ будетъ слушнѣйшій водлѣ права, тотъ ку доводу маеть быти припушонъ.

АРТЫКУЛЬ 17.

Вси въ томъ панствѣ нашомъ великомъ Князствѣ Литовскомъ однимъ тымъ правомъ сужоны быти мають.

Уставуюемъ тежъ и вѣчиѣ а неотмѣннѣ мѣти хотимъ, абы всѣ подданные наши всѣхъ становъ, такъ богатога яко и вбогаго, почоншы отъ княжать пановъ радъ духовныхъ и свѣцкихъ пановъ хоруговныхъ и шляхты, ажъ до нижшого стану, однимъ тымъ правомъ отъ насъ данымъ были сужоны; и всякіе речы, почоншы отъ почтивости горла достоинствъ маетности имѣней всякихъ справъ земельныхъ лежачыхъ рухомыхъ, ажъ до наименшее речы, а не иначе правомъ але тымъ статутомъ отъ насъ данымъ мають быть сужоны. Также и чужоземцы и заграничники Великого Князства приѣдчые и якимъ кольвекъ обычаемъ прибылые люди тымъ же правомъ же мають быть сужоны и на такихъ врядахъ, гдѣ выступить.

АРТЫКУЛЬ 18.

О листѣяхъ заповѣдныхъ, ижъ не мають быти съ канцляреи наше выдаваны.

Тежъ уставуемъ, ижъ листовъ нашихъ заповѣдныхъ на продлуженъе справедливости людское, яко кольвекъ повстегаючы або задержываючы, отъ сихъ часовъ на потомъ до всякихъ судовъ мы сами и потомки наши Великіе Князи Литовскіе давати не будемъ, окромъ трохъ члонковъ: первое если бы хто о Речь Посполитую въ непріятелей нашихъ у везеню былъ; другое коли бы хто на службѣ нашей и Речи Посполитое въ посельствѣ до земель чужыхъ або заграничье панствъ нашихъ, гдѣ ся будетъ дотыкало Речи Посполитое, и въ иншихъ речахъ господарскихъ властныхъ посланъ, и къ тому особливе въ потребахъ якихъ кольвекъ водлѣ часу припалыхъ потребы отправуючы ими ся забавиль, въ таковыхъ речахъ и справахъ не только листы наши господарскіе але и пановъ радъ нашихъ ити могутъ и мѣстце у правѣ мѣти будутъ; третее коли бы хто правдиве немоцонъ былъ, тогды толко которій не сталь, маеть на другомъ року присегнути, ижъ правдиве немоцонъ былъ. А у въ иншихъ речахъ кромѣ тыхъ члонковъ хотя бы и выданы кому были; тогды врадники наши то есть судъ замковый земскій и мѣскій, таковыхъ листовъ заповѣдныхъ ку кривдѣ одное стороны одержаныхъ неповиины пріймовати ани ихъ послушни быти.

АРТЫКУЛЬ 19.

Листы отворонные мають быти каждому ворочаны.

Тежъ хтобы листы наши отворонные въ жалобѣ своей до кого принесъ, будь до князя, або до пана, або до державецъ, або земенинъ до земенина, а хто бы колвекъ зъ нихъ оный листъ отворенный прочетши у себе держаль и копею зъ него знявши подъ печатью вознаго оному не хотѣль вернути до трехъ дней; тогды таковой за противность свою намъ Господару у вину упадываетъ у дванадцать рублей грошей, а сторонѣ такожъ маеть заплатити. А вѣдъже листы отворонные мають обычаемъ слушнымъ даваны быти черезъ вознаго и предъ людьми сторонными шляхтою.

АРТЫКУЛЬ 20.

О битью посланца нашего господарского, и тежь посланцовъ отъ пановъ радъ нашихъ при листехъ нашихъ господарскихъ и пановъ радъ и старость нашихъ судовыхъ и суду земского.

Уставуемъ, хто бы посланца нашего господарского, и тежь посланцовъ пановъ радъ нашихъ, за листы нашими и за листы пановъ радъ нашихъ и старость судовыхъ и суду земского, збилъ и листовъ не училъ, або листы подраль ку зелжivosti нашей и радъ нашихъ; тотъ маеть за слушнымъ доводомъ, если на него очевисто переведуть дванадцать недѣль на замку нашомъ сѣдѣти, а дворанина совито, навезать водлугъ стану его. А дворанинъ кгда листы подавать маеть, маеть метъ при собѣ сторону, то есть двоухъ шляхтичовъ для доводу. Такъ тежь и сторону, которыхъ будетъ мѣти при собѣ дворанинъ, если бы хто забилъ або якую легкость учинилъ, маеть совито водлугъ стану ихъ навезати. За листы и въ справахъ урядовне посланные Ъздячы мають скромнѣ и учтиве се заховать, и жадное прычины ку имѣнью и зелженью своему не давать и ничего неслушнаго не почынять, одно то справовати, што вряду его наледыть и съ чымъ прѣхаль.

АРТЫКУЛЬ 21.

О листѣхъ заручныхъ.

Тежь абѣцуемъ и маемъ давати о безпечность здоровья подданныхъ нашихъ шляхту, за похвалками и звазненьемъ чѣимъ кольвекъ противко ихъ кожного, зъ великихъ кровныхъ ажъ до нижныхъ становъ, съ канцляреи наше листы заручные, и заклады на нихъ казати описовати пять сотъ копъ грошей наименшей, а болшей двѣ тысеци копъ грошей, а над то вышайописанные заклады никому такъ съ болшихъ яко и зъ меншихъ становъ шляхецкаго народу даваиы быти не мають. А того канцлярейные писары наши господарскіе земскіе Великаго Князства Литовскаго доглядати и вважати (sic) мають, кому пять сотъ копъ грошей а кому двѣ тысеци копъ грошей въ листѣхъ заклады описованы и даваны быти мають. А хто бы за похвалкою або звазньемъ своимъ обнесень будучы урядовне листомъ нашимъ заручнымъ, а черезъ тотъ закладъ кого забилъ; тогды справа за слушнымъ доводомъ горломъ маеть быть каранъ, а закладъ на насъ Господаря до скарбу нашего земского Великаго Князства Литовскаго на ииѣнью его маеть быти с правлено. А еслибы не забилъ, толко ранилъ або збилъ; тогды с права также за слушнымъ доводомъ заруку намъ Господарю маеть платити, а тому битому маеть быть справлено навезка совита водлѣ стану его. А хто бы заруку выневшы, сторону противную, на которую заруку взялъ, самого его забилъ або билъ або ранилъ; тотъ самъ таковою жъ виною маеть быть каранъ. А мы Господарь не маемъ таковыхъ закладовъ никому отпушати, але кажемъ брати до скарбу нашего земского Великаго Князства Литовскаго; а въ небытности нашей въ здѣшн емъ панствѣ воеводове старосты державцы судовые, гдѣ книги лежать, будутъ мочы листы заручные подъ печатми своими шляхтѣ давати, уважаючы кому якій съ тыхъ двоухъ сумъ закладъ маеть быти даванъ.

АРТКУЛЬ 22.

О отповѣдникахъ неосѣлыхъ.

Тежъ уставуемъ, если бы хто кольвекъ неосѣлый, будь тубулець панства нашего Великаго Князства яко и чужоземець, кому тежъ колвекъ иншому отповѣдь обличнѣ або черезъ листы або тежъ заочнѣ учинилъ; таковой отповѣдникъ маеть быть поставленъ отъ насъ Господаря або отъ вряду замкового або и земского передъ правомъ, гдѣ бы колвекъ при которомъ врьдѣ то се дѣяло, и если бы онъ тое отповѣди предъ врьдомъ довелъ, тогда таковой отповѣдникъ неосѣлый маеть быти на замку нашомъ посажонъ, а сѣдѣти маеть дванадцать недѣль), не маеть быть съ того везенья пушонъ, ажъ первой себе рукоемствомъ увыйститъ, абы тотъ, противъ кого отповѣдь учинилъ, въ покою былъ.

АРТКУЛЬ 23.

О листѣхъ желѣзныхъ, кому мають быти даваны.

Тежъ уставуемъ, ижъ листы желѣзные съ канцляреи наше не мають быть даваны тѣмъ, которые маетности своей на збыткохъ марнѣ тратили и за таковыми збыточными тратами въ долги попали, але тымъ маеть давати таковые листы, которые бы въ долги пришли и въ убозство попали зъ Божьего допущенья: то есть, если бы огнемъ погорѣли або маетности ихъ стонули, албо бы отъ разбоу отъ неприятели нашего забрани были, або хто бы тежъ для Речи Посполитое ку утратѣ у въ убозство пришолъ. А вѣджо далшого часу и волности не маеть тымъ узычати и давати толко въ наибольшой сумѣ и речи три годы, а въ томъ часѣ маеть се въ наибольшой речи и сумѣ тотъ о заплату старати. И людемъ простымъ купцомъ и жыдомъ противъ шляхты таковыхъ листовъ не маемъ держати, а вѣджо кому будь хотѣли такового листу желѣзнаго узычати, и то предсе не напротивъ шляхты; тогда съ канцляреи наше тотъ маеть быть отосланъ до вряду его належачого, отколь есть. Передъ которимъ врьдомъ хто таковаго листу желѣзнаго потребуеть, маеть рукоемство слушное поставити людей добрихъ осѣлыхъ и куститися ими и ихъ маетностями, ижъ не згинеть въ тыхъ же лѣтехъ, яко на листехъ ему назначоно, а на остатный день выйстя року будутъ повинны рукоимы оного на томъ же врьдѣ поставить, а должники долговъ своихъ и оного истца въ того вряду упоминати и найдовати и доходити будутъ; еслибы рукоимы не поставили и въ томъ се онымъ не всправедливили, тогда сами за листы або за доводомъ правнымъ тые долги повинны будутъ платити.

АРТЫКУЛЬ 24.

Кому бы шло о честь, якъ рыхло справедливость учынена быти маеть.

Тежь обѣцуюемъ и будемъ повинни каждому съ подданныхъ нашихъ, кому бы шло о честь прудкую а неодвочную справедливость учынити, а если бы на насъ Господаря зашли якіе трудности; тогды таковой справѣ въ годы чотыри роки складаемъ. А гдѣ на першомъ второмъ або на третемъ року предъ ся за недоспѣхомъ нашимъ не могли быхмо конца въ той речы учынить; и до того четвертого або розсудку нашего того оного обвиненаго почтивости шкодити не маеть. А хотя бы умеръ або забить былъ, не дождавшы оного розсудку нашего; тогды ему ани потомкомъ его почтивости шкодити не маеть. А приганенный службы наше земское не маеть се вымовляти, вѣдже четвертого остатнего року и войною се вымовляти не будетъ мочы.

АРТЫКУЛЬ 25.

О мытгъхъ новыхъ.

Тежь уставуемъ и приказуемъ, абы жадень человѣкъ въ томъ панствѣ нашомъ Великомъ Князствѣ Литовскомъ не смѣлъ новыхъ мытъ вымышляти ани встановляти ни на дорогахъ, ни на мѣстехъ, ани на гребляхъ, ани на рѣкахъ, ани въ торгахъ, ани въ мѣстечкахъ ни въ стодолахъ, або въ корчмахъ на гостинцахъ въ имѣньяхъ своихъ, кромѣ кол торые бы были зъ стародавна установлены, або мѣли бы на то листы продковъ нашихъ або наши. А хто бы кольвекъ смѣлъ мыто кромѣ звычайнаго торгового установляти; тогды тое имѣнье, въ которомъ мыто кромѣ торгового установилъ, тратитъ и спадываетъ на насъ Господаря. А которіе здавна и за привильями и листы нашими мыто и мостовое на имѣньяхъ своихъ на дорогахъ гати мосты гребли и ровы направовати мають, а хто бы гдѣ мостовъ гатей гребели направленныхъ не мѣлъ, а для того бы переѣздъ былъ трудный, а кому бы се на тыхъ мѣстцахъ шкода стала; тому тотъ же панъ, хто мыто беретъ, винень будетъ шкоду оправити и зъ накладомъ, што ищуты шкоды наложить. А старостове державцы або мытники наши, еслибы такежь беручы мыто дорогъ не поправовали на имѣньяхъ нашихъ; тогды шкоду и накладъ тому, што ищучи хто наложить, винны будутъ платити. А которіе тежь князи панове и земляне шляхта старіе дороги ставы своими затопятъ, або заорутъ, привлащаючи собѣ пожытки; таковыя новые дороги мають быти погачоны и положоны не ку кривдѣ людемъ переѣждимъ, але што могутъ быть напростей и такъ, або были напровованы, жебы зъ возы тяжкими у вездѣ безпечный переѣздъ былъ. А къ тому иншыя стародавныя дороги на имѣньяхъ и на кгрунтехъ своихъ въ мѣстцахъ потребныхъ поправовати, мостъ мостити, гати гатити, тые которіе зъ стародавна людьми то робливали и впередъ будутъ повинны. А кгда бы на чьемъ имѣньи або на кгрунтѣ злый переѣздъ былъ, а шляхтичъ хотѣлъ бы его поправовати, а съ того себѣ за накладъ свой пожитокъ мѣти; тогды тотъ маеть до насъ Господаря утечы, а мы, довѣдавшыся того

черезъ посланцовъ або старость нашихъ ку тому прилежныхъ, маемъ ему дати и встановити отъ купцовъ и иныхъ переѣждныхъ людей мыто або платъ, водлѣ важности и наклады его и ласки наше господарское. Такъ тежъ и мытники наши въ мѣстечкахъ и селахъ князскихъ, панскихъ, боярскихъ, гдѣ первой мыто не бирано, часу праздниковъ и сходовъ жадныхъ мытъ и торгового вымышляти и брати не мають * квалтъ и шкоду совито платити. А на рѣкахъ портовыхъ, и на которыхъ портъ можетъ быти, а гдѣ кольвекъ въ панствѣ нашомъ Великомъ Князствѣ, жаденъ ставовъ новыхъ становити и гребли сыпати ку переказѣ порту и спусту не маеть мѣти. Такъ тежъ и ѣзы на рѣкахъ портовыхъ, гдѣ зъ стародавна бывали, хтобы ставиль; тогды предсе маеть мѣстца заставляти такъ слушиѣ, абы ѣзомъ або тамованьемъ никому се шкода не стала. А таковыхъ речей воеводове, старостове, державцы наши кождый въ державѣ своей мають досмотрѣти, а новыхъ мытъ абы на рѣкахъ портовыхъ и на ставехъ и на гребляхъ не было, также на ѣзохъ абы проходы были слушные безъ завады заставованы.

АРТЫКУЛЬ 26.

О неданье мыта шляхтѣ.

Тежъ зъ ласки и доброты наше господарское княземъ, паномъ радамъ духовнымъ и свѣцскимъ, шляхтѣ въ томъ панствѣ нашомъ тую вольность на водахъ на дорогахъ, то есть сухимъ путемъ и воднымъ, на торгохъ, на мостехъ, такъ по имѣньяхъ нашихъ ** спущати и продавати зъ ихъ власныхъ гуменъ, кождому его работы правдивое збожье а не купленое, отъ того мыто не маеть быти давано; такъ тежъ и одъ подводъ шляхецскихъ, которіе зъ ихъ речми властнымъ збожьемъ а стацьями ходять отъ того всего мыто и мостовое брано быти не маеть. А если бы што купленого збожья и иныхъ речей пры томъ мѣль; отъ того мыто маеть платити. А вѣдже сами особами своими, або гдѣ бы ихъ самихъ при томъ не было, тогды слуги ихъ або справцы отъ нихъ притомъ посланные вѣры годные на мытѣхъ нашихъ головныхъ мають присегнути, што есть правдивое работы его домовое а што тежъ прикупленое, а подводы мають безъ присеги быти пропущаны толко за листы и печатми ихъ, тымъ же обычаемъ и лѣсные товары и отъ всякого господарства домовое работы маеть ся разумѣти и безмытнѣ пропущоны быти. А на мостехъ старожитныхъ, гдѣ передъ тымъ што будетъ давано только отъ подводъ такихъ, которіе збожье на продажу везуть, вѣдже водлѣ стародавнаго обычаю мають давати.

АРТЫКУЛЬ 27.

Хто напротивко выроку наішого господарскаго мовиль.

Тежъ уставуемъ, кды быхмо мы Господарь съ паны радами нашими зъ выроку нашего сказанье учынили, а хтобы противъ тому выроку нашому по сказанью што противъ его мовити мѣль; тогды таковые, якогжъ кольвекъ стану такъ високаго яко и низкаго, мають сѣдѣти на замку нашомъ шесть недѣль, а то никому не маеть быти отпуцено.

АРТЫКУЛЬ 28.

Хтобы подь кимъ што упросиль, а тому напрудь дано и въ привильи нашомъ господарском напрудь описано.

Уставуемъ тежь, хтобы подь кимъ имѣнье люди земли въ насъ Господара упросиль и въ привильи бы то собѣ описаль, а у того бы, подь кимъ то онъ собѣ упросиль, первой было на датѣ его або на привильи нашомъ описано и тому потвержено, и того онъ колко лѣтъ вжываль и въ держанью былъ; тогды таковой первый привилей або листы при моцы мають зостати, и за иныхъ господарей потомковъ нашихъ тотъ, кому дано, тую речъ держати и поживати маеть водлугъ листовъ и потверженья нашего, а послѣдніе листы ни во што мають обернены быти.

АРТЫКУЛЬ 29.

Хтобы на што листы упросиль, а того въ держанью не былъ.

Тежь уставуемъ, если бы хто собѣ въ насъ Господаря имѣнье люди або землю впросиль и въ листѣ данины наше ему то было описано, а того въ держанью и въ поживанью не былъ до десети лѣтъ; тогды и листы наши и дата таковая потомъ жадное моцы мѣти не маеть. Так тежь, и справуючись водлѣ правъ хрестіянскихъ и тежь остерегаючы, абы межы поддаными нашими небезпечность и ростырки не множились, уставуемъ, абы отъ сего часу жадные листы, которые по латинѣ експектативами зовутъ, жадное моцы не мѣли, а хотя бы отъ насъ кому даны, предсе держаны быти не мають; нижли если бы хто самъ по своей доброй воли передъ нами Господаремъ зъ волею нашою господарскою на то призволилъ.

АРТЫКУЛЬ 30.

Абы се у дворехъ нашихъ господарскихъ никто не становиль.

Тежь уставуемъ, ижь жадень пань, а нихто съ подданныхъ нашихъ, Великомъ Князствѣ Литовскомъ ѣздечи дорогами, не мають ся становити и стацый на себе и на кони свое зъ дворовъ нашихъ брати, ставовъ и сажавокъ и озеръ нашихъ волочыти. А если бы хто противъ тое уставы наше учинилъ, а въ дворѣхъ нашихъ становилсе, стацью собѣ и конемъ своимъ зъ дворовъ нашихъ бралъ, ставы и сажавки и озера наши волочыль; тогда за слушнымъ доводомъ и с права въ томъ поконаный маеть на замку нашомъ дванадцать недѣль сѣдѣти, а шкоду оправити.

РОЗДѢЛЬ ВТОРЫЙ О ОБОРОНѢ ЗЕМСКОЙ

АРТЫКУЛЬ 1.

О повинности яко вси обыватели Великого Князства литовского чынить мають.

Уставуемъ тежь съ призоленьемъ радъ нашихъ зуполныхъ и всѣхъ становъ подданныхъ панства нашего Великаго Князства, ижь кождый князь и пань дховный и тежь дворянинъ бояринъ и вдовы кождые и иные станы, и татарове наши, такъ мѣщане мѣсть нашихъ, маючи земское имѣнье и лѣта зуполные маючы, часу потребы зъ нами и потомками нашими або при гетманохъ нашихъ винни будутъ сами особами своими войну служыти и выправовати на службу военную, коли бы кольвекъ была потреба водлѣ уфалы земское соймовъ нашихъ Великаго Князства, якая на онъ часъ будетъ потреба оказовати *, то есть и похожихъ зъ имѣней зъ людей, яко будетъ потреба, отчызныхъ выслужонныхъ и купленныхъ. А вдовы и сироты и дѣти лѣтъ зуполныхъ не маючи мають выправовати водле важности имѣней своихъ, а тымъ обычаемъ; маеть быти выправа пахолка зо всимъ на добромъ кони, што бы конь стоялъ наименшей осмъ копъ грошей литовскихъ, а на немъ сукня цвѣтная, панцеръ, прилбица, мечъ, павеза древо съ прапорцемъ цветнымъ. А который бы бояринъ або мѣщенинъ не мѣлъ въ своемъ имѣнью людей такъ много, яко устава будетъ, тотъ самъ предсе маеть ѣхати и служити; такъ тежь которій не маеть пѣшо ити зъ ручницею або зъ рогатиною, а на мѣстцу наименованомъ черезъ листы наши або гетмана нашего великого маеть ся очевисто каждый становити и датися написати и ошафовати гетману нашому великому на тотъ день, которій черезъ насъ або черезъ гетмана нашего къ тому попису будетъ положонъ и выволанъ. А коли бы было колко братьи недѣленое; тогда братья мають межы себе годнѣйшаго лѣтъ дорослыхъ выбравшы послати, который зъ имѣнья недѣленого маеть войну служыти тымъ же обычаемъ, яко вышей описано. А хтобы отъ насъ Господаря держалъ якое имѣньѣ нашо въ заставѣ; тогда тотъ не повинень будетъ выправовати на войну. Хотемъ тежь мѣти и уставуемъ, абы подданные наши вси мѣщане ку валной потребѣ зъ иншими людьми нашими войну служили, або зъ дозволеньемъ нашимъ водлѣ постановеня нашего на войну выправовали. А хто бы кольвекъ съ тыхъ подданныхъ нашихъ шляхты и рыцества всякаго стану, также маючы имѣнье земское, войны не служыль, або прѣхавшы на рокъ постановеный не пописалъ, а хотя бы и пописался, а шыфу не ждалъ, або и шыховавши се безъ воли наше або отъ гетмана нашего великого прочъ поѣхалъ; тотъ имѣнье свое все тратитъ подъ тымъ обычаемъ, яко бы войны не служыль. И для того жъ кождого гетмана великого мы Господарь обѣцуемъ тотъ урядъ (т.е. гетманство) годнымъ и досвѣдчонымъ людямъ народу шляхецкого родичомъ стародавнымъ тутошнего панстдемъ Великого Князства Литовскаго давати, и тое мѣстце засаживати.

АРТКУЛЬ 2.

О постановеню обороны земское только на соймѢ.

Обѣцуюем и уставуемъ вѣчными часы быти держано, ижъ кгда будетъ потреба противко которого неприятели нашего обороны земское сему панству нашему Великому Князству Литовскому, албо валка вести; тогда мы сами Господарь або и съ паны радами нашими не маемъ ани будемъ мочи того учинити, ани серебщизны и поплату некоторую установляти, ажъ первой соймъ великій вальный зложившы въ томъ панствѢ нашомъ Великомъ КнязствѢ Литовскомъ, на которомъ за росказаньемъ и листы нашими будутъ повинни вси княжата и панове рады духовные и свѣцскіе, маршалки и иные врядники земскіе и дворные, панове хоругвные, послы земскіе повѣстовые зѣхатися; тежъ на онъ часъ на соймѢ великомъ валномъ зо всеми радами нашими и зо всеми княжаты и паняты и зо всимъ рыцертвомъ порядою а позволеньемъ ихъ маемъ таковыя речы становити а не иначе. А вѣдѣже гдѢ бы отъ котораго неприятели нашего яко прудкое уторгненье было въ се панство наше Великое Князство; тогда и безъ сойму толко за листы нашими, а въ небытности нашей за листы пановъ радъ нашихъ гетмана нашего великого мають вси князи и панове подданные наши, войны павинны, на часъ и мѣстце назначоное ххати, яко на квалтъ, и то зѣ милости Речи Посполитое боронечы собѢ жоны и дѣтей маетности отчизны своее.

АРТКУЛЬ 3.

О невызволенье листы нашими, и тежъ кого волно вызволити.

Тежъ уставуемъ, ижъ мы не маемъ жаднаго зѣ войны отъ службы земское такъ словнымъ росказаньемъ яко и презъ листы наши вызволити изъ войска отпущати, такъ тежъ и гетманове наши не будутъ мочи вызволити и зѣ войска отпущати, кромъ тыхъ врядниковъ нашихъ и слугъ, которихъ мы Господарь на онъ часъ для послугъ нашихъ и справъ земскихъ оставимъ, а вѣдѣже и тые почты свои водле можности имѣней ихъ винны слати и выправовати. А што се дотычетъ старость и державецъ украинныхъ, тые часу вальки также повинни зѣ имѣней своихъ у войско, яко иные шляхта, почты свои ку службѢ земской выправовати и становити. А сами они, звлаща тые, которіе быхмо у войско листы нашими и панове рады або гетманъ нашъ не казали ити, таковыя почты свои, што зѣ урядовъ своихъ новинни, становити мають.

АРТЫКУЛЬ 4.

О имѣнья заставныя, хто зъ нихъ службу земскую служити маеть.

Тежь уставуемь, если бы который шляхтичь або пань хто закупить и въ держанью будеть, службу земскую съ того заступовати маеть. Нижли если бы тотъ собѣ на записѣ заставномъ обвароваль; а тотъ, хто заставитъ, тымъ описомъ своимъ въ то бы се подалъ, ижъ самъ съ того имѣнья службу земскую служити маеть; а онъ хто закупилъ въ томъ волень будеть. А вѣдже хто за такимъ обычаемъ, естли бы тотъ, хто закупуетъ, мѣль оселости и можетъ службу земскую самъ служити, а кгда бы оселости яковое и можности не могъ мѣти; тогды предсе тотъ, хто закупуетъ и вживаетъ, самъ съ тое закупилъ маеть службу земскую служити.

АРТЫКУЛЬ 5.

О Хоружыхъ.

Хоружества всихъ земляхъ и повѣтехъ Великого Князства тымъ радомъ и способомъ мають быти захованы, ижъ мы Господарь хоружыхъ нашихъ не маемъ уставляти толко людей зацныхъ добрыхъ ростропныхъ можныхъ и осѣлыхъ о повѣтѣ томъ. А хоружый, и гдѣ будетъ хоруговь держати, маеть на собѣ мѣти зброю добрую и гелмъ албо прильбицу и бронь, а конь абы былъ подъ нимъ добрый, а хоруговь самъ хоружый въ гуфѣ своемъ на шыху и ку потребѣ маеть держати, и статечнѣ се въ томъ врядѣ на потребахъ нашихъ земскихъ маеть заховывати водлугъ цноты и повинности на хоружихъ належачое; а хорогвы мають имъ даваны быти за скарбу нашего подлугъ давного обычаю; а хоружые земскіе и дворные мають быти подлугъ стародавнего обычаю захованы.

АРТЫКУЛЬ 6.

О збиранью и тягненью шляхтѣ на войну.

Тежь мы Господарь для поряднѣйшаго тяготенья на войну, абы въ томъ шкода не была людемъ, такъ уставуемъ, ижъ гдѣ за потребою земскою будеть отъ насъ и пановъ радъ албо гетмана всей земли розказано на войну ѣхати; и тогды хоружый, давши вѣдомость о томъ шляхтѣ, каждый у своемъ повѣтѣ, маеть выѣхати самъ у поле и казати до себе всимъ повѣтикомъ своимъ за тры дни передъ тегненьемъ съ повѣту зѣѣхатися; а они будутъ повинни и до войска къ нему не вымовляючыся ѣхати въ томъ часѣ и на тое мѣстце, яко имъ отъ насъ дано и назначено будеть, съ почты своими яко на войну служити

повинни зѣхатися. И тамъ же хоружому собравшыся зѣ ними и маючы о каждомъ зѣ нихъ добрую вѣдомость и печу посполу маеть тягнути зѣ ними до каштеляна, давши о собѣ первой знати, гдѣ бы се мѣли ку нему стегнути; и тамъ съ каштеляномъ зѣхавши се хоружый оный повѣтъ шляхту одати и оповѣдати каштеляну и ознанити маеть, если все сполна albo и хто есть... А гдѣ въ котормъ повѣтѣ каштеляна нѣтъ ино до маршалка, которій въ томъ таковую жѣ моцъ мѣти будетъ яко каштелянове. И кгда вжо и къ каштеляномъ стягнутца хоружыя и зѣ шляхтою, тогда вси споломъ подѣ каштеляновою або маршалковою справою тягнути мають до воеводы того воеводства; и тягнувшыся зѣ нимъ кашталянъ або маршалокъ съ хоружымъ мають здати и оповѣдати шляхту воеводѣ, кого нѣтъ, а за чимъ гдѣ. Вже вси тые якъ панове воеводове и кашталянове и маршалкове и съ хоружими мають тягнути на мѣстце отъ насъ и пановъ радъ нашихъ назначоное, або гетману гдѣ розказано будетъ, и у въ одномъ мѣстцу завжды при воеводѣ становитися а не порозну, будучы въ послушенствѣ и справѣ пановъ воеводъ своихъ. А въ томъ тягненью воевода маеть того съ пильностью стеречи и боронити повинень, абы повѣтники его никому никоторое шкоды въ дорозѣ и на станѣ стоечы ни въ чомъ не чынили, але собѣ и конемъ своимъ за пенези торгомъ а не уставою живность куповали; а которій бы надѣ заказъ смѣль кому которую шкоду учинити, тогда воевода або кашталянъ, поки до пана гетмана не дотягнуть, мають имъ съ таковыми справедливость учинити и отправу на винномъ и на маетности его самъ заразомъ не проволокаючы дѣлати, а повѣтники шляхта будетъ у его повинни во всемъ томъ яко вышей описано послушни быти, а противъ непослушнымъ и противнымъ также повинни заховатися и карати ихъ мають, осадившы о немъ право, и што с права заслужыть, то втерпитъ.

АРТЫКУЛЬ 7.

Уси шляхта повѣтовые повинни становитися подѣ хороговью повѣтовою.

Хочемъ тежъ мѣти и приказуемъ грозно, абы вси подданные наши будучы на войнѣ нигдѣ се инде не шыховали ани становили особами своими и съ почты, одно подѣ хороговью своею повѣтовою, въ котормъ суть повѣтѣ осѣлыми, кромъ особного розказанья гетманского. А если бы которій зѣ нихъ служылъ въ которого пановъ радъ, нашихъ, або до врядниковъ або, тежъ всякого иного; ино и тотъ будетъ повинень подѣ хороговью на мѣстцу установити брата або кривнаго своего або такъ добраго шляхту якъ самъ, абы съ тымъ мѣстца неопустилъ, а ни се омѣшкаль, подѣ страченьемъ имѣнья своего. А княжата, понята, хоруговные маршалки, врядники наши земскіе и дворные, тые мають се становити на мѣстцахъ своихъ подлугъ стародавнаго обычаю.

АРТЫКУЛЬ 8.

О шляхтѣ, которые у разныхъ повѣтѣхъ имѣнья мають.

Уставуемъ, которые шляхта подданные наши мають въ розныхъ повѣтехъ имѣнья свои, таковой маеть въ томъ повѣтѣ, въ которомъ будетъ наиглавнѣйшее имѣнье мѣти зо всихъ имѣней своихъ отчизныхъ выслужонныхъ купленыхъ и жониныхъ, самъ стати и почтъ своей ставити.

АРТЫКУЛЬ 9.

О духовныхъ, якъ мають службу земскую служыти.

Уставуемъ тежъ и духовные зъ имѣней своихъ свѣцкихъ и костелныхъ наданыхъ, съ которыхъ служба земская военная бывала до сихъ часовъ, такжо зъ имѣней своихъ отчизныхъ купленыхъ и закупленыхъ шляхецкихъ, войнѣ повинныхъ, службу земскую служыти мають тымъ же обычаемъ, выправуючы съ тыхъ имѣней своихъ почетъ повинни при немъ слать за свою особу челоука доброго шляхтича водлѣ уфалы земское сеймовое.

АРТЫКУЛЬ 10.

Абы се по шыхованю не розвѣджали до домовъ своихъ.

Тежъ уставуемъ, ижъ кождый подданный иашъ пописавшысе, и по шыху обычаемъ вышей описанымъ съ тыми жъ конми и зброями, съ которыми се шыховаль, при насъ або при гетманѣ нашомъ повиненъ будетъ войну служыти а на тыхъ же коняхъ и съ тыми зброями, ажъ до зуполнаго роспусченя зъ войска нашего. А которій бы кольвекъ подданный нашъ, хотя и пописавшыся, а безъ воли и вѣдомости гетманское зъ войска прочъ отъѣхаль або, што почту своего повинного отпустилъ до дому; таковой имѣнье тратить, яко бы войны не служылъ. А если бы тотъ што пенези бравшы, а былъ бы челоуекъ неосѣлый, а то тежъ учынилъ, таковой кождый честь свою тратить такъ, якобы зъ войны утекъ. А на пописѣ маеть каждого коня гетманъ нашъ въ шерсть написати и петно, которое будетъ на кони, въ рестрѣ намалевати. А станъ свой павѣтники на войнѣ при хоружомъ у въ одномъ мѣстцу мають мѣти а не розно.

АРТЫКУЛЬ 11.

Которіе для немоцы своее на войну Ъхати не могутъ.

Уставуемъ тежъ, если бы которій шляхтичъ зъ Божьего допущенья былъ немоцью обложною хорь, за которую на службу земскую Ъхати не могъ, а не мѣлъ бы сына дорослаго; тогда маеть ся оповѣдать хоружому своему, въ котораго есть повѣтъ, а опричей трема шляхтычами, которые немоцы его очыма своими огледавши и то мають намъ або гетману нашому оповѣдати подь сумненемъ своимъ, а выздоровѣвши тотъ немоцный предсе будетъ повиненъ безъ отступу на потомъ передь тымъ хоружымъ присягнути, ижъ для правдивое и обложное немоцы не могъ на тую послугу земскую Ъхати, а почоть свой зъ имѣней на войну пред се послати повиненъ. А панове рады княжаты и панове иные вси вьрядники наши, которые подь хороговью повѣтовою не стояли; таковые у форобѣ своей пред се тымъ обычаемъ водлѣ уфалы земское и важности имѣнья своего почоть выправовати на войну, и по зъѣханью зъ войны безъ отпуску на томъ передь гетманомъ присягнути повинни, яко были правдивыми. А вѣдже подь часомъ войны таковой, хто обложною хоробою немоцонъ, маеть оповѣдаться намъ Господару, а въ небытности нашей и гетману нашому; а хто бы кольвекъ изъ становъ большихъ яко и меньшихъ въ таковой речи присягнути не хотѣлъ, тотъ имѣнье свое тратить на насъ Господаря.

АРТЫКУЛЬ 12.

О сынехъ заступованью войны одинъ за другого.

Тежъ уставуемъ, хто бы съ подданныхъ нашихъ изъ шляхтъ будучы самъ здоровъ, а мѣлъ сына дорослого лѣтъ осмнадцати а не нижей, а тотъ сынъ не былъ бы зъ нимъ дѣленный, або и подѣленный, а былъ бы годенъ ку службѣ военной; тогда таковой сынъ можетъ за отца войну служыти съ почтомъ отца своего. А вѣдже то есть и таковой отецъ сына своего весполокъ зъ сусѣды своими трема шляхтычами маеть привести до хоружаго своего, въ которомъ повѣтъ есть, и ему оповѣдати; а хоружый, узнавши его годного ку службѣ военной, при кашталянѣ маеть его гетману нашому оповѣдати; а гетманъ нашъ будетъ повиненъ таковаго ку попису и ку службѣ нашей пріяти.

АРТЫКУЛЬ 13.

Хто бы замѣшкаль, на рокъ положонный до войска не пріѣхаль.

Уставуемъ тежь, если бы хто замѣшкаль року отъ насъ, або отъ пановъ радъ нашихъ положоного, а до войска се не поспѣшаль, або на року се гетмана нашего не постановиль безъ слушное причыны; тогда таковыхъ огурныхъ и непоспѣшныхъ гетманъ великій у въ особливый реестръ маеть казати писати, и доложывшы того якъ который долго мѣшкаль; а тые вси такимъ способомъ караны быти мають, ижъ панъ гетманъ маеть ихъ послати на границу, або тамъ гдѣ того потреба Речи Посполитое розумѣти будеть, а они тамъ совитымъ почтомъ, а ве двое такъ много яко змѣшкали, тамъ заслуговати будутъ повинни.

АРТЫКУЛЬ 14.

О такомъ, хтобы зъ битвы утекъ.

Уставуемъ тежь, хто бы первой разъ зъ битвы утекъ, таковой имѣнье тратить; пакли тежь и другій разъ зъ битвы утекъ, таковой за слушнымъ доводомъ отъ гетмана черезъ вырокъ нашъ господарскій почтивость свою тратить.

АРТЫКУЛЬ 15.

О тыхъ, которые на войнѣ коней зброй и броней кому иному позычаютъ.

Тежь уставуемъ, хтобы кому на войнѣ будучы у войску позычылъ коня зброй торчы древа и всякое брони, а то бы на него переведено; отъ того таковой статокъ увесь черезъ гетмана нашего до рукъ нашихъ забранъ быти маеть. А кгда бы се тотъ же у другій разъ тогда пустиль; таковой яко омыльный слуга Речи Посполитое горло тратить.

АРТЫКУЛЬ 16.

По чому отъ попису брати.

Уставуемъ, абы гетианове наши не казали болше брати отъ попису войска писаромъ своимъ, только по пол-грошу отъ коня, то за працу ихъ въ тотъ часъ коли войско наше зъѣжджается; а коли войско нашо маеть быти роспущено, тогда не маеть гетманъ ани

писарь отъ попису ничего брати подъ ласкою нашою Господарскою. А пань гетмань зъ реестру войско распустити маеть.

АРТЫКУЛЬ 17.

О старшихъ, которые надъ людомъ войска нашего послани бывають

Тежь уставуемъ, которые бы были послани отъ насъ Господара або отъ гетмановъ нашихъ старшымъ надъ частью людей войска нашего въ розные стороны водлѣ потребы, абы тыхъ всихъ старшихъ вси кожного стану, которіе подъ чією справою послани будутъ, были послушни. А старшие оные справцы, ропущаючи людей, и такъ же ся яко пань гетмань заховывати мають.

АРТЫКУЛЬ 18.

О хоружыхъ, абы земянь дома не осажывали а ни отпускали.

Уставуемъ тежь и приказуемъ, абы хоружые наши не мѣли жадень зъ нихъ земенина дома осажывати и отпускати, а если бы который земенинь дома зосталъ, а хоружый бы того передъ гетманомъ не повѣдилъ и втаилъ, а то бы на него было переведено, ижъ то умыслнѣ оставиль; тогда таковой хоружый врьдъ свой тратить.

АРТЫКУЛЬ 19.

О сторожы военной.

Тежь уставуемъ, ижъ кгда бы жолнеровъ не было у войску нашомъ; тогда сторожу вси повинни держати войско Великого Князства Литовского, кгдажъ то не чья иншая потреба и безпечность, одно ихъ властная.

АРТЫКУЛЬ 20.

О наѣздъ на домъ и гумна на войнѣ шляхецкіе.

Уставуемъ, хтобы на войнѣ будучы одинъ другому на домъ або на гумно наѣжджалъ, або ставы и сажовки волочылъ; тогды тотъ, который на домъ и на гумно будетъ поѣждчати, маеть кгвалтъ и шкоду платити зособна на каждое наѣханье. Такъ тежъ и по дорожѣ будучы, хтобы кому на домъ и на гумно наѣхалъ, а бралъ, або ставы и сажовки выловилъ, або якіе шкоды починилъ; тогды маеть кгвалтъ и шкоды платити за слушнымъ доводомъ.

АРТЫКУЛЬ 21.

О стацыи, на войнѣ кому бы не доставало.

Уставуем, кому бы съ подданныхъ нашихъ будучы на войнѣ и лежечы войскомъ на одномъ мѣстцу стацыи на самого або на кони его не доставало; таковой маеть зъ вижомъ гетманскимъ ѣхати и взяти съ потребу живности на себе и на кони, и заплатити водлугъ уставы отъ насъ або гетмана нашего на тотъ часъ положоное водлугъ урожаю; нижли дрова мають брати волно, гдѣ стояти будутъ, але домовъ розбирати, плотовъ жечы, становъ и сажовокъ волочыти ани спущати, жыть яринъ умыслнѣ не травити ани топтати не мають. А хтобы таковой шкоду учынилъ, тотъ шкоду совито маеть платити; а хтобы на збожьяхъ и на яринахъ обозомъ умыслнѣ положылъ и шкоду вчынилъ, такового маеть панъ гетманъ карати водлѣ шкоды и выступу его; а хтобы тежъ маючы стацыю у себе у въ обозѣ досытъ, а предсе не вживаючы, иншое собѣ найдоваль и за вижомъ бралъ, таковой то што озметъ, тому, у кого взялъ, совито ворочати або платити маеть.

АРТЫКУЛЬ 22.

О бранью вижа на стацыю отъ гетмановъ.

Тежъ уставуемъ, хотечы мѣти * на войнѣ, кому бы для недостатку стацый вижа была потреба; тогды гетманъ нашъ винень будетъ вижа придавати на скупованье стацый. А вижомъ его вижованое не маеть быти давано на милю по грошу, одно жъ на кгвалты бои и тому, хтобы на шкоду свою бралъ вижа, таковымъ вижованое маеть быти давано по грошу на милю, и если на мѣстцу не будучы нигдѣ мили, также по грошу мають давати.

АРТЫКУЛЬ 23.

О квалтъ або о находъ военный у въ обозѢ.

Тежъ уставуемъ, если бы хто будучы на службѢ нашей одинъ другого умыслилѢ або оборочаючы або обычаемъ звады наѢхалъ ** або на станъ квалтомъ, кого забилъ або ранилъ, а было бы на него переведено; тотъ горло тратить. А если бы не ранилъ, але умыслилѢ своволилѢ нашедшы ударилъ, а хотя и не ударилъ *** ; такового панъ гетманъ карати маеть водлѢ баченья своего.

АРТЫКУЛ 24.

О людехъ пенежныхъ, якъ мають съ имѢней своихъ службу земскую служыти.

Тежъ уставуемъ, хтобы кольвекъ съ подданныхъ нашихъ пенези наши бралъ, таковые за пенези наши особами мають въ гуфѢ пенежномъ становитисе, а зъ особы своее людей годныхъ шляхецскихъ съ почты подъ хоруговью повѢтовою, або тамъ, здавна гдѢ мѢстце свое мають, становити; абы за тые пенези, которые въ ротмитсровъ, служба земская зъ имѢней ихъ не гинула.

АРТЫКУЛ 25.

О чужоземские прибылые люди, якъ се мають заховать въ тегненью.

Уставуемъ тежъ, ижъ людей прибылыхъ такъ обчыхъ яко и сусѢдныхъ заграничниковъ приймавати и вести до панства нашего Великого Князства Литовского и черезъ тое панство маемъ, ижъ за вѢдомостью и радами радъ нашихъ Великого Князства. ВѢдже тые люди прибылые яко тежъ и тутошніе жолнере не мають иншыми дорогами и до иншого мѢстца стягнути и на лежахъ се роскладати, одно тамъ гдѢ мы Господаръ або гетьманъ великій тогожъ Великого Князства ознаимить, а лежу роспишетъ; а дорогъ изъ лежъ ихъ отъ насъ и отъ гетмана Литовского даныхъ и ознаименыхъ они Ѣздити въ пицованье нигдѢ не мають, але тамъ въ дорозе на ночлегохъ и на лежахъ и зъ сторонъ живность звезеную они торгомъ або уставою, яко мы зъ радами нашими уфалимъ або гетманъ въ небытности

нашой установитъ, мають куповати. А порядокъ до данья тое живности и цѣну также мы зъ радами нашими сегожь панства въ онъ часъ уфалимы водлѣ потребы.

АРТЫКУЛ 26.

О шкоды въ тяненю о жолнеровъ такъ тубылцовъ яко чужоземцовъ.

Тежь уставуемъ, ижь гдѣ бы люди пенежные жолнерскіе драби прыбылые изъ иншихъ панствъ и тубылцы ку потребѣ нашой земской того панства нашего тягнули, которые спорные на мѣстца имъ зложные и назначоны, або на земли нашой украинной, тогда шкоды ни которіе никому не мають чинити ани на домъ ани на гуина и обору шляхецкіе наѣжджати и собѣ зъ нихъ брати не мають; але живность собѣ и всякіе потребы за пенязи купити мають цѣною, або водлугъ уставы, кгда быхмо уставу нашу таковымъ людемъ пенежнымъ учинили, а квалтомъ ничего ни въ кого не мають брати. Вѣдже въ таковомъ тягненю за вижы нашими або гетманскими або за врядовымъ, гдѣ бы ити, и зъ сель подданиыхъ своихъ духовные и свѣцкіе стацый на дорогѣ завозити и провадити не хотѣль; тогда уставою нашою платечы мають брати. А хтобы зъ нихъ на домъ або на обору и на гумна шляхецкіе такъ духовныхъ яко и свѣцкихъ для стоянья и для бранья стацый наѣхаль, або нашоль квалтомъ; таковые горло тратять, а шкода маеть быти плачона ись статку его. И такъ о тотъ квалтъ яко и оные шкоды, которіе бы ся комужь кольвекъ отъ жолнеровъ и отъ драбовъ въ тягненю безъ гетмана стали, рохмистрове и зъ старостами або державцами нашими, подъ которого повѣтомъ або врядомъ то ся станеть, мають справедливость и отправу каранье заразъ не откладаючи чинити, водле сего права и статуту тогожь Великого Князства Литовского. Кгда бы ротмистръ таковыхъ збытныхъ и шкодниковъ за обсыланьемъ старость и державецъ не ставиль и справедливости каранья и нагороженья вдѣлати не хотѣль; тогда тые врядники наши намъ Господару або гетману нашому мають оповѣдати або дати знати; а мы або въ небытности нашой гетманъ нашъ ротмистровъ таковыхъ, противныхъ статуту и уфалѣ земской, везнемъ, а выступниковъ шкодниковъ таковыхъ водлѣ выступу ихъ карати маемъ, яко вышей есть о томъ написано. Вѣдже сесь артыкулъ и постановенье наше статутное за границахъ або на мѣстцахъ при даваню пенезей маемъ казати служебнымъ, оповѣдати для того, абы се не вѣдомастью не вымовляли.

АРТЫКУЛЬ 27.

О блудяги на войнѣ.

Уставуемъ о блудяги, абы кождый у войску нашомъ въ тегненю не смѣль коня блудяги держати въ себѣ только черезъ ночь а мѣстцу до третего дня, але тогожь часу маеть его вести до гетмана нашего. А хтобы держаль далѣй нижли черезъ ночь таковой конь за злодѣйство маеть быти поличонъ; такъ тежь и кождую речъ знаходшы нести маеть до гетмана. А гетманъ нашъ не маеть казати отъ блудяги брати болшей толко отъ коня по

грошу, а о иншыє рѣчы, въ обозѣ закликати, а то, што нашоль маеть, до пана гетмана отдавати.

АРТЫКУЛЬ 28.

О указанью а пописованью шляхты повѣтовое у воеводствахъ або у старостахъ головныхъ.

Уставуемъ тежъ мы Господарь и приказуемъ, всихъ радъ нашихъ Великого Князства Литовского, вѣдаючи того потребу часу покою, роскажемъ и рокъ листы нашими ознаймимъ всимъ обывателемъ Великого Князства всякого стану, яко хто водлугъ уфалы земское служыти войну повинень, абы оказывали и пописовалисе въ повѣтѣхъ судовыхъ оногю дня. А мають ся оказовати и пописовати передъ воеводами, а въ земли Жомойтской ино передъ старостою Жомойтскимъ, а индеи передъ головными старостами, а хто въ розныхъ повѣтѣхъ имѣнья маеть, тотъ при головнѣйшомъ имѣнью иншыхъ имѣней своихъ почотъ показовати и пописовати мають; а тые воеводове и старостове головные въ тотъ часъ свое почты показовати и пописовати мають, якъ которые се тамъ для попису и оказованья изѣдуть, тые живность собѣ не уставою але торгомъ куповати иають, а отъ того попису у тыхъ, которые се тамъ зберуть и укажугъ, не мають ничего брати.

АРТЫКУЛЬ 29.

Яко на войнѣ повинные у войску отъ гетмана далеко становитисе не мають.

Уставуемъ тежъ, абы ниhto не смѣлъ далѣй мили отъ гетмана нашего у войску становитися, але такъ яко имъ водлѣ потребности часу панъ гетманъ раскажетъ.

РОЗДѢЛЬ ТРЕТІЙ О ВОЛЬНОСТЯХЪ ШЛЯХЕЦКИХЪ И О РОЗМНОЖЕНЬЮ ВЕЛИКОГО КНЯЗСТВА ЛИТОВСКОГО.

АРТЫКУЛЬ 1.

О размноженью Великого Князства Литовского.

Мы Господарь обѣцуюемъ тежь и шлюбуемъ за себе и за потомки наши Великіе Князи Литовскіе подѣ тоужъ присегою нашою, которую есыю учинили всимъ обывателемъ всихъ земель Великого Князства Литовского и всихъ земель ку нему здавна и теперъ належачыхъ у славѣ, титулѣ, столицы, зацность, и владзы, и можность росказованью, и въ иныхъ всихъ належностяхъ и прислухиванью и въ границахъ ни въ чомъ не вменшати и о вшемъ примножати. И хотя бы панъ Богъ зѣ ласки свое светое намъ Господару узычити рачыль панства Литовского князей и пановъ радѣ духовныхъ и свѣцскихъ и всихъ врядниковъ земскихъ и дворныхъ шляхту рыцарства и всихъ иныхъ становъ ни въ чомъ томъ не понижати, але отъ всякое легкости и пониженья, яко славное памяти продки наши, Великіе Князи Литовскіе, за щастливого панованья своего чынити стеречы и боронити будемъ, съ помочью Божьею стараючисе о примноженье и вывышенья того панства и всихъ становъ достойности оздобѣ и пожитковъ зѣ наиболшою пилностью и всилованьемъ нашимъ.

АРТЫКУЛЬ 2.

О вольностяхъ шляхецкихъ.

Тежь мы Господарь обѣцуюемъ словомъ нашимъ за насъ и за потомки наши Великіе Князи Литовскіе подѣ такимъ же обовязкомъ нашимъ, яко вышей у первомъ артыкулѣ есть описано, ижъ всихъ князей и пановъ радѣ, якъ духовныхъ, такъ и свѣцскихъ, и всѣхъ врядниковъ земскихъ и дворныхъ, пановъ хоруговныхъ, шляхту, рыцарство, мѣщане и всихъ людей посполитыхъ у Великомъ Князствѣ Литовскомъ и во всихъ земляхъ того панства намъ заховати при свободахъ и вольностяхъ хрестіанскихъ, въ которыхъ они, яко люде вольные, вольно обираючы изъ стародавна изъ вѣчныхъ своихъ продковъ собѣ пановъ и Господарей Великихъ Князей Литовскихъ, жыли и справовали прикладомъ и способомъ волныхъ панствъ хрестіанскихъ, равнаючы однако маючы и тыхъ вольностей уживаючы и зѣ сусѣды братьею своею рыцарствомъ и иные станы народу Коруны Польское, и особливѣ на то при свободахъ и вольностяхъ и листѣхъ Великихъ Князей Литовскихъ, продковъ нашихъ, и отъ насъ всѣмъ вобецъ яко и каждому зособна на учтивости достоенства вряды на имѣнья на люде на кгрунты и на што кольвекъ даныхъ, и што еще будутъ даваны впередѣ, непорушнѣ неотмѣннѣ (вѣчными часы ховати). А хтобы тежь што хотя безъ привилеєвъ за отчизнымъ правомъ якимъ кольвекъ обычаемъ набытыхъ людей кгрунтовъ своихъ въ держанью былъ, такъ за славного панованья продковъ нашихъ Короля его милости Казимера и Александра, яко тежь за светое памяти и отца нашего и за нашего щастливого панованья, тые сами съ потомки ихъ близкими своими и теперъ то вѣчнѣ держати мають и будутъ.

АРТЫКУЛЬ 3.

Мы господарь обѣцуюемъ розмножати Великое Князство Литовское, а штобы розобрано и одышло зась ку нему привернути.

Тежъ добра Князства Литовского не уменьшымъ и то, што будетъ черезъ неприятелей того панства нашего отдалено розобрано и ку иному панству отъ того нашего коли кольвекъ упрошоно, ку КоронѢ ку Мазовшу ку Прусомъ ку Ифлянтюмъ, то за се ку власности того Великого Князства привести привлащати и границы оправити обѣцуюемъ. А хотя быхъ тежъ кому заграничникомъ при границахъ тыхъ верху мененыхъ земли имѣнья села и люди дали; тогды таковыя мають съ того служыти Великому Князству Литовскому, а хтобы не хотѣль служыти, таковыхъ привилей не маемъ мы и потомки наши держати.

АРТЫКУЛЬ 4.

О неданье шляхты и ихъ имѣней кгрунтовъ и всякихъ вольностей и тежъ неданье листовъ и привилейъ против сему статуту.

Уставуесь и вѣчными часы ховати и держати обѣцуюемъ, ижъ яко продки наши Великіе Князи Литовскіе, такъ и мы незвыкые никому ни которымъ способомъ бояръ шляхецкихъ имѣней кгрунтовъ и земель давати, такъ и теперь на всѣ потомные часы обѣцуюемъ и прирѣкаемъ подъ тою жъ присегою нашою, которую есмы учили обывателемъ сего панства нашего Великого Князства Литовского, бояръ шляхты и ихъ имѣней кгрунтовъ и всякое маетности и иныхъ свободъ и вольностей и правъ въ нихъ отбирати и отводить, и ни якимъ особамъ, которымъ кольве въ томъ панствѣ обывателемъ яко и заграничникомъ и постороннимъ и жадному иному, давати записовати и ни которымъ способомъ отдаляти не маемъ. А гдѣ бы што одержано и вышло якимъ же кольвекъ обычаемъ противъ сего статуту; то с права и суду справедливость черезъ насъ и потомки наши за радою радъ нашихъ Великого Князства на сторону отложено и ни во што обернено быти маеть. А про то привилейъ такъ въ посполитомъ яко и каждому зособна не маемъ ани будемъ мочи давати противъ сего статуту и артыкуловъ въ немъ описаныхъ; а которые бы передъ тумъ вышли и про то съ канцляреи наше по выданью сего статуту отъ насъ черезъ кого кольвекъ одержаны были, таковыхъ мы и потомки наши держати не хочемъ, але справа и суду сказовати и ни во што оборочати будемъ. Вѣдже кому быхмо зъ ласки наше дали и давати хотѣли родичомъ Великого Князства имѣнья наши спадковыя, и въ нихъ бояре хотя бы шляхта была, а имѣныша свои здавна и ново тежъ черезъ данину оныхъ пановъ, по комъ на насъ Господаря тые спадки пришли, (мели) и имъ служыли, а листы потверженьемъ нашимъ не вызволили, въ томъ моцы рукъ и щодробности наше и потомковъ нашихъ не замыкаемъ.

АРТЫКУЛЬ 5.

О соймикохъ повѣтвовыхъ и о выправованью и посланью зъ нихъ пословъ земскихъ на вальный соймъ.

Уставуемъ для лѣпшого порядку во всѣхъ речахъ и въ способу ку справедливости и оборонѣ, абы за волею всѣхъ на соймикахъ потребы се земскіе становили и отправованы были, абы вѣчными часы передъ сеймомъ великимъ вальнымъ, которымъ маемъ мы и потомки наши завжды, коли того потреба окажетъ Речи Посполитое Великого Князства, порядоу радъ нашихъ тогожъ панства складати листы нашими соймики повѣтвовые, а меновите на тыхъ мѣстцахъ и воеводствахъ нижей суть написаныхъ и постановленныхъ, которые соймики также листы нашими даны будутъ не на близшей часъ и рокъ, толко за чотыры недѣли передъ соймомъ великимъ. На которые соймики мають зѣжджатися и бывати тые воеводове и каштелянове вранники земскіе, потомужъ князове панове шляхта того жъ повѣту и воеводства, а намовляти о тыхъ речахъ и потребахъ земскихъ, которые имъ на мѣстцахъ нашихъ ознайменены будутъ, на мней тежъ о своихъ и о всѣхъ потребахъ земскихъ и долегlostяхъ оногo повѣту и воеводства; и зволившыся вси одностайнымъ зданьемъ мають обирати пословъ своихъ, то есть отъ каждого суду земского, колко ихъ у томъ воедствѣ будетъ, по двѣ особы, послати ихъ на соймъ ознаймившы и вручившы то все имъ, о чомъ водлѣ листовъ нашихъ господарскихъ, и тежъ во всѣхъ потребахъ, радити намовляти и становити мають, даючы имъ моць на томъ таковомъ вальномъ соймѣ поступовати и кончыти тые и иные припалые речи водлѣ часу и потребы. Вѣдже князей, пановъ, маршалковъ и иныхъ всихъ урядниковъ земскихъ и дворныхъ подлѣ старого обычаю маемъ листы нашими на таковой вальный соймъ взывати; и тые вси въ радѣ посполитой мѣстца и воты свои будутъ мѣти способомъ звычайу стародавнего, а послове земскіе мѣстца и воты свое мають мѣти водлѣ порядку нижей написаного.

АРТЫКУЛЬ 6.

О сойму вальномъ.

При том тежъ уставуемъ, съ призволениемъ радъ нашихъ духовныхъ и свѣцкихъ и зо всеми станы сойму належачыми, на теперешнем сойму великомъ Виленскомъ, хочечы то все мѣти вѣчными часы, ижъ маемъ мы и потомки наши Великіе Князи Литовскіе съ потребы Речи Посполитое за радою радъ нашихъ того жъ панства, або за прозбою рыцерства, складати сеймы вальные въ томъ же панствѣ Великомъ Князствѣ Литовскомъ завжды, коли колко того будетъ потреба.

АРТЫКУЛЬ 7.

Абы шляхтичь безправнѢ не былъ имань ани сажонь.

Тежъ обѣцуюемъ и вѣчными часы мѣти хотимъ мы Государь и потомки наши, ижъ все рыцарство шляхту Великого Князства при вольностяхъ звыклыхъ, которые отъ насъ Государя и отъ предковъ нашихъ имъ суть наданы, будемъ повинни мѣти захвати и держати. Тежъ кождый шляхтичь осѣлый подлѣ права позванный, непоконанный правомъ, отъ насъ Государя и отъ каждого вряду имань и въ везенье сажонь быти не маеть.

АРТЫКУЛЬ 8.

Абы панове шляхту о почтивость ихъ сами не судили.

Тежъ уставуюемъ, ижъ княжата и панове рада наша шляхту и кождого бы зъ рыцарства нашего, которые тежъ шляхту нашу служебниками въ себе ховають, не мають сами о почтивость судити кромѣ насъ; бо тотъ судъ никому иному не належитъ одно Государю. А што се дотычетъ злодѣйства и иныхъ речей выступковъ — то волни будутъ панове ихъ зъ ними, осадившы при собѣ предъ се шляхту людей добрыхъ, справедливость чинити, а въ чомъ бы былъ хто съ права поконанъ, тогда тотъ за выступокъ свой терпѣти и каранъ маеть быти бы и горломъ.

АРТЫКУЛЬ 9.

Ижъ достоинствъ врьдовъ въ дѣдичтво чужоземцомъ дано быти не маеть.

Такъ тежъ мы Государь обѣцуюемъ и шлюбуюемъ подъ присегою нашою, которую учинили есмы Великому Князству Литовскому и всимъ станомъ и обывателемъ его, беручы то изъ статуту старого пана отца нашего Короля его милости тому панству Великому Князству Литовскому даного, а въ сесь выкладаючы и на то позволяючы, штожъ въ томъ панствѣ Великому Князствѣ Литовскомъ и во всихъ земляхъ ему прислухаючыхъ достоинствъ духовныхъ и свѣцкихъ городовъ дворовъ и крѣпостей староствъ въ держаньи и поживаньи и вѣчностей жадныхъ чужоземцомъ и заграничникомъ ани сусѣдомъ таго панства давати не иаемъ; але то все мы и потомки наши Великіе Князи Литовскіе давати будутъ повинни только Литвѣ а Руси, родичомъ старожитнымъ и врожонцамъ Великаго Князства Литовского и иныхъ земель тому Великому Князству належачыхъ. А хтобы съ чужоземцовъ заграничниковъ и сусѣдъ таго панства и всихъ земель ему прислухаючихъ важыль се што съ того упросьти взяти и въ держане прійти, а впомятый будучы того заразомъ не пустиль; тогда маетность его вся маеть быти взята до столу и скарбу нашего Великого Князства

Литовского. А хотя бы хто обчого народу за свое заслуги въ той речы посполитой пришоль ку осѣлости зъ ласки и данины наше, албо которымъ инымъ правомъ; тогда такыя толко осѣлости оное ужывати мають будучы обывателемъ обѣцнымъ Великаго Князства и служачы службу земскую томужъ панству. Але на достоенства и всякій врьдъ духовный и свѣцкій не маеть быти обираень, ани отъ насъ Господаря ставлень, толко здавна продковъ своихъ уроженецъ Великаго Князства Литовского Литвинъ и Русинъ. А гды бы одержаль обчого народу человѣкъ которій кольвекъ врьдъ духовный и свѣцкій противъ сему статуту, напомнимый того пустити не хотѣлъ; тогда таковой маетьность свою на насъ Великаго Князя Литовского тратить, кгдажь около того и въ статутѣ судейскомъ Польскомъ есть описано.

АРТЫКУЛЬ 10.

Достоинства и врьды давныя не мають быти нарушоны.

Тежь обѣцуюмъ и хочемъ вѣчными часы мѣти, абы панове рада наша, такъ духовныя яко и свѣцкіе, и вси иные врьдника наши земскіе и дворные, въ томъ панствѣ нашемъ Великомъ Князствѣ Литовскомъ были во всякихъ достоенствахъ и у почтивостяхъ захованы водлѣ давного обычаю и кождый подлѣ зацности и мѣстца своего. А што се дотычетъ владности и справъ ихъ судовыхъ; въ томъ се они мають заховати и справовати, яко ниже въ семъ статутѣ есть описано.

АРТЫКУЛЬ 11.

Достоенствъ и врьдовъ на заочное обмовенье не маемъ одыймовати.

Тежь обѣцуюмъ, ижь достоенствъ всякихъ врьдовъ староствъ державъ тивунствъ на справу чію кольвекъ и на обмовы заочныя мы и потомки наши не мають отнимати; але коли бы который изъ врьдниковъ нашихъ былъ роспрошитель або шкодникъ нашъ и дворовъ нашихъ, и до насъ бы въ томъ обмовень и обвинень былъ; тогда обоя сторона, якъ тая хто ведеть, такъ на кого менишь, мають передъ нами очевисто стати, а мы съ паны радами нашими Великаго Князства Литовского, выслушавшы ихъ и розознавшы тую речъ, винного водле выступку его карати маемъ, а безвиннѣ и безъ права на заочное повѣданье не будемъ ни в кого врьдовъ брати, ани ихъ зъ нихъ рушати.

АРТЫКУЛ 12.

О держанью старыхъ уставъ, а новыхъ безъ сейму вальнаго не встановляти.

Тежъ прирекаемъ вси привелея земскіе стародавныи и ново отъ насъ наданыи волности и звычай добрый стародавний тымъ статутомъ нашимъ ховати и ни въ чомъ ни нарушати, а нового ничого не встановляти. А вѣдь же была ль бы того потреба што нового прибавити ку доброму речы посполитой; тогда того не маемъ чинити ани вставъ жадныхъ дѣлати, ажъ на вальномъ соймѣ того панства нашего и въ здѣшнемъ панствѣ нашомъ Великомъ Князствѣ Литовскомъ, зъ вѣдомостью порадою радъ нашихъ и призволеньемъ всихъ земель того панства нашего.

АРТЫКУЛЬ 13.

О волности выѣханья нашего изъ земли кромъ земель непріятельскихъ.

Тежъ узычаемъ и уфалюемъ вѣчными часы, абы княжата и панове хоруговныи шляхты и кождый человѣкъ рыцарскій и всякого стану того панства нашего Великого Князства Литовского мѣли вольность и моцъ выѣхати и выйти съ тыхъ земель нашихъ Великого Князства Литовского мѣли вольность и моцъ выѣхати и выйти съ тыхъ земель нашихъ Великого Князства * для наукъ у писъмѣ цвиченя учынокъ рыцарскихъ и лѣпшаго счастья своего, и тежъ будучы неспособного здоровья своего для лекарствъ до всякихъ сторонъ и земель, кромѣ земель непріятелей нашихъ Московского бесурманскихъ и иныхъ, съ кимъ тое панство наше на онъ часъ вальчыло; а вѣдьже такъ, абы изъ имѣней ихъ подъ тымъ часомъ въ небытности ихъ самихъ службы земское не были омѣшканы, але намъ и потомкомъ нашимъ яко при нихъ были завжды, только иле кротъ бы потребы вказовали подлѣ уфалы и уставы земское были заслугованы. А если бы сынъ поѣхаль по рыцарству, а отца собѣ зоставилъ, а въ небытности его отецъ бы вмеръ, а не оставилъ бы по собѣ другого сына дорослого або опекуна або близкаго крвнаго прироженого въ имѣняхъ; тогда мы Господаръ маемъ опекуна установити на тые имѣнья, хто бы зъ нихъ службу земскую заступоваль и имѣнья отъ кривды и шкодъ боронилъ, а кгда тотъ съ чужыхъ земель пріѣдетъ, маеть имѣнья и маетность свою до рукъ взяти яко властность свою.

АРТЫКУЛЬ 14.

По смерти отцовъ и матокъ и иныхъ кровныхъ и близкихъ ихъ дѣтей и потомковъ отъ каждого дѣдичтва спадкомъ выслуги и всякого набытья не отдаляти.

Тежъ уставуемъ, ижъ по смерти отцовъ и маток ихъ дѣти сынове и дочки отчизны и материзны не мають быти отдалены, але они сами и щадки ихъ властные кровные и близкіе правомъ прирожонимъ и слушне набытымъ звычайемъ стародавнымъ и тежъ статутомъ першым и теперешнимъ мають посягнути и одержати, и тые добра на пожитокъ свой оборочати вѣчными часы. А то се тежъ будетъ розумѣти о близкостяхъ спадкохъ выслугахъ и всякомъ набытью водлугъ права тымъ же обычаемъ, естли бы было колко братьи и сестръ рожоныхъ выданныхъ албо и не выданныхъ замужъ, а тые бы братья межы собою отчизною подѣлилися, албо еще не подѣлилися, а который бы зъ нихъ потомъ умеръ не оставивши по собѣ плоду; тогды его часть отчизны только на братью приходит и на ихъ потомство, а на сестри толко выправа съ четвертое части всякого имѣнья, естли бы передъ тымъ которая зъ нихъ замужъ идучы от отуа своего або тежъ отъ тое жъ братьи не была дана, поколь бы се были межы собою не подѣлили; а если бы была материзна, тогды мають братья зъ сестрами ровно подѣлити межы собою. Паклижъ бы Богъ такъ допустилъ, же бы оная братья померли вси, а у жадного потомства по нихъ не зостало, а хотя жъ бы и было, а потомъ се звело; тогды оная вся отчизна и всякимъ обычаемъ набытые имѣнья засе на сестры и на ихъ потомство спадываетъ. Нижли если бы еще такжо панъ Богъ допустилъ, же бы оныхъ братьи и ихъ сестры ани ихъ потомства и щадковъ не зостало; тогды оная отчизна ихъ вся также всякимъ обычаемъ слушное набытье имѣнья и маетности на близкихъ спадывати маеть, который есть наближшій до отчизны по мечу, водлѣ того жъ поступку также тежъ и материстые мають спасти на тыхъ, которые будутъ до материстого имѣнья и маетности наближшии по матцѣ оныхъ змерлыхъ, если бы черезъ нихъ кому слушнымъ записомъ не было заведено. Кромѣ тежъ того которые безъ потомства близыхъ щадковъ и наслѣдниковъ своихъ зомрутъ, а ни на кого права своего прирожоного выслужного и набытого не влившы а ни записавшы; бо по тыхъ тымъ обычаемъ имѣнья спадкомъ на насъ Господаря Великаго Князства Литовского и потомковъ нашихъ Великихъ Князей Литовскихъ приходятъ и приходити будутъ. А гдѣ потомства близкихъ и щадковъ изъ слядковъ (наслѣдниковъ) и надальшаго вже бы въ поколѣнью кровныхъ близкихъ не достало, и никому отъ нихъ записано и заведено не было; тогды по тыхъ и по таковыхъ обычаемъ имѣнья спадковъ на насъ Господаря Великаго Князя Литовского, и потомковъ Великаго Князства Литовского приходити будетъ.

АРТЫКУЛЬ 15.

Людей простыхъ надъ шляхту не повышати.

Тежъ простыхъ людей надъ шляхту не повышати, на достоинства ихъ прекладати и врядовъ нашихъ простымъ людемъ давати не маемъ, а шляхтѣ каждому рыццерскому человѣку тутошнего панства нашего Великаго Князства Литовского родичу мы Господарь, зъ ласки наше господарское за службами за годностями ихъ намъ господару, обѣцуемъ ихъ водлѣ годностей достоинствами и вряды опатровати и въ службахъ нашихъ заховати, яко вѣрныхъ подданныхъ.

АРТЫКУЛЬ 16.

О зводъ шляхецтва.

Уставуемъ тежъ, если бы хто кому рекъ, жебы не былъ шляхтичъ, тогды тотъ, хто ся выводитъ, маеть поставити зъ отца и матки двоухъ шляхтичовъ приржонныхъ, и на то имъ поприсегнути, ижъ ихъ естъ приржонный а правдивый шлхтичъ. А пакъ бы се будетъ родъ звель, а онъ бы тутошнего панства нашего тубылецъ; тогды бояръ шляхту околичныхъ маеть поставити двоухъ шляхтичовъ, которые мають при немъ присегнути, же онъ естъ зъ роду шляхтичъ. Пакли бы тежъ который шляхтичъ нешляхтянку жону свою мѣль, тогды жону и дѣти свои зъ нею спложные собою и шляхецтвомъ своимъ ошляхтитъ, и таковые жоны и дѣти ихъ за правдивыхъ шляхтичовъ быти мають. А вѣдже если бы таковая невѣста бывши за шляхтичомъ, а завсе бы потомъ пошла за простаго человѣка а не за шляхтича; тогды тая засе учтивость свою шляхецкую тратить, и въ такомъ станѣ быти маеть яко мужъ ее, за кимъ въ тотъ часъ будетъ; а дѣтемъ тымъ, которые съ первымъ мужемъ своимъ шляхтичомъ прыбыла, то предсе шкодити не будетъ, толко бы ремесломъ а ни шынкомъ се не живили и локтями не мѣрили, а вѣдже и таковой, если бы шынкъ и ремесло мѣстское хлопское покинулъ и опустилъ, а поступковъ шляхецскихъ и рыцерскихъ наслѣдовалъ, тогды предсе за шляхтича почитанъ быти маеть.

АРТЫКУЛЬ 17.

О чужоземцу наганеномъ о шляхецтво.

Тежъ если бы хто чужоземець былъ наганенъ о шляхецтво; тогды маеть ѣхать до земли своее, отколь естъ, и тамъ передъ врядомъ вывести шляхецтво свое, а зъ уряду подъ ихъ печатями листы принести, съ которыми шляхецтва своего маеть довести. А еслибы валка съ тое стороны была, отколь онъ естъ; тогды маеть поставити двоухъ особъ правдивыхъ шляхтячовъ съ тоежъ стороны своее, або тутошнихъ бывалыхъ въ той земли, которые бы были свѣдомы шляхецтва его, а тые мають также при немъ присегнути, ижъ онъ естъ шляхтичъ, таковымъ обычаемъ чужоземцу выводъ шляхецтва его будетъ. А кгда вже тотъ *, который ему приганилъ **, якимъ кольвекъ обычаемъ слушнымъ набылъ собѣ имѣнье шляхецское, а хотѣль вольностей шляхецскихъ ужывати; тогды первѣ маеть оказати передъ врядомъ тымъ, гдѣ купилъ имѣнье, если естъ шляхтичъ правдивый; а гдѣ бы не показалъ, тогды хотя имѣнье купить, предсе зъ вольностей шляхецскихъ веселитися и ихъ ужывати не маеть, ни под хороговью заровно зъ шляхтою стояти не будетъ, але близкіе его мають съ того имѣнья скупити и службу земскую зъ него стужити, а предсе достоинствъ и врядовъ одержати не маеть, хотя бы и шляхтичомъ былъ.

АРТЫКУЛЬ 18.

Если бы кто кому приганиль, а самъ не былъ шляхтичь.

Уставуемъ тежь, ижь кгда бы хто самъ не будучы шляхтичь приганиль человѣку доброму шляхтичу, а тотъ шляхтичь въ томъ станѣ своемъ шляхецскомъ былъ, и доводъ на шляхецство учинилъ, а то показаль, ижь не шляхтичь тотъ, хто ему приганиль; тогда тотъ шляхтичь тому нешляхтичу таковое приемве не будетъ повиненъ справоватися, и таковая примовы ничога ему шкодити не маеть, але того который важылся тую примовку учинити, маеть врьдъ нашъ урѣзаньемъ языка карати.

АРТЫКУЛЬ 19.

О наганене шляхтича забитого.

Тежь если бы кому дана была вина о головщызну шляхецскую, а онъ бы подвѣдилъ, ижь тотъ забитый не былъ шляхтичь; тогда кгда того доведуть кровные, же былъ шляхтичь, маеть быти каранъ, яко о томъ ниже написано, а зособна и навезка зъ имѣнья его маеть быти плачона, яко бы живому шляхтичу наганиль.

АРТЫКУЛЬ 20.

О шляхтѣ, которые бы въ мѣстѣ осѣлость прынели.

Тежь уставуемъ, ижь кгда бы шляхтичь занехавшы имѣнья шляхецскаго, а ищучы пожывенья, шоль бы собѣ до мѣста и мѣшкаючы тамъ, торгъ мѣскій ведучы або шынкъ въ дому маючы або ремесло робечы, понехавшы на тотъ часъ шляхецтва своего подлѣ уставы ниже у артыкулѣ описаное; тогда сынове такового, кгда бы потомъ шынком и ремесломъ мѣстскимъ обходитися не хотѣли и локтемъ не мѣрили, а наслѣдовали поступковъ рыцерскихъ предковъ своихъ, таковыя мають быти за правую шляхту почитаны.

АРТКУЛЬ 21.

О простых людехъ, кдыжъ повышена чести и становъ за годностями заслугами могут мети.

АРТКУЛЬ 22.

Кды бы шляхтичь шляхтичу примовку якую учиниль, такъ о шляхецтво яко и о иные речы, заочнѣ и у въ очы.

Тежъ уставуемъ, ижъ кды бы князь панъ котораго кольвекъ стану и достойности, будучы толко бы одно роду шляхецскаго человѣкъ, заровно всихъ въ томъ почитаючы отъ вельможнаго и до навбожшаго шляхтича, однако розумѣючы, одинъ другому такъ о шляхецтво яко и о иные речы шкодливые доброй славѣ очевисто и заочнѣ примовку учиниль, а о то бы обѣ стороны ку праву приточили, а тотъ хто примовиль передъ правомъ того се запрѣль; тогда оному примовенному шокдिति не маеть, и того онъ не будетъ повиненъ справоватися, а тежъ тая примовка далѣй на того, хто се запрѣль, не маеть быти довожона.

АРТКУЛЬ 23.

О примовку, ижъ бы хпю не былъ чистого ложа сынъ.

Тежъ уставуемъ, ижъ коли бы хто кому рекъ, же ты нетыстого ложа сынъ, а того бы на него не довелъ; тогда сказуемъ, ижъ таковой маеть тую примовку передъ судомъ такъ очистити и тыми словы отмовити: што есмо мениль на тебе, же бы ты не былъ чыстого ложа сынъ, въ томъ на тебе брехалъ якъ песь. А гдѣ бы такъ упорный былъ, а тыми словы у того суда отмовити не хотѣль; тогда маеть седѣти у везенью на замку нашомъ такъ долго, ажъ тыми словы яко въ томъ артыкулѣ написано отмовить, а врадъ нашъ въ томъ упорномъ некоторое фолкги чинити на маеть. А вѣдъже доводъ на бенкарты не инакшый одно таковой быти маеть, хтобы дѣти не зъ вѣнчалною нешлюбною жоною мѣль; и таковымъ дѣтемъ отеуъ отъ правыхъ дѣтей и отъ кровныхъ ничого записати не можетъ. А таковыя дѣти надъ даръ надъ бенкарты* розумѣти (розумены) быти мають, которыхъ бы отецъ при властной жонѣ съ чужолозницею мѣль, а хотя бы по смерти правое малжонки тую подложницу свою поняль, а дѣтей зъ нею прибыль; тогда яко тые першыя блудные, такъ и тые хотя по вѣнчанью а въ шлюбѣ съ таковою жоною мѣти будутъ, предсе за бенкарты мають быти розумены. Которого бы се отецъ за живота вырекъ и не своимъ сыномъ быти его созналъ, одно же бы того не чиниль зъ вазни и зъ гнѣву противъ сыну або жоны своей и матцѣ его почтивой, або бы тежъ жебы его часъ не малый за дитя мѣль, и по его пороженью и съ собою маткою его а жоною своею терпѣль, бо яко вже его разъ за дитя

свое признавши маючы его при собѣ въ дому своемъ терпеливостью своею за дитя свое призналъ; такъ вже его потомъ чинити злымъ не маеть и не можетъ, кгда жь доброму ничого злого и непочтивога въ дому своемъ терпѣти не годитца. А особливе отецъ сына бенкартомъ учинити не можетъ за другое жоны своее маючы его, а звлаща естли будетъ того сына своего съ першою жоною своею маткою его мѣшкаючы за сына мѣли; тогды вже при мачосѣ отъ имѣнья отчизного отдаляти не можетъ потомужь. А matka яко за першого мужа своего такъ тежъ и за другого пошедши дѣтей своихъ ** тымъ правомъ и обычаемъ яко о отцы написано и сужона быти маеть.

АРТЫКУЛЬ 24.

О вызволенье отплатовъ новыхъ и подводъ кроме стародавнаго обычая, якъ тежъ по дорогамъ.

Тежъ уставуемъ и хотимъ мѣти, абы вси посполитые люди тяглые и вси поданные княжать пановъ хоруговныхъ шляхтъ боярь и мѣщанъ тыхъ земель Великого Князства Литовского отъ кождое дани плаченья и податку серебщиного, и тежъ дѣла и ото всякихъ беремьня камня дерева або дровъ ку паленью плиты и вапна на замки наши, кромъ стародавнаго обычая, такъ и подводы хтобы передъ тымъ даваль и подыймованье станцыи на станехъ и на мѣстцахъ звычайныхъ намъ Господарю посломъ гонцемъ нашимъ, такъ тежъ и мосты поправовати и новые на старихъ звычайныхъ мѣстцахъ будовати замки старіе поправовати, такъ и на тыхъ старихъ мѣстцахъ дѣленицы свое знову будовати и пословъ подыймовати, то водлугъ стародавнаго обычая въ цѣлости заховуемъ. А княжата панове рады воеводове старостове украинные и ниhto зъ шляхты, Ъздечы по дорогамъ отъ имѣнья до имѣнья своего и въ войско на замки украинные Ъдучы, имѣней шляхецкихъ и ихъ подданныхъ не мають шкодити, стаціи и подводъ брати, але собѣ и слугамъ и конемъ своимъ за пенези водлугъ торгу цѣною куповати будутъ повинни; а хтобы надъ сюю уставу нашу што учиниль, тотъ сторонѣ жалобливой кгвалту дванадцать рублей грошей платити маеть, а шкоду совито опраивти за слушнымъ доводомъ.

АРТЫКУЛЬ 25.

Естли бы котории съ подданныхъ нашихъ на князей панохъ або на комъ иномъ выслужыль имѣнье лежачое.

Коли бы который съ подданныхъ нашихъ выслужыль на князехъ або на панохъ або на комъ иномъ имѣнье лежачое, и будучы того имѣнья въ держанью онъ самъ або и потомки его отъити прочъ гдѣ хочеты зо всеми статки и зо всеимъ набытьемъ своимъ и накладомъ або будованьемъ, што будетъ на тое имѣнье наложыль, нижли еслибы листы ему даными и то выражоно ему было, же бы могъ тымъ имѣньемъ служыти ему * хочечи.

А вѣдѣже хтобы таковой листъ слузѣ своему дати хотѣль, тотъ маеть дати оному листъ подъ печатью своею и подъ печатми и свѣдомомъ людей добрихъ шляхты, а предсе то княжа або паня маеть обличнѣ пришедшы намъ Господарю, а въ небытности нашей господарской, тогда по вряду земскому оповѣдати, тогда таковой листъ маеть быти держанъ. А которій бы выслужылъ имѣнье на комъ кольвекъ, а по смерти того пана, на комъ бы тое имѣнье выслужылъ, дѣти хотѣли ся дѣлити, а тотъ слуга въ тотъ часъ на дѣлу ся не припоминаль, а листъ свой на тое имѣнье выслужоное въ дѣль пустиль поступилъ; тогда таковые листы и вольности его вжо никоторое моцы мѣти не будетъ, бо самъ того замовчалъ, и спадываетъ тое имѣнье на сына отчича. Который слуга естли будетъ тому служыти, и ему се въ дѣлу останеть, а естли бы служыти ему не хотѣль, волень имѣнье зоставити тому пану съ тымъ всимъ съ чимъ ему дано, самъ взявши статки свои, которые въ тое имѣнье внесъ, або што властнымъ грошомъ своимъ прибавиль, пойти прочь. А которій бы бояринъ шляхтичь князскій панскій выслужывшы на панѣ своемъ имѣнье и на немъ мѣшкаючи, а тому пану своему съ того имѣнья служечи, потомъ безъ воли и вѣдомости оного пана своего съ тымъ имѣньемъ пана своего поддался под кого иного; тогда о то позванный до суду, кгда на него то переведено будетъ, маеть быти каранъ, у везеньи седѣти чверть лѣта.

АРТЫКУЛЬ 26.

О позыванье свѣцскихъ въ духовное право.

Тежъ уставуемъ, ижъ бискупове и вси прелаты стану духовного и ихъ справцы княжать пановъ и всее шляхты рыуерства, мѣщанъ и всихъ подданныхъ нашихъ яко и шляхецскихъ не мають никого ку собѣ до духовного права о свѣцкіе речы вызывати; такъ и сами шляхта мѣщане и вси подданные наши и тежъ подданные шляхецскіе якого кольвекъ стану не мають се до духовного права утекати и повывати о речи свѣцкіе, подъ закладомъ сторонѣ позванной дватцатма рублями грошей и подъ нагороженьемъ утратъ всихъ зъ совитостью, нижли што духовному праву належыть и прислухать будетъ, то въ духовномъ правѣ справовано и сужоно быти маеть.

АРТЫКУЛЬ 27.

О мѣщанехъ мѣста нашего Виленского, якимъ правомъ шляхту зъ мѣщаны судити мають.

Тежъ уставуемъ, ижъ кгда бы се трафило жаловати которому шляхтичу на подданныхъ нашихъ мѣщанъ Виленскихъ о раны о головщизны; тогда о то судить вряду мѣскій

маеть своимъ судомъ, Майдеборскимъ правомъ, водлугъ привильевъ и наданья имъ отъ насъ Господаря и отъ продковъ нашихъ. Гдѣ бы се тежъ трафило якій квалтъ мѣщанину отъ шляхтича, хотя бы въ томъ мѣстѣ нашомъ Виленскомъ; тогды таковыя речы врядъ замковый земскій справедливость чинить будутъ правомъ земскимъ и статутомъ правъ посполитыхъ сего панства великого Князьства Литовского, и карати ведлугъ права и статуту земского. А мѣщане иныхъ мѣстъ шляхту судити мають о раны о головщизны ихъ шляхецкіе земскимъ правомъ, водлугъ стародавнего статуту Короля его милости Жикгимонта пана отца нашего.

АРТЫКУЛЬ 28.

О мѣщанехъ, ижъ селянь не мають на торгу грабити.

Тежъ уставуемъ, ижъ мѣщане подданные наши о долги свои якіе кольвекъ не мають селянь ани тежъ духовныхъ и свѣцскихъ ани чіихъ на торгу заповѣдати и грабити, ани тымъ собѣ справедливости на нихъ доводити; але о тые долги съ тыми виноватыми у пановъ ихъ, а зъ нашими поддаными у врядниковъ нашихъ, будутъ повинни справедливости доходити, а нашы врядники и панскіе мають имъ справедливости чинити. А естли бы хто пограбилъ не доведечи права; тогды маеть дати вины намъ Господарю три рубли грошей, а сторонѣ три рубли грошей, а грабежъ совито навезати и шкоду также совито оправити.

АРТЫКУЛЬ 29.

О слуги и о люди шляхецкіе челядь неволную, которіе до мѣстъ входятъ.

Уставуемъ, которіе бы слуги и люде отчизные або челядь невольная втекли отъ княжать пановъ або отъ которого шляхтича, и пришли до столечного мѣста нашего Виленского, або до иныхъ мѣстъ нашихъ князскихъ панскихъ и духовныхъ, въ земляхъ панства нашего Великого Князьства Литовского; ижъ тыхъ людей слугъ мають войтове бурмистрове радцы наши зъ мѣстъ нашихъ выслуhavшы слушного доводу отъ пановъ ихъ * судечи земскимъ правомъ, кромей которое бы слуги шляхецкіе до мѣстъ нашихъ, а приемши право въ которомъ зъ мѣстъ нашихъ ** войтове и врядники наши выдати не мають. А што се дотысечъ челяди неволное, которые бы пришли до мѣстъ нашихъ; тымъ ани права Майдеборского принятъе ани оселость ани тежъ заседене десети лѣтъ ку помочы быти не маеть, и повинны будутъ войтове и державцы и врядники наши имъ выдати ***. Такъ тежъ старостамъ и державцамъ и врядникомъ нашимъ, гдѣ права Майдеборского нѣтъ, на врядѣхъ нашихъ тымъ же обычаемъ противко таковымъ збѣгомъ заховатися мають.

АРТЫКУЛЬ 30.

О мѢрахъ, абы были ровны.

Уставуемъ, абы въ мѢстѢ нашомъ столечномъ Виленскомъ и въ кождымъ мѢстѢ нашомъ панства нашего Великого Князства Литовского, такъ тежъ въ мѢстѢхъ князскихъ, панскихъ, духовныхъ и свецскихъ, въ торгохъ збожье всякое продавати мѢра была однакова равна: то есть, абы была бочка, въ которой бочцѢ маеть быти чотыри корцы мѢры наше дворное равныхъ безъ верху и тресенья, але подъ стрыхъ; которая мѢра маеть быти чотыри корцы вымѢрена у Вильни отъ вряду пана воеводы Виленского, а при собѢ мають мѢти урядъ мѢстскій, гдѢ въ которыхъ мѢстехъ право Майдеборское есть. А по иныхъ, воеводствахъ и староствахъ и державствахъ и тивунствахъ нашихъ, также воеводове старостове и державцы и тивунове наши тые жъ мѢры постановити мають, абы не тресены и безъ верховъ были и клейта на тыхъ мѢрахъ положить. Абы бочка была въ чотыри корцы, а четверть бочки одинъ корецъ, въ той мѢрѢ всякое збожье мѢрено быти маеть подъ стрыхъ; таяжъ мѢра збожья маеть быти по мѢстомъ и торгомъ князскимъ панскимъ и землянскимъ, а по стодолахъ и въ корчмахъ въ дорозехъ. А хто бы кольвекъ смѢль ся того важыти, а иншіе мѢры уставляль и ихъ уживаль, таковой маеть заплатити намъ Господарю вины три рубли грошей. Тымъ же обычаемъ панове воеводове старостове на врядахъ своихъ съ таковыми уряды мѢсткими, около мѢри и цѢны шынкованья питья привозного мушкетлы малмазеи и меду пива, также около ваги и локтя, черезъ врядниковъ своихъ постановенье чинити мають.

АРТЫКУЛЬ 31.

Кнегинь, паней, дѢвокъ, вдовъ не маемъ ни за кого кгвалтомъ давати.

Тежъ обѢцуемъ и приказуемъ кнегинь, паней вдовъ, княжонъ, панень дѢвокъ шляхтянокъ и всякого иного стану рожаю земского, яко людей вольныхъ подъ вольнымъ панованьемъ нашимъ господарскимъ, заховати ихъ при вольностехъ ихъ, а кгвалтомъ ни за кого ихъ давати не маемъ безъ воли ихъ, за кого хотя, за того волно пойти.

АРТЫКУЛЬ 32.

Отець за живота своего змушенья не повинень имѢнья дѢтемъ поступовати, лечь по доброй воли части его.

Уставуемъ тежъ, ижъ отецъ дѣтемъ за живота своего змушенья не повиненъ имѣнья жадного поступовати, нижли по доброй воли своей, што воля его будетъ. Также невѣста, которая будетъ имѣнья свои отчизные або материстые мѣти, змушенья не повинна за живота своего дѣтемъ поступовати, але што будетъ добрая воля ее, то можетъ поступити. А што се до тычетъ материстыхъ имѣней, не будутъ ли мѣти на то слушного права и описовъ, повиненъ то сыну дорослому и дѣвцѣ замужъ ее выдавши поступити; а сынъ и дочка на отцу жадныхъ шкодъ и личбы съ тыхъ имѣней поискивати не мають.

АРТЫКУЛЬ 33.

Всимъ станомъ народу шляхецкого, якъ хотя, волно имѣньями шафовати.

Тежъ уставуемъ, ижъ всимъ станомъ шляхецкого народу яко и людемъ вольнымъ вольно есть и будетъ имѣньями своими отчизными материстыми и якимъ жъ кольвекъ обычаемъ набытыми шафовати, подлѣ потреби воли и подобанья своего отдати, продати, доровати, записати, заставити въ долгу и въ сумахъ завести, замѣняти; вѣдже водлѣ того, яко о томъ шырей у роздѣлѣ о записехъ есть описано.

АРТЫКУЛЬ 34.

О вольности шафовати выслугою своею.

Тежъ хто кому дати хотѣлъ даровати записывати або продати имѣнье выслугу свою на насъ Господарю; тотъ не можетъ того никому передъ жаднымъ урядомъ записати, только пришедшы и постановившы се передъ нами Господаремъ и зъ вѣдомомъ нашимъ, а мы того боронити не будемъ. Вѣдже которые бы мѣли привилья наши, а въ нихъ то доложено, ижъ волно ему отдати даровати и записати; таковые могутъ оное имѣнье записовати передъ кождымъ врядомъ, яко отчизну свою або куплю. А звлаща тые которые бы собѣ и потомкомъ своимъ на вѣчность описаную мѣли, а тые привилья мають на врядахъ оказываны быти; а которые бы леннымъ правомъ або доживотьемъ або до воли и ласки наше господарское мѣли, тыхъ маемъ заховати водлѣ привильевъ ихъ и ласки наше господарское.

АРТЫКУЛЬ 35.

О вольности шляхтѣ имгъня лежачые и иные маетности свои намъ Господарю записовати.

Тежъ хтобы хотѣль што намъ Господарю записати такъ имѣней лежачыхъ яко и иныхъ маетностей; тогда вольно будетъ каждому такъ передъ судомъ земскимъ яко и замковымъ, и тежъ сознаньемъ своимъ очевистымъ до книгъ нашихъ канцлярейскихъ и за листы нашими водле права записовати, а форіе (хорые) могутъ то намъ Господарю описовати тестаменты своими.

АРТЫКУЛЬ 36.

Хто чога за Короля Казимера и за Александра и за отца нашего Короля его милости Жикгимонта былъ въ держанью, тотъ вѣчнѣ таеть держати.

Хочемъ тежъ мѣти и уставуемъ, абы вси подданные наши, такъ духовные такъ и свѣцкіе, княжата и панове и вси шляхта, которые имѣнья свои отчызные выслужонные и купленые и якіе кольвекъ набытые, за предковъ нашихъ славное памяти Короля Казимера або дядка нашего Короля Александра, такъ тежъ и за отца нашего Короля его милости Жикгимонта и за нашего щастливого панованья, покойнѣ держали; тые мають таковыя имѣнья вѣчнѣ съ покоемъ держати, отъ сихъ часовъ и на потомные часы вживати они сами и потомки ихъ, бы добрѣ и листовъ ни которыхъ на то не мѣли.

АРТЫКУЛЬ 37.

Хто бы имѣнье отъ насъ въ кого отыймоваль.

Тежъ уставуемъ, кому быхмо мы Господарь имѣнье або люди и земли дали, а хто иншый по той данинѣ нашей тое имѣнье отнялъ; тогда тотъ, у кого отнято, можетъ того доходити и правомъ поискивати, нижли большей искати не можетъ одно, яко ему дано и якъ на насъ Господаря то держано, толко бы давности земское отъ того часу, яко ему дали, не омѣшкаль.

АРТЫКУЛЬ 38.

Што бы кому через листь дано або упрошоно, а онъ бы того не ужываль и въ молчаньи былъ через давность земскую, и тежь о лѣта дѣтиные, которые бы въ чужой земли были.

Тежь уставуемъ, естли бы што кому дано або продано за записомъ слушнымъ, будь тежь и передъ нами Господаремъ, або и передъ судомъ земскимъ было объявлено, а оный бы што ему дано продано або записано въ держанью и въ пожыванью десеть лѣтъ не былъ, и о то се врьдовнѣ не упоминаль; таковой по выйстю лѣтъ десети того доходить не можетъ, але держачый то вѣчнѣ маеть мѣти. А вѣдже тотъ, хто се вспоминаеть маеть его вспоминати через листы наши господарскіе и земскіе позвы, припозываючы его ку праву и становечыся за позвы; а хто бы позвы взявшы у себе держаль, а сторону ку праву не припозваль, таковое упоминанье за упоминанье у права не маеть быти приимовано. Лечь естли бы было написано дѣтемъ лѣтъ дорослыхъ не маючимъ; тогды имъ въ молодости лѣтъ ихъ давность земская не шкодить, хотя бы того въ держанью и въ поминанью не были и не припоминались, то есть лѣта дорослые мужчызнѣ осмнадцать лѣтъ а дѣвцѣ петнадцать лѣтъ. Хтобы тежь въ чужой земли былъ, тогды томужъ также давность земская не шкодить; нижли толко дѣти лѣтъ своихъ доросшы, такъ тежь и тотъ, хто въ чужой земли былъ, съ чужое земли приѣхавшы давности земское десети лѣтъ не омѣшкаль.

АРТЫКУЛЬ 39.

Мы Господаръ шлюбуемъ однакую справедливость всимъ чинить, а передъ судомъ * мы и панове рады наши брати не маемъ.

Обѣцуемъ тежь зъ ласки и доброты и милости нашей господарской ку подданнымъ нашимъ, всему рицеству Великого Князства Литовского, подъ сумненьемъ нашимъ, ижъ мы Господаръ и панове рада наши иаемъ кождому стану всимъ заровно однакую справедливость чинить безъ отволоки, а отъ права не маемъ ничего брати; потомужъ и панове рада наша, а не маемъ тежь стати и зычностью быти одной сторонѣ, але просто кождому справедливость дѣлати будемъ повинни, такъ тежь и панове рада наши подъ присегою, которую до рады вчинили, справедливость чинити будутъ повинни. А што се дотычетъ почтивостей шляхецскихъ, о то жадень съ пановъ радъ ани судъ замковый ани тежь судъ земскій повѣтовый не маеть судити, толко мы сами Господаръ съ порадю пановъ радъ нашихъ Великого Князства Литовского судити маемъ обычаемъ

вышейписанымъ. Вѣдже што здавна и теперь въ семь статутѣ суду замковому належить, то судъ замковый судити и отпраовати маеть.

АРТЫКУЛЬ 40.

О тыхъ, которые ѣдучи въ дорогу на поляхъ се становять, а збожью шкоду чинять.

Уставуемъ, хтобы ѣдучи дорогою бралъ албо жаль жито и иное жито збожье, або выпаствилъ и вытопталъ конми, и за ишпашъ грабити се не даль; таковой будеть повинень сторонѣ жалобливой три рубли грошей платити, а шкоду, што люди сторонніе на испаши ошацують, также платити и оправовати маеть.

АРТЫКУЛЬ 41.

О невывоженю приправъ военныхъ до земли непріятельское.

Уставуемъ и вѣчными то часы мѣти хочемъ, постерегаючи того, абы зо всихъ земель панства нашего Великого Князства Литовского яко жидове татарове купцы и вси подданные наши, которого кольвекъ стану, явнѣ и таемнѣ всякихъ броней желѣза ручницъ назовъ стрѣль и всякого иного наряду военного не выпускали и не вывозили, посломъ не продавали, съ чого бы непріятель силитись могъ. А хто бы се того смѣль важыти надъ тое розказанье и уставу нашу; тотъ ничимъ инымъ одно горломъ каранъ быти маеть, а товари и вся маетность его маеть быти до скарбу нашего взята, а того съ пильностью на всѣхъ замкохъ украинскихъ сторожове и вси врядники наши постерегати мають, а то се розумѣти будеть въ покою и подъ не впокоемъ.

РОЗДѢЛЬ 4-Й О СУДЬЯХЪ И О СУДѢХЪ .

АРТЫКУЛЬ 1.

О выбиранью судей въ повѣтѣ.

Уставуемъ, ижъ въ тыхъ повѣтѣхъ, которые суть ниже расписаны, и въ каждомъ такомъ повѣтѣ, гдѣ еще до сихъ часовъ не обраны, зособна мають быти судья подсудокъ и писарь, которые такъ и тымъ обычаемъ мають быть выбираны и на таковыя уряды установлены. На первой маемъ мы Господарь часъ певный зложити и то листы нашими по всихъ таковыхъ повѣтѣхъ ознанити, гдѣ въ каждомъ повѣтѣ княжата панове рада наша, также рицерство и шляхта вси, хто кольвекъ якого стану будетъ тамъ имѣнья свои мѣти, зѣхатися мають до двора, которій на посродку того повѣту будетъ, и тые которые ся зѣдуть не ждучи никого, хтобы въ повѣтѣ имѣнье маючи пріѣхати не хотѣль, ку тому року мають выбрати зо всее шляхты того повѣту братьи своее на каждый врьдъ таковой, на судейство чотырохъ людей добрихъ, на подсудство другихъ чотырохъ, на писарство третихъ чотырохъ людей добрыхъ, цнотливыхъ, ростропныхъ въ правѣ у мѣстныхъ**, роду шляхецкого, въ томъ повѣтѣ добрѣ оселыхъ, не иное вѣры только Хрестіанское; и выбравшы ихъ, тыхъ выбранныхъ черезъ листы свои намъ Господарю ознанити мають, а мы съ тыхъ всихъ дванадцати особъ выберемъ трехъ до того повѣту на врьдъ земскій, на

судь судою и подсудка и писара.

Которіе отъ насъ выбранные и потверженые на першыхъ рокохъ судовыхъ передъ повѣтовымъ воеводою, або въ небытности воеводиной передъ кашталыны, а въ земли Жомоитской передъ старостою Жомоитскимъ, при зобранью шляхты, што ихъ тамъ въ томъ часѣ будетъ, маеть судья подсудокъ и писарь присегнути тыми словами:

Я присегаю Пану Богу во Троицы единому, ижъ въ томъ повѣтѣ водлѣ Бога справедливе подле права и статуту сего писаного Великого Князства Литовского, водлугъ жалобы и отпору, ничего не прикладаючи ани уймуючи, буду сознавати и записы пріимовати, не фолкгуючи высокимъ и подлымъ станомъ на достоинствахъ и на врьдехъ седячимъ, на богатого ани на вбогого, на пріятеля кровного заховалого, ани на непріятеля, на тутошнего, не на гостя не смотречи, не съ пріязни не зъ вазни не зъ боязни не за посулы и дары, ани сподеваючися на потомъ дарованья и якого нагороженья, и не радечи сторонѣ, а ни боячися казни помсты и погрозокъ, але самого Бога и его светую справедливость и право посполитое и сумнѣнье свое передъ, очима маючи, тежъ роковъ николи не омѣшкываючи, кромъ великое правдивое и зложное хоробы; а якъ то справедливе присегаю Богу, такъ ми Боже помози; а естли несправдливое,— Боже ми не помози.

А писарь земскій маеть по Руску литерами и словы Рускими вси листы и поэвы писати, а не иншымъ языкомъ и словы, и такъ маеть писарь присегати.

Я, N, присегаю Пану Богу въ Троицы единому на томъ, ижъ справедливе водлѣ Бога и того права писаного и подлугъ мовенья и споровъ сторонѣ, ничего не прикладаючи ани уймуючы, у суду записовати и радити судьи и подсудку вѣрнѣ и справедливе, подлѣ сознанья сторонѣ и споровъ на судехъ и освѣдченья и оповѣданья судового и сказанья судового, и въ книги судовые вписовати буду а пилновати и догледовати, абы подлѣ сее присеги моее справедливе были вписованы, не маючи баченья на высокіе а ни подлые станы на достоинствахъ седячихъ, на богатого, ани на вбогого на пріятеля кровного заховалого, ани на непріятеля, на тутошнего, ани на гостя, не съ пріязни не зъ вазни не за

посулы и дары, а не бочыся вазни и помсты и погрозоць, не ждучы нагроженья, але самого Бога и его светую справедливостъ и право посполитое передь очима маючы, и сумнѣнье свое добрѣ а побожнѣ справуючы, такъ ми Боже поможы.

А потомъ, кгда бы который съ тыхъ на початку и знову отъ насъ теперъ выбранные умеръ, судья, подсудокъ, або писарь, а трафило се бы то въ небытности нашей; тогды тые, которые на тыхъ урядѣхъ зостануть, мають о томъ дати знати воеводѣ своему, а въ земли Жомоитской старостѣ Жомоитскому; а воевода маеть черезъ листы свои старостамъ врадникамъ и шляхтѣ того повѣту, а староста Жомоитскій тивуномъ шляхтѣ и всякого стану оное Жомоитское земли обывателемъ часъ зложити, на который зѣхавшиися вси станы оного повѣту и до такового двору нашего, яко вышей описано, мають на мѣстце того умерлого чотырохъ особъ таковыхъ же, яко и первымъ выменено, обрати и намъ черезъ листы свои отворотные за печатью воеводиною ознаймить; а мы потомъ съ тыхъ чотырохъ одного, который се намъ видѣти будетъ, выбравшы на мѣстцѣ того умерлого судьи подсудка або писара, которого съ тыхъ въ тотъ часъ потребовати будутъ, не отволочнѣ установити. А гдѣ бы на судство обрали подсудка або писара земского; тогды на тое мѣстце тамъ же за разомъ на тотъ врьдъ обобравшы къ намъ послати мають; а тотъ, кому тотъ врьдъ дамо, потомъ на першыхъ рокохъ судовыхъ будетъ повинень первой на мѣстцу тамъ передь тымъ воеводою або кашталяномъ и передь старостою оного суду такъ, яко вышей описано, присегнути, тожъ потомъ врьдомъ своимъ владнути и справовати. И такъ мають вжо вѣчными часы въ повѣтѣхъ около выбранья тыхъ врьдниковъ справоватися и заховати.

АРТЫКУЛЬ 2.

О моцы и владности судей, ижъ кождый и каждого стану повинень передь нами становитися, и о томъ, хтобы передь насъ не сталь.

Тежъ уставуемъ и даемъ моць вѣчными часы, звирхностью владности наше господарское съ прозволеньемъ пановъ радъ нашихъ и всихъ становъ всихъ земель того панства нашего Великого Князства Литовского, тымъ врьдомъ повѣтовымъ въ кождымъ повѣтѣ судьи и подсудку на роки зложоные позывати передь себе, судити и справовати всихъ пановъ радъ духовныхъ и свѣцскихъ, княжатъ, пановъ хоруговныхъ, шляхту и бояръ о земскіе речы зъ имѣней однако одностайно, хто одно кольве въ томъ повѣтѣ имѣнья свои мѣти будетъ, жадного не выймуючы ани зъ суду имене ихъ не выпускаючы, кромъ насъ Господара и врьдниковъ зъ имѣней нашихъ, а не ихъ имѣней, тыхъ они судити не могутъ, толко мы Господарь, або тотъ кому то подъ часомъ воли наше злецымъ. А хто бы кольвекъ маючы имѣнье свое въ томъ повѣтѣ передь ними се становити не хотѣль на часы певные, яко то ниже на своемъ мѣстцу постановлено, за позвы не хотѣль, або и ставшы съ початку а до конца розсудку и сказанья ихъ не слушаючы прочь отъ суду отышоль, не хочечы быти права послушнымъ; на таковые хто кольвекъ будетъ, такъ высокого яко и низшого стану, даемъ моць зуполную оному врьду земскому судьи и подсудку, ижъ мають подле сего права и артыкуловъ ниже о томъ постановеныхъ и написаныхъ поступокъ и сказанье и отправу чинити противъ кождому, яко хто у во што

упадець, ажъ до остатнегo стопня права. Нижли тотъ судъ земскій толко тыхъ артыкуловъ судити не маець и моцы мѣти не будеть, которіе ниже у артыкулѣ двадцатомъ суть описаны и замковому суду злецоны обычаемъ и способомъ о поступкахъ описанымъ. А выписы и листы судовые маець писарь рукою своею подписывати а не выдавати сторонѣ, ажъ передъ судьей и подсудкомъ вычтетъ первой нижли до книгъ уписавши.

АРТЫКУЛЬ 3.

О пересудахъ судьи подсудку або писару.

Тежъ уставуемъ, ижъ кгда бы судъ земскій и которій же кольвекъ врядъ нашихъ кому што на комъ присудилъ; тогда отъ презыску того, хто зыщеть, судья и подсудокъ мають брати отъ копы одному грошу, и съ того пересуду судьи два грошы а подсудку третій грошъ. Нижли што се дотчыеть, долгу хтобы платити не хотѣль, ажъ за позы съ права; тогда не тотъ пересудъ платити маець, хто зыщеть свою суму, але тотъ, хто позычилъ а безъ права заплатити не хотѣль, таковой самъ долги и пересудъ платити повинень будеть, окромъ долковъ по умерлой руцѣ. А што се дотчыеть того, хто се отъ кого оттяжеть; тогда памятного яко отъ великое такъ и отъ малое речы не повинень дати большей только чотыри грошы. А писару земскому и кгородскому такій доходъ: отъ кождыхъ позововъ по грошу, за вписованье въ книги грошъ, отъ выпису съ книгъ грошъ, и оповѣданья кривды писарю грошъ, а отъ судовыхъ листовъ и выписовъ за кождый позовъ, кгда отсужонъ будеть, по два грошы; а черезъ то яко вышей описано, бы тежъ наибольшей письма и працы было и речъ наиважнѣйшая, писари не мають больше брати отъ листу паркгаминового, естли сторона потребуеть съ привѣсистыми печатями, за працу писару дванадцать грошей, а паркгамень шнуры и воскъ сторона будеть повинна дати.

АРТЫКУЛЬ 4.

О возныхъ присезѣ и врядѣ ихъ.

Уставуемъ, хотечи мѣти, абы въ правѣ земскомъ завжды порядокъ и справа обычайнѣ шла, даемъ моць, абы воеводове въ кождомъ повѣтѣ судовомъ, гдѣ книги лежать, а староста Жемоитскій тамъ въ той земли Жемоитской возныхъ выбирали пострыгали уставляли тежъ шляхту людей добрихъ вѣры годныхъ цнотливыхъ оселыхъ въ томъ же повѣтѣ, такъ много яко бы ихъ потреба указовала водлѣ повѣту и шырокости его а

потребы людской, а принявши отъ его присегу въ рейстра свои вписовати и листы свои таковымъ вознымъ давати мають, и присега имъ маеть быти выдана тыми словы:

Я, N, присегаю Пану Богу въ Троицы Единому на томъ, ижъ будучи мнѣ вознымъ маю вѣрнѣ и цнотливѣ и побожнѣ на томъ врьдѣ заховатися, позвы справедливе относити и отдавати тежъ правдиве зозновати то, на што буду посланъ, кгвалты бо и огледавши и раны правдивѣ до книгъ врьдovýchъ созновати, и все иншое справовати, што належытъ врадови моему, не за посулами ани пріязнью ани за неприязнью ани за боязнью, одно водлѣ Бога и светое справедливости, такъ ми Боже поможы.— А завжды возный посланый зъ уряду што кольвекъ справовати будетъ, при кождой таковой справѣ мають мѣти при собѣ сторону двохъ шляхтичовъ, о которіе не возный але сторона старатися и ихъ собѣ набывати маеть.

АРТЫКУЛЬ 5.

Справа и врьдъ возного.

А то врьдъ возного: позвы носити и ими позывати, хотя безъ вѣдомости врьдovое, и рокъ складати водлугъ старого обычаю, а заповѣдити ижъ бы отъ права не уѣжджали, свѣдкомъ водлѣ сказанья у суду присегу выдавати, при освѣдченью всякомъ быти, увязывати зъ выроку и съ првданья судьи и подсудка за листы ихъ, а кгвалты розбой раны головщызны оглядывати и до книгъ врьдovýchъ, отъ которого врьду будетъ посланъ, созновати, и завжды маеть мѣти при собѣ при кождой таковой справѣ двухъ шляхтичовъ для подпору вызнанья и свѣдчества своего, а вѣдже бои грабежы и кривды раны и иншые шкоды тымъ подобные меншые а не кривавые, которые самъ одинъ и безъ стороны шляхты огледати и безъ посланья врьдovого на то вѣхати можетъ, однакожъ безъ жадного омѣшканья то все до книгъ врьдovýchъ маеть сознати, а сознание возного въ книгахъ такъ будетъ мощно, яко бы самъ возный очевисто сталъ. А гдѣ бы возный до книгъ не доѣхавшы и сознанья не вчинившы умеръ, а не было бы то въ книгахъ; тогда оная шляхта сторона и по смерти оногo возного маеть стати и подперети сознанья его. А гдѣ бы возный што кольвекъ такового непристойнаго справовалъ, albo ижъ бы неправдивѣ созновалъ, albo врьдомъ своимъ ку шкодѣ которое стороны фальшовалъ, шафовалъ за якою жъ кольвекъ причиною; тогда за доводомъ ничымъ только горломъ маеть быти каранъ. А што се дотычетъ доходу возному, отъ кого што маеть брати, то естъ коли гдѣ на которую справу поѣдетъ, тогда отъ мили по грошу у въ одну сторону, а што назадъ поѣдетъ, за то ничего брати не маеть; а если мили не поѣдетъ, только на мѣстцы позвы дастъ оглядывати кгвалту ранъ або прислухиватисе чого будетъ предсе, ему отъ того грошь, а отъ свѣдченья грошь; а гдѣ на увязованье поѣдетъ зъ тыхъ же людей, въ которые се увязывати будетъ, зъ службы по грошу брати маеть, а съ пустовщызны таковое, которую пашуть, по пол-грошу, а отъ пол-службы а отъ сумы пенезей отправаючы се отъ копы по два пенези брати будетъ.

АРТЫКУЛЬ 6.

Хто бы возного за посланьемъ и за листы вряду замкового и земского на справть збилъ, або листы въ него отнемшы содраль.

Уставуемъ тежь, хто бы возного на справѣ за листы воеводѣ вряду замкового або повѣтового збилъ, або листы отъ него отнемшы содраль, и тымъ вряду не учтилъ; тогда тотъ за доводомъ слушнымъ маеть возного навезати совито водлѣ стану его, а не замку албо у дворѣ повѣтовомъ шесть недѣль седѣти, а сторону которую бы при возномъ сбито маеть также за слушнышъ доводомъ навезати водлѣ стану, якого будетъ.

АРТЫКУЛЬ 7.

Абы особы врядовые сами судили а ни хто иншый на ихъ мѣстцу.

Уставуемъ, абы судья и подсудокъ сами черезъ себе ани черезъ свои намѣстники суды и роки отпраовали, окромѣ того еслибы который зъ нихъ самъ захораль, албо бы тежь свои власные потребы мѣлъ; тогда маеть человѣкомъ добримъ, цнотливымъ, вѣры годнымъ, и въ правѣ умѣстныхъ шляхтою такъ же въ томъ повѣтѣ оселомъ, мѣстце свое засадити. А вѣдѣже тотъ судья або подсудокъ, который се форымъ мѣнилъ быть, на другихъ рокохъ подѣ тою жъ присекою, которую на вряду свой присегаль, маеть повѣдити, ижъ правдиве немоцнѣ былъ, а не ку зволоцѣ права а ни ку чьей шкодѣ тою се форобою вымовлялъ. А гдѣ бы судья або подсудокъ безъ правдивое и обложное немоцы роковъ судовыхъ омѣшкиваль, а то бы се колко кротъ показывало, таковой вряду свой тратить. А писарь можетъ подписа, або одного або и двоухъ або колко ему будетъ потреба, при собѣ мѣти, а пилнѣ самъ завжды доглядати, абы вѣрнѣ а правдивѣ не проволокаючы але за разомъ до книгъ записывано было, а гдѣ бы се што такового въ правѣ отъ нихъ мылило, неповинна будетъ шляхта подписковъ смотрѣти, але на самомъ писару за оною помылкою шкоды своее доходити мають. А гдѣ быхмо зъ тыхъ врядника земского судью подсудка або писара на справы земскіе або въ посельствѣ послали; тогда до звернення того маемъ злетити и засадити мѣстце его человѣкомъ добримъ, шляхтичомъ въ томъ же повѣтѣ оселымъ; а тотъ маеть первой въ томъ же повѣтѣ на рокохъ першыхъ передѣ урядомъ замковымъ на томъ присегнути, ижъ до звернення оногo врядника справедливость людскую правдиве отпраовати будетъ.

АРТЫКУЛЬ 8.

О судьяхъ, якіе мають быти обираны.

Уставуемъ, ижъ на тые вяды яко на судейство на подсудковство и писарство не мають быти выбираны духовиые особы, а ни старостове державцы, а ни тивунове того повѣту, а ни хоружые и ни хто таковой, хтобы въ томъ повѣтѣ нашомъ вядникомъ былъ; але таковые и такъ мають быти выбираны яко вышей описано.

АРТЫКУЛЬ 9.

Яко и при комъ позвы позыватися мають, и якъ и гдѣ то освѣдчыти, и што возному за проѣздъ давати.

Тежъ хтобы на кого позвы взялъ и тыми позвы позывати его хотѣлъ, тогда позвы колько ихъ будетъ, маеть очевисто давати и позывати можетъ очевисто при костелѣ у суду и на каждомъ мѣстцу, гдѣ бы кольве его зостати и найти могъ, черезъ возного; а гдѣ бы ихъ очевисто дати не могъ, тогда на имѣнью того, съ которого се кривда дѣеть, маеть положить въ дворѣ томъ, або у ворота уткнути; а естли въ томъ имѣнью, съ которого кривда дѣеть, двора оного пана не было и ку жадному двору того пана оное имѣнье не прислухало, яко то бываетъ села данники на Руси и инде въ томъ панствѣ нашомъ, тогда тые позвы предсе што до наиблизшаго двора тое волости оного пана несены и въ ономъ дворѣ, яко о томъ вышей описано, вядовнѣ покладаны быти мають, и рокъ, который за тыми позвы зложыть, маеть на обоихъ позвехъ написати, абы и позваная и поводовая сторона року вѣдоми певны и пилены были. А кгда бы возный писати не вмѣлъ; тогда будетъ повинень оного позванья сознаны на письмѣ подъ печатью своею дати и на рокохъ судовыхъ передъ вядомъ земскимъ сознати, которое сознаны за слушное у права принято быти маеть.

АРТЫКУЛЬ 10.

О печати нашей господарской земской и тежъ о печатехъ вядовыхъ, которими што печатано маеть быти.

Тежъ мы Господаръ даемъ подъ гербомъ того панства нашего Великого Князства Литовского, погонее, печать до каждого повѣту, тую печать писарь земскій присяжный въ себе самъ а не хто иншый ховати маеть, которою печатью и подъ тытуломъ нашимъ позвы мають быти печатованы а выдаваны, а иншые никоторые листы выписы и сознаныя кромѣ только самихъ позвовъ тою печатью не маеть быти печатовано; але будутъ печатованы всякые листы того вяду земского судовые выписы и сказаныя печатьми судьиною подсудковою, а подписованы рукою того жъ писара земского.

АРТЫКУЛЬ 11.

О книгахъ земскихъ, въ каждомъ повѣте гдѣ будутъ хованы.

Уставуемъ тежъ, хотечы то мѣти, и приказуемъ, абы въ каждомъ такомъ повѣтѣ, гдѣ судъ земскій будетъ, въ замку альбо у дворѣ нашомъ, судья подсудокъ и писарь земскій посполъ зъ шляхтою выбрали збудовали и патрыли таковое мѣсто, гдѣ бы завжды книги земскіе безпечнѣ отъ всякое пригоды были захованы. А кгда роки ихъ сужоны будутъ, по выволанью роковъ мають книги еще не мней тры дни лежати, при которыхъ быти мають не отъждаючи судья подьсудокъ и писарь для сознанья и выписовъ бранья и для иныхъ потребъ шляхецскихъ; а разъждаючи мають тые книги вложыти и заховати въ скриню мощную за трема замками, отъ которыхъ одинъ ключъ будетъ у судьи другой у подсудка а третій у писара, а печатьми своими запечатовати мають. А передъ роками тотъ урядъ яко судья такъ подсудокъ и писарь за три дни мають прѣхати и списати въ реестръ позвы для того, хто кого первой позвалъ, абы тежъ тотъ а не иной былъ первой сужонъ. А кгда зъ реестру тры разы вызовуть, а не отзоветца тотъ кого волають; таковой маеть быти сказанъ, яко бы не сталъ. Тымъ же обычаемъ и поведовая сторона маеть розумѣно быти, ижъ волавшы сторонъ одного дня и другого, а третего дня волавшы, сторона не уставающая року маеть быти сказана за нестанье свое.

АРТЫКУЛЬ 12.

Хто бы за позваньемъ позвы на першыя другіе и третіе роки не сталъ безъ причины слушное.

Уставуемъ тежъ, хто бы будучы позванъ на першыхъ рокохъ не сталъ, и причины слушное нестанья своего у суду не оповѣдалъ; таковой маеть сторонѣ на другихъ рокохъ, первой нижли у судъ уступить, заплатити нестаного копу грошей, а суду дванадцать грошей, то есть судьи осмь грошей а подсудку чотыри грошы. А гдѣ бы о тое жъ на другіе роки также будучы позванъ у права не сталъ; тогда сторонѣ маеть заплатити три рубли грошей, а суду двадцать и чотыри гроши. А если бы также на третихъ рокохъ судовыхъ о тоежъ будучы позванъ у права не сталъ; таковой вжо въ речи своей упадываетъ и тую речь, о которой былъ позванъ на тые три роки судовые, вѣчиѣ тратитъ; а судъ на такомъ упорномъ тое о што позванъ будетъ шкоды и наклады правные сказати маеть. А гдѣ бы сторона позваная ставшы на рокохъ третихъ упоромъ своимъ тыхъ винъ за нестанье свое платити не хотѣла; тогда о што позвана будетъ въ речи своей упадываетъ такъ, яко бы и на вси роки не стала, а судъ маеть на такомъ упорномъ тое, о што былъ позванъ, сказати.

АРТЫКУЛЬ 13.

Хто бы за хоробою або за послугою нашою земскую за позвы стати не хотѣль.

Тежь уставуемъ, хто бы былъ позванъ на роки судовые першіе другіе и третіе, а зашла бы его хороба, або послуга наша земская и припалые потребы земскіе, або сеймъ вальный, або тежь повѣтрее моровое, для которыхъ бы на тыхъ трехъ рокахъ судовыхъ стати не могъ; тогды за таковымъ нестаньемъ яко нестаного платити такъ и речы тратити не маеть, нижли особъ суду и сторонѣ маеть дати знати: если жъ бы послуга наша земская або потреба тежь припала земская, тогды черезъ листы наши и пановъ радъ нашихъ, если бы хороба, тогды листомъ своимъ отворонимъ черезъ у моцованого пріятеля або слугу своего, а сеймъ и повѣтрее моровое то само собою кромъ обсылания вымовляетъ. А вѣдже тотъ, который се форобою закрываетъ, потомъ на першыхъ рокохъ за припозванемъ стороны поводовое маеть се отприсегнути, яко правдиве былъ немоцонъ, а если бы присегнути не хотѣль, тогды въ речы своей опадываетъ. А если бы на третихъ рокохъ за форобою не сталъ, тогды на тыхъ третихъ рокохъ маеть судъ земскій послати до него вознаго и при немъ двоухъ шляхтичовъ, передъ которыми тотъ форый на томъ маеть присегнути, ижъ по вси тые роки форъ былъ и за тою форобою стати не могъ; а кгда присягнетъ, на онъ часъ отъ всихъ винъ вышей описаныхъ будетъ воленъ, а кгда бы присегнути не хотѣль, таковой оный выны маеть платити. И хотя бы предсе форъ былъ, вжо будетъ повиненъ самъ черезъ себе або черезъ умоцованого своего на четвертыхъ рокохъ на конецъ усправедливитися не вымовлячисе форобою. Пакли жъ бы и въ четвертыхъ рокохъ черезъ умоцованого усправедливитися не хотѣль, тотъ вжо въ речы той, о которую позванъ, упадываетъ и вѣчнѣ то сказано быти маеть.

АРТЫКУЛЬ 14.

Хто бы кого позвавшы на роки судовые, самъ безъ слушное причины не сталъ.

Уставуемъ тежь, хто бы кого позвавшы ку праву, а будучы стороною поводовою, безъ слушныхъ причинъ, яко вышей о позваномъ описано, и не даючы о собѣ причины слушное суду и сторонѣ знати не даль, и самъ съ доводомъ своимъ не сталъ; тогды оному позваному, гдѣ бы хотѣль его о то другій разъ позвати, маеть первой за нестанье свое справу и накладъ его заплатити, тожь потомъ о свое мовити. А пакли бы и другій разъ позваль о тую жъ речъ, и самъ же и повторе не сталъ; тогды тую речъ, о што позваль, тратитъ, а позванный тотъ, хто року и права за позвы пилнуеть, вжо отъ того часу о што позванъ на вси пришлые часы будетъ воленъ *.

А если бы сторона поводова ставшы и у право уступившы, маючы споръ зъ стороною обжалованую на правѣ зъ якихъ припалыхъ причинъ, о которыхъ передъ правомъ не вѣдала, а брала се еще на якій иной доводъ, которого на тотъ часъ ку праву на судѣ зъ собою мѣти не могла, або о немъ не вѣдала, а просила бы на отложено на другіе роки судовые; тогда судъ маеть того допустити, а тымъ речы своей не тратитъ, а на другихъ рокохъ судовыхъ естли бы самъ не сталь, або доводу не ставиль, тогда речъ свою тратитъ. Такъ тежъ и сторона позваная если бы на тыхъ рокохъ и за такъ короткимъ часомъ ему за позвы зложонымъ не могла правдивѣ за якою слушною причиною пристойною и вѣдомою листовъ або заводцы мѣти, и брала бы се въ таковыхъ рокохъ и артыкулахъ на другіе роки; тогда судъ маеть ей того допустити, а вѣдъже на тыхъ другихъ рокохъ будетъ повинна зо всимъ готова быти, и то передъ судомъ яснѣ показати, ижъ тотъ рокъ собѣ одержала и впросила не на проволоку якую сторонѣ поводовой, але ижъ безъ того быти не могло. А гдѣ бы се то у суда показало, ижъ неслушнѣ ку кривдѣ и проволоцѣ сторонѣ противной таковой рокъ хто собѣ одержаль, маючы то мѣти на першыхъ рокохъ; таковой повиненъ сторонѣ шкоды, которые за отволокою его принела, на чомъ присягнетъ, платити будетъ.

АРТЫКУЛЬ 15.

Хто бы кого черезъ судъ або еднане ку праву позваль.

Уставуемъ, хто бы съ кимъ мѣвшы право и утратившы которую речъ на правѣ або еднаньи, а по судѣ зъєднавши о то за се его до права позваль, и по правѣ тое жъ речы за се знову искаль и того доходиль; таковой будетъ повиненъ заплатити сторонѣ семь копъ грошей, судьи двѣ копе грошей, а подсудку копу грошей, а тотъ судъ и единање предсе при моцы зостати маеть.

АРТЫКУЛЬ 16.

Ижъ въ позвѣхъ ни хто не маеть ни на кого речей неучтивыхъ писати и образливыхъ доброй славѣ.

Уставуемъ тежъ, ижъ въ позвѣхъ нашихъ земскихъ тые, которые ихъ берутъ, не мають писати речей доткливыхъ ку почтивости; а гдѣ бы позваль такъ, тогда на такіе позвы сторона позваная ставшы не повинна отповѣдати, ажъ се онъ на другихъ рокохъ на позвѣхъ своихъ поправить, нишли што се дотычетъ наѣздовъ домовыхъ, квалтовъ бѣлымъ головамъ, выжоги, разбоевъ и иныхъ злочынствъ, которые артыкулы на врядъ

нашъ замковый судъ а не земскій належать, о то каждый подлѣ учинку такового можетъ въ позвехъ меновите написати.

АРТЫКУЛЬ 17.

Хто имѣнья свои въ розныхъ повѣstechъ маеть, а доколка судовъ розныхъ зъ имѣней розныхъ на одны роки за разомъ будетъ позванъ.

Уставуемъ, естли бы хто съ подданныхъ нашихъ въ розныхъ повѣstechъ имѣнья свои мѣль и до розныхъ судовъ былъ позванъ, а роки бы на одинъ часъ въ тыхъ повѣстѣхъ, до которыхъ есть до суду позванъ, притрафили; тогда маеть въ томъ повѣстѣ стати, до которого есть о большую речъ припозванъ. А вѣдже сутяжымъ своимъ маеть черезъ листъ свой и черезъ возного и шляхту людей добрихъ стороннихъ и суду повѣстовому, у которого се не становить, о собѣ дати вѣдати, ижъ для лепшое и большое речы, о которую есть позванъ до иного повѣсту, тамъ не становится; а однакожъ съ тыхъ книгъ, у которого се суду становиль, взявши выпись на другихъ рокохъ маеть показати передъ судомъ, у которого се не становиль, иже се правдиве болшою справою вымовлялъ, тогда нестанного неповиненъ будетъ платити. А вѣдже на третихъ рокохъ не маеть се болшою справою вымовляти, але се повиненъ становити и въ отказѣ быти яко на завитомъ року, естли не самъ черезъ себе, тогда черезъ умоцованого своего подъ утратою тое речи, о которую позванъ; а предсе оного суду, гдѣ первой и повторе се становиль, маеть выпись передъ урядомъ показати.

АРТЫКУЛЬ 18.

Што бы се стало пры бытности нашей и при дворѣ нашомъ, котормъ обычаемъ то маеть сужоно, а хто бы черезъ заказ * утѣхаль; о гостяхъ чужоземцахъ.

Уставуемъ тежъ, гдѣ бы при бытности нашей господарской въ томъ панствѣ нашомъ Великомъ Князствѣ Литовскомъ, гдѣ кольвекъ будучи намъ дворомъ нашимъ, учиниль хто кому квалтъ бой раны або якую шкоду; тогда тотъ обвиненый учинившы то при дворѣ нашомъ не маеть се повѣстомъ вымовляти, ани позвы брати и ими се закрывати. Але заразомъ черезъ дворенина нашего будетъ повиненъ передъ нами або передъ тымъ урядомъ нашимъ дворнымъ Великого Князства Литовского родичомъ, кому то отъ насъ злецоно будетъ, заповѣдаиый, ставшы усправедливитися передъ урядомъ нашимъ каждому тутъ же и тутошнимъ правомъ безъ року, только за заказомъ, не вымовляючи ани закрываючисе правомъ своимъ. А пакли бы которому чужоземцу при насъ Господары, або хотя и въ небытности нашей, въ котормъ мѣстѣ або подъ которымъ урядомъ у котораго тубылца сталсе квалтъ бой разбой зраненье отнятье квалтовное маетности его, што

кольвекъ съ тыхъ поменныхъ речей; тогда обвиненый въ тыхъ речахъ безъ позу, а мѣщанинъ и простой человѣкъ безъ року, не проволокаючы ничымъ повиненъ усправедливити за заказомъ передъ нами и передъ воеводами врядниками нашими замковыми и дворными, а мѣщанинъ мѣшкаючы подъ правомъ Майдеборскимъ передъ мѣскимъ урядомъ. А естли бы хто съ подданныхъ нашихъ на жалобу гостиную былъ заповѣданъ, а прочь уѣхалъ; тогда на имѣнье его зъ листомъ нашимъ дворенинъ нашъ маеть быть посланъ, або врядъ замковый маеть послати зъ листомъ своимъ, хотя бы его на имѣнью не было, предсе тотъ листъ на имѣнью его маеть быти положонъ и рокъ зложонъ, ку праву за двѣ недѣли стати, а онъ наконецъ не вымовляючисе будетъ повиненъ на тотъ часъ стати и усправедливити, а гдѣ бы предсе на тотъ день ему зложоный не сталь, тогда маеть быти то на немъ, о што жалоба есть, водле доводу сказано и отправа дана.

АРТЫКУЛЬ 19.

О тыхъ, которые не маючы въ томъ повѣтѣ або врядѣ нашомъ осѣлости и тамъ, пріѣхавшы зъ стороны або зъ иного повѣту, збытокъ учинилъ.

Тежъ уставуемъ, ижъ хто кольвекъ зъ иное земли чужоземець або хтожъ кольвекъ неосѣлый въ томъ панствѣ нашомъ Великомъ Князствѣ Литовскомъ, пріѣхавшы въ который кольвекъ повѣтъ, гдѣ осѣлости не маеть, або подъ врядъ и до мѣстечка нашего, учинилъ тамъ кому кгвалтъ бой раны шкоду и якій же кольвекъ збытокъ; тогда тамъ же а негдѣ индей на врядѣ нашомъ замковомъ, або гдѣ бы замку не было, въ дворѣ нашомъ сужонъ и сказованъ быти маеть и отправа на немъ чынена. А вѣдже естли бы въ другомъ повѣтѣ по недалеку осѣлость свою мѣль або пана, кому служить, повѣдилъ; такового зъ осѣлости его або передъ его паномъ, кому служить, правомъ ужывати маеть; а однакожъ слуга панскій неосѣлый, вчинившы кгвалтъ и зраненье, маеть задержанъ быти на замку або на врядѣ двора нашего, а оный о собѣ маеть дати знати пану своему, а гдѣ бы панъ справедливости не вчинилъ, о то самъ до вряду позванный отповѣдати повиненъ, а позывати о то до вряду замкового.

АРТЫКУЛЬ 20.

Што мають судити воеводове старостове державцы, и о ихъ позвехъ.

Уставуемъ тежъ, хотечы мѣти и даючы моць, абы воеводове, старостове и державцы наши, кождый въ повѣтѣ и врьдѣ своемъ, судили и справовали и позвы свои давали о тые артыкулы меновите тутъ описаные: то есть о наѣздѣ квалтовный на дома шляхецкіе, кгалтъ въ мѣстехъ нашихъ, о пожогу и разбои по дорогахъ, о квалтоване панень и невѣсть, о злодѣйство, о фалшь, о голову шляхецкую, яко вышей написано о нихъ. А въ не бытности ихъ намѣстники ихъ зъ судьею замковымъ присяглымъ осѣлымъ мають судити и моць мѣти будутъ справовати и кончыти подле права и сего статуту всему панству нашему Великому Князству Литовскому отъ насъ даного. А гдѣ бы хто на горячомъ учынку тыхъ вышь мененыхъ артыкуль которого жъ кольвекъ стану былъ пойманъ, тогда тотъ безъ позву маеть быть сужонъ; а пакли бы заразомъ на горячомъ таковомъ учынку не былъ пойманъ, тогда вжо позвы ку праву маеть быти припозванъ, а позву таковому не маеть быти рокъ дальшый отъ поданя только за двѣ недѣли. А если бы за тыми позвы на рокъ стати не хотѣлъ, тогда врьдѣ тотъ о томъ намъ маеть дати знати черезъ листь свой, а мы тому не фолькгуючы, безъ всякое проволоки, и откладанья на иншый часъ, але заразомъ взявши о томъ отъ того врьду нашего вѣдомость, такового обвиненного и врьду нашего непослушного маемъ зъ земли панствъ нашихъ Великого Князства Литовского казати выволати, и не маемъ ему на тое выволане поднесенья чынити и давати, ажъ бы се первой зъ стороною жалобливою росправиль.

АРТЫКУЛЬ 21.

О судьи замковымъ.

Уставуемъ, ижъ воеводове, старостове и вси державцы замковые и дворовъ нашихъ повѣтовыхъ мають зособна кождый зъ нихъ на врьдѣ своемъ выбрати человѣка доброго шляхтича въ томъ же повѣтѣ осѣлого прысяглого, который уставичнѣ повиненъ будетъ посполу зъ урядомъ замковымъ судити и справовати вси речы судовые, которые замку або врьду нашему приналежати будутъ. А если бы што недоизрѣнемъ ихъ на томъ урядѣ въ справѣ ихъ поблудило; тогда за отозваньемъ стороны на таковыхъ врьдниковъ, яко намѣстника своего и судью замкового и писара, воеводове старостове и державцы повѣтовые съ тымъ вышейописаными врьдниками своими замковыми справедливости учынити не хотѣлъ, або сами суду своего справедливости его на правѣ уближенье чынили; тогда таковой врьдѣ нашъ маеть передъ насъ листомъ нашимъ позванъ быти, на который рокъ тотъ врьдѣ нашъ маеть передъ нами за листомъ нашимъ самъ албо черезъ умоцованого своего стати, а мы на томъ року таковому укривжоному безъ отволочную справедливость учынити маемъ. А рокъ таковому позванью, естли будемъ въ здѣшнемъ панствѣ нашемъ Великомъ Князствѣ Литовскомъ, чотыри недѣли, а если въ Корунѣ Польской, тогда осмь недѣль складанъ быти маеть.

АРТЫКУЛЬ 22.

Роки завитые въ которыхъ речахъ мають быти складаны.

На первой хто кого позоветъ о заставу ку бранью пенезей, хотя сторона позваная не станеть, предсе судъ не маеть откладати на дальшыя другіе роки, але на першомъ року яко на завитомъ, первой выслушавшы доводы стороны поводовое, маеть сказанье и ввязане стороне поводовой дати, а взявшы отъ него пензи при врьдѣ и при книгахъ судовыхъ мають быти положоны до того часу, ажъ сторона позваная ихъ возметь. Другое о отнятье имѣней и выбитье спокойного мѣшканья. Третее о слугу якогожь кольвекъ стану, або человѣка невольника, который бы, пану своему шкоду учинившы, втекъ прочь до кого и найденъ былъ въ него и припорученъ ему або врьднику его, а онъ бы зъ нимъ справедливости не чынилъ, а если онъ на томъ року не станеть; тогды судъ за доводомъ слушнымъ стороны поводовое маеть сказанье вчинити, и того зъбѣга ему присудити, не откладаючи на другіе роки и дальшый часъ. Четвертое о мыто мостовое и гробелное и перевозки шляхецкіе всякихъ становъ, кгда хто на комъ або подданомъ чіемъ неслушнѣ возметь, маеть позваный на першомъ року яко на завитомъ стати; а естли же не нестанеть, тогды сторонѣ жалобливой нестаньемъ у вину впадываеть, яко около мытъ мостовыхъ и гробленыхъ неслушныхъ вышей описано естъ; а если бы то врьдники або мытники наши вчинили, тогды зъ мытниковъ подскарбій земскій зъ урядниковъ нашихъ мы Господаръ справедливость чынити маемъ. Пятое хто бы ѣзами або млынами, гатьми, мостами рѣки портовые гамоваль, проходу або дороги слушные не вчинившы, а то тымъ бы се кому шкода стала; таковой будучы позванъ на першомъ же року яко на завитомъ маеть се становити; а пакли бы не сталь, тогды судъ земскій маеть сказанье вчинити и съ заплаченьемъ шкодъ, а средсе суду въ таковыхъ млынахъ або ѣзохъ и мостахъ зъ уряду дороги и пропусты направены и волно вчинены будутъ. Шостое если бы хто добровольне записаль и рокъ въ листѣ своемъ ознаймилъ, а не вчинилъ бы тому досытъ; тогды за позвы на першомъ року яко на завитомъ естли не станеть, во все упадываеть водлѣ листу або запису своего, а судъ вжо (маеть) отправу вчинити подлугъ листу жадныхъ роковъ не складаючи. Семое о раздѣль имѣней и маетности всякое межы братьею и сестрами и близкими, также черезъ позвы маеть быть рокъ завитый тымъ обычаемъ и на поручники, а поручнику зъ истцомъ, по комъ ручыли, маеть быти завитый рокъ.

АРТЪКУЛЬ 23.

О сбиванью позвовъ.

Уставуемъ, тежъ хто кого позвы позоветъ, а сторона бы позваная ку тому се року не знала; тогды сторона поводовая позву и року маеть доводити выписомъ съ книгъ сознанья возного, а естли бы не довела, тогды позваная сторона не повинна отповѣдати. Къ тому тежъ и на таковыя не повинна отповѣдати, если бы хто значнѣ и меновите чого у позвѣ не написалъ и не доложилъ; а еще тежъ неповинна отповѣдати на таковой позовъ, который бы былъ скробанъ, и не мають таковыя позвы мѣстца мѣти, которые бы были скробаны, а звлаща естли бы се одинъ съ другимъ не згожалъ въ датѣ або въ чомъ кольвекъ, албо ижъ въ немъ не было дати написано. Над то постерегаючи того, абы

хитростью якою для збитья позву, проволокаючи кому право самъ позванный, маючи позвы въ рукахъ своихъ, скробаль и даты направоваль, уставуемъ, ижъ кгда бы таковой позовъ отъ обжалованого на правѣ былъ положонъ; тогда сторона поводова маеть вознымъ на него довести, ижъ ему даль позовъ цѣлый и не скробаный въ датѣ и во всемъ згодливый, а по такомъ доводѣ позванный повиненъ ему отповѣдати. А иными некоторыми причинами позвы не могутъ быть сбиты, а вины заплатити поводовой сторонѣ копу грошей а судови дванадцать грошей. Вѣдже въ позвѣ, гдѣ бы одинъ артыкуль былъ збитъ причинами вышей описаными; тогда предсе на другіе артыкулы правные сторона повинна отповѣдати.

АРТЫКУЛЬ 24.

О позвѣхъ, якъ долго трывати мають.

Уставуемъ тежъ, ижъ кожде позвы вряду земского трывати далѣй и въ моцы своей быти не мають, только на одны роки судовые, передъ которыми ихъ взято, и для того тые речи, на которые се тыми позвы позывати будеть, у въ оныхъ позвехъ меновите мають быти описаны.

АРТЫКУЛЬ 25.

Хто бы кого отъ суду земского съ повѣту своего до иного права вызваль.

Уставуемъ хотечы мѣти, абы ниhto никого о речъ суду земскому належачую до иного права замкового и ни до которого иного отъ своего повѣтового земского суду не смѣль вызывати, а хто бы кого до суду замкового або комисарского и до которого кольвекъ иного вряду и суду, кромъ артыкуловъ вышей мененыхъ суду замковому або дворному належачыхъ, вызваль; тогда позванный не повиненъ ни передъ кимъ се становити и таковыхъ позвовъ послушнымъ быти, але еще тотъ, хто позвы взялъ и ими позываль, за то ижъ мимо судъ свой смѣль то учинити, маеть заплатити судьи копу грошей, подсудку полкопы грошей, а сторонѣ тры рубли грошей, окромъ того хто бы записомъ своимъ отступуючы повѣту своего въ якій инший судъ доброволнѣ подаль.

АРТЫКУЛЬ 26.

О таковыхъ, которые не маючы въ повѣтѣ осѣлости кого бы тамъ осѣлого позваль.

Тежъ уставуемъ, кгда бы хто не маючы въ которомъ повѣтѣ осѣлости, другого кого тамъ осѣлого позваль, а шло бы имъ обудвумъ объ одну речъ, тотъ позванный осѣлый може заразомъ не отповѣдати и въ право се не вдавати, ажъ бы се оный противникъ его неосѣлый тамъ поддалсе и обовязалсе, тежъ ему въ той речы, кгда жъ объ одну речъ идетъ, тамъ жо въ его повѣтѣ отповѣдати и всправедливити не беручы се до своего повѣту; а кгда се подъ то поддасть и на то обовязетъ, тогды предсе оный позванный за тыми жъ позвы на онъ же часъ напередъ будегъ повиненъ ему се усправедливитися.

АРТКУЛЬ 27.

О рокохъ, на которыхъ судья подсудокъ и писарь зѣжджати ся мають и позванные передъ ними повинни се становити.

Тежъ уставуемъ, ижъ судъ земскій маеть быти три кротъ до году, то есть три роки судовые, на которомъ се будутъ повинни судья подсудокъ и писарь на одно мѣстце до замку або двора нашего, которые мѣстца вышей суть описаны, зѣжджати ся, а тамъ мѣшкати двѣ недѣли, если много справъ, а если меншь справъ, тогды поки росправятъ и розсудятъ, а позванные и поводовые будутъ повинни передъ ними се становити, а обычаемъ и способомъ ниже въ особливыхъ листцахъ и артыкулахъ описанымъ. Роки мають быти сужоны: первые отъ святое Троицы Рымского свята, и на завтрей се въ понедѣлокъ почнуть; другіе въ осень на день Светого Михайла Рымского жъ свята, и также на завтрее почнуть; третіе зимѣ по Божьемъ Нароженью, о трехъ кролехъ святѣ Рымскомъ, которые на завтрее тежъ судитисе на завтрее зачнуть; червертые въ другомъ году также на день Святое Троицы Рымского свята и на завтрее се почнуть. А судья подсудокъ писарь маеть суды справовати и на судѣхъ сѣдѣти каждого дня отъ поранку до не испорное години, а позвы судити поряднѣ зѣ реестру не гледечы на особу и нефолкгуочы въ томъ никому, але который первой позваль, тотъ на первой сужонъ быти маеть, а которые се на тые роки позвали, тыхъ всихъ на початку роковъ писарь повиненъ въ реестръ вписати и зѣ реестру до права волати будетъ. А вѣдже подъ тымъ часомъ роки сужоны быти не мають, наипервей естли бы соймъ вальный Великого Князства Литовского былъ зложонъ, тогды передъ соймомъ за чотыри недѣли роки судомъ устати мають; другое естлибы тежъ листы военные зашли, ино для готованья на войну за шесть недѣль не мають быти роки сужоны, а вѣдже естли бы въ томъ часѣ на войну не выѣхали, тогды на потомъ предсе мають роки за тыми жъ позвы и подъ таковою жъ мощью сужоны быти; третее естли бы, чого Боже уховай, въ томъ повѣтѣ повѣтрее моровое было, а то бы значнѣ показовало, подъ такимъ часомъ также роки не мають быти сужоны, а по томъ часѣ, яко повѣтрее моровое оминетъ, маеть врьдъ въ томъ повѣтѣ, гдѣ судъ есть, роки выволати, а тые, которымъ бы была потреба, мають се справовати за тыми жъ позвы своими на другихъ рокохъ, которіе по томъ повѣтрею выволаные близко припадати будутъ.

АРТКУЛЬ 28.

О позвѣхъ и о року, якій за позвы будеть складанъ, а каждый жалобу свою меновите маеть на позвѣ описати, и о збиванью позвовъ.

Тежъ уставуемъ, ижъ хтобы до кого мѣль яко дѣло о кривду албо о якую кольвекъ речъ, тотъ маеть отъ писара земского того повѣту позвы взяти подъ печатью нашою, отъ насъ тому повѣту даною, и въ тыхъ же позвѣхъ жалобу свою достаточнѣ и меновите выписати, а чого въ позвѣ не доложыть, на то сторона позваная отказывати неповинна. Вѣдже гдѣ бы сторона сама хотѣла собѣ позвы написати; тогды кды принесеть готовые написанные водлѣ права, писарь, отъ него взявши доходъ свой грошъ, записовати ихъ будеть повиненъ, и тыми позвы передъ каждыи роками судовыми мають се позывати, даючы ихъ очевисто и кладучы на имѣняхъ ихъ, съ которыхъ се кривда дѣеть. А кого очевисто позовутъ, рокъ чотыри недѣли, а кому на имѣнью положить, шесть недѣль маеть быти складанъ, не отъ даты позву въ немъ описаное, але отъ того часу и дня яко на имѣнью положоны будутъ, а меньшыи и близкіи роки не мають быти за позвы складаны. А пакли бы хто на першыхъ рокохъ судовыхъ не сталь; тогды на другихъ и на третихъ рокохъ позвовъ и артыкуловъ въ немъ описаныхъ ничымъ сбивати не можетъ, ани будетъ мочи, але повиненъ будетъ отказовати, естли бы тежъ хто кому грабежъ могутъ вчинилъ, ино о грабежъ позывати передъ роки за двѣ недѣли.

АРТКУЛЬ 29.

Которые бы се дѣели якіе кривды отъ врядниковъ слугъ и подданныхъ чыихъ кольвекъ.

Уставуемъ, естли бы тежъ княжатоу панятоу радомъ духовнымъ и свѣцкимъ, шляхтѣ и кому кольве съ подданныхъ нашихъ, имъ самымъ бояромъ слугамъ людемъ отъ врядниковъ, слугъ боярь и подданныхъ также князскихъ, пановъ радъ, пановъ хоруговныхъ, шляхты кривды якіе кольвекъ въ чомъ дѣели; тогды маеть сторона жалобливая (взявши) листь нашъ господарскій або отъ суду земского повѣтового, въ которомъ оный и имѣн्या ихъ будетъ, ѣхати зъ вознымъ до того пана, отъ чыего врядника и боярь слугъ и людей кривды кому се дѣяти будетъ, справедливости просечы и жалобы своее реестръ маеть дати. А гдѣ бы самыхъ пановъ въ тыхъ имѣняхъ ихъ не было, ино врядниковъ ихъ, абы они на слугъ боярь людей пана своего справедливость чынили. А рокъ праву не маеть быти далшій отъ нихъ покладанъ одно двѣ недѣли. Если бы панове сами такъ и врядники ихъ права дати и справедливость вчинити не хотѣли; тогды сторона жалобливая маеть позвы отъ суду земского взяти по того пана, съ чыего будутъ имѣн्या кривды дѣяти, и позвы на роки судовые его позвати, абы самъ сталь и тыхъ, отъ кого се кому кривда будетъ дѣяти, поставилъ. А вѣдже въ небытности того пана въ томъ мѣнью не маеть его сторона жалобливая нигдѣ индей шукати, але на томъ жъ имѣнью позвы положить маеть; а судъ

земскій повѣтовый будетъ повиненъ межы ними того досмотрѣти и справедливость вчинити. А гдѣ бы позванный самъ або черезъ умоцованого своего стати и тыхъ врядниковъ боярѣ и слугъ людей своихъ, кому вина дана, поставити не хотѣлъ; тогда судъ повиненъ къ таковымъ непослушнымъ захватисе водлугъ сего статуту, яко о томъ въ томъ же судеиномъ роздѣлѣ у артыкулѣ двадцатомъ есть описано. А если бы тотъ панъ и хтожь кольвекъ самъ або врядники ихъ комужь кольвекъ у кривдахъ ихъ рокъ справедливости зложыль, а на року зложономъ справедливости вчинити не хотѣлъ безъ слушное правное причыны; тогда такового пана и слугъ судъ земскій въ томъ судити маеть, а онъ тому, кому обѣцавшы справедливость учинити, а не вчинилъ, за разомъ у суда сторонѣ рубль грошей заплатити маеть. А вѣдже если бы се то показало на правѣ, ижь тотъ панъ чинилъ оному справедливость слушную, але онъ ее упоромъ своимъ не принялъ и на ней не переставалъ, и отъ того суду земскому притягнулъ; тогда тотъ того рубля грошей платити не повиненъ будетъ, але еще тотъ упорный самъ оному тотъ рубль грошей тутъ же заразомъ у суда заплатити маеть. Отъ того часу панъ шляхтичь яко листовъ нашихъ або врядниковъ ихъ о учынене справедливости обнесенъ будетъ, и такового урядника слугъ и подданныхъ его въ тотъ часъ тамъ застато очевисто и припоручоно было и то доведено; тогда тотъ оногo врядника и слугъ и подданныхъ своихъ маеть у вѣдомости мѣти, и за позвы повиненъ будетъ ихъ въ суду земского на року зложономъ становити. А вѣдже если панъ при прошеню права врядника слуги и подданого своего у вездѣ имати и до вряду близшого притягнувшы, если бы неосѣльный былъ, правомъ зъ нимъ обыходити, а панъ его въ томъ боронити не маеть.

АРТЫКУЛЬ 30.

Яко стороны у суду заховатися мають за позвы.

Тежь уставуемъ, хочечы то мѣти, абы у суду жалобы отпоръ поряднѣ безъ сваровъ и непотребного забавенья и проволоки шли, такъ уставуемъ, ижь напередъ сторона поведовая не чынечы жалобы, але вмѣсто жалобы маеть дать на правѣ позовъ чести и позву своего слушнымъ доводомъ подпирати, а сторона позванная маеть на тотъ позовъ яко на жалобы отказывати и справоватися. Въ которомъ спорѣ если бы сторона поведовая што противъ него услышала, на што бы размышленье потребовала; тогда судья отступленье и порадку зъ ее пріятели маеть допустати, а будетъ ли повторей таяжь сторона взычанья часу на порадку просити, и того судьи повторе боронити не мають, также тежь и обжалованой сторонѣ по два-кrotь одного дня толко яко и поведовой сторонѣ размышления на часъ не маеть судъ боронити, а болшь того свару и споровъ и отволокъ судъ не маеть допускати. А кгда вжо на обѣ сторонѣ справу свою передъ судомъ выповѣдять, а судья съ подсудкомъ потребовали сами собѣ въ томъ розмышленья; тогда мають первой сторонамъ поменути, абы все, што бы на правѣ покладати и отказовати мѣли, мовити и учинити. А кгда вжо то все учинять и писарь то спишетъ тогда; вжо надъ то стороны ничего большей прикладати не будутъ мочы, ани судъ того пріймовати и писати казати не мають, але судья и подсудокъ мають ся намышляти. Если бы того дня або завтрей розмыслитися не могли, и до третего дня то все взяти на порядку и размышленье могутъ, а третего дня вжо судъ конечное сказанье будетъ повиненъ чинити водлугъ жалобы и отпору сторонѣ, ничего не прикладати

ани выймовати. А въ томъ часѣ кгда судья и подсудокъ намышляютца, стороны естли бы хотѣли взяти собѣ на вгуду и еднанье, тогды того они имъ допустити мають. А мы, Господарь воеводове и врядники наши судья и подсудокъ и судъ замковый або дворный и ништо иный ничого съ головы и зъ умыслу своего судити и сказовати не мають и не будугъ мочы, только водле статуту сего, яко въ немъ стоить выображено.

АРТЫКУЛЬ 31.

О заступованью въ суду одному за другого.

Тежь уставуемъ, хотечы мѣти абы такъ было на вси потомные часы, ижъ коли бы хто кого другого о которую колвекъ речъ въ суду заступиль; тогды тотъ вжо будетъ повинень самъ безъ жадныхъ позвовъ, на тотъ часъ за тою жъ жалобою зъ суда не сходечы, за него отказовати и усправедливитися. А заступованье инакшое не маеть быти только очевистое, у права ставшы заступити, не черезъ листы и прокураторы. А гдѣ вжо очевисто у права ставшы заступити; тогды позванный або обжалованный отъ того волень, а поводовая сторона будетъ о томъ съ тымъ заступцею мовити, и речи свое на немъ доводить листы и выписы и оповѣданье, и все тое право и доводъ, которіе поводовая сторона противъ обжалованое стороны въ томъ правѣ мѣла, маеть противко тому заступцы ити и у права мѣстце мѣти такъ яко противъ обжалованому; и мы заступцу за имя обжалованого будемъ розумѣти, и заступца не маеть собѣ до повѣту ани до суду своего належачого откладати и брати, але повинень будетъ самъ або при собѣ маючы прокуратора того жъ часу, скоро заступити, отказывати и до конца усправедливитися.

АРТЫКУЛЬ 32.

О злеценью речы и отдаванью моцы инымъ за себе у права мовити.

Уставуемъ тежь, ижъ кгда бы хто за позвы або на которомъ року припаломъ не могъ на правѣ быти, такъ за хоробою яко и за иными нѣкоторыми прычынами и потребами своимы; тогды прокуратора або умоцованого своего можетъ у мѣсто себе у права мѣти. А вѣдже умоцованный або прокураторъ инакшый иначей установлень и у права пріймованъ быти маеть, абы ему очевисто злецыль речъ свою передъ врядомъ которымъ кольвекъ, тымъ земскимъ або замковымъ, и съ того вряду выпись съ книгъ маеть взяти. А княжата панове рада и панове хоруговные врядники наши шляхты, которіи суть печатей значныхъ, могутъ въ речахъ потребахъ своихъ прокураторовъ и умоцованыхъ до права слати зъ листы своими отворонными, припечатовавши ихъ печатью своею и рукою своею власною подписавшы, хто писати умѣеть; за таковыми листы умоцованными и выписы врядовыми судъ прокуратору маеть допустити у права мовити и справовати, а который бы самъ

писати не умѣль, тогда передь вряду маеть до книгъ сознанье вчинити. А гдѣ бы тежъ кто зъ шляхты вряду близкости або за хоробою своею до вряду Ъхати и порученья прокуратору очевисто передь вряду сознаньемъ своимъ дати не могъ; тогда тежъ таковой можетъ листомъ отворонимъ до вряду прокуратора умоцованого послати и ему речъ свою злещити, въ которомъ листѣ при печати своей маеть о приложенье печатей шляхтича вѣры годного просити, тогда таковой листъ, въ которомъ поменивши речъ, о што идетъ, остатокъ на позовъ указати зыскъ и трату доложити, и такъ вжо за нимъ прокураторъ мощный у права быти маеть.

АРТКУЛЬ 33.

Хтобы самъ не могъ, або не умѣль у права мовити.

Уставуемъ тежъ, хто бы очевисто у права стоечы не могъ або не умѣль самъ мовити або речы своее справовати, поручыль устнѣ кому иному речъ свою мовити; тогда таковому злещенья инакшого листовного не будетъ потреба, але судья злещенемъ устнымъ маеть его за мощного приняти, хотя и неосѣлого. Къ тому кгда бы хто, не могучы самъ справовати речы своее у суда и не вмѣючы мовити, прокуратора потребоваль; тогда судъ повинень ему зъ уряду прокуратора дати, и казати прокуратору отъ него мовити, а речъ его справовати. А въ вображенью маестату нашего господарского обѣцуюемъ прокуратора обвиненой сторонѣ дати. За се будетъ повинень судъ зъ ураду дати прокуратора, и дармо казати ему мовити отъ убогихъ сиротъ и вдовъ немаетныхъ и тымъ тежъ, которыи бы або за пріязню або тежъ убозтвомъ своимъ прокуратора мѣти и сами речы своее за недостаткомъ своимъ въ суду справовати не могли.

АРТКУЛЬ 34.

О прокураторохъ, якіе мають быти и якихъ тежъ судъ маеть пріймовати.

Уставуемъ тежъ, ижъ о имѣнья и всякіе иные речы лежачые рухомые не маеть быти прокураторомъ жадень чужоземець и неосѣлый у Великомъ Князствѣ Литовскомъ; а вѣдже кому идетъ о горло о честь, въ таковой речы можетъ собѣ прокуратора чужоземца и неосѣлого мѣти и отъ себе установити. А судья подсудокъ и писарь такъ тежъ и тые, которые только духовные имѣнья держать, прокураторовъ не мають; а однакожъ и тые вси вышъ помененые въ речахъ своихъ властныхъ сами черезъ себе и чрезъ прокураторовъ своихъ справовати могутъ.

АРТЫКУЛЬ 35.

О каранье фальшывыхъ и подступныхъ прокураторовъ, и къ тому ижъ волно сторонѢ прокуратора своего у права подперети, и самому мовити, и другого прокуратора на его мѣстце установити.

Уставуемъ тежъ, ижъ кгда бы который прокураторъ поднявшысе кому речъ его мовити и справовати, а вывѣдывшысе на немъ тое sprawy и листовъ его огледавшы, выдалъ его въ томъ сторонѢ противной, або до тое стороны его противное присталь, и отъ него за се напротивко тому, кому се первой обѣцаль и поднялъ речы мовити, а то бы на него якимъ явнымъ и слушнымъ доводомъ доведено было; тогда таковой, естли есть шляхтичь, честь тратить, а не шляхтичь горло тратить. А хтобы тежъ у права стоечы хотѣль отставити прокуратора, а самъ свою речъ мовити, або другому прокуратору речъ свою злецити; то ему вольно будетъ.

АРТЫКУЛЬ 36.

Причины нестанья прокураторовъ, ижъ то имъ и сторонамъ ихъ шкодити не маеть.

Тежъ уставуемъ, ижъ кгда бы прокураторъ передъ рокомъ права не могучы сторонѢ своей о форобѢ своей дати знати, ижъ бы иншого на его мѣстце послала, або ѣдучы вжо на дорозѢ рознемогсе форобою обложною, такъ же бы самъ на рокъ до суду быти не могъ; тогда то яко сторонѢ той, чью справу на себе взялъ въ речахъ тыхъ, такъ тежъ и прокуратору ничего шкодити не маеть, а хотя бы третіе роки остатніе або рокъ завитый былъ, предсе ничего тратити не будетъ. А вѣдже прокураторъ въ той форобѢ скоро се рознехожеть, маеть до вряду близшого о собѢ дати знати, и потомъ врьдовнѢ тое форобы довести, а обмогшысе потомъ на першыхъ рокохъ будетъ повинень присегнути, ижъ правдиво за обложною форобою на тотъ часъ становитисе не могъ. Такъ тежъ слуги посланные отъ пановъ, которыхъ бы на роки до суду пославахъ въ дорозѢ фороба великая и обложная зашла, по тому жъ будутъ повинни заховатисе яко вышей описано. А вѣдже естли бы прокураторъ або посланецъ и слуга таковой о форобѢ своей дати вѣдати и присегчы на другихъ рокохъ учинити не хотѣли; тогда судъ не дбаючи о таковыхъ вымовкахъ ихъ, сказанье маеть чынити ведле сего статуту. Такъ тежъ если бы хто кольвекъ хочечы кому шкоду учинити, а прокураторъ се учинилъ и листы отъ него подъ печатью его справилъ, а тогда бы ему сторона не поручыла, а за тымъ што кому утратилъ; таковой судъ не маеть быти держанъ, а тотъ прокураторъ, хто бы то учинилъ, ничимъ иньшъ только горломъ маеть быти каранъ.

АРТКУЛЬ 37.

Чого прокураторъ безъ стороны своее справовати не можетъ.

Тежъ уставуемъ, ижъ прокураторъ за мощью жадныхъ записовъ и некоторого признанья ни отъ кого не маеть у суду чынити и пенезей записаныхъ брати и съ нихъ квитовати, не маючи при собѣ стороны своее. А вѣдже естли бы хто не иогучы або не поспѣючы до вряду по пенези бѣхати, а хотѣль черезъ кого иного тые пенези брати и квитовати; тогда иначей не можетъ и не маеть только черезъ такового прокуратора або слугу своего, кому особливою на то мощь и порученье листомъ своимъ подписанымъ рукою своею дать, або передъ врядомъ близшимъ поручить, и выписомъ того вряду мощнымъ его на та меновите учинить, таковой мощной можетъ пенези брати и мощь мѣти будетъ квитовати.

АРТКУЛЬ 38.

Ижъ никто съ бронями передъ судъ приходити не маеть.

Уставуемъ тежъ грозно приказуючы, абы никто съ подданныхъ нашихъ княжатъ пановъ радъ, почоншы отъ вышшого ажъ до нижшого стану, яко сами панове такъ и слуги ихъ при панахъ своихъ и безъ пановъ прїатель за прїателемъ, не смѣль въ зброяхъ кафтанахъ и съ такими бронями, то естъ съ древомъ зо щепомъ зъ ручницею зъ лукомъ и съ кушою и зъ иными всякими, до суду замкового земского приходити и при собѣ мѣти; а вѣдже кордъ и мечъ то при собѣ мѣти можетъ и носити. А который бы черезъ сее розказанье наше важылсе съ таковыми бронями передъ судъ прїйти, таковой (въ подл. пробѣль) и ознайменемъ вряду нашего маеть намъ Господару заплатити дванадцать рублей грошей, а предсе судъ его sprawy не маеть до того часу, поки будетъ съ таковою бронею до суду приходити. А если бы предсе упоромъ своимъ не хотѣль отъ себе таковое заказаное брони отложить и тамъ зъ нею у суду былъ; тогда судъ заховуючы сторону жалобливую послушную, а другая бы сторона противная чынила сему розказанью нашему, досыть маеть подлѣ права поступокъ сказанье напроотивко упорному учинити, такъ яко бы тежъ и въ правѣ не стоялъ.

АРТКУЛЬ 39.

Хто бы кого передъ правомъ словомъ або рукою сегнулъ, попхнулъ, або ранилъ.

Тежъ уставуемъ, коли хто будучы стану шляхецаго, стоечы передъ судомъ уступившы речы своее, одинъ на другого словами се неучтивыми торгнулъ; тогда за то маеть зъ сказанья того суду вмѣсто вины сѣдети не замку близшомъ шесть недѣль. А естли бы пхнулъ або рукою ударилъ, а хотя бы и не вдарилъ; тогда маеть заплатити сторонѣ вмѣсто навезки дванадцать рублей грошей, а за вину сѣдѣти шесть недѣль. Пакли бы корда меча або шабли и якое кольвекъ брони безъ слушное причины добыль, хотя бы и не ранилъ; таковой руку тратить, кгда бы ранилъ, тогда ничымъ инымъ только горломъ маеть быти каранъ. А вѣдже хто бы свовольнѣ далъ причину кому словы и рукою початокъ учынилъ, а тотъ бы у въ оборонѣ примушоный початкомъ его брони своее добыль, ранилъ и забилъ; такий таковое покуты и каранья не повинень терпѣти. А хто бы тежъ кольве ранивши кого передъ судомъ утекъ, таковой маеть быти зъ земли выволанъ.

АРТЫКУЛЬ 40.

Хто бы на судѣ судью подсудка и писара такъ вряду земского яко и замкового зсоромотилъ, збилъ, ранилъ, або забилъ.

Уставуемъ тежъ, если бы хто кольвекъ пришедшы до суду замкового або земского словы доткливыми славѣ и почтивости его зсоромотилъ; таковой за то винень будетъ на замку близшомъ шесть недѣль у везенью сѣдѣти. А если бы ранилъ або забилъ; таковой маеть горломъ каранъ быти, а головщина близкимъ зъ имѣнья его маеть быти плачона, вѣдже обвиненый въ такихъ речахъ позванъ быти маеть передъ насъ Господара, а коли зъ суда такъ найдетсе, тожъ въ томъ по судѣ зъ выроку нашего такъ каранъ быти маеть.

АРТЫКУЛЬ 41.

О томъ, гдѣ бы судья подсудокъ и писарь такъ замковый яко и земскій седечы кого на судѣ зсоромотилъ, або се на него рукою торгнулъ.

Тежъ уставуемъ, ижъ кгда бы хто съ того вряду нашего такъ замкового яко и земского, сѣдечы на судѣ, кого словы неучтивыми зсоромотилъ; тогда маеть о то позвы нашими передъ насъ позванъ быти, и будетъ ли то на него слушнымъ доводомъ переведено, тогда маеть на замку нашомъ шесть недѣль сѣдѣти. А естли бы судья подсудокъ и писарь самъ квалтъ мѣстцу нашему и суду учынилъ, а кого ранилъ або забилъ, тогда маеть быти каранъ горломъ, а близкимъ зъ имѣнья его головщызна плачона быти маеть.

АРТКУЛЬ 42.

Если бы кто, на роки прїѣхавшы до суду земского або замкового, кого другого часу роковъ зраниль, кгвалтъ або шкоду якую кому учиниль.

Уставуемъ тежь, естли бы кто, на роки прїѣхавшы до суду земского або замкового, и часу того поколь роки будутъ, кому заступившы на господу кгвалтъ або находку вчинившы, кого зраниль и притомъ якую кольвекъ шкоду учиниль, а шкодный того жъ часу утекъ се до суду и то обжаловаль; тогда судъ замковый и земскій або дворный нашъ господарскій тамошній обжалованого будетъ повиненъ вознымы обослати, абы онъ не зѣжджаючи прочъ передъ судомъ сталь и обжалованой сторонѣ се справиль, который безъ позву виненъ будетъ стати и того жъ часу на тыхъ же рокохъ справитисе. А пакли бы не расправившысе зѣхаль; тогда за непослушенство маеть до суду заплатити три копе грошей, а сторонѣ жалобливой другую три копе грошей, а заплатившы маеть стати яко на завитомъ року и сторонѣ се усправедливити. А пакли бы на першыхъ рокохъ яко на завитомъ не сталь, або и ставшы въ отказѣ быти не хотѣль; тогда судъ замковый або дворный, не чынечы жадное проволоки сторонѣ жалобливой, такъ о зраненъе яко и о вси шкоды сказанъе на тыхъ першихъ рокохъ учинити маеть.

АРТКУЛЬ 43.

Ижъ позванный не маеть розривати права речми непотребными.

Уставуемъ, если бы позванная сторона, будучы у права, а отступившы отъ позву, сторонѣ поводовой што такового нового задала, або тежь зъ стороны до того се правомъ своимъ приповѣдала, хотечы право розорвати а проволоку вчинити; таковой сторонѣ то у суда ити не можетъ, маеть судъ отложитьти то на сторону, а предсе сторонѣ поводовой справовати чынити водле позву, о то о што позвано, и то кончыти и сказанъе чынити водле права. А въ таковыхъ новоприпалыхъ речахъ, естли будутъ суду земскому приналежати, судъ маеть имъ казати, абы се о то знову на иные роки позвали. А естли бы се што такового межы ними о почтивость дотыкало; судъ маеть имъ обѣма сторонамъ рокъ передъ нами Господаремъ станью зложыти, которого будетъ сторона обжалованая потребовати, и черезъ выписъ съ книгъ рокъ намъ Господару ознаймити, на который рокъ зложный обѣ двѣ стороне безъ жадныхъ позвовъ мають се передъ нами Господаремъ становити.

АРТКУЛЬ 44.

Яко братью недѣльную або вчастниковъ, то есть себровъ, позывати.

Уставуемъ, если бы колко братьи або вчастниковъ держали адно имѣнье себренное, люди тяглые або подданные, а кому бы се кольвекъ отъ того имѣнья людей кривда дѣла въ рукомыхъ речахъ, а они бы яко зъ себе такъ и съ таковыхъ людей справедливость чынити не хотѣли; тогда жалобливая сторона листъ врьдовый черезъ вознаго также врьдовнѣ посланого на томъ имѣнью положить маеть, абы се той жалобной сторонѣ справедливость стала. А если бы се той жалобной сторонѣ справедливость не стала; тогда усихъ учасниковъ о то передъ судъ позвы позвати маеть ни на томъ же имѣнью позвы положить, а хотя бы се оные учасники не зѣхали, тогда судъ на рокахъ судовыхъ будетъ сказанье подлѣ права на имѣнью чынити подлугъ того, яко о томъ о рокохъ судовыхъ написано.

АРТЫКУЛЬ 45.

Ижъ врьдниковъ нашихъ зъ ихъ врьдовъ ни хто судити немаеть адно мы сами Господарь.

Тежъ уставуемъ, ижъ врьдниковъ нашихъ, то есть воеводъ старость державецъ замковъ и дворовъ нашихъ и тивуновъ зъ ихъ врьдовъ, которые отъ насъ держать, кому бы кодвекъ кривда се дѣяла або видѣла, не маеть ихъ ни хто судити адно за позвы нашими мы сами Господарь. Але зъ имѣней своихъ я если бы кому якую кривду учынили; тогда передъ судомъ земскимъ будутъ повинни становитися и отповѣдати.

АРТЫКУЛЬ 46.

О мѣщанехъ и о людехъ нашихъ и кривдахъ ихъ отъ шляхты.

Уставуемъ, если бы хто съ князатъ пановъ шляхты всякого стану акъ и съ подданныхъ ихъ учынилъ кривду якую кольвекъ мѣщаномъ нашимъ мѣсть нашихъ, гдѣ права Майдеборскаго не мають, такъ тежъ и людемъ имѣней нашихъ господарскихъ; таковыхъ о учыненье справедливости воеводове старостове и державцы наши мають сами або врадники ихъ, разъ обослати листомъ своимъ, а гдѣ бы его на имѣнью не было, тогда возный маеть листъ на имѣнью его положить, абы самъ зъ себе и съ подданныхъ своихъ справедливость учынилъ. А если за тымъ першымъ обосланьемъ справедливости не вчынилъ, врьдъ нашъ маеть у суду земского позвы взяти и таковыхъ позвати на роки судовые, которые въ томъ повѣтѣ будутъ, который на первшыхъ рокохъ яко на завитомъ

року подь страченьемъ права маеть стати и подданныхъ своихъ поставити; а судъ маеть, яко съ тымъ самимъ паномъ, такъ и съ подданными его, отъ которыхъ бы ся мѣщаномъ або людемъ нашимъ кривда дѣла, яко на завитомъ року справедливость учинити, и справа въ чомъ бы противъ мѣщанъ и людемъ нашимъ стали винни, кождый грабежь, на чомъ доводъ слушный учинять, зъ навезкою казати заплатити.

АРТЫКУЛЬ 47.

О мѣщанехъ права Майдеборскаго.

Тежь уставуемъ, если бы которому зъ мѣщанъ нашихъ права Майдеборскаго которая кривда дѣла отъ князей пановъ землянь, а они бы сами доброволнѣ усправедливити не хотѣли; тогда такового кождого мѣщанинь маеть до суду земского повѣтового позвати, и далей поступовати противко ему подлѣ поступку права и статуту земского.

АРТЫКУЛЬ 48.

О учасникохъ, яко мають близкости имѣнья доходити лежачого.

Тежь о речъ сполечную, которую жъ кольвекъ вси учасники весполъ у права мовити и се доходити мають, а одинъ безъ другого самъ чынить а ни ку кривдѣ иныхъ учасникохъ своихъ никоторое речы сполечное притягивати не можетъ. А вѣдже естли бы иные участники вси посполу которое речы сполечное у права доходити а ни о ней мовити не хотѣли; тогда тотъ, который доходить всхочеть, маеть о то припозвати оныхъ участниковъ своихъ на роки судовые передъ врьдъ повѣтовый, въ которомъ оные участники его осѣлостями своими будутъ, а въ небытности ихъ самыхъ, тогда позвы на имѣньяхъ ихъ положить, складаючи рокъ очевисто чотыры недѣли, а заочнѣ шесть недѣль. А хто бы съ таковыхъ участниковъ за першыми позвы не сталъ, тогда того другими позвы о тое жъ на другіе роки позвати; а естли бы и за другими позвы на другихъ рокохъ не сталъ, тогда и въ третее яко на завитый рокъ позвати; а гдѣ бы за третими позвы и на третихъ рокохъ судовыхъ яко на завитомъ року хто не сталъ, тогда вжо оный вчасникъ, который речы сполечное доходити усхочеть, самъ одинъ можетъ доходити и безъ иныхъ вчасниковъ, а позванный будетъ повиненъ вжо ему самому, хотя бы иныхъ учасниковъ не було при немъ, отказовати. И иные вчасники, которые бы и за третими позвы передъ урядомъ становити не хотѣли; тые позваного, если правъ зосталъ, о тежь напотомъ у право поволокати а ни на немъ того доходити не мають, а ни тежь учасника своего, которій бы того дошолъ, частей своихъ у права доходити не могутъ, и кгда жъ вже отъ того за непослушенствомъ и нестаньемъ своимъ черезъ трои роки отпали, выймучы таковыхъ учасниковъ, до которыхъ бы за троими позвы для далекого отѣханья яко по чужыхъ

сторонахъ по рыцерству и наукахъ ихъ, а вѣдомость о такомъ позванью ихъ подлѣ доводу слушнаго ихъ и узнанья судового прійти не могла. А вѣдже абы небытностью такихъ участниковъ тотъ участникъ, который бы того доходити хотѣлъ, для продлуженья напотомъ не шкодовалъ, а если бы добрѣ оселый иожеть самъ одинъ того доходити, описавшысь позваному на осѣлости своей; а естли бы того права отсужонъ былъ, ино вжо оные участники его повторе на немъ того жъ права поискивати а ни доходити не мають, и естли бы поискивали и хотѣли, тогда онъ самъ отъ нихъ у права заступовати боронити своимъ накладомъ маеть и повинень будетъ.

АРТЫКУЛЬ 49.

О заповѣди и о заруки о речъ сужоную.

Тежъ уставуемъ, хто бы на комъ правомъ што презыскалъ, то естъ имѣнне люди або земли якіе жъ кольвекъ кгрунты лежачые; тогда маеть ему въ то увязанье справа дано быти, а зарука зъ уряду заеть быти положона, абы тотъ, хто на правѣ упустилъ въ то се черезъ тое не вступовалъ и увязыванья не боронилъ. А пакли бы увязыванья не допустилъ албо се по ввязыванью въ то вступовалъ; тогда тую заруку зъ уряду положоную маеть платити половицу на насъ Господара а половицу сторонѣ жалобливой, а вѣдже зарука болшая не маеть быти только водле важности тое речы, о што идеть, а тотъ, кому што присужоно, предсе то маеть держати.

АРТЫКУЛЬ 50.

Хто бы послѣ права и присяги того жъ искалъ, што передъ правомъ утратилъ.

Тежъ уставуемъ, если бы хто чого искалъ, а пустилъ бы его на присегу, або тежъ съ права была бы ему всказана присяга, а онъ бы присегнулъ а потомъ бы онъ што его обжаловалъ, хто бы колвекъ тое жъ речы на немъ и чого жъ кольве, што правомъ утратившы, у другое того искалъ, менуючы ижъ бы несправедливе присегнулъ, и хотѣлъ на того, который присягнулъ, доводити; тогда таковой доводъ водлѣ права не маеть ему быти допушонъ, але ижъ по присезѣ тоежъ речы искалъ, которую у права утратилъ, маеть чотыри недѣли на замку нашомъ сѣдети, а шкоду оправити, на чомъ слушный доводъ сторонѣ укажетъ и учинить. А гдѣ бы ничего такового не примовляючы словы не соромотечы только речы сужоное у другій разъ искалъ; тогда сѣденья не будетъ повинень, только маеть шкоду платити, на што слушный доводъ учинить.

АРТКУЛЬ 51.

О свѣдкахъ, якіе мають быти у права пріймованы.

Уставуемъ тежъ, ижъ на всякую речъ въ каждого суда свѣдки мають быти вѣры хрестіянское и таковые, которые привильями нашими до того припущоны суть, люди добрые вѣры годные и неподозреные. Вѣдже судья первой, нижли сторонъ або свѣдковъ ку свѣдцеству припуститъ, маеть ихъ розважыти, абы паметали на Пана Бога и на справедливость его и почтивость свою.

АРТКУЛЬ 52.

О доводѣхъ и отводѣхъ.

Уставуемъ, ижъ кгда бы судья, выслухавшы жалобы и отпору сторонъ, скажетъ которой кольвекъ сторонѣ поводъ або отводъ, а оная сторона на оный часъ, которій мѣла доводити або отводити, не доводила або ся не отведеть, таковая речъ свою тратитъ. А вѣдже если бы сторона заразомъ которого свѣтка ставити не могла, тогда судъ до завтрея отложить можетъ и маеть, а то вже будетъ подъ страченъемъ права рокъ завитый. А доводъ и отводъ на всякую речъ маеть быти наипервей черезъ письмо, черезъ свѣдки, а то суть наипевнѣйшые и накрунтовнѣйшые доводы будутъ, теды доводъ и отводъ черезъ присегу кому письма або свѣдковъ не достанеть, такъ тежъ черезъ певные знаки, яко о каждомъ доводѣ таковомъ зособна есть нижей описано.

АРТКУЛЬ 53.

Которые ку свѣдцеству мають быти припущоны.

Уставуемъ тежъ, ижъ ку свѣдцеству не мають быти прыпущоны тые, которые суть правомъ переконаны, што тамъ же передъ правомъ тотъ, хто ему наганитъ, доводити маеть, а если не доведеть, тогда ку доводу припущонъ быти маеть. Ку тому не мають свѣдчыти невольники слуги за пановъ ани тежъ противъ пановъ, шаленые, то есть которые розуму не мають, потомужъ свѣдками быти не мають одинъ другому, которимъ сполнѣ вину дадутъ, або помочниками ихъ будутъ.

АРТЫКУЛЬ 54.

О свѣдкахъ, которымъ бы хто што ку нимъ хотѣль мовити.

Если бы сторона противная хотела ку свѣдкомъ што мовити и ганити имъ, тогды тутъ же заразомъ передъ правомъ и первой нижли ихъ ку свѣдѣцству або ку присязѣ припустячь, ку нимъ мовити и на ихъ доводити не уступуючы съ права то учинити. А гдѣ бы на которого свѣдка што вель, а не довелъ; тогды маеть того свѣдка навезати водлугъ стану его; а переведеть ли, тогды тотъ свѣдкомъ свѣтокъ быти не можетъ, а сторона поводовая на того мѣстце иншого свѣдка маеть поставити; а путившы свѣдковъ ку свядецству, тогды вже по свядецствѣ къ нимъ правнѣ ничего мовити не можетъ.

АРТЫКУЛЬ 55.

На своихъ свѣдкахъ по правгъ ни хто ничего искати не можетъ.

Уставуемъ, хто бы въ якой кольвекъ речы передъ правомъ выдалъ свѣдковъ, а тые свѣдки противъ ему самому посвѣдчыли; тогды онъ на тыхъ свѣдкахъ по правѣ и свядецствѣ того поискивати и до права ихъ позывати не маеть.

АРТЫКУЛЬ 56.

Сведѣцствомъ двохъ або трехъ свѣдковъ маеть сторона речъ свою одержати, и хто бы тежъ оставившы доводъ, пустиль стороне на присегу.

Тежъ уставуемъ, ижъ сторона поводовая речы своее маеть доводити трема або двома свѣдкома людьми вѣры годными а неподозренными, бо если бы свѣдковъ не мѣль, тогды и зъ двома свѣдками вѣры годными и неподозренными, при которыхъ двохъ свѣдкахъ въ недостатку третего самъ маеть присегнути, и тымъ речъ свою одержати, а вѣдже не о честь не о квалтъ а ни о наѣздъ домовый, и тежъ гдѣ бы не шло сторонѣ обжалованой о горло, такъ тежъ и о землю, на што особливе на мѣстцахъ своихъ доводы суть написаны. А хто бы оставляючы доводъ добровольнѣ, свѣдковъ пустиль сторонѣ на присегу о

которую кольвекъ речъ; тогда тая сторона, кгда се добровольнѣ за присегу возметъ и присягнетъ, маеть речъ свою одержати, а если присягнути не хочеть, речъ свою тратить.

АРТЫКУЛЬ 57.

О доводехъ листовныхъ.

Могутъ тежъ быти доводы листовные, то есть записы на имѣнья и иные выписы, або оповѣданья съ книгъ канцляреи наше, съ книгъ судовыхъ земскихъ замковыхъ, и черезъ церокграфы подъ печатями и съ подписаньемъ руки власное, яко о томъ шырей ниже на мѣстцы своемъ есть написано, бывають тежъ доводы черезъ певные и не отменные знаки, яко о томъ о квалтехъ и границахъ меновите и значнѣ ниже написано.

АРТЫКУЛЬ 58.

О коліисыяхъ нашихъ господарскихъ, въ которыхъ речахъ мають быти даваны.

Уставуемъ тежъ, ижъ листы наши комисейные ко вчынкомъ справедливости только въ тыхъ речыхъ мають быти даваны, одно о границахъ межы имѣньями нашими шляхецкими и выкупованье имѣней нашихъ господарскихъ; а иные речи вси яко шляхта межы собою, такъ и вси панове духовные и свѣцкіе мають ся справовати передъ судомъ нашимъ земскимъ.

АРТЫКУЛЬ 59.

О роки заплаттъ пенежной.

Тежъ уставуемъ, ижъ каждой заплатѣ пенежной съ права сказаной мають быти роки заплатѣ судовнѣ положоны: петма и десятма копамъ грошей чотыри недѣли, а петмадесять копамъ грошей шесть недѣль, а сту копамъ грошей дванадцать недѣль, а тисечы копамъ роки зложыти на каждую четверть лѣта по сту копъ грошей, поколь тую тисечу копъ грошей заплатитъ; а если бы на тые роки не заплатилъ, тогда въ той сумѣ маеть быти во имѣнье его увязованье дано, нижли если бы се хто листомъ своимъ

записаль, на который рокъ заплатитъ, тогда тотъ виненъ водлугъ листу своего на рокъ въ листѢ описанный платити, а судъ таковому жадныхъ роковъ складати не маеть.

АРТЫКУЛЬ 60.

О полюбовномъ суду.

Уставуемъ тежъ, кгда судьи полюбовные кому презыскъ судовъне взыскали и листы того взысканья сполу обѢ двѢ стороне подъ печатьми своими дали, а тотъ бы водлѢ суда ихъ того держати и тому досыть вчинити не хотѢль; тогда тотъ листъ маеть быть положонъ передъ судомъ земскимъ, а судья вгленувшы въ оный листъ маеть его заховати при моцы и отправу дати. А гдѢ бы се судъ полюбовный показалъ розный; а таковой судъ мають се припозвати передъ врьдъ земскій, а тамъ на конецъ собѢ справедливости доходити.

АРТЫКУЛЬ 61.

О отзыванью изъ суда до насъ Господара.

Уставуемъ тежъ, коли бы ся кому съ подданныхъ нашихъ сказанье у суду земского або замкового або подкоморого не водлѢ права видѢло, такъ поводовой якъ и отпорной сторонѢ; тогда будетъ кождыйи тыхъ сторонъ такъ поводовой яко и отпорной волно по сказанью судовомъ отозвати до насъ Господара. А вѢдже тотъ, хто отзываетъ, не маеть суду словъ суровыхъ мовити при отозвѢ, одно тымъ словы: пане судья! тое сказанье твое видить ми се не водлѢ права, одзывамсе съ тымъ до Господара его милости. А по одзыванью поки ся передъ нами стороны правомъ розопруть, судъ отправки чинити не будетъ; а иы Господаръ отозвы судити маемъ и будемъ съ паны рады нашими здѢшними Литовскими и въ границахъ того жъ панства нашего Великого Князства Литовского и въ земляхъ того панства будучы. А за границую яко нихто ни кого позывати не маеть такъ и апелевати не мають быти вольно; а хотя бы се и вызвали и апелевали за границы Литовскіе изъ земли того панства; тогда и мы Господаръ такихъ речей судити не маемъ и на врьдѢ нашомъ не допустимъ отправовати, а тотъ, который вызоветъ сторону за границу заплатити маеть вызваному дванадцать рублей грошей.

АРТЫКУЛЬ 62.

О отозвехъ, гдѣ бы колько братьи або вчастниковъ позвали кому ку праву, а потомъ отозвавшысе отъ суду по сказаньи естли бы одинъ зъ нихъ зъєдналсе, а другіе, которіе се не еднали, могутъ отозву пильновати.

Тежъ уставуемъ, если бы колько вчастниковъ стороною поводовою або отпорною будучы мѣли съ нимъ право о якую кольвекъ речъ, а сказанье бы противъ нихъ вышло, въ чомъ бы они видечы собѣ кривду и до насъ Господара отозвавшысе, одинъ зъ нихъ або два зъ стороною зъєдналисє кромъ участниковъ, а потомъ бы другая сторона отъ позву хотѣла тымъ быти права, отбиваючы тыхъ, съ которыми се не еднала, для того ижъ иншыє вчастники ихъ зъєдналисє и зъ апеляцыи выступили; тогда таковый упоръ у права не маеть быти пріймованъ, одно тые, которые ся нееднали, могутъ отозву пильновати, и сказанье маеть быти чынено, бо тые, которые се зъєднали, зуполную моць отъ участниковъ ку тому праву ку еднанью мѣли.

АРТЫКУЛЬ 63.

О чомъ отозву судъ допустити не маеть.

Напередъ хтобы кому описался и обвезалъ въ чомъ листомъ своимъ або на врьдѣ вызналъ, а таковый запись найденъ бы слушный и врьдовный, а тотъ, хто ся опишетъ, не пріймуючы сказанья апелевати хотѣль, проволоку чынечы, тому отзовъ ити не маеть. А также тежъ нихто не маеть отзывати збиваючы позовъ скаженьемъ року и иными припальмыи речами причинами, але по сказанью головное речы о што позвано маеть апелевати. Такъ тежъ и таковому не маеть быти допушоны отзовъ, хтобы ся ку чому самъ доброволнѣ зналъ.

АРТЫКУЛЬ 64.

За апеляцыями рокъ завитый маеть быти складанъ, и о томъ хто бы неслушнѣ апеловалъ.

Уставуемъ, ижъ отозвовъ або апеляцылмъ отъ уряду рокъ завитый маеть быти покладанъ, пры бытности нашой въ тутошнемъ панствѣ нашомъ Великомъ Князствѣ Литовскомъ чотыры недѣли, а въ небытности нашой въ здѣшнемъ панствѣ, ино по пріѣханью съ Коруны Польское а по вѣѣханью въ границы Великого Князства изъ земель ему

належащихъ, также чотыри недѣли, а кгда намъ будучы въ Корунѣ Польской отзовъ быти не маеть. А хто не слушнѣ противъ правъ отзоветца, а мы Господарь сказанье судовое потвредимъ, тогда тотъ оному, противъ которому ся отозвалъ, маеть шесть копъ вины грошей заплатити, а платы пожытки або доходы, которые бралъ по отозвѣ, зъ навезкою маеть за слушнымъ доводомъ, въ томъ часѣ держачы тое, што право идетъ чиниль и бралъ, маеть ускаргоному вернути для тое прычины, абы ся никто упорне и въ чужомъ користѣчы надъ право ку проволоцѣ сторонѣ своей противной не отзывать.

АРТЫКУЛЬ 65.

Которого часу отъ суду земского и замкового отзовъ до насъ Господара маеть быти.

Уставуемъ, естли бы ся кому сказанья отъ суду земского и замкового видѣла кривда; таковой маеть того жъ часу отъ суду не отходечы отозватися обычаемъ вышешменованымъ, нижли большей ку помощи собѣ не брати ничего и прикладати не маеть, только тые што было передъ судомъ першымъ, отъ которого апеловаль, а естли бы того дня въ правѣ сточы не отзывать, а хотѣль бы на завтрее въ томъ ся отозвати, такову апеляция не маеть быти допушена.

АРТЫКУЛЬ 66.

О давностяхъ земскихъ.

Хто бы о имѣне лежачое давность земскую десеть лѣтъ у молчанью былъ не позываль ани листовъ упоминальныхъ не бралъ, уставуемъ, ижъ таковой о то вѣчнѣ молчати маеть; а хотя жъ бы се и поминаль и ку праву позываль и въ року стояль, а речы до конца не довелъ, а потомъ также отъ даты листовъ або позвовъ давность земскую десеть лѣтъ промолчалъ и не впоминался, таковой вжо о таковое имѣнье вѣчнѣ молчати маеть.

АРТЫКУЛЬ 67.

О отправахъ речей сужоныхъ.

Уставуемъ, ижъ кождоа отправа речы сужоное маеть быти плачона на роки земскіе, яко вышей описано, а по выйстью роковъ гдѣ бы ся заплава не стала; тогда судъ земскій маеть возного послати и при немъ двухъ шляхтичовъ землянь, которые отправу вчинити мають на имѣнью его водлѣ статуту и шацунку нижей описаного, и положыти закладъ на листѣ увязчомъ такъ великій, яко о самую речъ идетъ. А естлибы о тотъ урядъ дбалости мѣти увязанья поступити не хотѣль; тогда урядъ земскій маеть отослати до уряду замкового або дворного, а сторона поводовая маеть оного противного припозвати до уряду замкового на двѣ недѣли яко на завитой рокъ. И кгда доведеть сторона поводовая такового впору и не послушенства его; тогда врьдъ замковый, гдѣ воевода будетъ, ино воевода, або стороста, або державца сами особами своими, а въ небытности ихъ, ино намѣстники ихъ зъ рамени нашего господарского винни будутъ всю шляхту того повѣту обослати, и день зложившы съ ними ся рушыти, и мощно яко што первой у суду земского сказано такъ и въ закладехъ у во имѣнья того непослушного увезати, которое заруки половица сторонѣ поводовой быти маеть, а другая половица на насъ Господара. А гдѣ бы еще повторе тотъ же за позваньемъ до кгроду а рамени и звирхности врьду нашего господарского спротивилсе; тогда врьдъ замковый, того се всего достаточнѣ выведавши, намъ Господару листомъ своимъ маеть ознаймити, а мы Господаръ съ канцляреи наше листы роскажемъ выдати по всему панству нашему Великому Князству Литовскому, и за горло его поймавши, съ права гдѣ ся въ томъ винень покажетъ, ничымъ инымъ только горломъ карати роскажемъ. О речъ сужоную о заруки тые жъ воеводове старостове и державцы судовые и ихъ врьдники тымъ обычаемъ, яко вышей описано, на имѣньяхъ таковыхъ упорныхъ взрушеньемъ повѣту отправовати мощно мають; а шляхта за обосланьемъ старостинскимъ будутъ повинни збройно яко на войну на таковое увязанье и за се на поиманье такового противника нашего ѣхати, выймуючы съ того пановъ радъ и врьдниковъ нашихъ дворныхъ. А который бы шляхтичъ, будучи въ дому своемъ, а на таковую потребу нашу за старостою рушится и ѣхати не хотѣль; тогда таковой за доводомъ слушнымъ старостинымъ винень будетъ намъ Господару двадцать и чотыри рубли грошей заплатити, а за отправу возному, колько кротъ поѣдетъ, отъ копы по пол-гроша яко вышей описано, а замковому увязчому потому жъ, яко и передъ тымъ бывало, отъ каждое копы по шести грошей, которые увязчое маеть быти взято на виноватомъ. А который бы врьдъ такъ земскій яко и замковый по выстю року заплатѣ зложеного сторонѣ жалобливой отправы дати не хотѣль и зволокъ то до чотырохъ недѣль; тогда тотъ судъ будетъ повинень сторонѣ жалобливой вси шкоды и наклады, што по выйстью року зложеномъ въ томъ шкодовати будетъ, на што слушний доводъ учинить, подлугъ права самъ платити и отправовати.

АРТЫКУЛЬ 68.

На имѣнью лежачомъ отправа сумы пензей.

Уставуемъ тежъ, кгда бы отъ суду нашего господарского або тежъ отъ суду замкового земского было послано увязати за якую суму присужоную; тогда возный зъ уряду приданый, маючы при собѣ шляхту и людей добрыхъ стороннихъ, маеть увезати за кождою двадцать копъ службу людей потому жъ и уволоку ослую, а за десеть копъ

грошей въ пол-службы або въ пол-волоки, потомужь и въ землю пустовскую, а за копу грошь въ моркгъ земли погнуо, а простого поля тотъ же моркгъ за петдесятъ грошь, а сеножати моркгъ, пол-копы грошь *, а земли лесное, которая бы се годила на пашню, за сорокъ грошь моркгъ, а бобровое земли моркгъ за двадцать грошей, а пожытки пушцы озера и рѣки водле важности ихъ.

АРТЫКУЛЬ 69.

О квалтовное выбитье спокойного держанья.

Тежь уставуемъ, хтобы кого выбиль съ спокойного держанья такъ изъ имѣня яко и отнятьемъ людей кгрунтовъ; тогда оный выбитый того жъ часу, а надалѣй въ чотырохъ недѣляхъ отъ выбитью, маеть припозвати того, хто выбиль его, до вряду замкового на рокъ завитый на двѣ недѣли. А кгда доведеть держанья своего оногo квалтовного и упорного а безправного выбитья стороны своее противное; тогда вряду замковый або дворный судовый маеть всказати ему квалтъ и шкodu зъ навезкою, и черезъ возного положывшы закладъ на листѣ своемъ, яко тая речъ, съ которою выбить, стоять, маеть за се выбитому пустить въ держанье. И пакли бы съпротивиль и не поступиль возному увязанья и борониль самъ черезъ себе або черезъ врядниковъ и черезъ кого жъ кольвекъ; тогда вряду противъ тому повиненъ самъ ѣхати, повѣтъ рушывшы, и далее поступовать, яко о томъ ширей у артыкулѣ шестдесятъ осмомъ вышей сего роздѣлу есть описано. Потомужь хто бы се кому листомъ своимъ передъ врядомъ описаль и обовезалсе, што колвекъ выполнять, а тому досыть не вчиниль, увязанья мощно борониль, а было бы въ листѣ записѣ доложено мощного увязанья за листы нашими або врядовыми; тогда такжо вряду замковый зъ рамени нашего противъ такому заховатися маеть.

АРТЫКУЛЬ 70.

О подкоморыхъ и о ихъ врядѣ.

Уставуемъ, ижъ въ кождомъ повѣтѣ подкоморый присяглый и осѣлый въ повѣтѣ томъ, которого мы Господарь дамо, и маеть быти подкоморый на томъ урядѣ до живота своего, яко и иные врядники земскіе. А напервей нижли тымъ рядомъ справовати будетъ, маеть присегу на тотъ врядъ свой учинити тыми словы: Я. Н. присегаю Пану Богу всемогущему въ Троицы Единому, ижъ на врядѣ томъ земскомъ подкоморскомъ, который зъ ласки изъ рукъ его королевское милости беру, его Королевской милости Господару своему милостивому вѣрнень буду, справуючи тотъ врядъ вѣрне и справедливе, такъ судъ моемъ подкоморскомъ, яко тежь и при сыпованью границъ ничого большей на томъ врядѣ не постерегаючы одно справедливости светое, и не даючыся ни въ чемъ уводити а ни приязнею ани даромъ, также sprawy мои подкоморскіе на всемъ вѣрне справуючы, и споры зъ обудву сторонъ зъ усказаньемъ черезъ мене учиненымъ пыльнѣ до книгъ своихъ судовыхъ уписуючы, такъ ми Боже помози.

Врядь подкоморого.

По всякихъ розницахъ земельныхъ и граничныхъ за одосланьемъ отъ суду земского маеть подкоморый мощью звирхности нашею а владзы уряду своего давати позвы по стороны подь именовъ и печатью своею, и рокъ завитый складати на выѣздъ на кгрунтъ за чотыри недѣли на всякіе розниці земельные або граничные, и выѣхавшы и огледавшы выводовъ права листовъ и знаковъ граничныхъ и свѣдковъ, чіе листы лѣпшые и знаки граничные явнѣйшые и свѣдки слушнѣйшые будутъ, тую сторону ку доводу маеть припустити, и выслухавшы доводу подлѣ статуту маеть кгрунтъ певный сказати, и границы копцы знаки граничные учинити, и на то листы суду своего подь печатью и съ подписомъ руки своею дати. А гдѣ бы зъ обѣюхъ сторонъ вывода правового на письмѣ або тежъ и знаковъ граничныхъ явныхъ и слушныхъ не было; тогды поводовая сторона при жалобѣ своей маеть быти ку доводу припуцона. Тежъ, абы право ведучы о кгрунтъ певный або о розниці граничные зъ однимъ, не мѣлъ отъ кого иного зъ стороны переказы въ томъ правѣ, яко се то придавати звыкло отъ околичныхъ сусѣдовъ границами и межами прилеглихъ ку тоиу кгрунту, о который право идетъ, для того сторона поводовая або жалобная маеть околичныхъ сусѣдовъ на тотъ же выѣздъ позвы подкоморого притягнути ку пригледанью выводу при постановенью границъ, ку тому жъ ачъ кождый рокъ выѣзду подкоморого на кгрунтъ маеть быти завжды завитый. А вѣдже гдѣ бы которая сторона тотъ же часъ и рокъ або форобою правдивою зложона была, або иншую справу передъ инымъ врядомъ мѣла; тогды съ тыхъ причинъ маеть быти вольна отъ того року, а вѣдже о форобѣ своей естли се передъ рокомъ придетъ, маеть въ часъ урадови подкоморого и сторонѣ озаймити, абы того року не пильновано; а подкоморый повиненъ будетъ на инший часъ переложити, за которымъ переложенемъ на другомъ року сторона, которая на першомъ року не стала, повинна будетъ наипервей водлѣ статуту сумнѣнемъ и присегою своею правдивое форобы довести, и потомъ зъ стороною противною росправу судовную наконецъ принять, а около большое справы, которую бы передъ инымъ врядомъ мѣли, маеть довести свѣдцествомъ.

Справа Урядовая.

По суду подкоморого естли бы за присуженьемъ кгрунту и границъ шло о якіе колвекъ шкоды; тогды о то маеть быти отосланье за се до того жъ суду земского, отъ которого справа на судъ подкоморого пришла. А апеляцыя або отзовъ отъ подкоморого маеть быти до насъ Господара. А вѣдже ажъ по сконченью справы судовое за которымъ отозвомъ мають быти властные отъ насъ Господара на кгрунтъ комисаре въ ономъ же повѣтѣ осѣбные, а звлаща кашталянъ оногю повѣту, а гдѣ бы оногю повѣту каштеляна не было, тогды маршалокъ повѣтовый и зъ иными комисари, передъ которыми будетъ повиненъ подкоморый справы суда своего оказати; а они мощни будутъ судъ подкоморого и границы,

если бы въ чомъ выкочиль, поправити, або тежь, если добрѣ судиль, при моцы зоставати. А хто бы тежь безъ причины слушное отъ суду подкоморого отзовъ учынилъ, тотъ потомъ за высланьемъ комисаровъ нашихъ въ томъ дознаныхъ повинень заплатити вины на врьдъ подкоморого двѣ копе грошей и шкody сторонѣ нагородити подлѣ слушного доводу. Гдѣ бы тежь розницы въ кгрунтахъ придалися на границы сполной дву повѣтовъ; тогда не одинъ который подкоморій але оба два зъ обудву повѣтовъ на такий кгрунтъ певный выѣхати мають. Заплата подкоморому маеть быти отъ каждого нарожного копца по двадцати и чотыри грошій Литовскихъ, а отъ посреднихъ копцовъ отъ каждого по дванадцати грошей. А вѣдже копцы одинъ отъ другого не мають близшіе чинены одно черезъ три шнури волочные, окромъ того гдѣ бы се граница закривеная придала и частыхъ копцовъ потребовала, а гдѣ бы тежь копцовъ потреба не была, одно прогоненье межи было, тогда отъ таковое межи отъ кождыхъ трохъ шнуровъ волочныхъ дванадцать грошей.

О коморникохъ.

А ижъ бы отправа всякихъ справъ, врьду подкоморого належачыхъ, омѣшканья и затрудненья никоторого не пріймуючи, але тымъ снадней кромъ вшелякое проволоки и продолженья скутокъ, а конецъ свой пріймовала.

Про то въ кождомъ повѣтѣ подкоморій ку помочи своей маеть обрати одного або тежь и двоухъ коморниковъ, шляхтичовъ въ повѣтѣ осѣлыхъ людей годныхъ и статечныхъ, которые на рокохъ судовыхъ передъ кашталяномъ або маршалкомъ повѣтовымъ и передъ врьдомъ земскимъ або дворнымъ мають присегу таковую жъ, якую самъ подкоморій, на врьдъ свой коморницкій учынити; а потомъ кождый зъ нихъ по особну за сланьемъ подкоморого, гдѣ бы самъ подкоморій на которой справѣ быти не могъ, тую всю моць и владность зуполную мѣти мають и будутъ яко самъ подкоморій.

РОЗДѢЛЬ ПЯТЫЙ О ОПРАВѢ ПОСАГОУ

АРТЫКУЛЬ 1.

Которымъ обычаемъ отецъ выдаючи дѣвку свою замужъ маеть обваровати и впеvнити записанья вѣна отъ зятя.

Тежь уставуемь, ижь каждый обыватель того панства которого кольвекъ будучы стану, выдаючы дочку свою замужъ и даючи за нею посагъ або выправу подле доброе воли своее, наипервей нижли дѣвку выдасть, маеть отъ зятя взяти запись подь печатью его и подь печатьми людей добрихъ, которымъ онъ на третей части имѣнья своего лежачого оный посагъ або выправу совито описати маеть потомужъ яко ниже описано; а потомъ оный запись тотъ же зять на первыхъ рокохъ земскихъ передь судомъ земскимъ оногю повѣту, въ которомъ ослѣности маеть, оповѣдати и въ книги земскіе записати маеть, таковая отправка маеть быти въ каждого права задержана. А пакли бы отецъ выдаючы дѣвку замужъ передь выданьемъ ее вѣна и отправки отъ зятя своего не одержалъ; таковая дѣвка по смерти мужа своего внесенье тратитъ, хотя бы и великую суму за собою внесла. А ведже предсе яко шляхтянце дѣти або близкіе повинни будутъ за вѣнецъ дати тридцать копъ грошей, если бы замужъ пошла; а гдѣ бы замужъ пойти не хотѣла, тогды межы дѣтьми и близкими въ имѣньяхъ мужжнихъ будетъ равную часть имѣнья держати ажъ до смерти своей; естли же бы оногю шляхтича имѣнье тридцати копъ грошей не стояло, тогды тежь водлугъ того зъ оногю имѣнья маеть выдѣлена быти четвертая часть, которую будетъ держати только до живота своего, хотя за другою мужа пойдетъ.

АРТЫКУЛЬ 2.

Якъ маеть мужъ жонѣ вѣно записати.

Тежь уставуемь, хто бы хотѣлъ записати вѣно жонѣ своей, тогды маеть, ошачовавши вси имѣнья свои, на третей части, чогу стоитъ, маеть совито противко того внесенья записати вѣно жонѣ своей, такъ яко бы сума описаная тое третье части. И коли будетъ тая жона его на третей части имѣней мужжнихъ вѣно описаное отъ него мѣти, а онъ бы потомъ умеръ, а дѣти по собѣ оставилъ, а тая жона пойдетъ за другою мужа, а если дѣти всхочуть або близкіе ее съ тое третее части имѣнья за живота ее вывѣновати; тогды мають всю суму пенезей, яко будетъ въ листѣ описано, заплатити, тожь тое имѣнье къ рукамъ своимъ взяти. А естли же будутъ дѣти ждати смерти матки своее, не всхочуть выкупити; тогды повинни будутъ одно внесенье, што въ домъ ихъ внесла, по смерти ее заплатити тому, кому она отпишетъ, а привенку, што будетъ записаль отецъ ихъ на противко внесенья, совито платити не повинни, а она тежь не маеть никому того привенку записовати, кромѣ только вольна будетъ отписати внесенье свое, а естли бы никому не отписала а дѣтей не мѣла, тогды маеть тое внесенье вернено быти въ домъ той, съ которого вышла. Вольно тежь каждому жонѣ своей отписати речы свое рухомые такъ яко и каждому обчому, то естъ: золото, серебро, шаты и иншыя речы, кромъ зброи стада и челеди невольное быдла дворного; а ведже и того всего яко имѣнья лежачого третюю часть жонѣ отписати вольно, абы седечы на имѣнью мѣла чимъ службу нашу господарскую и земскую съ третее части имѣнья заслужовати. А дѣти и близкіе кгда будутъ съ тое третее части скуповати; тогды тые вси речы яко зброя челядь стадо и быдло мають при имѣнью оставити, а гдѣ бы тые речы утратила, тогды зъ вѣна ее мають за то ошачовавши вытрутити часу откладанья пенезей. А такъ подлѣ уставы наше мають ся заховати вси подданные наши и на потомные часы, а хто бы надъ звышей тое уставы наше учинилъ, а што неслушнѣ жонѣ своей записаль; таковыхъ записовъ не хотимъ мѣти мощныхъ мы сами и потомки наши Великіе Князи Литовскіе. А для того жъ отецъ еще не выдавши дѣвки своей замужъ маеть

первей того смотри, естли бы того зятя своего третья имѣнья совито стояти могла противко внесенья дочки его, на чомъ бы ее противъ того венovati мѣль. А гдѣ бы тая часть не стояла противко внесенья; тогда маеть отецъ за тую суму пенезей, што бы по ней мѣль дати, купити имѣнье и дочцѣ своей за то дати; а зять предсе жонѣ своей за то, што бы особно взялъ суму якую, маеть отправу вчинити на третей части имѣнья своего властивого, а того имѣнья, которое отецъ купивши дочцѣ своей дастъ, мають сполу уживати ажъ до живота своего мужнего, а по животѣ мужнемъ она яко свое властное маеть одержати весполокъ зъ веномъ своимъ.

АРТЫКУЛЬ 3.

По смерти отцовской дѣвки якъ мають зъ имѣнья выправованы быти.

Уставуемъ, если бы отецъ за живота своего выдалъ одну дѣвку свою замужъ, а въ томъ умеръ, а по собѣ оставивши еще колко дѣвокъ; тогда и тые дѣвки водле опису або тестаменту его мають быти выправованы, яко имъ будетъ описано, або зъ готовизны заставленое. А гдѣ бы сумы описаное а ни назначоное не было готовизны, и не могъ бы брать такъ великое сумы по нихъ дати яко за першою дано; тогда ошачовавши четвертую часть имѣнья своего отчызного, ничего съ того имѣнья не втративши; и тымъ сестрамъ своимъ выправу равно всимъ дати, иле ихъ будетъ, окромъ если бы брать ихъ разумѣль, ижъ четвертая часть имѣнья ихъ отчызного болшое важности, нижли бы имъ на равные части такъ много яко першой сестрѣ выправы пришло, то будетъ на воли его. А пакли бы брать або стрыеве суму имъ оставленую утратили; тогда водлѣ опису будутъ повинни яко властный долгъ отдати и заплатити.

АРТЫКУЛЬ 4.

О вдовѣ венowanej, якъ се мають противко ее дѣти лѣта маючые обходити.

Вдова которая сѣдитъ на вдовьемъ столцы, а будетъ ли венована отъ мужа своего, а сынове мають зуполные лѣта; тогда она маеть осѣлость только на венѣ своемъ, а сынове мають припущоны быти ко всимъ имѣньямъ и скарбомъ отцовскимъ, которые мають службу земскую заступовати; а естли бы была не венована, тогда маеть быти захована, яко вышей есть описано.

АРТЫКУЛЬ 5.

Вдовы бесплодные, которые дѣтей не мають.

Обачившы есѣмо то, ижъ которые вдовы бесплодные сѣдятъ навдовьемъ столцы, многіе се шкоды отъ нихъ дѣлають Речи Посполитой, а то тымъ обычаемъ ижъ службы земскіе отъ ихъ не бывають служоны, такъ яко бы мѣли быти, и тежъ ближнимъ много имѣнья утрачають; уставуемъ такъ, ижъ которая вдова бесплодная, а будетъ ли венована отъ мужа своего, тогда маеть осѣсти только на вѣнѣ своемъ, а имѣнья мають на ближнимъ спасти; а естли бы небыла венована отъ мужа своего, тогда маеть на третей части имѣнья сѣдѣти, поки за мужъ пойдетъ, тогда близшіе мають вѣнецъ ее платити, яко естъ вышей, если будетъ не вдовою замужъ пришла.

АРТЫКУЛЬ 6.

Который бы кольвекъ осѣлый и неосѣлый оженился въ Литвѣ.

Тежъ уставуемъ, ижъ бы который кольвекъ оселый и неоселый оженился въ Литвѣ и побралъ по жонѣ имѣнья; тогда часу войны и каждое потребы Великого Князства Литовского противъ каждому неприятелю того панства зъ имѣней жоны своее, и зъ якого жъ кольвекъ набытъя досталъ бы имѣнья въ томъ панствѣ, повиненъ будетъ самъ съ того службу военную земскую служити и заступовати, и тымъ се не вымовляючы, же ему жона не записала. И хто бы съ таковыхъ якимъ же кольвекъ обычаемъ набывшы и маючи имѣнье у Великомъ Князствѣ Литовскомъ и въ земляхъ ему належачихъ, а войны которіе бы кольвекъ не служиль, яко вышей описано; тогда онъ и жона тые имѣнья тратять на Речь Посполитую.

АРТЫКУЛЬ 7.

О дѣвкахъ, которые бы безъ воли родичовъ замужъ идуць, або бы мѣли пойти.

Гдѣ бы которая дѣвка безъ воли отцовское и матчины ишла за иужъ; таковая отпадываетъ отъ посагу и отъ имѣнья отчизного и материстого, а естли бы одна была у отца, тогда отчизна на близкихъ спадываетъ мимо таковую дѣвку.

АРТКУЛЬ 8.

О дѣвкахъ, которые по смерти родичовъ своихъ безъ воли братьи або стріевъ за мужъ идутъ.

Уставуемъ, естли бы дѣвка остала отца и матки, по смерти ихъ родичовъ своихъ, не доросши лѣтъ своихъ, або тежъ и доросши лѣтъ замужъ пошла безъ воли братьи або стріевъ своихъ, а не будетъ ли братьи рожное мѣти або стріевъ, або близкихъ своихъ; таковая отпадываетъ отъ посагу имѣнья своего отчизного и материстого и спадковъ, што бы напотомъ на нее спасти мѣло. А естли бы она мѣла лѣта свои, а братья або стріеве ее задерживаючи ее не хотѣли бы замужъ выдати; тогда однакожъ своволнѣ не маеть ни за кого ити, лечъ маеть дати знати до вряду черезъ кровныхъ вѣдомость, а вряду ей маеть дозволити замужъ пойти; а она естли зъ волею вряду або близкихъ замужъ пойдетъ за ровного собѣ шляхтича, тогда таковая имѣнья не маеть тратити, а вѣдь же дѣвка маеть мѣти лѣта зуполные петнадцать лѣтъ, а тотъ хто ее поиметь вольно ему будетъ доходити маетности жоны своее. А братья або стріеве и которіи кольвекъ близкіе маючи сестри въ опецѣ своей, поколь ихъ замужъ выдадутъ, мають ихъ учтиве на всемъ ховати, держечы при нихъ нѣвесту старую статечную; а естли бы учтивѣ ховати не хотѣли, тогда таковыя дѣвки могутъ на части своей, съ которое имъ выправа маеть быти, сами сѣдети подъ справою опекуна отъ вряду имъ приданаго до того часу, поколь замужъ пойдутъ, а идучи замужъ выправа имъ съ того дому маеть быти водлѣ поступку вышей описаного.

АРТКУЛЬ 9.

Хто бы з двѣма або съ трема жонами дѣти мѣль.

Уставуемъ, естли бы котоя вдова замужъ пошла, и дѣти въ мужа першое жоны нашла и съ тымъ мужемъ другихъ дѣтей набыла, тогда по смерти мужней зъ обоима детьми того мужа своего во имѣнью ровную часть и въ скарбѣ маеть мѣти; а естли бы дѣтей не мѣла, тогда зъ дѣтьми мужа своего першое жоны его ровную часть только во имѣняхъ лежачихъ будетъ мѣти, але въ скарбехъ и въ рухомыхъ речахъ мѣти не маеть, окромъ внесенья своего, и тежъ естли бы што зъ ласки ей мужъ записаль нѣкоторую часть имѣнья лежачого, на той она маеть сѣдѣти только до живота своего, если замужъ не пойдетъ, а если бы замужъ пошла, тогда тую ровную часть имѣнья маеть дѣтемъ первое жоны его зоставити, а тые дѣти венца ей не повинни будутъ дати.

АРТКУЛЬ 10.

О вдовѣ, которая зостанеть зъ дѣтьми недорослыми мѣть.

Уставуемъ, которая вдова зостанеть по мужу своемъ зъ дѣтьми недорослыми, а хотѣла бы на вдовьемъ столцы сѣдети и дѣти въ опецѣ своей мѣти, а будетъ ли оселость добрую мѣти або вено отъ мужа своего оправное; тогда таковая вдова маеть на вдовьемъ столцы на всихъ имѣньяхъ зъ дѣтьми сѣдѣти, если бы опекуны уставленные отъ мужа ее не были. А естли бы оселости добрые або вѣна отписаного не мѣла, тогда маеть дати по собѣ рукоемство доброе люсей оселыхъ, таковая ку опецѣ маеть быти припущона. А гдѣ бы она и потомъ будучи на вдовьемъ столцы дѣтемъ имѣнья скарбы утрачала; тогда стріеве або близкіе мають ее притегнути передъ урядъ земскій на рокъ певный, яко на завитый, и доведуть ли того, же утрачала, маеть опеку и имѣнья и дѣти пустити кривнымъ, а сама зостати на оправѣ своей; а не будетъ ли мѣти оправы, тогда мають ей выдѣлити ровную часть межи дѣтьми, которую маеть держати и ее вживати до живота своего, або покуль замужъ пойдетъ, а по жывотѣ ее тая часть ее маеть спасти на дѣти. А вѣдѣже утрата отъ нее на имѣньяхъ иншая не можетъ се показовати: одно естли бы непобожными податками винами серебщизнами людей у въ оныхъ имѣньяхъ обтяжала, гумна и иные статки домовые неряднѣ роспрашала, або частые и непотребные калацѣи мѣвала, и слуги непотребные ховала, а ничего въ домъ дѣтиный не прибавляла. А гдѣ бы стріевъ и иншихъ кривныхъ не было, тогда мы Господарь, а въ небытности нашей у Великомъ Князствѣ Литовскомъ ино панове рада наша каждый у своемъ воеводствѣ для таковое утраты мають зъ рамени нашего господарскаго опекуновъ оселыхъ на тое мѣстце уставити, которіе дѣти имѣнья скарбы и ее самую у въ опецѣ своей мѣти будутъ а не допускати большей утраты чинити. А въ томъ часѣ намъ тую утрату по ней обачать, она бы што дѣтемъ утратила; тогда будетъ винна тую всю шкоду дѣтемъ своимъ платити зъ вѣна або зъ властного имѣнья своего, а не будетъ ли мѣти имѣнья або вѣна, тогда оные рукоимцы будутъ повинни шкоду дѣтемъ платити.

АРТКУЛЬ 11.

О дѣвкахъ и вдовахъ, которіе за простыхъ людей замужъ идуть.

Уставуемъ, которая бы дѣвка або вдова, будучы стану шляхецскаго, маючы имѣнья отчизные або материстые, пошла замужъ за простаго стану челоуѣка не шляхтича; таковая отъ всихъ имѣней своихъ якъ отчизныхъ такъ материстыхъ вѣчности отпадываетъ, але тые имѣнья на близкихъ мають прійти, а по вдовѣ на дѣти и тежъ на близкихъ ее, которіе дѣти яко близкіе предсе будутъ повинни таковой дѣвцѣ або вдовѣ за тые имѣнья ее отложить суму пенезей подлѣ шацунку статутаго, але по половицы, то естъ даючы за каждую службу людей пять копѣ грошей, а иншыя кгрунты сумы по

половицы, яко въ томъ статутѣ о томъ шырей написано, а вѣно описаное все тратять, и не повинни будуть дѣти и близкіе таковой вѣна откладати.

АРТЫКУЛЬ 12.

О вдовѣ, которая бы по смерти мужа своего за другого хотѣла пойти.

Хочемъ мѣти, абы малженство въ почтivosti было заховано и для вѣдомости плоду, абы каждая вдова шляхтянка по смерти иужа своего до шести мѣсецей за другого мужа не смѣла пойти; а которая пойдетъ, тогда вѣно отъ мужа своего описаное тратить, а пакли бы вѣна описаного не мѣла, тогда заплату до скарбу нашего дванадцать рублей грошей заплатити маеть.

АРТЫКУЛЬ 13.

О спадки, которые заровно на сына и на дочки приходятъ, и о внесенью матчиномъ, если бы кому не записала.

Тежъ уставуемъ, ижъ всякіе материстые такъ лежачіе и иные речи рухомые, тежъ внесенье матчино, которое бы никому не было записовано, то все маеть въ ровный дѣль пойти межи всихъ дѣтей якъ сыновъ такъ и сестръ, нижли спадки отчизные на сыновъ на близкихъ по мечу приходятъ такъ, яко на иномъ мѣстцу шырей о томъ написано.

АРТЫКУЛЬ 14.

О поровнанья внесенья розныхъ жонъ передъ раздѣломъ дѣтиного имѣнья.

Тежъ уставуемъ, кгда бы одинъ шляхтичъ мѣль колко жонъ, а оные жоны мѣли бы ровное внесенье свое въ сумахъ пенежныхъ; тогда сынове, колько ихъ будетъ зъ оныхъ жонъ, вси имѣнья отчизные мають на себе на ровные части подѣлити. А естли бы которое жоны внесенья большей нижли иныхъ жонъ; напервей передъ роздѣломъ имѣней своихъ выровнати оное болшое внесенье матки братаи своей, ровное внесенье подѣливши, заплатити, тогда жъ имѣнья отчизные на ровные части межи себе подѣлити.

АРТЫКУЛЬ 15.

Если бы которая вдова замужъ пошла.

Уставуемъ, если бы которая вдова замужъ пошла, а первой будучи за первымъ мужемъ своимъ вѣно оправленое отъ мужа своего мѣла; тогда отъ другого мужа вѣна записаного мѣти не може, нижли бы тотъ мужъ ее другій вмеръ, а дѣти по собѣ зоставилъ, тогда она межи дѣтьми своими ровную часть у въ имѣнью взяти маеть, а на томъ до живота мѣшкати*. Тогда отъ близкихъ маеть на вдовьемъ столцу на третей части зостати, а по животѣ ее и тая третья часть маеть спасти на близкихъ *, заховатися водлѣ того, яко вышей о томъ написано.

АРТЫКУЛЬ 16.

О имѣнью, на которомъ мужъ жонѣ отпаву чынить.

Уставуемъ тежъ, ижъ хто кольвекъ описавшы отпаву жонѣ своей на которомъ имѣнью своемъ учинившы, того имѣнья своего никому иному никоторимъ правомъ а ни способомъ записовати а ни въ чужіе руки задавати не можетъ, хотя и призоленье отъ жоны показовалъ, безъ очевистого передъ врьдомъ сознанья ее; а и врьдъ тежъ кождый на такомъ вѣнованомъ имѣнью никому отпавы никоторое чинити не маеть, окромъ добровольного и очевистого передъ врьдомъ самое панее вѣнованое призоленья.

АРТЫКУЛЬ 17.

О безплодной жонѣ.

Кгда бы которая жона будучи замужемъ безплоднѣ умерла, маючи певное внесенье за выправую отъ родичовъ своихъ, а того бы имѣнья никому не записала, таковое внесенье зась въ тотъ же домъ, съ которого вышло, вернутися маеть родичомъ ее. А которая бы жона незплоднѣ умершы мѣла внесенье и выправу певную отъ братьи съ четвертое части, а никому бы того не записала, а еще бы сестра ее была невыпосажона и за мужъ не выдана; тогда таковое внесенье не приходитъ zase на братью, але на сестру которая бы еще замужъ не выдана была; або если бы оное внесенье отъ сестры своее братья собѣ

взяти хотѣли, тогда вмѣсто того сестрѣ невыданой зо все четвертое части, чого стояти будетъ посагъ и выправу дати повинни. Кгда жъ четвертая часть водлугъ давныхъ правъ особливѣ на выправѣ дѣвокъ замужъ отложена безъ всякое розности, хотя бы ихъ было и на болѣй або тежъ и одна **.

АРТЫКУЛЬ 18.

О розводехъ малженскихъ передъ судомъ духовнымъ.

Тежъ уставуемъ, ижъ розводъ малженскій маеть быти передъ судомъ духовнымъ обоого стану водлѣ правъ нашихъ хрестіянскихъ: если мужъ зостанеть виненъ зъ розсудку права духовного, тогда жона останеть на оправѣ отъ него описаной; а пакли бы жона винна найдена, тогда внесенье и оправу свою тратить. А вѣдъже если бы розводъ слушный доводомъ для кривности, ижъ ся малженство въ невѣдомости кривности стало, або для иныхъ причинъ, которые бы се передъ правомъ духовнымъ показали, ижъ бы слушный розводъ мѣлъ быти; тогда при розводѣ вѣнокъ при мужу и внесенье при жонѣ зостати маеть.

РОЗДѢЛЬ ШЕСТОЙ О ОПЕКАХЪ

АРТЫКУЛЬ 1.

О дѣти недорослые лѣтъ.

Уставуемъ, абы по смерти родичовъ дѣтемъ лѣтъ недорослымъ шкоды и роспрошенья маетностей ихъ якъ лежачихъ такъ и рухомыхъ не было; съ тое причины таковыя дѣти лѣтъ недорослые мають быти подъ справою и опатрностью опекуновъ отъ родичовъ назначонныхъ, або тежъ приданыхъ до лѣтъ зуполныхъ, а лѣта мужчизнѣ мають быти зуполные осмнадцать лѣтъ, а дѣвка петнадцать лѣтъ.

АРТЫКУЛЬ 2.

О опецѣ отцовской.

Тежъ уставуемъ, если бы отецъ мѣлъ дѣти недорослые лѣтъ, которые бы мѣли имѣнье материстое обоимъ записаное; тогда якъ дѣтьми самими отецъ, такъ и таковымъ

имѣнемъ ихъ материстымъ и якимъ кольвекъ ихъ властнымъ, опекунъ маеть быти до лѣтъ ихъ dorosлыхъ, а кгда лѣтъ dorocтуть, маеть имъ тые имѣнья зъ опеки своее пустити, и личбы ни которое имъ чинити не повиненъ. Одно жъ часу опеки своее не мають моцы ничого оныхъ имѣней въ руки чужіе а ни вѣчнымъ а ни заставнымъ правомъ и обычаемъ впушати; а хотя жъ бы и впустилъ, тогда то дѣтемъ шкодити не маеть, але мають того на держачомъ доходити, толко бы давности, вышедши зъ опеки, не омѣшкали. А тежъ кгда бы которого сына его власного имѣнье набытое въ готовыхъ пенезей або якихъ кольвекъ речахъ отецъ за живота своего на свои потребности выдалъ, а потомъ самъ умеръ и колько бы сыновъ зоставилъ; тогда наипервей нижли дѣль ровный во имѣнью отчизны межи сынми будетъ, мають они долгъ отца своего вси сынове съ тымъ посполу братомъ своимъ, чїи речи будутъ, межи себе на ровные части рознати, и такъ кождый части своее оный долгъ брату своему отложившы, тожъ мають имѣнья отчизные въ ровный дѣль подѣлити.

АРТЫКУЛЬ 3.

Которыи опекунами мають быти.

Наипервей тые опекунами мають быти, кого бы отецъ на тестаментѣ дѣтемъ своимъ описалъ, а если бы не описалъ, тогда братъ старший лѣтъ dorosлый маеть молодшую братью и сестрами опекается. А не будетъ ли брата dorosлого; ино стрыеве по мечу мають опекунами быти, а если бы стрыевъ рожоныхъ не было, ино близкіе также по мечу ку опецѣ мають быти припушоны. А кгда бы опекуновъ прирожонныхъ никого не было, ино по матцѣ иншые кривные мають быти опекунами; а не станеть ли покудели кривныхъ, тогда отъ насъ Господара або отъ пановъ воеводъ або тежъ и отъ суду земского мають быти опекуны приданы, не чужоземцы але добрѣ оселые въ томъ же повѣтѣ, гдѣ опекается будетъ, абы оселость такового опекуна значна была равна съ тымъ имѣнемъ, которое у въ опецѣ мѣти будетъ. И кождый опекунъ хотяжъ бы и кровный также добрѣ оселый маеть быти, кромъ тыхъ опекуновъ которихъ отеуъ тестаментомъ назначить. А вѣдже если бы тотъ опекунъ отъ отца назначонный неслушнѣ се на той опецѣ справовалъ зъ шкодою оныхъ дѣтей; тогда мы Господаръ або панове воеводове або тежъ врядъ земскій въ повѣтехъ своихъ мають тую опеку отъ того опекуна отнемши, кому съ прирожонныхъ або близкихъ або кому кольвекъ обчому, только цотливому и добрѣ оселому, тую опеку злецити, и што бы ся шкодъ отъ оногo першого въ имѣнью онымъ дѣтѣмъ стало, то все на ономъ опекунѣ съ права сказано быти маеть. А если бы дѣтинные имѣнья въ розныхъ повѣтехъ были, тогда врядъ, въ которомъ повѣтѣ головнѣйшее имѣнье тыхъ дѣтей будетъ, маеть опекуна придати; а тотъ самъ одинъ при головнѣйшомъ имѣнью и иные вси имѣнья, хто бы по розныхъ повѣтехъ мѣлъ, будетъ съ одного держати и ими се опекаети. Тежъ опекунъ маеть быти не вельми зешлыхъ лѣтъ, не форый, ростропный, розумный, тотъ который бы собою добре владнулъ и домъ свой ростропне и опатрне справовалъ.

АРТЫКУЛЬ 4.

Наука опекунамъ якъ мають на себе опеку брати.

Уставуемъ, ижъ кождый опекунъ прїймаючи въ опеку наипервей маеть передъ вознымъ отъ вряду на то приданымъ передъ двома шляхтичами списати достаточнѣ людей и всю маетность дѣтиную, такъ лежачую яко и рухомую, и тотъ реестръ подъ печатью возного и шляхты маеть увести до книгъ земскихъ, и собѣ того уписанья выпись съ книгъ взяти; а потомъ опекунъ взявши дѣти маеть ихъ въ добромъ и цнотливомъ выхованью и наукахъ мѣти и въ достатку, водле можности имѣней и водлѣ большого старанья своего, яко ему самому почтивость мѣла, ховати, и маетность ихъ якъ лежачую такъ и рухомую въ цѣлости мѣти, а съ чого бы за долгимъ хованьемъ дѣтемъ шкода быти мѣла, то тые речи на пенези оборочати маеть, и все ку пожитку дѣтиному справовати. А кгда дѣти къ разумнымъ и дорослымъ лѣтомъ прїйдуть; пекунови повинни будутъ оные вси маетности дѣтинныя, якъ лежачіе такъ и рухомые и всякіе доходы зъ имѣнья ихъ, дани пенезныя и медовое и иныя всякія, которіе жъ кольвекъ черезъ весь часъ опеки своее зберуть, ихъ отдати мають, и личбу достаточную вчинивши зо всего усправедливитися. А за працу свою опекунове зъ гумна зъ млыновъ и пересудовъ и зъ озеръ маеть мѣти пожитки и не будутъ повинни съ того личбы чынити; вѣдже предсе изъ тыхъ пожитковъ якъ зъ гумень такъ и зъ млыновъ мають накладати на выхованье и прїодѣванье дѣтемъ, и службу земскую заступовати. А которимъ житомъ и всякимъ збожьемъ злжонымъ и засѣянымъ опекунъ озметъ, зъ тымъ всимъ опеку здати маеть. Тежъ серебщизны а ни винна себе опекунъ брати а ни ставовъ спускати не маеть, только рыбъ изъ ставовъ ку потребѣ своей и къ живности можетъ ловити. А которій бы кольвекъ опекунъ, такъ тестаментомъ zostавлений, якъ и приржоный, або тежъ зъ уряду приданый, не заховуючися водле науки не врядовне безъ возного на то приданого и безъ стороны, несписавшы напродъ всихъ маетностей дѣтинныхъ такъ лежачихъ яко и рухомыхъ, въ опеку вшоль и што шкоды дѣтемъ опекою своею починилъ; противъ такому дѣти лѣтъ доросшы близшіе будутъ ку доводу, што по тымъ онымъ дѣтемъ дорослымъ лѣтъ справа на ономъ опекунѣ всказано и отправлено быти маеть. А если бы такій опекунъ што опекою своею вшкодившы вмеръ, тогды предся тая шкода на имѣнью его всказана и отправлена быти маеть.

АРТЫКУЛЬ 5.

Если бы опекунъ што несправою або недбалостью своею дѣтемъ упустилъ.

Кгда бы тежъ опекунъ, такъ приржоный яко и встановлений отъ отца, або тежъ зъ уряду приданый, якимъ омѣшканьемъ або недбалостью своею дѣтемъ въ молодости лѣтъ ихъ што впустилъ; тогды дѣти, доросшы лѣтъ своихъ зуполныхъ, могутъ своего правомъ поискивати на томъ, хто бы имѣнье держалъ, абы одно доросши лѣтъ своихъ зуполныхъ давности земское не омешкали.

АРТЫКУЛЬ 6.

Опекунъ можетъ дѣтиное кривды доходити у права, але немоцонъ ничего утратити.

Кгды бы хто сиротамъ або дѣтемъ лѣтъ немаючимъ якую кольвекъ кривду учинилъ; тогда опекунъ ихъ моцонъ того правомъ доискиватися. А кгды бы опекунъ зъ дѣтьми о што былъ позванъ, на то опекунъ не повиненъ у права отповѣдати, окромъ тыхъ причинъ, которые нижей описаны; бо опекунъ не повиненъ дѣтемъ ничего утратити, и што бы опекунъ въ лѣтехъ ихъ недорослыхъ имъ упустилъ, въ чомъ бы се имъ кривда видѣла, тогда они доросши лѣтъ своихъ, могутъ о тыхъ кривдахъ своихъ мовити и правомъ того доходити, только бы давности земское не омешкали.

АРТЫКУЛЬ 7.

Хто бы дѣти недорослые до права позваль.

Уставуемъ тежъ, ижъ о имѣнья такъ отчизные яко и материстые купленные и выслужонные дѣти а ни опекунъ не будутъ повинни у права отповѣдати, але мають тую справу до лѣтъ дѣтиныхъ зуполныхъ отложыти; а они кгды лѣта зуполные будутъ мѣти, тогда на онъ часъ сторона жалобливая маеть ихъ припозвати, а они вжо будутъ повинни на жалобу отповѣдати не вымовляючися давностью земскую, только бы тежъ сторона жалобливая отъ зуполныхъ лѣтъ ихъ давности земское не премѣшкала.

АРТЫКУЛЬ 8.

Ижъ дѣти недорослые не мають у права отповѣдати въ одно чотырохъ причинахъ.

Тежъ дѣти не маючы лѣтъ, будучы до права позвани, одно въ чотырохъ речахъ повинни будутъ отповѣдати. Первей, кгды отецъ ихъ або matka за доброго здоровья которое имѣнье лежачое въ пенязехъ заставнымъ обычаемъ держали, або якъ кольвекъ суму на томъ имѣнью было имъ описано, а близкіе бы тое имѣнье отъ тыхъ дѣтей выкупити хотѣли, и для того бы были позвани ку обранью пенезей; тогда будутъ повинни пенези

взяти через опекуна або теж через пріятелей кровныхъ, а имѣнье пустити. Другое, кгда бы отецъ ихъ кому ручылъ о якую кольвекъ речъ, а о тую бы поруку еще отецъ ихъ за живота своего былъ позванъ до права; тогда по смерти отцовской дѣти, будутъ ли отъ кого позвани, отповѣдати повинни, и съ права найдеть ли се, то мають его съ поруки вызволити. Третье, кгда бы отецъ за живота своего о якое дѣдичество мѣлъ право и не доконавши умеръ; тогда дѣти через опекуна повинни будутъ отказовати, а если бы одно позванъ былъ, а у права не стоялъ, тогда тая речъ маеть отложена быти до лѣтъ дѣтиныхъ. Четвертое долъ отца своего повинни дѣти платити не вымовляючися молодостью.

АРТКУЛЬ 9.

О братьи недѣльной.

Уставуемъ, кгда бы братья недѣльная маючы лѣта dorosлые одного въ имѣнью оставили, а онъ яко старшій мѣстцу оставленый былъ бы ку праву позванъ, а сполную речъ свою и братьи своее утратилъ; тогда иншая братья его рожающая не маючы моцы такового судовного выроку у права отмѣнити ани поправляти, але што черезъ брата своего утратили, о то на вѣки мають молчати. А кгда бы одному брату лѣта зуполные маючому имѣнье его отъ братьи младшее отъ опекуновъ въ руки пришло, а былъ бы позванъ о которую кольвекъ речъ о имѣнье, або о што кольвекъ, повинень отповѣдати у правѣ ни ждучи лѣтъ братьи своее младшее; ачкольвекъ правомъ дойдеть, то съ братьею, кгда лѣтъ доростуть, ровно дѣлити будутъ повинни; а если тежъ што правомъ утратитъ, того братья нагрожати не будетъ повинень, а ни братья будутъ мочи того на братѣ своемъ ани на томъ, хто зыщеть правомъ, поискати; а вѣдьже если бы братъ которую хитростью або недбалостью своею што ку шкодѣ братьи своее пустилъ, а то бы братья на него у права довели, тогда тотъ братъ, который што не слушнѣ упустилъ, маеть братьи съ части своее нагородити.

АРТКУЛЬ 10.

Старшій опекунъ не можетъ имѣнья дѣтиного продавати, утратити и граничити.

Уставуемъ, ижъ опекунъ не можетъ имѣнья дѣтиного, которимъ ся опекаетъ, продати або якимъ же кольвекъ обычаемъ утратити и тежъ граничити; а если бы опекунъ иначе учинилъ, тогда дѣти дошедши лѣтъ зуполныхъ будутъ мѣти моць имѣнье свое отъ того, хто его уживаеть, правомъ доходити, одно бѣ дошедши лѣтъ зуполныхъ давности земское не омѣшкали.

АРТКУЛЬ 11.

Старшій сынъ дорослый не можетъ братья недорослое имѣнья отдаляти або завести, окромъ части своее, лечь бы для долговъ родичовъ своихъ.

Уставуемъ, ижъ старшій братъ держачы сполное имѣнье зъ братьею своею нероздѣльное не будетъ мѣти моцы якимъ же кольвекъ мененымъ обычаемъ того сполного имѣнья заставляти продавати отдаляти або утрачати, вынемшы часть свою, которая на него приходитъ, можетъ зоставити до вѣчного дѣлу. А гдѣ бы тежъ долги того родичовъ ихъ записаные або правомъ належачые потребовали, въ которой же потребѣ тотъ братъ старшій, зъ вѣдомостью а порадою старшихъ пріятелей дому своего, будетъ маючи имѣнье сполное братья зоставити, о такіи долги платити, а вѣдѣже такъ яко бы пенези на имѣнье братья своее взятые не превышали сумы долговъ отцовскихъ. А если бы долги або заплата яка судовнѣ сказаная при меньшимъ была; тогда старшій братъ, первой огледавшы живностей и иные потребности домовые, маеть съ цыншовъ доходовъ имѣней сполныхъ долги оные малые плати, а останокъ, што бы збывало, маеть вѣрне братья заховати; а если бы иначе чинилъ, тогда такового заставованье або записованье имѣней у права пріимовано быти не маеть; а братья, которихъ имѣнья тымъ або якимъ инымъ неслушнымъ способомъ будутъ заставлены, кгда лѣтъ своихъ доростутъ и давности не замолчать, будутъ мочы его правомъ доходити; а той, которій бы противъ уставы наше пенеzi на имѣнье братское безъ ихъ зуполного дозволенья такъ неопатрнѣ даль, тогда своихъ пенезей на ономъ старшомъ братѣ доходити искати будетъ. А кгда бы которій дорослый былъ на службѣ у чужихъ краинахъ або на науцехъ або у везанью неприятельскомъ, тому давность не шкодитъ, если ее отъ пріѣханья своего не замолчить. А вѣдѣже и на свою часть будетъ ли хотѣти братъ старшій якую суму пенезей взяти, тогда маеть такъ брати, яко бы сума не превышала, а на вѣчность, не роздѣлившы имѣнья съ братьею своею, части своее продавати не можетъ.

АРТКУЛЬ 12.

Въ опецѣ, тое имѣнье держечи, не маеть ничего зъ него за свою вину платити.

Коли бы хто чужое имѣнье въ опецѣ або заставѣ держаль, а были бы якіе кривды суседскіе або долги або якіе иные sprawy покананье; таковой кождый, если бы не былъ на своей властности оселый, въ таковыхъ своихъ речахъ въ сужоныхъ на рухомомъ имѣнью его або въ недостатку заплаты на самомъ истцу * маеть быти отправлена **.

АРТЫКУЛЬ 13.

Коли бы ся графило ексекуторови оборонцы, почавшы которіе справы тестаментовъ справовати, и недоконавши умерли.

Уставуемъ, ижъ кгда бы ся опекунове почавши тестаментомъ справовати што кольвекъ, а въ томъ не докончившы померли; тогды близкіе оныхъ дѣтей мають быти припущоны ку ексекуціи, а естли близкихъ не будетъ, ино врядъ опекуновъ, хотя бы обчихъ, до того тестаменту подъ тою жъ моцью все справовати, якъ и тые, которые померли.

РОЗДѢЛЬ СЕМЫЙ О ЗАПИСЕХЪ И ПРОДАЖАХЪ.

АРТЫКУЛЬ 1.

О записехъ на имѣнья свои отчизные и материстые.

О записехъ на имѣнья свои отчизные материстые и всякимъ обычаемъ набытые, которіи ся уфалили на соймѣ вальномъ Берестейскомъ, въ року тисеча пять сотъ шестьдесятъ шостого, мѣсяца Юня. Кгдажъ въ старомъ статутѣ и въ поправахъ статуту нового бачили панове рада обоего стану, также и вси станы, на першомъ вальномъ соймѣ Берестейскомъ отъ насъ Господаря зложономъ отмѣнити четыре артыкулы въ роздѣлѣ томъ семомъ о записехъ: первый, другій, третій и четвертый и праве ихъ на сторону отложить и на то мѣстце тотъ нижей описанный установити и въ статутъ вложить, якожъ на то сполнѣ и одностайнѣ вси зезволившыся и уфалившы, до насъ Господара донесли и утверженъе того насъ просили. Мы Господарь, приставаючы тому зволенью и уфалы ихъ, утвержаемъ мѣсто оныхъ чотырохъ артыкуловъ вышъ помененыхъ, откладаючы ихъ на сторону, на передъ нижей описанный ку уживанью и справованью въ томъ панствѣ Великомъ Князствѣ Литовскомъ и во всихъ земляхъ ему належачихъ, межи всими станы и особами праву земскому и сему статуту прислухаючихъ. Што вси отъ сего часу и дня волно и мощно кождому имѣнья свои отчизные и земскіе материстые и выслужонные купленые и якимъ кольвекъ обычаемъ набытые и названые, не смотречы третее и двохъ частей, яко передъ тымъ бывало въ статутѣ обычаемъ стародавнымъ, але все съ домоумъ, хто ихъ што маеть, будь тежъ половицу або и которую ихъ часть, и по собѣ и у одно або люди земли, што хотя отъ нихъ водлѣ доброе воли своее и мысли, отдати продати даровати и записати заставити, отъ дѣтей и близкихъ отдалити, подлѣ баченья своего тымъ шафовати. И хотя бы перво которую часть албо половицу имѣнья своего албо што кольвекъ люди земли кому продалъ записалъ; тогды остаточныхъ имѣней своихъ потому жъ волень шафовати вѣчностью заставою, якъ воля его будетъ, отдаляючы то отъ дѣтей близкихъ своихъ. А вѣдъже кождый таковой, або продаеть албо даруетъ, самъ очивисте передъ нами Господаремъ объявити маеть, або передъ урядомъ земскимъ, гдѣ въ которомъ повѣтѣ тое имѣнье лежитъ, або до которого суду земского прислухаеть. А пакли бы до которого повѣту было далеко, въ которомъ имѣнье тое лежитъ, алимъбо до которого суду прислухаеть, тогды будетъ еиу вольно запись свой оповѣдати и до книгъ записати; а тотъ кому, продано або якимъ кольвекъ обычаемъ записано будетъ, съ тымъ листомъ записомъ сво и тежъ записомъ врядовымъ маеть ѣхати або послати до того вряду земского

повѣтоваго, гдѣ въ которомъ повѣтѣ имѣнье лежати будетъ, а то оповѣдавши маеть до книгъ земскихъ тотъ записъ свой увести, а урядъ урядови вѣрити маеть.

АРТЫКУЛЬ 2.

Если будетъ кому потреба записъ чинити кромѣ роковъ земскихъ отъ лежачихъ книгъ.

Тежъ хто бы хотѣлъ што записати оселость кому вѣчностью межи роки судовыми, безъ которыхъ судъ не звыкъ засѣдывати на судѣ, и книги подлугъ статуту лежати не будутъ; тогда маеть прійти передъ врьдъ замковый дворный, гдѣ судъ отъ насъ Господара засажоны, и тамъ же записъ справеный передъ воеводою або старостою альбо державцою, гдѣ такіе суды суть, оказати вызнати и дати его до книгъ записати замковыхъ слово отъ слова, и выписъ взяти, который выписъ замковый будетъ тривати до году а не далее. А въ томъ году маеть быти оный записъ пренесеный до книгъ земскихъ и при врьдникахъ земскихъ въ тые жъ книги земскіе дати записати, тымъ обычаемъ таковой записъ маеть быти при моцы захованъ, и тотъ, што имъ кому будетъ записано, маеть то одержати. А гдѣ бы такъ доводу не вчинилъ; тогда таковой записъ жадное моцы мѣти и за онымъ тую речъ, што кому записано, одержати не маеть. А въ небытности воеводъ старость и державецъ судовыхъ на таковыхъ урядехъ и мѣстцахъ ихъ; такіе записи за листы вызнаными предся очевисто особы будучи сами, хто што записуеть, вызнавшы и такіе записы сами жъ оказавши врьду тому, то есть передъ подстаростимъ намѣстниками и при судьи, отъ таковыхъ особъ урядовыхъ могутъ быти и выписы даваны подъ ихъ печатями и съ подписаньемъ рукъ ихъ, а при намней двухъ, если бы вси три писати не вмѣли.

АРТЫКУЛЬ 3.

Хто бы хотѣлъ имѣнье свое отчизное продати або заоставити.

Хочемъ тежъ мѣти и уставуемъ, абы каждый таковой, хто бы хотѣлъ имѣнье свое отчизное продати або заоставити; тогда маеть прійти передъ насъ Господара або передъ врьдъ земскій, въ которомъ повѣтѣ тое имѣнье лежитъ, объявити передъ судомъ земскимъ, которая продажа за таковымъ обычаемъ будетъ мощна и вѣчнѣ держана, хотя бы на то и потверженья нашего господарскаго не было. А вѣдьже тотъ, кому будетъ записано, того жъ часу маеть, взявшы возного зъ уряду повѣтоваго, увойти въ держанье и того имѣнья; пакли бы по ономъ записѣ въ держанье того имѣнья не пришлолъ, а давность земскую десеть лѣтъ промолчалъ, тогда таковая продажа и застава потомъ моцы ни которое мѣти не будетъ.

АРТЫКУЛЬ 4.

О вольности продати третюю часть на вѣчность.

Уставуемъ, хто бы хотѣль имѣнье свое отчизное продати на вѣчность; тогда только третюю часть имѣнья отчизного вольно ему на вѣчность продати, а двѣ части того жъ имѣнья въ сумѣ оставить. А вѣдьже не маеть большей на тые двѣ части имѣнья отчизного брата, только такъ яко бы сума не превышала на уфалу и постановене наше, яко вышей въ роздѣлѣ о судьяхъ есть написано; а гдѣ бы большъ на тые двѣ части пенезей дано, тогда дѣти яко близкіе не будутъ повинни большъ платити, только шацункомъ потому яко вышей описано, а што будетъ превышать, то оному, хто вышей даль, маеть згинутти.

АРТЫКУЛЬ 5.

О записехъ имѣней купныхъ.

Уставуемъ тежъ, ижъ каждому будетъ вольно имѣнье свое куплю и выслугу отдати и продати и кому хочечы записати, бы тежъ кому и обчому, отъ дѣтей и близкихъ своихъ все не менуючи третее части; а вѣдь же тые тымъ же обычаемъ, пришедши передъ насъ Господаря або передъ врьдъ земскій часу роковъ судовыхъ, маеть объявити и сознати и до книгъ земскихъ тую продажу свою записати, за которымъ оповѣданьемъ тая продажа маеть вѣчнѣ держана быти. А хто бы хотѣль записати нам не объявивши передъ нами Господаремъ, або передъ паны рады нашими, або тежъ передъ врьдомъ земскимъ, бы тежъ и печати людей стороннихъ у того листу были; тогда таковой листъ або запис у права mocy никоторое мѣти не будетъ. А естли бы хто продалъ имѣнье на рокохъ судовыхъ, таковой маеть передъ врьдомъ замковымъ сознати; и тотъ, хто купиль, взявши выписъ зъ уряду замкового, маеть потомъ на першихъ рокохъ судовыхъ земскихъ перенести и дати записати *.

АРТЫКУЛЬ 7.

Не маеть ни хто никому жадного спадку записовати, чого въ рукахъ немаеть.

Тежъ естли бы хто хотѣль кому записати которимъ спадкомъ, который бы мѣль на него прійти вѣновье або материстое або которою кольвекъ близкостью, которій бы кольвекъ по ближнемъ по пустой руцѣ мѣло спасти, а тотъ бы еще былъ живъ; тогда такового спадку

нихто не можетъ записовати ни продати а ни отдати а ни сумы никоторое на томъ записовати, оли жъ бы въ рукахъ своихъ мѣль. А если бы хто кому таковой спадокъ записаль або продалъ тежъ записаль на томъ которую суму пенезей, таковой запись передъ правомъ не маеть быти держанъ, бо нихто никому не можетъ дати, чого въ рукахъ своихъ не маеть. А пакли бы хто кому што записаль отъ своихъ близкихъ, не маючи того въ рукахъ, самъ на передъ умеръ, однакожъ запись ни в вошто маеть обернень быти предсе, то маеть прійти на приржонныхъ близкихъ.

АРТЫКУЛЬ 8.

Хто бы кому записаль имѣнье або землю по своемъ животѣ, а тотъ, кому записано, того смерти не дождалъ и напередъ умеръ.

Тежъ уставуемъ, если бы хто кому записаль имѣнье або люди по своемъ животѣ, а тот, которому будетъ тая речь записана, того смерти не дождалъ, которій то будетъ ему записаль, и самъ напередъ умеръ; тогды тотъ тую речь можетъ иному записати, кому воля его будетъ. Нижли еслибы тотъ живъ былъ, а онъ ему записавши, и потомъ иному Другимъ записомъ хотѣль записати; тогды отъ першый запись маеть при моцы зостати, а послѣдній ни во што маеть обернень быти. Такъ тежъ хто бы кому имѣнье або люди або земли продалъ; тогды тотъ, хто первой купиль, маеть то одержати, а тотъ, которій опослѣ купиль, маеть пенезей своихъ на истцу смотрѣти.

АРТЫКУЛЬ 9.

Хто бы на которую кольве речь добровольнѣ далъ запись, тотъ маеть при моцы зостати.

Тежъ уставуемъ, если бы ся хто кому записаль на которую кольвекъ речь рухомую або суму позычоную добровольнѣ запись, подъ печатью своею и подъ печатьми людей добрихъ подлѣ обычаю права учиненый; таковой кождый маеть у таковомъ записѣ зостати, а тотъ запись кождый маеть управа мѣти иоць.

АРТЫКУЛЬ 10.

О имѣнье должное и давность земскую.

Тежь уставуемь, коли хто купилъ якое дѣдицтво и держалъ съ покоемъ заплатившы, а на томъ же бы имѣнью хто иншый долгъ мѣль первой врьдовнѣ записаный, поки еще было не продано, и въ молчанью былъ о тотъ долгъ десеть летъ, черезъ давность земскую, и правомъ его не доходилъ; таковой хотя и листы упоминальные мѣль, то не маеть на томъ имѣнни долгу смотрѣти, але истца у своихъ пенязяхъ искати. А естли бы тотъ истецъ на мѣль чимъ платити; тогда въ томъ долгу маеть его судъ за шлюбъ выдати, нижли если бы отъ того * долгъ также врьдовнѣ записаный до права позываль того, который имѣнне держать тое, давности земское не омѣшкавшы, тому подлугъ запису его першого тотъ долг на томъ же першомъ имѣнью маеть быти держанъ, а тотъ, который въ держанью того дѣдицтва, оный долгъ маеть заплатити тому, хто первшый записъ маеть, а самъ маеть тыхъ пенезей и кожного онога накладу на истцу доискивати.

АРТЫКУЛЬ 11.

Хтобы подъ кимъ искалъ близкости, а тотъ держалъ имѣнне записомъ слушнымъ.

Хто бы под кимъ имѣнне искалъ близкости своей, а тотъ бы, подъ кимъ ищетъ, держалъ тое имѣнне записомъ слушнымъ, а повѣдилъ бы, ижъ то не одному ему але иншимъ тымъ же записомъ тое имѣнне записано, и рекъ бы : про то я безъ нихъ о тое имѣнне не хочу отповѣдати; тогда тотъ, хто имѣнне ищетъ, маеть оныхъ всихъ учасниковъ припозвати, которимъ тотъ записъ служить.

АРТЫКУЛЬ 12.

О долги двохъ або колко на одномъ имѣнью.

Коли бы хто имѣнне закупное у которой сумѣ держалъ, а другій бы ся долгомъ своимъ ку тому жъ имѣнью приповѣдалъ, менечи ижъ темъ ему на томъ же имѣнью сума есть описана, и съ права бы тую ему перевелъ, и давность бы земская не замолчана, а тое бы имѣнне обои суммы стояло; тогда тотъ который маеть большую суму повиненъ заплатити, або обадва тое имѣнне иншому въ обоей сумѣ зоставити, а тые пенези межи себе водле записовъ роздѣлити. А пакли бы колько должниковъ равными долги до одного имѣнне збѣглося, а имѣнне бы вже за тые долги не стояло; тогда хто бедеть мѣти первшій записъ, або бы въ держанью имѣнне былъ, а имѣнне тежь большое суммы не стоить, тогда (тотъ при такомъ имѣнью зостати маеть, а тые зъ) остатными записы мають тыхъ пенезей своихъ на истцу доходити.

АТЫКУЛЬ 13.

О речь заставную, хто въ большой сумѣ заведеть.

Тежъ коли бы хто речь заставную у большой сумѣ заставилъ, а тотъ чья речь у кого ль бы свое засталъ, и ку бранью пенезей, которые пенези або предокъ его будетъ на тую речь взялъ, и ку праву его позвалъ, а передъ правомъ суму пенезей водлѣ запису своего положилъ; таковыя пенези отдавши речь свою маеть взяти, а тотъ, которій на чужую речь большую суму даетъ, на истцы нехай того собѣ смотреть, што бедеть на звышь первое сумы даль.

АРТЫКУЛЬ 14.

Кождая застава давности мѣти не можетъ.

Хочемъ тежъ мѣти и уставуемъ, абы кожда застава давности земское не мѣла; и вольно будетъ всякому дѣдичу, отложивши передъ правомъ пенези, дѣдичтва своего дойти, такъ за правомъ своимъ приржонимъ яко кольвекъ и набытымъ.

АРТЫКУЛЬ 15.

О одкладанью пенезей на заставу,

Коли бы хто ииѣнье або иншую речь которую у пенезехъ заставилъ на рокъ мененый, и хотѣль бы пенези ѣго на року ему отдати, а заставу къ собѣ взяти, а не будетъ ли хотѣль пенезей въ его своихъ брати ани заставы еиу попустити, а позванъ бы былъ ку праву, абы пенязи свои взялъ, а онъ бы на року завитомъ не хотѣль стати; тогды жалобникъ передъ правомъ пенязи маеть положить, а врядъ ему маеть дати увязанье во имѣнье, и кождый заставу свою зъ уряду одержати маеть водлѣ опису своего. Пакли бы оный, которій имѣнье або которые оные речи заставнымъ обычаемъ закупилъ, а на року позваномъ сталъ; тогды взявшыя тые пенязи свое заставы, то есть имѣнья лежачаго або рухомыхъ речей, жалобнику маеть поступити водлугъ запису своего и умовы, жадною давностью не отбываючи. Пакли бы такому заставилъ на рокъ; тогды естли тотъ живъ, а рокъ пришолъ, а онъ на рокъ не выкупил; тогды онъ тую заставу маеть держати, ажъ до другого року не

можець окуповати водлѣ запису на то даного. Нижли бы тотъ, хто заставиль, умеръ свое заставы не выкупившы; а сынъ заставцы, або близкіе тогды того року не мають смотрѣти, але кгда будетъ припозванъ, безъ року маеть тотъ пенези взяти а заставы поступити.

АРТЫКУЛЬ 16.

Рокъ праву о заставную речъ маеть быти положонъ завитый.

Хочемъ тежъ мѣти и уставуемъ то, ижъ кождый первый рокъ за позвы зложоный о кождую речъ заставную маеть быти завитый подъ страченьемъ права; отъ которого часу позванъ будетъ тотъ, который заставу держитъ, и отъ того часу не маеть большей за имѣней казати жадныхъ доходовъ и пожитковъ брати, а што бы кольвекъ послѣ положенья позву черезъ возного зъ имѣнья того взялъ, то все маеть при выкупанью имѣнья ему вернути.

АРТЫКУЛЬ 17.

Хто бы што запродалъ на рокъ.

Тежъ если бы хто кому заставиль рухомую речъ на рокъ подъ страченьемъ, а коли бы рокъ пришоль, а тотъ, хто заставиль, не выкупиль; тогды тотъ, хто закупиль, оповѣдавшися вряду можець тые речи обернути, кгда хочеть, ку своей потребѣ на вѣчность.

АРТЫКУЛЬ 18.

О имѣнье заставное, безъ року не окупати.

Такъ тежъ имѣнье если бы хто кому заставиль на рокъ подъ страченьемъ на упадь; тогды если бы рокъ пришоль, а тотъ, хто заставиль имѣнье, на тотъ рокъ не могъ выкупити; тогды тотъ, хто закупиль, и по ономъ року врядовнѣ обослати маеть ближнихъ, а ближніе не могли бы по ономъ обосланью до году того имѣнья окупити, тогды тотъ, хто закупиль, по ономъ году, естли такій не выкупить, маеть вѣчнѣ держати.

АРТЫКУЛЬ 19.

О отнятье имѣнья заставного.

Тежь уставуемь, естли бы хто заставиль кому имѣнье або люди въ которой сумѣ пенезей на рокъ, и zase пенезей не заплатившы тое имѣнье або люди, што будеть заставиль, въ него отняль до року; тогда тому маеть кгвалту платити дванадцать рублей грошей и заруки въ листѣ описаные, а колько будеть до року тые люди, колко ихъ заставиль, не робили, за кождый тыжь день маеть навезки платити за службу суполную по шести грошей, а люди предся маеть пустити. А если бы одинь другого заставиль люди або землю, а стороны пришедшы бы хто третій тые люди отняль; тогда кому то отнято будеть, ли не всхочеть ли позвати отъ кого ему кривда, тогда маеть позвати оного, хто заставиль, а онъ с права будеть повинень ему, хто заставиль, очищати, а не чищить ли, ино такъ можными людьми землями маеть то нагородити, або и самого истца не будеть, ли тогда только съ тое заставы маеть доходити на томъ, хто заставу въ него отыймуеть.

АРТЫКУЛЬ 20.

О речь рухому въ заставѣ.

Уставуемь, коли бы хто кому заставиль въ сумѣ пенезей якую колвекъ речь рухому, кромъ дѣдства лежачого, на рокъ, а тотъ бы маючы заставу припозвалъ того, абы заставу свою выкупиль, а онъ бы съ тое заставы окупити не хотѣль; тогда врядъ маеть ему дозволити и допустити тые речы рухомые продати, и што бы звышей на той заставѣ на одну суму его превышало, тогда тое, што будеть назвышь, маеть оному, чія то заставка была, вернути. А гдѣ бы безъ року тая заставка запроДана; тогда врядъ маеть рокъ положити чотыри недѣли, и на которій маеть выкупити заставу свою, а не выкупить ли на оный рокъ, тогда по оному року подъ тымъ же способомъ, яко вышей описано, мають о тую ся заставу расправити.

АРТЫКУЛЬ 21.

Хто бы кому заставиль коня або вола безъ року.

Уставуемъ, если бы хто кому заставилъ коня або вола безъ року або и на рокъ, а въ томъ часѣ оное заставы конь альбо воль здохнетъ безъ причины ображена, ижъ робечы имъ не порвалъ, або голодомъ не вморилъ; тогда такового коня або вола платити не повиненъ, тому скуру показати, и тые пенези въ чомъ былъ закупилъ, тратить.

АРТЫКУЛЬ 22.

О речахъ заставныхъ, што вы згнуло въ чіемъ схованью.

Уставуемъ, хто бы мѣль речи въ себе якіе кольвекъ рухомые въ заставѣ або у схованью, а тые бы речи были сполу у въ одномъ кгдаху зъ речми домового господаря, и съ пригоды огнемъ погорѣло або покрадены, а онъ бы то вряду, подъ которымъ сѣдитъ, тогда жъ оповѣдалъ, и къ тому будетъ ли еще при тыхъ и властивое маетности его што выкрадено або сгорѣло; тогда маеть на томъ самъ присегнути, ижъ оныхъ речей не користилъ, и ничого ку пожитку своему не обернулъ, за таковымъ отприсяженьемъ маеть быти волень. А пакли бы повѣдалъ, же толко того речы, хто далъ ховати, сгорѣли або покрадены, а его самого господаря домового цѣлы; таковой тые речы вси повиненъ будетъ оному вернути або заплатити, а естли въ сумѣ пенезей заставлено, ино пенези взяти, а тые речи предсе вернути, на што слушный доводъ учинить. Такъ тежъ если бы хто у кого зложилъ въ sklepѣ або у якомъ схованью речы своее и замкнулъ, а домовый господарь тые речи въ небытности его рушыль, або и на иншое мѣстце перенесъ, а въ томъ бы се шкода стала; тогда тотъ, хто рушилъ, маеть тую всю шкоду платити за слушнымъ доводомъ або присегою оногo шкоднаго.

АРТЫКУЛЬ 23.

О заповѣданью речей рухомахъ чужихъ.

Уставуемъ, кгда бы хто свое речы далъ въ схованье кому, а иншій зъ стороны доведавшися о тыхъ речахъ въ захованью приповѣдался, ижъ тотъ и тые, хто тые речы зложилъ, виненъ ему албо долженъ; тогда господарь маеть тые речы у себѣ мѣти, а ихъ не выдавати до росправы. А естли бы ихъ хто заповѣдалъ, хотѣль отъѣхать прочъ, тот маеть на мѣстце свое передъ судомъ прокуратора встановити, который въ небытности его будетъ оногo долгу доходити; пакли бы самъ ѣхаль, а прокуратора не зоставилъ, ино тые речы, которые заповѣдалъ, мають оному выданы быти, чіи суть, а въ томъ господарь домовый никоторое трудности ани шкоды мѣть не маеть.

АРТЫКУЛЬ 24.

О листы на долги на имѣнья и на заставы згинулые.

Тежь уставуемъ, кому бы листы на долги и на заставы на имѣнья згинулые гдѣ кольвекъ на дорозѣ отъ огню або отъ воды и якимъ кольвекъ обычаемъ стороны, а тот, кому листы тые належали, которого жъ часу по оной згубѣ передъ нами Господаремъ або передъ врядомъ оповѣдалъ и записати далъ, а потомъ пришло бы ку праву; тогда тотъ, хто листы стратилъ або кому тые листы прислухаютъ и належать, маеть довести людьми добрыми вѣры годными, которые листы видѣли и ихъ свѣдомы, а потомъ самъ и зъ свѣдками, колько ихъ можетъ мѣти, на томъ прысегнути маеть, ижъ таковые листы страчены, а кгда того доведеть людьми добрыми и присегою своею, маеть оную речъ, на што листы згинули одержати.

АРТЫКУЛЬ 25.

Якъ много безъ листу вызнаного маеть позычити.

Уставуемъ, ижъ каждый шляхтичъ мѣщанинъ ни хто иншій не маеть безъ листу вызнаного болшъ позычити десети копъ грошей; а если далъ большую суму, а листу вызнаного на то не мѣль, тогда тотъ, хто болшъ дал безъ листу вызнаного, пенези тратитить, а тотъ, который позычилъ, не повиненъ болшъ платити только десеть копъ грошей и то за присегою оногo, хто на немъ тыхъ пенезей доходить.

АРТЫКУЛЬ 26.

О позычкахъ купецкихъ.

Тежь купцы мѣщане жидове не шляхта реистрами, окромъ записанья до книгъ або церокграфовъ, долговъ никоторыхъ доходити не могутъ. А вѣдьже хто бы хотѣль до листовъ печати прикладати, тогда до всякихъ листовъ на заочную просьбу ани тежь написанье листовъ на заочную просьбу печати прикладаны быти не мають, кромъ устное и

очевистое прозбы, маючи певную вѣдомость, што на тыхъ листехъ записныхъ будетъ написано.

РОЗДѢЛЬ ОСМЫЙ О ТЕСТАМЕНЬТЕХЪ.

АРТЫКУЛЬ 1.

Хто можетъ и не можетъ о речахъ своихъ рухомыхъ тестаментъ чинити.

Уставуемъ, ижъ кождый маеть мѣти моць о речахъ своихъ рухомыхъ тестаментъ чинити, кромъ тыхъ парсунъ нижей описаныхъ, которые парсуны ижъ подлѣ права не мають ничего вольного, для того тестаментомъ никому ничего отдати не могутъ: наипервей дѣти лѣтъ зуполныхъ не маючіе, законники будучи въ законѣ не привильеваномъ, приемши и потвердившия въ законѣ, сынове зъ отцемъ недѣльные окромъ речей набытя своего властного або выслугъ, бо тежъ въ чужую моць поданные, то есть тотъ кого бы кому выдано зъ его статки, шаленные, кацеры, невольники, отъ розуму отходячіе, а вѣдже тые, коли къ собѣ прійдутъ, моцны тестаментъ свой чинити, такъ тежъ и чти отсужонные не могутъ тестаментовъ чинити.

АРТЫКУЛЬ 2.

О тестаментехъ на речи рухомые на имѣнья набытые, якъ мають чинены быти.

Коли бы хто на речи рухомые або на имѣнье набытое хотѣлъ тестаментъ чинити; тогды таковой будь здоровъ або форъ, коли бы только былъ при доброй памяти, моцомъ будетъ речи свое и имѣнье набытое таковое отказовати, кому хочеть такъ духовнымъ парсунамъ яко и свѣцкимъ, призвавши къ тому врьдъ земскій судью подсудка писара каплана, а гдѣ бы врьду иѣти не могъ, ино передъ трема свѣдками вѣры годными можетъ тестаментъ чинити. А коли сам потомъ умереть, а тую волю свою остатнюю смертью потвердить, хотя бы и печати не приложилъ; таковой тестаментъ маеть при моцы зостати, только бы по смерти его не омѣшкали тестаменту передъ нами Господаремъ або передъ врьдомъ земскимъ оповѣдати на рокохъ першыхъ судовыхъ. Пакли бы хто учиненю тестаменту живъ зосталь, вольно таковому тестаментъ свой колько кротъ хочеть отмѣнити, а остаточный тыхъ двоухъ тестаментовъ смертью потвержоный врьдовнѣ учиненый въ кождого права при моцы зостати маеть. А именье набытое тестаментомъ яко рухомую речь кождый можетъ записати, коли хочеть, нижли хтобы хотѣлъ имѣнье набытое на церковь записати маеть тымъ обычаемъ: которые кольвекъ духовные будутъ тое имѣнье держати, мають съ того имѣнья службу земскую служити конно збройно водле уставы и уфалы земское. И вже отъ того часу уставуемъ, хто записаль имѣнье на костель, тогды съ того имѣнья потомужъ маеть быть служба, яко и первей бывало. А а вѣдже тые свѣдки, которые при справованю тестаментовъ бывають, мають въ собѣ слова, которые слышать

отъ того, хто тестаментъ чинить, правдиве до тестаменту казати вписовати и выразити значѣ безъ кождо охиленья, тежъ и тотъ, хто тестаментъ чинить, маеть меновите кождую речъ у тестаментѣ докладати.

АРТЫКУЛЬ 3.

О сведкахъ, которые мають быти при справованью тестаментовъ.

Тежъ уставуемъ, при тестаментѣ мають быти три свѣдки вѣры годныхъ и неподозренихъ, про то тые свѣдки ниже менованы быти не мають: наипервей тые, которые тестаментовъ своихъ чинити не годни, тежъ невѣсты и езекуторове або опекунове того тестаменту, такъ тежъ и тые, которымъ въ томъ тестаментѣ што будетъ описано. А вѣдже если бы ся приходило кому тестаментъ на войнѣ и въ дорозѣ и въ дому а у пригодѣ, або не могли бы трехъ свѣдковъ мѣти; тогда колко можетъ быти, только бы вѣры годни, а при таковыхъ можетъ тестаментъ чиненъ быти, нижли скоро по вчиненью маеть тотъ тестаментъ объявленъ быти передъ нами Господаремъ або передъ судомъ земскимъ на первыхъ рокохъ судовыхъ, а на войнѣ передъ гетманомъ альбо хоружимъ повѣтовымъ, а тые свѣдки присегою своею мають тотъ тестаментъ подтвердить. А трафить ли ся таковой тестаментъ чинити въ чужія земли; тогда тестаментъ маеть быти объявенъ передъ тымъ врядомъ, гдѣ ся пригодить, а прѣхавшы до того панства и вказавшы отъ оногo вряду выпись, предсе маеть передъ врядомъ земскимъ оповѣдати, яко вышей описано.

АРТЫКУЛЬ 4.

Ни хто не можетъ невольнику своему ничего записати, вольнымъ не вчинившы.

Уставуемъ, ижъ кождый якогo кольвекъ стану невольнику своему, не вчинившы его на передъ вольнымъ, ничего тестаментомъ записати не может, абы его первой вольнымъ учинилъ. А вѣдже тестаментомъ ижъ каждымъ листомъ явнымъ можетъ невольника своего вольнымъ учинити, а учинившы, тымъ же тестаментомъ можетъ ему што рухомогo водлѣ воли своее записати.

АРТЫКУЛЬ 5.

Кождый слуга путный и мѣщанинъ мгъсть неупривильеваныхъ, и тежъ человекъ простой якъ маеть тестаментъ чынити.

Уставуемъ, ижъ кождый съ таковыхъ людей воленъ тестаментъ чынити о речы свое рухомые и описати третью часть маетности своее всее кому хочеть, а двѣ части тыхъ же рухомыхъ речей маеть zostавити дитяти въ дому своемъ, для отслугованя съ тое земли свое, на которой сѣдитъ; а не будетъ ли мѣти дѣтей ино предсе тые двѣ части маетности его маеть zostати въ дому его ку службѣ оного пана, на чыей земли сѣдитъ. А естли бы дѣти будучи вольные, а хотѣли прочъ пойти, тогды тую двѣ части маетности вземшы мають пойти прочъ, только землю мають пану своему подати и съ жытомъ засѣянымъ и съ хоромами съ тымъ всимъ, съ чымъ будетъ тую землю пана своего на службу взять.

АРТКУЛЬ 6.

Если бы тестаментъ въ чомъ не былъ достаточнѣ справованъ.

Коли бы въ которомъ тестаментѣ якимъ незначнымъ або якимъ закрытымъ письмомъ который артыкуль въ немъ былъ написанъ, або тежъ на мѣстцу значномъ або на датѣ было скробано, тогды таковой тестаментъ маеть быти никчемный; а гдѣ бы на мѣстцу мало потребномъ было скробано не ку шкодѣ сторонѣ, тогды шкодить не можетъ. Такъ тежъ хто бы хотѣлъ бурить тестаментъ, а если бы въ въ одномъ або въ кольку артыкулахъ былъ нарушонъ, а иные вси поряднѣ водлѣ статуту справлены; тогды однимъ або кольку артыкуловъ всего тестаменту касовать не можетъ. Такъ тежъ о записехъ всякихъ на кождую речъ розумѣно и сужено быти маеть.

АРТКУЛЬ 7.

Причины для которое отецъ сына можетъ отъ имѣней выдѣлити або отдалити.

Уставуемъ ижъ съ причинъ тыхъ, гдѣ сынъ квалтовну руку поднесеть на родичовъ, альбо имѣнье за живота зъ рукъ отцовскихъ квалтовнѣ отыйметъ. Другая кгда значную кривду вчынить родичу, альбо которымъ обычаемъ на горло стоять. Третья кгда сынъ або дѣвка правнѣ не для Речи Посполитое а зе злостью або зъ ненависти стоять на горло родичу або матцѣ. Четвертая кгда часъ потребы рукоемства, або взятыя зъ везенья, ку постановенью своей руки на рокъ въ речы, кгда идетъ о горло отцу або которому кольвекъ, речъ отмовлять або зборонялсе взяти. Пятая кгда дѣвка нерядные учинки чынить, чыстость свою ображаючи, а родичы малженства и вѣна ее не забороняли, а въ той нерядности

передъ лѣты двадцатма и петма въ малженство не пошла, а нерядности своее уживати хотѣла; тогда родичове могутъ отъ имѣнья выдѣдичить, а то для того, ажъ ихъ послушна быть и въ малженство пойти не хотѣла. Шестая кгда родичовъ опушаютъ взешстью розумовъ ихъ. Семая коли бы родичовъ въ неприяельскихъ рукахъ будучыхъ окупити або чымъ инымъ вызволити не хотѣли, маючи имѣнье и маетность въ рукахъ своихъ. Осмая кгда упорнѣ кацерства не слѣдуютъ, або ку вѣрѣ Хрестіянской пристать не хотятъ. А вѣдже и за тыми причинами первой жадныхъ записомъ а ни тестаментомъ выдѣдичити не можетъ, ижъ бы тые причины або которою зъ нихъ передъ врядомъ оповѣдалъ и до книгъ записалъ.

АРТЫКУЛЬ 8.

О человѣку слѣпомъ.

Если бы се тежъ пригодило человѣку слѣпому testamentъ чынити, таковой при testamentѣ своемъ маеть мѣть осмъ свѣдковъ а не мнѣй, при таковыхъ свѣдкохъ testamentъ подлѣ права справованый маеть быти и за слушный принять.

РОЗДѢЛЬ ДЕВЯТЫЙ О ПРАВАХЪ ЗЕМСКИХЪ.

АРТЫКУЛЬ 1.

О отняты имѣней въ границахъ.

Уставуемъ, еслибы которые княжата, панове бискупове закону Рымского такъ и Греческого, и кнегини панни, вдовы, и земляне мѣли имѣнья люди и земли ловы и лѣсы озера и бобровые гоны у границахъ або иежахъ; а хотѣль бы одинъ другого перешедши границу або между въ землю уступоватися, або люди и земли ловы и лѣсы озера и сѣножати и бобровые гоны отнимати, хотѣчы его съ того имѣнья вытиснути; тогда мають зъ obu сторонъ по осмнадцати свѣдковъ передъ правомъ поставити на кгрунтѣ земляномъ, и кого найдуть судьи близшого ку доводу, тогда каждого стану вышеймененыхъ маеть и зъ шестма свѣдками самъ семей на своемъ кгрунтѣ присегнуть.

АРТЫКУЛЬ 2.

О рокъ завитый на землю выѣхатъ.

Тежь уставуемъ, ижь рокъ ку граниченью и всякой копе судомъ положоный маеть быти завитый, а про то черезъ жадную причину не маеть далее отложонъ быти, толко съ тыхъ причинъ, которые особливими артыкулами суть описаны: моромъ, соймомъ вальнымъ, службою нашою господарскою, то есть посельствомъ або войною, и немоцью правдивою. И коли бы которая сторона кромъ тыхъ причинъ не стала; тогда сторона за своимъ слушнымъ врядовымъ доводомъ передъ судомъ земскимъ маеть речь свою одержати подлѣ заведеня свѣдковъ присяглыхъ, на мѣстцу граничномъ постановеныхъ, и присяги своей, и тымъ же речь свою маеть не вѣчность одержати. А естли бы передъ тымъ рокомъ былъ немоцонъ, маеть дати вѣдомость судьямъ и сутяжому, а судъ маеть отложыти, поки онъ выздорѣеть, а коли выздорѣеть, мають его судьи листомъ обослати и рокъ зложыти; а онъ на другомъ року передъ судомъ первой маеть присегнути на на томъ, ижь справедливѣ былъ немоцонъ и для тое форобы на томъ року стати не могъ. Также судья передъ тымъ рокомъ естли бы ся рознемогъ; тогда мають подсудокъ и писарь на тотъ рокъ предся выѣхати и то судити и отпраовати, а тотъ судъ ихъ маеть моцонъ быти яко бы и всихъ трехъ. Такъ тежь кгда бы ся трафило о граниченье о речь важную вышей двадцати бочокъ земли; тогда судья або подсудокъ съ писаремъ у повѣтѣ, маючы при собѣ людей добрыхъ, а тую землю объѣхавшы, справовати кончыти и ограничити мають.

АРТЫКУЛЬ 3.

Въ свѣдѣцствѣ жадного закону не маеть быти кромъ Хрестіянского Рымского, Греческого закону.

Тежь уставуемъ, ижь свѣдки о речь земскую и доводъ держаня земли, а такъ тежь и о кождую речь, не мають у свѣдѣцтва припуцоны быти жыдове а ни Татарове, одно Хрестіянского Рымского або Греческого закону. И вшакъ же може съ тыми Хрестіяны, которые бы патерь умѣли и вѣрою во единого Бога, на кождый годъ у плебановъ або у поповъ своихъ на сповѣди бывали, тѣло Божое пріймовали, а въ жадномъ подозрѣнью не бывали, а ни в поволаню у воколицы а ни фальшерствѣ, тые мають допуцоны быти свѣдѣцтва; а хотя бы и хрестіяне будъ Рымского або Греческого закону, которые божего тѣла не пріймуютъ, сведѣцтва передъ не мають допуцоны быти.

АРТЫКУЛЬ 4.

Хто бы кому свѣдки ганиль.

Коли бы хто своволнѣ сторонѣ поведовой свѣдки ганиль, а онъ если бы подлугъ права поставилъ осмнадцать свѣдковъ, а тотъ бы межы тыми осмнадцатма свѣдками не обраль шести вѣры годныхъ, а оставляль хотечы имъ тымъ право конченя переказити, а тотъ яко поведовая сторона другими ся свѣдками не опатрилъ, мѣль бы тымъ на одномъ року завитомъ речъ свою упустити; тогда таковой моцень маеть быти о тое наганенье свѣдковъ своихъ тамъ же передъ судьями первой очищати. А коли судьи визнають, ижъ ему тыхъ свѣдковъ свовольнѣ ганиль и оставилъ, а они се выведуть; тогда таковой оставуючы тыхъ свѣдковъ, каждого зганеного водлѣ стану повинень будетъ навезати водлѣ роду ихъ, шляхтича яко шляхтича, холопа яко холопа, такъ яко бы его раниль.

АРТЫКУЛЬ 5.

Коли бы хто свѣдковъ наганеныхъ передъ судомъ не очыстилъ.

Коли бы хто тыхъ же свѣдковъ передъ тымъ судомъ своимъ зганеныхъ всихъ не очыстилъ; тогда хто свѣдковъ наганить, а оные свѣдки зганеные не очыстилися, ино тые свѣдки которые не приганеные мають присегнути. А если бы зъ обудву сторонъ межы собою свѣдки одны другимъ наганили; тогда свѣдки тые на обѣдвѣ стороны мають оставлены быти, а знову иныхъ свѣдковъ зъ обохъ сторонъ поставити мають неподозреныхъ, и межы тыми которые будутъ годнѣйшіе, тые мають быти пріймованы, и сами зъ свѣдками присегати.

АРТЫКУЛЬ 6.

О землю обрубную.

Тежъ уставуемъ, естли которой сторонѣ о землю обрубную доводъ права былъ сказанъ, тотъ свѣдковъ своихъ маеть подлѣ обычаю права осмнадцати передъ правомъ постановити, и якъ тотъ панъ або землянинъ поколе съ тыми свѣдками заведшы присягу вчинить, по толь маеть граница вдѣлана быти. Нижли естли бы право мѣли о землю сумѣсную, а не въ одномъ мѣстѣ порозну, одна земля отъ другое въ пол-мили або и далей; тогда на каждой таковой далекой межы маеть свѣдковъ особныхъ мѣти, и на каждой межы самъ и зъ шестма свѣдки повонинъ будетъ присегнути, а тые свѣдки, которые на первой межы присегнуть, на другой межы того жъ часу свѣдчыти и присегати не могутъ, окромъ тыхъ земель которые тужъ понедалеку отъ себе, на таковыя межы тыхъ же свѣдковъ поставити и доводъ подлѣ права чынити можетъ.

АРТКУЛЬ 7.

О рокъ завитый шесть недѣль.

Уставуемъ, абы на кождый кгрунтъ земляный отъ суду земского заочнѣ рокъ не быдъ зложонъ, лечь первой сторона жалобливая маеть передъ судъ земскій припозвати, а судъ зъ очевистого мовенья маеть имъ обоимъ сторонамъ рокъ зложыти завитый за шесть недѣль, на который судья съ подсудкомъ и писаремъ мають выѣхавши, яко на року завитомъ мають справедливость чынити, а стороны обѣ двѣ будутъ повинни передъ ими права достояти и сказанье пріймовати. А по сказанью будетъ ли ся которой сторонѣ видѣти зъ уближенемъ, тогда по сказанью мають выпись отъ суду земского вземшы до пановъ радъ нашихъ апелевать.

АРТКУЛЬ 8.

Хто бы будучи урядникомъ господарскимъ, маючы имѣнье въ томъ повѣтѣ, мѣль зъ шляхтичомъ право о землю.

Тымъ тежъ обычаемъ если бы который урядникъ нашъ, маючы имѣнье въ томъ же повѣтѣ державы своей, мѣль зъ которымъ шляхтичомъ копу вести; теды маеть справоватсе о кгрунтъ земный, яко вышей описано, и маеть ставить осмнадцать свѣдковъ шляхту и иныхъ людей добрыхъ вѣры годныхъ, а не того уряду присуду своего, але иныхъ постороннихъ, и такъ тежъ судьи мають гледѣть листовъ границъ знаковъ, а чьи будутъ листы лѣпшые и границы, тая сторона маеть быти припушена ку доводу.

АРТКУЛЬ 9.

Хто бы кому граниу або между сказалъ.

Коли бы шляхтичь шляхтичу границу сказалъ, або огнемъ выжогъ, або вырубаль квалтовнѣ, або яко кольвекъ инакъ выказиль, або копцы роскопаль, або между сказалъ, а было бы то на него переведено правомъ; тогда таковой маеть заплатити ображоному дванадцать рублевъ грошей, а суду земскому копу грошей, а за кождый копецъ скажоный три копе грошей. А естли бы шлихтичь шляхтичу между переораль; тогда за переоранье межи три рубли грошей и на судъ земскій пол-копы грошей, а границу або между черезъ

него скажоную маеть за се передь урядомъ направити по старому. А если бы холопъ простой холопу то учынилъ; тогда за скаженъе холопское межы рубль грошей. А пакли бы граница або межа здаласе ему ку кривдѣ, ино маеть правомъ спирати а не квалтомъ.

АРТЫКУЛЬ 10.

О лѣсъ сумесный и о проробки.

Уставуемъ, если бы хто лѣсъ сумесный мѣлъ; тогда маеть кождый поля своего гледѣти и противъ себе проробки чинити, а отъ лѣса одинъ другого не маеть заходити, и якъ зоткнутъсе топоры, тутъ маеть быти граница. А вѣдже естли бы одинъ дубъ былъ и большей проробиль нижи другій, а оному се видѣла бы кривда, и потегнулъ его о то до права; тогда маеть быти выслано и осмотрѣно, и естли будетъ большей проробиль, таковой маеть на тое мѣстце лѣсу дати противъ проробковъ, хто большъ проробиль, хотя не такъ доброго якъ тотъ выробленный. А кгда оный сяберень его лѣсу только приробить яко оный, тогда иаеть у мѣру лихое и доброе подѣлити на полы; если бы оны съ того лѣсу ему отвести, который большей приробиль, ино маеть тые проробки свое, што будетъ большъ выробиль, на полы або на ровные части, иле ихъ будетъ, роздѣлити.

АРТЫКУЛЬ 11.

О рѣки, где граничатъ.

Тежъ гдѣ бы рѣка граничыла, тогда кождый съ берега своего маеть до половицы вживати. А кгда бы рѣка которая граничная на чый берегъ песокъ незначнѣ сыплючы прибавокъ чынила, тотъ прибавокъ маеть быть того пана, чый берегъ естъ; а естли бы рѣка квалтомъ идучи инуды пошла, тогда старое рѣчыще маеть быти предсе границою, а того рѣчыща будетъ ли въ ней пожитокъ, такъ кождый съ берега своего на половицы уживати маеть. А тая рѣка граничная, которая инуды се обернетъ, оба два береги того мають, чымъ кгрунтомъ поидеть. А естли хто рѣку прокопаль умыслнѣ ку шкодѣ сусѣду своему, и о то бы его ку праву позваль, и то бы на него перевель ведле права, тогда маеть оному право сказати; абы зась рѣку по старому загаиоваль, и за то будетъ повинень жалобливой сторонѣ квалтъ дванадцать рублей платити, яко бы границу сказиль, и вси шкоды, што въ пожиткохъ тое речы шкодовалъ, зъ розсудку оправити маеть.

АРТЫКУЛЬ 12.

Коли бы хто своимъ ставомъ инший ставъ або сѣножати затопиль.

Тежъ уставуемъ, коли бы хто въ дѣдизнѣ сполную рѣку мѣль, то есть оба два бы береги мѣль и его были, а на ней ставъ и млыны поставиль, а сусѣдній выше млынъ затопиль своимъ ставомъ, хотя бы опослѣ збудоваль былъ, а онъ поднемшы греблю затопиль; тогда маеть возного зъ уряду взяти, а вознымъ и сторонами маеть спустити воду, и што будетъ шкоду учиниль, тую шкоду затопленому оправити водлугъ слушного доводу маеть. А естли бы сѣножати затопиль безъ воли того пана, чья сѣножать есть; тогда будетъ ли его воля отмѣну взяти, а онъ маеть ему отмѣну дати, а пакли бы на то воли его не было, тогда онъ нехай воду потому держитъ, яко бы его сѣножати шкоды не было и верхнего млына не затопиль. Естли бы тежъ половицу рѣки мѣль, а присыпаль греблю къ чужому берегу або сѣножать затопиль безъ его дозволенья; тотъ тую греблю роскопати маеть и за то не повиненъ будетъ квалту платити, бы нихто не маеть безъ дозволенья къ чужому берегу греблю засыпати а ни ставу займовати.

АРТЫКУЛЬ 13.

Хто бы на чьей земли посѣяль збожъе, тежъ коли бы хотѣль сѣно косити альбо бы и покосиль, якъ маеть заповѣдати вознымъ, абы не звозиль до права.

Уставуемъ, хто на чьей земли жыто посѣеть; тогда тотъ, хто свою землю менуеть, маеть взяти возного зъ уряду, въ чьемъ повѣтѣ се дѣеть, маеть заповзати подъ закладомъ на насъ Господаря и на судъ земскій, штобы онъ жыта не звозиль и пожавшы поставиль на той же земли до права, и рокъ положившы, маеть зъ obu сторонъ судъ земскій вывести. А естли бы тотъ, хто заповѣдалъ, правомъ перевель, штожъ онъ тое жыто будетъ сѣяль на его власной земли; тогда маеть быти ему такъ земли яко и оное жыто; а гдѣ бы тотъ черезъ заповѣдь або закладъ пожавшы оное жыто и звезъ прочъ, тогда маеть закладъ заплатити и жыто зъ навезкою отдати. А если бы хто будетъ на своей власной земли сѣяль, а онъ ему то заповѣдалъ, а тотъ правомъ не переведеть, ижъ бы то земля его была; таковый закладъ тотъ самъ платитъ до скарбу нашего господарского и шкоды оному оправити маеть, то есть, если бы чье жыто за заповѣдью погнило. Або тежъ хто судъ земскій вывелъ и на него наложилъ, а то што жаловаль не довелъ, тогда тое жыто маеть тому платити и тую шкоду оправити. А хто бы хотѣль черезъ границу кому шкоду вчинити; тогда въ таковыхъ речахъ закладъ маеть быти на насъ Господара сто рублевъ грошей, а на державцу двадцать рублевъ грошей; а если бы о межахъ была заповѣдь, тогда закладъ маеть быти на насъ Господара дванадцать рублевъ грошей, а на державцу три рубли грошей, нижли заповѣдь жыту и сѣножатемъ маеть трывати до Божьего нароженья.

АРТЫКУЛЬ 14.

Хто бы земли въ держанью были три годы, а другій правомъ не переконавши жыто пожалъ, або жатое побралъ, або бой учынилъ, або соху зрубалъ барону и колеса.

Тежь уставуемъ, ижь коли бы хто которую землю держалъ въ упокою три годы, а съ покоемъ ее сѣялъ або оралъ, а другій пришедшы на тое поле жыто пожалъ, або жатое побралъ и вдарилъ самого або человѣка его, або которого кольвекъ стану, або соху колеса борону зрубалъ и сошники взялъ; таковый маеть платити кгвалтъ дванадцать рублей грошей, а если возметъ безъ бою, то маеть шкodu платити зъ навезкою, коня конемъ вола воломъ навезати, а за соху десеть грошей, а за нарoги дванадцать грошей, за колеса дванадцать грошей, за борону шесть грошей заплатити, а потомъ, кгда похочеть, держачого о тую землю маеть правомъ урядовнѣ спирати. А если бы хто въ кого отнималъ, а другій того боронилъ, и въ держанье не далъ; тому маеть быть право, и хто въ земли будетъ винень, тотъ маеть шкoды и кгвалтъ оправити.

АРТЫКУЛЬ 15.

О увезанье въ имѣнье за долги, або за иншую причину, якъ се мають справовати.

Уставуемъ, если бы отъ насъ Господара были посланъ дворенинъ нашъ увезатисе въ чье имѣнье за суму пенезей, которая бы прислушала до скарбу нашего господарского, тогды тотъ посланецъ маеть приѣхати до того имѣнья, и взявшы зъ уряду земского або замкового возного и людей добрыхъ шляхту, и оногo имѣнья людей всихъ маетности списати, одинъ реестръ дати до скарбу нашего, а другій до замку або до суду земского, а третій у себе маеть оставить, для того абы въ часъ помовки мѣлъ ся чимъ выправовати. Нижли естли бы што на комъ было присужоно зъ выроку нашего або пановъ радѣ нашихъ; тогды въ таковой речи зи листы нашими маеть судъ земскій увязанье дати, а гдѣ бы ся спротивлено суду земскому, ино замокъ ино повѣтъ маеть мощно увезати, пестерегаючи и заховываючися ведле того, яко о томъ вышей въ роздѣлѣ о судьяхъ естъ написано.

АРТЫКУЛЬ 16.

О имѣнье, которое зволившыся дадутъ до рукъ нашихъ господарскихъ.

Тежь уставуемь, ижь коли бы обѣ двѣ стороне зволившися и дали имѣнье до рукъ нашихъ господарскихъ до росправы, а мы быхмо которому вьяднику нашему господарскому або черезъ листы наши або черезъ увяжчого оное имѣнье до води и науки наше вѣ держанье дали; тогда вьядникъ воленъ будетъ вѣ томъ имѣнью слушную живность собѣ мѣти, а зѣ двора индей ничего не маеть возити, але будетъ повиненъ оное имѣнье со всими речами рухомыми, такъ тежь и зѣ росходы часу держанья собранными, оной сторонѣ, которой прислушаетъ, вѣрнѣ а зуполнѣ за листомъ нашимъ господарскимъ отдати, и дозрѣти того, же вѣ ономъ имѣнью за держанья его жадная шкода и спустошенье не сталося. А естли бы тотъ вьядникъ иначе чинилъ; повиненъ будетъ оной сторонѣ шкодной всю шкоду и згубу платити, а мы и потомки наши винни будемъ зѣ нимъ той сторонѣ справедливость учинити на первомъ року яко на завитомъ, а вѣ небытности нашей ино панове рада наши.

АРТЫКУЛЬ 17.

О имѣнье нероздѣльное межѣ братьею.

Тежь уставуемь, ижь коли бы братья рожная, альбо и и дальшая вѣ роду нижли братья рожная, лѣта зуполные маючи, мѣли которое имѣнье сумѣстное нероздѣльное, а потомъ передъ правомъ собѣ зровнали и роспишавши подѣлили, або и подѣлившы и передъ вьядъ пришедши сознали, або листы и реестры межѣ себе дали; тогда тотъ вжо дѣль промежку себе вѣчнѣ держати мають, а хотя бы и не передъ правомъ але передъ сполными прїятельми своими также во имѣнью собѣ дѣль учинили, а тотъ дѣль промежку себе давность земскую десеть годъ держали, таковой дѣль вжо за таковою давностью земскою мають промежку себе деражати. А естли бы братья або кровные якій дѣль промежку себе хотя и мѣли, а передъ вьядомъ того дѣлу своего сполечнѣ не сознали, а листовъ або реестровъ дѣлчихъ межѣ себе такъ и листовъ прислучаючихъ на то не розобрали; таковой дѣль за вѣчный держанъ быти не маеть, и никоторая давность шкодити не можетъ, а то для того, же бы одинъ на другого большей собѣ не привлащаль части.

АРТЫКУЛЬ 18.

У чужого человѣка не маеть ни хто земли закуповати безъ воли пана его.

Тежь уставуемь, ижь не маеть жаденъ бояринъ а ни человѣкъ вѣ чужого человѣка земли закуповати безъ воли пана своего; а естли бы хто вѣ чужого человѣка безъ воли пана его

закупивъ и што на ней посѣялъ, тогда тое сѣенье и пенези тратить. А тотъ человѣкъ, чья земля маеть безъ откладанья пенезей всю землю къ своимъ рукамъ взяти; а онъ на томъ его, въ которого будетъ землю закупиль, и на поручнику, черезъ чьи руки даваль будетъ, пенезей искати не маеть, для того ижъ онъ то учиниль надъ тую уставу нашу. Также и чужого человѣка не маеть ни хто закуповати безъ воли пана.

АРТЫКУЛЬ 19.

Которые люди приходятъ на волю и засѣдевши волю втекають прочь.

Уставуемъ, коли бы человѣкъ вольный пришолъ за которого князя або пана и земенина, а сѣлъ на воли, а высѣдевши волю хотѣлъ прочь засе пойти; тогда первой маеть заслужити тому пану своему только, колько на воли седѣлъ, тожъ пойти прочь. А естли бы не хотѣлъ заслужити толькожъ; тогда маеть пенези заплатити на каждую недѣлю по шести грошей. А естли жъ бы онъ, заседѣвши волю, втекъ за кого кольвекъ иного; тотъ за кого втечетъ, маеть его ему выдати не мнѣй яко отчича, пакли жъ бы на обсыланье его того человѣка выдати не хотѣлъ, а тотъ человѣкъ потомъ отъ него втекъ прочь, а то бы на него правомъ переведено, тогда за него маеть платити за каждую недѣлю, колко на воли седѣлъ а не робиль, по шести грошей.

АРТЫКУЛЬ 20.

О найденью скарбу захованого въ земли або у якомъ поклаженю.

Уставуемъ, коли бы ся трафило кому налѣзти въ земли якій скарбъ, гроши, золото, серебро, або иншое яко се трафляеть находити; тогда естли найдеть на своемъ кгрунтѣ, маеть тому быти чий кгрунтъ, а естли бы на чьемъ иншомъ нашолъ, тогда половицу маеть тому дати, на чией земли нашолъ, а половицу собѣ взяти, такъ тежъ и на заставной земли на полы роздѣлити мають. Нижли хто бы умыслнѣ на чужой земли кладу искалъ и нашолъ; тогда маеть што будетъ найдено все тое отдати, чий кгрунтъ естъ. А вѣдъже таковому найденью хтобы се знати не хотѣлъ, тогда ку праву притягивати ани ку присязѣ его примушати не маеть.

АРТЫКУЛЬ 21.

О портехъ водныхъ и о товарахъ стонулыхъ на водахъ.

Кгды бы ся трафило, воднымъ путемъ везучи якіе товары съ прыгоды судно се розбило, або стонуло при чіемъ кольвекъ берегу; тогды оный товаръ стонулый купецъ або хто кольвекъ маеть добровольнѣ зъ воды выбиратьи и на берегъ выносити, а врядники наши князи и панове и ихъ врядники земяне и люди простые, и чій кольвекъ берегъ есть, не мають отъ того ничего брати. А хто бы хотѣль въ томъ онымъ стонулымъ трудность задавати; тогды тотъ будетъ повинень всю шкodu, што будетъ на томъ шкодовати, совито оправити.

АРТЫКУЛЬ 22.

О дорогахъ старовѣчныхъ.

Уставуемъ, ижъ дороги звѣчные мають быти водлѣ стародавнаго обычаю такъ широки, абы два возъ форманскихъ розминулися, а возъ порожній маеть уступити возу наложоному, пѣшій ѣздному, вoзoвoму ѣздный, естли бы тѣсна дорога была яко у мѣстехъ, або естли бы хто передъ непріателемъ утекаль, тогды возъ застановеный маеть быти, ажъ обминуеть. А часу зимнего кгды снѣгъ бываетъ велкій, мають поткавшися дорогою половицы дѣлити, а одинъ другого спихати не маеть съ дороги.

А вѣдъже на томъ соймѣ зъ росправы господарское его милость придати рачиль урядъ подкоморого ку тымъ справамъ судовъ земляныхъ, а то для большое и поспѣшнѣйшее отправки въ справедливости людской, про то што судъ земскій мѣль отпраовати ведлѣ артыкуловъ урядовныхъ вышей описаныхъ въ томъ статутѣ.

РОЗДѢЛЬ ДЕСЯТЫЙ О ЛОВЫ О ПУЩУ И О ДЕРЕВО БОРТНОЕ.

АРТЫКУЛЬ 1.

О ловы о пущу, хто бы ихъ половиль.

Уставуемъ, хто бы чіе ловы кгвалтомъ половиль; тогда тому, у чіей пущи будетъ половиль, маеть кгвалтъ заплатити дванадцать рублевъ грошей, а звѣру, колко будетъ половиль, цѣною яко нижей описано маеть платити. А естли бы хто стрѣльцовъ послалъ въ чужую пущу, або самъ украдомъ звѣръ побиль; тогда, естли будетъ то на него слушнымъ доводомъ переведено, колко звѣру убито, таковой маеть за каждого звѣра платити потомужъ, яко нижей написано. А естли бы стрѣльца поймано надъ звѣремъ убитымъ; таковой маеть быти веденъ до вряду нашего до замку альбо двора того повѣту, и передъ врядомъ за доводомъ слушньшъ або присегою пана оного стрѣльца або его врядника, обославши и рокъ слушный ознаймивши, маеть сказанъ быти на смерть яко иншій злодѣй. А естли бы хто застрѣлилъ або ранилъ звѣра у своей земли, а тотъ звѣръ ушолъ бы в чужую землю, а тамъ его дошедши вольно будетъ взяти. А вѣдь же кгда бы звѣръ пришолъ въ лѣсъ панскій землянскій, гдѣ передъ тымъ ловы не бывали, тогда каждому вольно на своей земли звѣръ ловити.

АРТЫКУЛЬ 2.

Цѣна зверемъ дикимъ.

Уставуемъ цѣну звѣремъ дикимъ: за зубра дванадцать рублевъ грошей, за лося шесть рублевъ грошей, за оленя або за ланю шесть рублевъ грошей, за мѣдвѣдя три рубли грошей, за вепря або за свинью рубль грошей, за сарну копу грошей, за рись три рубли грошей.

АРТЫКУЛЬ 3.

О борти и озера и сеножати, хто маеть въ чіей пущи.

Тежъ уставуемъ, которые мають борти свои въ пущи нашей господарской, або тежъ князской, панской землянской, которимъ обычаемъ мають бортей своихъ уживати, а то тымъ же обычаемъ: хто маеть борти свои або озера сеножати альбо при сеножатехъ лазни въ чіей пущи, тогда къ озеру зъ неведомъ ѣхати вольно, а собаки ему не брати ани рогатины ани жадное стрѣльбы, чимъ бы мѣлъ звѣру шкodu чинити; а хто маеть сеножати въ чіей пущи, тотъ маеть сеножатеи своихъ старихъ уживати, а новыхъ не маеть приробливати, а естли бы старые сеножати заросли, то можетъ ихъ собѣ засе ростеребити; а хто тежъ маеть борти въ чіей пущи, бортники, которые мають уходити къ ихъ бортямъ, не мають зъ собою псовъ брати ани рогатинъ ани жадное стрѣльбы, чимъ бы мѣлъ звѣру

шкоду вчинити, але бортники только мають мѣти секиру а пешню, чимъ борти робити; а къ сеножатемъ ити только мають мѣти сѣкиру, чимъ ростеребливати заросли, а косу чимъ косити ее. А вѣдѣже тымъ которые озера мають въ чіей пуци, кгда прїѣдутъ зимѣ озера волочити, вольно имъ дровъ съ тое пуци къ лазнямъ своимъ взяти и корита на рибу выдѣлати; а тымъ, которые сеножати мають, вольно на стырту або на стогъ або одрину вчинити альбо огородити; а бортникомъ вольно на лезиво лыкъ або лубья на лазамень и на иншіе потребности бортниціе, што бортникомъ на потребности бортниціе прислушаеть, иле имъ потреба будетъ взяти, што можетъ на собѣ знести а не возомъ вывести. А кгда дерево, въ которомъ борть ихъ будетъ, обвалитя, со пчолами або безъ пчоль, вольно имъ зъ бортью улей выпустити и вывезти, а верхове и корень оставити въ пуци тому пану, чія пуца будетъ, а дерево на будонанье и дровъ за тыми ихъ входы ни хто зъ чужое пуци брати не маеть. Нижли хто маеть здавна озера сеножати и борти въ чіей пуци; тогды озеръ сеножатыми въ чужой пуци взяти не можетъ; а тотъ, въ чіей пуци озера сеножати и борти будутъ, также тыхъ чужихъ входовъ у своей пуци отняти не можетъ, а кгда пуцу свою ростеребливати всхочеть, не маеть бортямъ и жадному дереву бортному жадное шкоды чинити. А естли хто ниву розробливаючы, чіе дерево бортное на борть удѣланое скримленое або со псолами або и безъ пчоль очерь або пожаромъ попалиль, шкоду которую тому дереву учиниль, съ чого бы мѣло тое дерево уснухути, тотъ тому, чіему дереву шкоду вчиниль, за то повинень будетъ платити подлѣ уставы наше ниже описаное. Кгда на чіемъ поли чужое дерево бортное будетъ, тотъ орючи свое тое поле не маеть чужого дерева бортного близко подьорювати такъ, якъ отъ сохи остиомъ дерева досегнути не можетъ, а естли близко тое дерево подьореть, а тое дерево для того усхнетъ, тогды тотъ повинень будетъ платити за тое дерево водлѣ уставы ниже описаное.

АРТЪКУЛЬ 4.

Хто бы чужое озеро въ своей пуци поволочиль.

Уставуемъ, кгда бы озера чужіе у своей пуци хто поволочиль; тогды маеть тому, чіе озеро будетъ, квалтъ платити и за рибу, на чомъ тотъ панъ мѣти будетъ присегнути, што ему въ рыбѣ будетъ шкоды стало, досытъ маеть дѣлати. Также естли хто чіи сеножати у своей пуци квалтомъ покоситъ, и вытискаючи его отъ его сеножатеи бой учинить; тогды повинень будетъ квалтъ платити дванадцать рублей грошей, а битыхъ навезати, а естли бою не будетъ, а хотечи сеножати чужіе покосити або кошоное погребеть, тогды повинень будетъ сено зъ навезкою платити.

АРТЪКУЛЬ 5.

Хто бы засталъ чіего человѣка у своей пуци и пограбилъ.

Коли бы хто у своей пуши засталъ человѣка, рубаючи альбо везучи дерево, и пограбилъ; тогды за тотъ грабежъ не повиненъ навезати, нижли маеть того человѣка пану и грабежъ на рукоимство выдати и до пуши и до пана вести, гдѣ пограбилъ, а на немъ шкоды своее доводить. А естли шкоды своее на немъ доведуть, тотъ маеть шкоду ему оправити, а естли бы въ пуши ему отъ него шкоды не стало, а онъ безвинно его пограбилъ, тотъ маеть человѣку пограбленаго самого и грабежъ навезати.

АРТЫКУЛЬ 6.

Хто бы мѣлъ споръ о борти або о входы въ пушы.

Тежъ уставуемъ, хто бы мѣлъ споръ о борти и о входы въ пушы, а хотѣлъ хто кого отъ бортей и отъ входовъ спирати, яко бы хто чіе кольвекъ борти або уходы завель въ чужіе руки, яко того много се дѣеть межи мужиковъ, и пчолы для недостатку дани продаеть, альбо дочѣ даеть зятю дерево со пчолами въ чужіе села, а тымъ забираемъ сваръ и невпокой межи сѣсѣди дѣется, и оные на тые пчолы на дерева знаменья свои наложивши за тымъ знаменемъ новымъ входъ въ тую пушу мѣти будутъ, а зася того першого, хто бы первой былъ тыхъ входовъ въ держанью, витискалъ, а споръ о томъ былъ; тогды маеть судъ знаменъ у деревѣ казати заколоти, и чіе старшее и врослѣшее знаме будетъ, тому борти и входы сказати мають, а тые, хто будетъ ново знаменья свои въ чужій островъ внесли, не мають се у тое уступовати. И вжо отъ того часу хто бы съ подданныхъ нашихъ князскихъ панскихъ и землянскихъ дерево бортное за границу пановъ своихъ отдавалъ даровалъ и якимъ кольвекъ обычаемъ въ чужіе руки заводилъ, таковой маеть горломъ каранъ быти, а тое дерево засе тому пану маеть быти превернено, чіе первой было.

АРТЫКУЛЬ 7.

Хто бы кому озеро або ставъ або сажовку зволочилъ або млынъ изжогъ.

Тежъ уставемъ, естли бы хто кому озеро або сажовку або ставъ зволочилъ, або млынъ зжогъ, тѣзь порубалъ; таковой оному маеть платити кгвалтъ дванадцать рублевъ, а шкоду предсе оправити. А пакли бы млынъ сказилъ або греблю перекопалъ або млынъ изжогъ, а въ томъ бы оный шкодовалъ, ижъ млынъ стоялъ, а плату ему не было, або тежъ ставъ спустилъ, на што слушный доводъ учинить або присегою тѣлесною потвердить; таковой маеть платити кгвалтъ дванадцать рублей грошей, а шкоды або замѣшканье млива за слушнымъ доводомъ оправити, а млынъ будетъ скаженный, знову будовати.

АРТЫКУЛЬ 8.

О гнѣздо сокольє и лебединое и о перевесь.

Уставуемъ, хто бы кому гнѣздо сокольє сказиль, або подрубаль, або умыслинѣ сокола подѣ гнѣздом помкнуль, або зѣ гнѣзда соколы молодые покраль, а то будетъ на него ведле права слушнѣ переведено; тогда тому, въ чѣй пушы тоє гнѣздо скаженое, маеть заплатити шесть рублевъ грошей. А тымъ же обычаемъ хто бы лебединое гнѣздо яйца побраль, або гнѣздо розметаль; тогда за лебединое гнѣздо, хто бы его сказиль, маеть заплатити три рубли грошей, а хто бы перевѣсь кому другому подрубаль, а сѣть перевѣсную украль, маеть заплатити шесть рублевъ грошей.

АРТЫКУЛ 9.

О бобровые гоны.

Тежъ уставуемъ, естли бы князскіє панскіє або землянскіє были гоны бобровые у въ иного сосѣда дѣдизнѣ, а оный панъ, въ чѣй дѣдизнѣ будутъ гоны, не маеть самъ ани людемъ своемъ допустити отъ старого поля такъ далеко дооривати, яко бы отъ зеремени могъ кіемъ докинути, также далеко сеножати подкашивати не маеть лозы теревити, яко бы могъ отъ зеремени кіем докинути. А естли бы подѣ зеременемъ подѣораль, або сеножати подкосиль, або лозу подрубаль, а тымъ бобра выгониль; таковой маеть платити дванадцать рублей грошей, а тому зеремени предсе маеть дати покой такъ далеко, яко бы могъ кіемъ докинути. А пакъ ли бы хто квалтомъ бобры побиль, або злодѣйскимъ обычаемъ выкраль; таковой маеть квалтъ платити, а колко будетъ бобровъ убиль, тогда маеть платити за чорного бобра двѣ копе грошей, за карого копу грошей.

АРТЫКУЛЬ 10.

О хмелища.

Хто бы кому хмелища поораль або порубаль у чіей дѣдизнѣ а то на него слушнымъ доводомъ переведено будетъ; таковый маеть кгвалтъ платити дванадцать рублей грошей, а если бы дерева не посѣкъ, толко хмѣль побраль, то маеть три рубли грошей заплатати.

АРТКУЛЬ 11.

О принадахъ пташихъ.

Хто бы кому принады порубаль, а то бы на него правомъ переведено; тотъ маеть тому заплатити, чіи принады, шесть рублей грошей.

АРТКУЛЬ 12.

Хто бы кому принады злодѣйскимъ обычаемъ показиль.

Тежь хто бы чіи принады злодѣйскимъ обычаемъ показиль, а переведено бы то на него правомъ, тогды маеть заплатити тому, чіи принады, три рубли грошей. Тымъ же обычаемъ хто бы кому шатерь на принадахъ украль; тотъ маеть заплатити три рубли грошей.

АРТКУЛЬ 13.

Устава дереву бортному.

Хто бы чужое дерево бортное со пчолами сосну або дубъ обчеръ, або корень у земли обрубаль, або пожаромъ обжогъ, або яко кольвекъ сказиль; тот за тое дерево со пчелами повинень будетъ кгвалтъ платити двѣ копе грошей. А хто бы злодѣйскимъ обычаемъ, або умыслнѣ кого вытискаючи, сосну со пчолами зжогъ, або въ которой пчолы бывали, знамена вырубаль, або огнемъ выжогъ, а то бы на него переведено; тогды маеть тому пану чіе дерево со пчолами за сосну и за дубъ, въ которомъ пчолы бывали, двѣ копе грошей, а за сосну бортную и за дубъ, гдѣ еще пчолы не бывали, копу грошей, и за кремъ безъ борти, иле ихъ сказиль, по полкопы грошей.

АРТЫКУЛЬ 14.

Цена пчоламъ,

Хто бы кому пчолы выдраль не подлаживаючи, а дерева не сказиль; тогда повинень будетъ за кождые таковы пчолы заплатити двѣ копе грошей. Хтобы въ дому або и въ пасецѣ пчолы выдраль, а дошли бы его купою або присегою; тогда маеть заплатити три грошей *, окромъ естли бы кого зъ лицомъ поймано, такового мають сказати яко злодѣя.

АРТЫКУЛЬ 15.

О порубанью гаю.

Тежъ хто бы кому въ гаи зарощономъ которую шкоду кгвалтомъ учиниль або порубаль, а естли шляхтичу; тогда маеть заплатити тому кгвалтъ дванадцать рублей грошей, а шкоду оправити, а естли бы мужикъ мужику кгвалтомъ порубаль гай, тогда маеть заплатити три рубли грошей, а шкоду оправити. Пакли жъ бы хто кому злодѣйскимъ обычаемъ гай порубаль, а его зъ лицомъ и съ деревомъ поймано; тогда маеть откупити горло свое, естли жъ бы самого не поймано, а лице бы выпето, тогда за каждое дерево, которое бы се згодило на бервено яко селидбу такъ и на избу, по дванадцать грошей, а которое се будетъ годити якъ на оглоблю, такъ и на дрова, по шести грошей.

АРТЫКУЛЬ 16.

О покраденье саду.

Тежъ хто бы шляхтичу садъ скраль, а на него бы слушне переведено было и зъ лицомъ поймано, тотъ маеть заплатити дванадцать рублей грошей, а естли бы хто въ саду дерево щепное порубаль, або щепъ выкопавши изъ саду взялъ, тотъ маеть заплатити три рубли грошей.

АРТЫКУЛЬ 17.

О пожарахъ въ пуши.

Тежъ обачивши есмо въ томъ шкоду земскую, ижъ которіе близко села одны съ другими въ сусѣдствѣ, маючи вазнь межи собою, такъ тежъ люди переѣжчіе въ пущахъ на станахъ своихъ и пастухи, пасучи кони и быдло въ пущахъ на станахъ своихъ, пожаръ отъ становъ своихъ пуцають, а тымъ дереву бортному пчоламъ звѣру и птахомъ шкоду великую чинятъ; уставуемъ на таковыхъ, хто бы смыслне недбалствомъ своимъ у пуши и в островѣ въ дубровахъ огнемъ пожаръ пустиль, будь сусѣди або пастухи межи собою, такъ тежъ и купцы люди переѣждчіе, а стоявши на пуши станомъ огню на станѣ своемъ не загасили, таковой, на кого слушне правомъ будетъ переведено, маеть горломъ каранъ быти, а шкоду зъ маетности его платити.

РОЗДѢЛ ОДИНАДЦАТЫЙ, О КГВАЛТЕХЪ И О ГОЛОВЩИЗНАХЪ ШЛЯХЕЦСКИХЪ.

АРТКУЛЬ 1.

Хто бы на чій домъ або на господу умыслнѣ наѣхаль, хотечи его забити.

Хто бы на чій домъ а господу умыслнѣ наѣхаль, хотечи его забити, а умыслнѣ наѣхавши або нашедши, въ томъ дому кого кольвекъ раниль або забиль, а то бы на него переведено было слушнымъ доводомъ; таковой горло тратить, а головщизна близкимъ зъ имѣнья плачона быти маеть. А естли бы кгвалтомъ наѣхаль або на домъ нашолъ, а никого не раниль а ни забиль, а знаки предсе кгвалту або шкоду якую учиниль; тогды только за кгвалтъ будетъ повиненъ платити дванадцать рублей грошей и шкоду оправити за слушнымъ доводомъ, а горла для нахоженья кгвалту не тратить. Тымъ же тежъ обычаемъ естли хто кому въ мѣстѣ на господу нашолъ кгвалтовнѣ, а кого забиль або раниль и тымъ покой посполитый взрушилъ, маеть быти сужонъ и сказанъ на горло.

АТРКУЛЬ 2.

О доводъ кгвалту, якъ мають освѣдчати и обжаловати.

Уставуемъ, кгда бы хто на кого наѣхаль кгвалтомъ и забиль, а вѣдь же на такового кгвалтовника такий доводъ маеть быти: естли бы на чій домъ або на господу чью наѣхаль и забиль кого; тогды скоро по ономъ кгвалтѣ того жъ часу кгвалтъ и того забитого маеть оповѣдати и оказати околичнымъ суседомъ своимъ, а въ небытности ихъ ино врядникамъ ихъ шляхтѣ людемъ добрымъ, а въ недостатку шляхты ино также околичнымъ сусѣдомъ своимъ, хотя и не шляхтѣ только людемъ добрымъ вѣры годнымъ маеть оказати, а потомъ обжаловати вряду замковому або двору нашему, которій близшій будетъ, и возного взяти и

такъ же оказати квалтъ и забитого, и тотъ квалтъ и жалобу въ книги записати. И въ правѣ естлибы се ку оному квалту и забитому не зналъ; тогда вжо тотъ жалобникъ близшій будетъ того сусѣди околичными и вознымъ або выпиномъ врьдовышь на него доводити, и при томъ доводѣ самотреть и зъ шляхтичами собѣ равными присегнути, а естли бы на тотъ часъ не могли мѣти шляхтичовъ ку доводу, тогда и зъ жоною своею и съ дѣтьми дорослыми, а не будетъ ли мѣти дѣтей дорослыхъ, ино и зъ жоною и зъ слугами домовыми маеть того квалтовника поприсегнути, а кгда присягнетъ, тогда тогъ горло тратить, а головщина его близкимъ того забитого маеть быти плачона, а шкоду за слушнымъ доводомъ. А естли бы квалтомъ на домъ наѣхалъ и не забилъ, только ранилъ; тогда также маеть тотъ квалтъ оповѣдати и раны оказати околичными сусѣдями, яко вышей описано, и при такомъ доводѣ оногъ ввалтовника квалту и ранного маеть самъ семь зъ людьми добрыми шляхтою поприсегнути, а кгда присягнетъ, таковой квалтовникъ маеть быти горломъ каранъ, нижли естли бы сполна шести свѣдковъ не мел, тогда и съ трема свѣдки самочвартъ присегнути маеть, а квалтовникъ за таковымъ незуполнымъ доводомъ горла не тратить, одно квалту дванадцать рублей грошей, а навезку водле стану и шкоду за доводомъ маеть платити, а за вину дванадцать недѣль въ везенью седѣти. Пакли бы на томъ доводѣ своемъ усталъ, тогда только самъ ранний на ранахъ своихъ присегнути маеть, которому по присязѣ его навезка будетъ сказана, а квалтъ и шкоды не мають быти сказаны. А гдѣ бы на оном квалтѣ въ дому никого не забито ани ранено, только одно шкода учинена; таковой квалтъ также маеть быти освѣдчонъ, яко вышей описано, а при томъ доводѣ у правѣ на квалтовника маеть тымъ же обычаемъ на квалтѣ и на шкодахъ самотреть присегнути, а кгда присягнетъ, маеть быти квалтъ плачонъ дванадцать рублей грошей, и шкоды оправити за доводомъ его, а горла не тратить, а не будетъ ли мѣти чимъ платити, а именье его тое бы шкоды и маетность не стояла, тогда у въ остатку заплаты самъ маеть быти выданъ. А гдѣ бы тотъ, на чій домъ наѣхалъ, чинилъ собѣ быти равную шкоду о сорокъ або о петдесять копъ грошей; то и зъ жоною и зъ дѣтьми лѣтъ дорослыми на той шкодѣ присегнути маеть. А жонѣ дѣтемъ забитого, а въ недостатокъ ихъ, ино кровнымъ такимъ же обычаемъ маеть право ити, яко вышей описано.

АРТЫКУЛЬ 3.

О квалтъ костела закону хрестіанского.

Тежъ естли бы хто пришедши квалтовнѣ на костель або на цвинтару въ школѣ, або въ капланскомъ поповскомъ дому кого забилъ або ранилъ, а тые бы раны значны были; тогда подъ таковымъ же способомъ и доводомъ маеть быти каранъ, яко вышей о квалтовникахъ описано. А естли бы только вдарилъ, а раны не было; тогда совито квалтъ маеть платити, то естъ двадцать и чотыри рубли грошей, а оногъ вдаренаго навезати, и то все заплативши еще двадцать недѣль у везенью маеть седѣти въ томъ повѣтѣ, гдѣ ся то станеть.

АРТКУЛЬ 4.

О квалтовнику, который забивши зь земли втечь.

Тежь естли бы таковой квалтовникъ забивши кого въ дому въ въ господѣ на улицы на дорозѣ и гдѣ жь кольвекъ, будучи первой запозванъ хотя бы тежь и заочнѣ, втекъ изъ земли прочь; тогда маеть первой быти выволанъ съ того панства нашего, а потомъ головщизна и шкода маеть быти плачона зь имѣней его. А гдѣ бы тое имѣнье за головщизну и шкоду не стояло; однакожь тое имѣнье маеть быти въ той головщизнѣ и въ шкодахъ подано дѣтемъ того забитого або кривнымъ, и мають держати потоло, поки ажъ того выволаного дѣти або кривные тую суму за оные имѣнья отложить, нижли таковые дѣти або кривные тую суму мають откладати, которые того мужобойства не помогали. А естлибы по выволаню оногo квалтовника або забойца налезень былъ въ томъ панствѣ нашомъ; тогда и на томъ врьдѣ, гдѣ будетъ постижонъ, маеть быти каранъ яко квалтовникъ, а не будетъ ли хто стояти або фалдровати, тогда врьдъ нашъ, маючы певную вѣдомость о томъ мужобойцы або квалтовнику, маеть также на томъ врьдѣ своемъ поймавшы скарати, яко о томъ вышей описано. А въ томъ часѣ нижь постижонъ и на врьдѣ каранъ будетъ, трафить ли ся кому жь кольвекъ его забити, за такового выволанца забитье ниhto головщизны платити не будетъ повинень.

АРТКУЛЬ 5.

Хтобы злочинцовъ, разбойниковъ, злодѣевъ явныхъ, а людей выволаныхъ, въ себѣ въ дому переховываль.

Тежь уставуемъ, хтобы съ подданныхъ нашихъ господарскихъ людей подозренихъ злочинцовъ разбойниковъ явныхъ выволанцовъ въ дому або имѣню своемъ переховываль, маючы вѣдомость, кимъ которую раду помочъ ку шкодѣ Речи Посполитой давалъ и чинилъ, або тежь и речей злодейскихъ вѣдомо поживаль, а то бы на него было переведено слушнымъ правомъ; тогда таковой маеть быти горломъ каранъ таковой и онъ злочинца, которого онъ въ дому переховываль. А ведже жалобливая сторона за онымъ злочинцю або выволанцемъ, гдѣ бы о немъ вѣдалъ хотя бы и въ иншомъ повѣтѣ того панства нашего, взявши выпись зь ураду маеть ѣхати и на ономъ врьдѣ, такъ тежь и въ мѣстехъ по торгохъ у костелехъ ознанити, и цедулу написавшы, о его выволаню маеть поприбавати и о немъ ознанити. А чрезъ таковое оповѣданье оногo злочинцы або выволанца, а хто бы вѣдаючы и знаючы его ховаль, также маеть каранъ быти яко вышей описано и шкода зь имѣнья его плачона за слушнымъ доводомъ, а доводъ на такового не инакшій маеть быти, одно таковой якъ на самого злочинцу, а естлибы повѣдалъ, ижъ бы его не вѣдалъ и не зналъ, тогда тое невѣдомости маеть отприсягнути.

АРТКУЛЬ 6.

Хто бы забилъ квалтовника въ дому своемъ и помочниковъ его.

Тежъ уставуемъ, хтобы на чій домъ або на господу квалтомъ наѣхалъ або нашолъ, а тотъ господарь домовый также и гость, который въ дому его томъ або господѣ стоить, оного квалтовника самого або помочниковъ его боронечи дому своего забилъ; тогда скоро по ономъ квалте маеть сусѣдомъ своимъ околичнымъ обволати и оповѣдати, и того жъ часу до вряду нашего, который будетъ наблизшій, ѣхати або слати, изъ уряду взявши возного и сторону людей добрыхъ шляхту а иншихъ сусѣдовъ вѣры годныхъ, оный квалтъ и забитого квалтовника въ дому своемъ сказати. А потомъ кгда будетъ о тые забитые обвинень; тогда за оказаньемъ слушнымъ знаковъ квалту маеть зъ жоною и съ дѣтьми дорослыми и съ тремя шляхтичи собѣ равными, а не будетъ ли мѣти жоны або дѣтей, ино съ тыми трема шляхтичома собѣ равными предсе маеть присегнути и тымъ ся отвести на томъ, ижъ тотъ забитый квалтомъ наѣхалъ або нашолъ, а сталося за початкомъ того забитого. А если бы только ранил, а не забилъ; тогда самъ одинъ панъ домовый маеть присегнути, ижъ яко квалтовника въ дому своемъ ранилъ, таковой головщизны ранъ и ни шкодъ никоторыхъ платити не будетъ повинень.

АРТКУЛЬ 7.

Хтобы наѣхалъ або нашолъ на чужое имѣнье або на село квалтомъ, а въ томъ боронечи квалтовнику своего кого забилъ.

Тежъ уставуемъ, которому бы шляхтичу шляхтичь або хтожъ кольвекъ умыслилъ на чіе имѣнье квалтомъ наѣхалъ або нашолъ, квалтъ або якую значную шкоду учинилъ, а тотъ шляхтичь боронечи имѣнья своего оного квалтовника забилъ; тогда маеть тымъ же способомъ, яко вышей о квалтовникахъ написано, присегою своею отвестися, и кгда присегою ся отведеть, ижъ его яко квалтовника на своей земли забилъ, такового головщизны ани шкодъ платити не будетъ повинень.

АРТКУЛЬ 8.

О квалтъ дѣвки и невѣсты.

Тежь уставуемъ, хтобы дѣвку або учтивую невѣсту якого кольвекъ стану сильствомъ зквалтиль, а оная дѣвка або невѣста за онымъ учинкомъ волала квалту, за которымъ воланьемъ люде бы прибѣгли, знакъ квалту оказала а потомъ бы оногю ку праву притегнула, а двѣма або трема свѣдки квалтъ пересвѣдчила, а ку тому при оныхъ свѣдкохъ на томъ квалтѣ своемъ на того присегнула; тогда таковой маеть быти каранъ горломъ, а навезка маеть быти зъ имѣнья его водле стану, якогю будетъ, плачона. Пакли бы оная дѣвка або невѣста квалту волала, а люде оные слышели, нижли на квалтъ не прибѣгли, а ведже по ономъ квалтѣ скоро бы пуцона была, а оповедалася тымъ людемъ, и зась оногю ку праву притегиула, а тыми людами освѣдчила; тымъ же обычаемъ каранъ маеть быти, яко вышей описано, а естли бы похотѣла его собѣ за мужа мѣти, то будетъ на ее воли.

АРТЫКУЛЬ 9.

О квалтовное взятъе въ малженство дѣвки вдовы и каждое невесты.

Уставуемъ, хто бы безъ воли отца и матки стрьевъ або близкихъ на якомъ кольвекъ мѣстцу взяль кого съ тыхъ вышеймененыхъ квалтомъ, менуючы ижь бы ему въ малженство его шлюбила, а то бы пришло до насъ Господара або передъ пановъ радъ нашихъ и передъ кождый врьдъ; таковая персуна маеть первой быти взята до секвестру. И кгда то покажетъ съ права, же яко пріятель кривныхъ такъ тежь и ее самое на то позволенья не было; тогда тотъ хто се того важыль, маеть горломъ каранъ быти, а за навезку третяя часть всего имѣнья его маеть спасти на тую парсуну квалтомъ взятую, а шкоды, которые се будутъ при томъ квалтѣ стали, за доводомъ на двохъ частехъ того жъ имѣнья его маеть быти сказано. Нижли естли бы дѣвка, уквивши то передъ родичами своими, на тое малженство и на взятъе позволила и на правѣ се того знала; тогда таковая дѣвка отпадываетъ отъ выправы и отъ всихъ имѣней своихъ отчизныхъ и материстыхъ, яко о томъ вышей написано въ роздѣлѣ пятомъ.

АРТЫКУЛЬ 10.

О мужу и жонѣ о замордованье до смерти.

Тежь кгда бы зъ ненависти и зъ немилости на обѣдвѣ сторонѣ, такъ мужъ яко и жона, будучи въ ростырку зъ якихъ кольвекъ причинъ, одинъ другого приправиль о горло, замордовалъ, або струль; такое окрутенство и замордованье сынове або кривные то мають до врьду оповѣдати и обжаловати або фалдровати на кождого такового мордера. А хотя бы сынове або кривные не хотели фалдровати; тогда врьдъ нашъ зъ мѣстца своего маеть того особливе перестерагать и съ пильностію около того вывѣдати, и у въ околичныхъ

сусѣдовъ близкихъ о того замордованого опыть чинити, и обобравши семи шляхтичовъ ку присезѣ припустити, которые о томъ подъ присегою справедливе мають того передъ врьдомъ повѣдити. И кгда тая семь шляхтичовъ о того замордованого, на кого присягнуть; таковой мордеръ безъ маеть быти каранъ горломъ тымъ способомъ, яко бы отца имилости матку забилъ.

АРТЫКУЛЬ 11.

О похвалку за которую бы ся стала якая шкода и отповѣдь на горло.

Тежъ если бы хто на кого похвалился, въ похвалцѣ сталася шкода, спалено домъ, дворъ, гумно, або збожъе зложеное, або тежъ што кольвекъ огнемъ ускажоно; нижли бы ся тая шкода стала, маеть первой жалобливая сторона тую похвалку его того жъ часу на врьдѣ нашомъ оповѣдати и записати, а потомъ безъ мѣшканья его припозвати маеть. А естли бы ся передъ врьдомъ призналъ, ижъ тую похвалку учинилъ, або и не зналъ, а было бы то на него слушне переведено; тогды маеть быти данъ за поруку. А естли бы потомъ оной сторонѣ жалобливой шкода стала, а тотъ бы, на него хто ся похвалилъ, позвавши ку праву самъ и съ жоною и съ дѣтьми дорослыми на шкодѣ своей, ижъ отъ него маеть, поприсегнулъ съ с такимъ доводомъ, яко вышей о квалтехъ домовыхъ описано; таковой будетъ повинень сторонѣ жалобливой оную шкоду оправити и платити, а собѣ винного искати, хто тую шкоду учинилъ. Тымъ же обычаемъ и не шляхтичи противъ шляхты у права заховани быти мають. А хто бы тежъ на кого учинилъ похвалку, отповѣдаючи на горло, ино сторона жалобливая тымъ же способомъ мають тую похвалку передъ врьдомъ оповѣдати и дати записати, и притягнувши ку праву тую похвалку людьми добрыми вѣры годными шляхтою трема свѣдками то на него перевель; тогды такъ оселый яко и не оселый для лучшее безпечности покою посполитого маеть быти данъ за доброе рукоемство людемъ осѣлымъ. Кгда бы за таковою похвалкою забито, того на кого ся похвалилъ, такового поручники передъ врьдомъ мають поставити, а сторона жалобливая самотреть зъ шляхтою естли присягнетъ, ижъ отъ него то забойство сталося; тотъ горломъ маеть быти каранъ, а головщизна близкимъ зъ имѣнья его маеть быти плачона. А гдѣ бы рукоемства о тую похвалку дати не хотѣлъ; ино врьдѣ такового маеть дати до везенья замкового, и до того часу маеть седѣти, ажъ рукоемство дастъ. А пакли бы поручникъ того, по комъ ручилъ, передъ врьдомъ не постановилъ; тогды маеть головщизну самъ кровнымъ платити, а у везенью такъ долго седѣти, ажъ тотъ, по комъ ручилъ, прѣхавши ись такового обвиненья выправится, або, естли будетъ винень, заплату свою озметъ.

АРТЫКУЛЬ 12.

Естли бы колко парсунъ шляхецскихъ о забитье одного шляхтича обвинено было.

Уставуемъ, естли колко парсунъ объ одного шляхтича забитье было обвинено, а сторона жалобливая не вызволяючи ни отъ кого зъ нихъ, але ихъ колко присегнуло; тогда одинъ зъ нихъ, которого на смерть оберуть и поприсягнетъ, маеть горломъ каранъ быти, а тые помочники его, на которихъ тежъ ровно сторона поприсягнула, ачь кольвекъ бы ведле правъ Хрестіянскихъ винни бы тые вси горло дати, нижли мы занехавшы такъ срокгого права на таковыхъ уставуемъ, ижъ тые вси помочники его, иле ихъ будетъ, мають сто копъ грошей платити и въ везенью сорокъ и шесть недѣль* седѣти на замку Виленскомъ або Троцкомъ въ земли шесть сажонъ, а трафить ли ся тое забійство въ которомъ воеводствѣ або у староствѣ далеко, тогда на томъ замку того выоеводства тотъ мужобойца маеть седѣти также у земли шесть сажонъ. А панове воеводе старостове на замкохъ нашихъ мають тые турмы доброе оправены и вкопаны мѣти глубоко шесть сажонъ у земли, за певною сторожою, и не мають таковымъ вязнемъ фолкги никоторое доущати чинити, и съ того везенья до сороку а шести недѣль выпускати подь ласкою нашою господарскою. И будетъ ли двоухъ або трехъ забитого и колко ихъ особъ шляхецскихъ, тогда за кожного шляхтича особа шляхецкая горломъ карана быти маеть. А естли бы простый хлопь шляхтича, тогда, колько ихъ будетъ поймано и передь врьдомъ обвинено и поприсягнуено, мають вси горломъ карани быти, а вежде хлоповъ простыхъ вышей семи человѣковъ объ одну голову шляхецкую карано быти не маеть. Также и о шляхтянкахъ розумѣно быти маеть.

АРТЫКУЛЬ 13.

О звадахъ шляхецскихъ.

Хто бы кому руку або ногу втялъ, або око, губу, зубы, ухо вытялъ, за каждый таковой члонокъ по петдесать копъ грошей платити, а двадцать и чотыри недѣли на замку седѣти. Або хто бы обѣ двѣ руки и обе двѣ ноги и обѣ двѣ уши оттялъ и обѣ двѣ очи; тогда головщизну яко за человѣка маеть плачоно сто копъ грошей, а годъ и шесть недѣль седѣти. А рана, которая бы у человѣка была, съ которое бы кости выбирано, тридцать копъ грошей. А естли бы съ тое раны речъ замкнулъ, хотя бы се и выгоиль; тогда маеть сто копъ грошей яко головщизны платитъ, рокъ и шесть недѣль седѣти. А естли бы рана была на твари, сорокъ копъ грошей платити; а хотя бы поличокъ кому даль, бороду рвалъ, тогда за все тое по дванадцати рублевъ грошей платити; а хотя бы былъ киємъ шляхтича, сорокъ копъ грошей платити. А бѣлымъ головамъ шляхецскимъ якъ головщизна такъ и навезка маеть быти плачоно совито, тымъ же обычаемъ потомъ и ихъ жонамъ и дѣтемъ, которіе вѣнчалныя жоны мають, маеть быти навезка шляхецкая.

АРТЫКУЛЬ 14.

О вказанье шляхецства за всказаньемъ навезки.

А естли бы по всказанью навезки шляхецкое сторона противная повѣдила, ижъ водлугъ сказанья судового навезку ему платити готовъ, нижли не ест есми свѣдомъ, естли онъ естъ шляхтичь, або и радъ бымъ о томъ вѣдалъ; тогда тотъ, хто ся шляхтичомъ менить быти, маеть ѳхати до оное земли або повѣту, отколь родомъ естъ, и тамъ же маеть, зобравши братью и стрьевъ або кривныхъ своихъ, передъ врьдомъ тамошнимъ маеть высвѣдчитися, ижъ естъ шляхтичь, а врьдъ зъ оное земли або съ повѣту маеть писати листъ зъ уряду до суду, гдѣ ся тое право точило, даючи о немъ свѣдество, ижъ естъ шляхтичь. И кгда таковую о собѣ вѣдомость принесеть, врьдъ маеть оную сторону противную листомъ своимъ обослати, складаючи ему рокъ короткій, на которомъ яко на завитомъ ставши маеть прислухати, и навезку шляхецкую ему заплативши, будетъ еще повинень страву шкоду, што на то ѳздечи наложилъ, за присегою его платити ведле важности и далекости дороги. А ведь же естли бы не оселый человѣкъ доведовался оного шляхецства; маеть до того часу, поки онъ зѣздитъ, за поруку данъ быти.

АРТЫКУЛЬ 15.

О мѣщанине, который бы шляхтича ранилъ.

Если бы который мѣщанинъ у бурмистровствѣ шляхтича забилъ * або ранилъ; тогда маеть навезати такъ, яко вышей описано. Нижли естли бы бурмистромъ на тотъ часъ не былъ, кгда шляхтича, ранилъ; маеть руку тратить. Также тежъ и хлопъ простой, естли бы забилъ або ранилъ шляхтича, маеть руку тратить, а естли руку або ногу шляхтичу утнетъ, або на которомъ члонку охромить, маеть горломъ каранъ быти.

АРТЫКУЛЬ 16.

О забойцахъ отца и матки.

Уставуемъ, естли бы хто отца або матку свою изъ якое замети забилъ, якимъ кольвекъ обычаемъ родича своего о горло приправили; тогда таковой сынъ або дѣвка, которая причиною своею родича своего о горло приправила, не только горломъ маеть быти каранъ, але и почтивость и вси имѣнья тратить, и таковою смертью и потварностью ганебною маеть каранъ быти: по рынку возечи и клещами тѣло его торгати, а потомъ у мѣхъ скураный усадивши, до него пса кура ужа котку, и тое все посполу въ мѣхъ завезавши, гдѣ наглубей до воды утопити, тымъ же тежъ обычаемъ и помочниковъ его, которыхъ поволаеть або на нихъ правомъ будетъ переведено, маеть быти караны. А естли бы ся трафило отцу сына своего дорослого або матцѣ дѣвку дочку свою властную забити; тогда таковой оецъ и matka мають караны быти за тое: годъ и шесть недѣль на замку нашомъ у вежи седѣти, а выседѣвши годъ и шесть недѣль, мають еще до году чотыри кротъ при церкви и при костелѣ головномъ покутовати и визнавати явнѣ найвышній грѣхъ свой передъ всими людьми збору Хрестіянского.

АРТЫКУЛЬ 17.

Если бы хто брата або сестру забилъ.

Уставуемъ, естли бы хто брата або сестру забилъ, въ неданью имѣнья або якую кольвекъ на правую о горло приправилъ, а то бы на него доводомъ слушнымъ переведено; тогда таковой маеть быть каранъ горломъ, а тое имѣнье, которое бы на него и на дѣти его припасти мѣло, спадываетъ на иншую братью або сестры або тежъ на стрывъ и близкихъ въ томъ дому. Тымъ же обычаемъ естли бы зять забилъ шурина своего; тогда жона его сестра того забитого и дѣти ее до имѣнья по братѣ своемъ не маеть ничего мѣти, а тотъ хто забилъ, маеть горломъ каранъ быти. Тоежъ право и на тыхъ, хто бы кровного своего забилъ и далекого въ роду.

АРТЫКУЛЬ 18.

Который бы слуга забилъ або ранилъ пана своего.

Тежъ уставуемъ, естли бы который слуга взялъ передъ себе злый умыслъ, пана своего забилъ або ранилъ; таковой маеть срокго горломъ каранъ быти здрайца, а естли бы не забилъ ани ранилъ, одно брони противъ пана своего добылъ, таковой руку тратить.

АРТЫКУЛЬ 19.

Хто бы на кого на дорозѣ засель, а въ томъ самъ забить былъ.

Уставуемъ, гдѣ бы шляхтичъ другому шляхтичу добровольнѣ дорогу засѣлъ, хотечи того забить або ранить, а тотъ боронечи горла своего не маючи зъ нимъ никоторого зайстья, а того, хто засѣлъ, забилъ; тогда тотъ скоро по ономъ забитью маеть ѣхати оповедати вряду и высвѣдчитися людьми добрыми вѣры годными, ижъ тотъ забитый засѣлъ и початкомъ того забитья самт, былъ, а кгда на томъ и съ тымъ доводомъ присягу вчинить, воленъ будетъ отъ головщины и отъ седѣнья.

АРТУКУЛЬ 20.

Если бы шкoda або кгвалтъ кому стался, такъ въ чіемъ дому яко и на дорозѣ, за вѣдомостью домового господаря.

Уставуемъ, кгда бы се кому въ чіемъ кольвекъ дому або на дорозѣ за вѣдомостью домового господаря якая шкoda або кгвалтъ се сталъ, а оный господарь былъ бы до суду позванъ, а было бы то на него слушнымъ доводомъ або якими знаки врьдовне переведено; таковой повиненъ будетъ оный кгвалтъ и шкodu своими властными пенезьми платити и оправити, а тыхъ кгвалтовниковъ шкодниковъ собѣ искати, нижли естли бы того господаря лице налезено або помочниковъ его.

АРТКУЛЬ 21.

Хтобы на чіе имѣнье на село и на люди наслалъ, або самъ наехавши кгвалтомъ побилъ, поранилъ.

Уставуемъ, хто бы на чіе имѣнье на село на люди самъ кгвалтомъ наѣхалъ, або наслалъ побилъ и поранилъ; таковой сторонѣ ображоной, на чомъ слушный доводъ учинить иаетъ кгвалтъ и раны платити, а грабежъ зъ навезкою ворочати маеть, и всю школу добре оправити. А хотя бы не ранилъ ани билъ, только наѣхалъ а грабилъ; потомужъ кгвалтъ маеть заплатити, и грабежъ зъ навезкою поворочати.

АРТКУЛЬ 22.

За кгвалтъ посполитый сусѣдскій.

Уставуемъ за каждый кгвалтъ посполитый сусѣдскій, врьдовне переведеный, маеть быти сказанъ сторонѣ обжалованой дванадцать рублей грошей.

АРТЫКУЛЬ 23.

Если бы шляхтичь шляхтича розбилъ на дорозѣ.

Уставуемъ, если бы шляхтичь шляхтича розбилъ на дорозѣ, а оный розбитый у парсуну его позналъ, и передъ врьдомъ того жъ часу раны свои оказавши того у парсуну меноваль; а потомъ притягнувши ку праву, подле оказанья ранъ своихъ близшій будетъ самъ изъ шестма шляхтичами на него присегнути, а кгда присягнетъ, тотъ горломъ каранъ быти маеть яко розбойникъ. А естли бы сторона поводовая и зъ шестма свѣдки поприсегнути не хотѣла; тогды тотъ обжалованный также самъ и зъ шестма шляхтичы маечъ отприсегнутися, а не будетъ ли мѣти съ кимъ отприсегнутися, ино поводовая сторона самотретъ на ранаъ и шкодахъ маеть его поприсегнути. А будетъ ли на дорозѣ звада стала, а лупу никоторого не было, а сторона жалобливая вину дала разбойную; тогды только раны за доводомъ будетъ повиненъ платити, а горла для розбою менованого не тратитъ.

АРТУКУЛЬ 24.

Который братья рожной будетъ отца забито або зъ нихъ самыхъ которого кольвекъ.

Уставуемъ ижъ кгда бы колько братья рожной, лѣта зузопольные маючы або и недорослые, дѣльные або и недѣльные, а одного бы зъ нихъ або отца ихъ забито, а иные бы братья были бы по службахъ або въ чужой земли; ино который братъ будетъ дома, тотъ братью маеть обослати, абы зъ нимъ тое головщизны искали. Естли бы братья его будучи въ здѣшнемъ панствѣ нашомъ зъ нимъ весполокъ головщизны искати не хотѣли; тогды тотъ, который дома мѣшкаеть, маеть самъ тое головщизны доходити, а дошедши съ тою жъ братьею своею не будетъ дѣлити. Одно кромъ хто бы былъ въ чужой земли, а прѣхавши оттоль и той головщизны припытовался; таковой, кгда накладъ его што доходечи тое головщизны будетъ наложилъ, ему часть свою, которая бы межи братьею на него припасти мѣла, отложити, тогды маеть межи братьею своею ку части ровной тое головщизны припушонъ быти.

АРТЫКУЛЬ 25.

Хто близкій головщизны искати маеть.

Коли бы колько братья было и сестръ рожныхъ выпосажонныхъ и не выпосажонныхъ, а одинъ братъ отъ ихъ забить былъ; тогды они сами братья мимо сестръ выпосажонныхъ маюць головщизны доходити, и естли бы братья змерли, тогды и дочки выпосажонные

мають головщизны искати, а естли бы сынове и дочки змерли, тогда близкіе доходити мають.

АРТЫКУЛЬ 26.

О звадахъ.

Если бы хто съ кимъ звадилъ, а въ оной звадѣ оба два се ранили, а одинъ бы съ тыхъ позванъ до права, а свѣдковъ бы межи собою не мѣли, хто бы мѣль межи ими розознати, а оба два се торгали ку присязѣ, а одинъ бы другому не допустилъ; тогда судъ мають жеребей искати и кинути, чій се жеребей наипервей выйметъ, тотъ маеть присегнути на ранахъ своихъ и на початку, ижъ онъ первой почаль его бити и за онымъ початкомъ тая ся звада стала. А коли оный присягнетъ, тогда оиыи тому присяглому маеть за раны платити, якого жъ стану будетъ. А гдѣ бы ся въ оной звадѣ оба два се зъбили, а не было бы свѣдковъ на обѣ сторонѣ; ино потомкое або близкіе забитыхъ вжо головщизнъ собѣ искати не мають. А естли у въ одное стороны раны будутъ, а зъ другое стороны забитый; тогда при ономъ забитомъ, близшій будетъ доводъ чинити нижли при ранномъ, и кгда будетъ правомъ поконанъ, маеть головщизну платити сто копъ грошей, и естли за шляхтича будетъ платити головщизну, тогда тотъ маеть рокъ и шесть недѣль сѣдети, а за хлопа простого везенья не повиненъ терпѣти, только головщизну платити.

АРТЫКУЛЬ 27.

О звадѣ вечерней.

Тежъ коли бы при якой вечерней звадѣ хто кольвекъ свѣчу загасилъ, въ томъ кого съ тыхъ, которіе при той звадѣ были, ранено было не вѣдаючи отъ кого, и позвано бы до суду того, хто свѣчу загасилъ, менуючы такжо мене въ той звадѣ ранено, а не вѣдаю отъ кого за причиною твоею, и на то бы доводъ учинилъ, а естли бы и доводу не чинилъ, смѣль бы присегнути; тогда тотъ, хто свѣчу загасилъ, повиненъ ему раны платити такъ тежъ и головщизну. Въ такой пригодѣ хочемъ мѣти, абы сужоны яко вышей описано, а тотъ, заплативши вси раны або головщизну и заседѣвши головщизну и заседѣвши годъ и шесть недѣль, маеть собѣ винного искати. Тымъ же обычаемъ хто бы кого съ пригоды забилъ, а повѣдилъ, жемъ то не умыслнѣ учинилъ; тогда тотъ маеть вывестися людьми добрыми вѣры годными, которые при томъ были и то видѣли, ижъ съ пригоды се тое стало а не зъ умыслу; кгда то они сознають, предся будетъ повиненъ на томъ присегнути, ижъ съ

пригоды а не зъ умыслу а ни зъ вазни тое забійство учиниль, а по присязѢ предсе головщизны повиненъ платити, естли шляхтича забиль рокъ и шесть недѣль седѣти.

АРТЫКУЛЬ 28.

Хто бы кого неумыслил раниль, а до суду былъ позванъ.

Коли бы тежъ хто кого раниль, и его о рану позвалъ, а оный позванный бралъ бы се на одводъ; мы бачечи, ижъ никто въ невинности своей терпѣти ранъ не маеть, сказуемъ ижъ тые раны жалобнику мають быти справованы по тому, яко вышей описано о звадахъ.

АРТЫКУЛЬ 29.

Слуга, который боронечи пана своего, коли бы кого забиль або раниль.

Тежъ уставуемъ, ижъ коли бы у якой звадѣ слуга боронечи пана своего, кого забиль або раниль; таковой отъ каждого права маеть быти воленъ, але сторона жалобливая будетъ тыхъ ранъ и головщизну на пана его дохотити. Нижли естли бы чій слуга своволнѣ безъ расказанья пана своего передъ очима кого забиль або раниль, хотя бы не былъ припоручонъ; маеть панъ его поймати и до везенья посадити, а кровнымъ забитого дати вѣдомость. И естли бы фолькгуючи служебникови своему поймати его не хотѣль, а онъ потомъ забивши втекъ; тогда тотъ панъ повиненъ будетъ сам головщизну платити, естли шляхтича забиль, то рокъ и шесть недѣль седѣти маеть, а ранному, якого стану будетъ, раны оправити, и по заплатѣ головщизны, первой нижли на седѣнье року и шести недѣль пойдетъ, маеть на томъ присегнути, ижъ безъ росказанья его и порады тая головщизна стала, а естли бы отприсегнутися не хотѣль, а пустиль сторону жалобливую на себе присегнути, тогда маеть горломъ каранъ быти.

АРТЫКУЛЬ 30.

Естли бы чій слуга, учинивши кому кгвалтъ домовый або головщизну, прочь втекъ.

ГдѢ бы чій слуга учинилъ кому кгвалтъ домовый або головщизну втекъ, а въ его пана черезъ сторону былъ застатъ, а приповѣданъ, а онъ черезъ туюжъ заповѣдь его упустилъ; тогда тотъ панъ, чій то слуга вчинилъ, самъ кгвалтъ головщизну и шкоду платити маеть, а собѢ на слузѢ искати, и заплативши маеть на томъ присегнути, ижъ тотъ слуга кромъ вѣдомости и позволенья его то учинилъ, а не есть то черезъ его умышленье при рукъ * выпущонъ, а гдѢ бы присегнути не хотѣлъ, тогда тотъ певне самъ панъ маеть быти каранъ горломъ, яко кгвалтовникъ и мужобойца. А естли бы тотъ слуга небылъ приповѣданъ; тогда панъ не повиненъ за его платити, одно се маеть отприсегнути, ижъ тотъ кгвалтъ безъ его позволенья и вѣдомости стался.

АРТЫКУЛЬ 31.

О забитье человѣка перѣждчого и безплеменнаго.

Уставуемъ, тежъ, естли бы ся потрафило гдѢ жъ кольвекъ забитого человѣка переходчаго або безплеменнаго, которого головщизны искати не будетъ кому; тогда скоро такового человѣка трупъ будетъ найденъ, того жъ часу врядъ того замку або двора нашего врядникъ маеть обослати всихъ мѣщанъ людей сельскихъ, такъ и подданныхъ нашихъ яко и шляхецскихъ, и опыт вчинити разъ або и два, а гдѢ бы се на такихъ двоухъ копахъ о томъ забитью вывѣдатися не могли, тогда третью копу присяжную маеть врядъ собрати, на которой повинни будутъ вси тые, которые на той копѢ повинни се становити, присегнути на томъ, ижъ сами не суть причиною того забитья и о такомъ мужобойцы не вѣдаютъ. А естли бы которыя съ тыхъ копниковъ на присяжной копѢ нестали, або хотя и ставши, присегою отвестися не хотѣли; тогда таковыя будутъ повинни головщизну сами платити, а собѢ винного искати, а тая головщизна маеть зостати при томъ врядѢ, въ которомъ тотъ трупъ налезенъ, а потомъ, кгда бы кровные оного забитого выналезлися, маеть тая головщизна онымъ кровнымъ отдана быти.

АРТЫКУЛЬ 32.

О промолчанье кгвалту або злодейства.

Уставуемъ, кгда бы хто кому кгвалтъ учинилъ або злодѣйство шкоду або якій грабежъ, а тотъ бы молчалъ отъ того часу, яко се то стало три годы, вжо о то будетъ вѣчнѢ молчати.

АРТЫКУЛЬ 33.

Который злочинца будетъ на смерть сказанъ, а отъ того бы се откупилъ або отпрошонъ былъ.

Тежъ уставуемъ, естли бы хто о злодѣйство або о которое иное злочинство на каранье або на смерть врядомъ права посполитого всказанъ былъ, а въ томъ караньи горло свое пенязми откупилъ, або от того каранья або отъ страченья горла черезъ пріятелей своихъ або гостей пословъ пановъ знакомитыхъ выпрохонъ былъ або выправенъ, або тежъ за злый свой учинокъ въ ката въ рукахъ былъ; таковой кождый безчести маеть быти, и промежку добрыми людьми рыцерскими не маеть большей привилъевъ шляхецскихъ уживати.

АРТЫКУЛЬ 34.

Хто бы послѣ ранъ по пиромъ и по корчмомъ ходечи пилъ.

Уставуемъ, кгда бы который шляхтичъ битый або ранний послѣ ранъ ѣздилъ або ходилъ по калаціямъ, по торгохъ и по корчмахъ пилъ, на беседехъ седѣлъ, а потомъ отъ тыхъ ранъ умеръ; тогды тот, отъ кого тые раны або бой ему се сталъ, головщизны платити не повиненъ будетъ, повиненъ только за раны досыть чинити его кровнымъ подле статуту.

АРТЫКУЛЬ 35.

Такъ званого гостя яко и незваного.

Хто бы тежъ въ домъ свой позвалъ до себе гостя на учту, и былъ такъ небачный а того гостя своего званого въ дому своемъ зелжилъ збилъ або зранилъ, а тотъ бы гость позвавши его до права то на него слушнымъ доводомъ перевель, таковой ображоную сторону съ права маеть навезати водле стану его и шкоду платити, на чомъ присягнетъ, а за таковой выступъ маеть седети въ замку нашомъ въ повѣтѣ тамошнемъ, гдѣ оселость маеть, дванадцать недѣль. А естли бы тотъ гость званый доводу слушного не мѣлъ; тогды маеть того жъ часу скоро по зраненью оказати раны и шкоды свои людемъ стороннымъ околичнымъ суседомъ и обжаловати вряду, такъ тежъ раны оповѣдати и въ книги записати, а при том оповѣданью самъ маеть на ранахъ и на шкодахъ своихъ поприсегнути, а тотъ повиненъ будетъ его навезати, седѣнье приняти, и шкоду платити водле того, яко вышей въ томъ артыкулѣ описано. Нижли естли бы гость званый въѣхавши въ чій домъ, былъ такъ вшетечный, господара домового такъ тежъ господиню або сына збилъ або зранилъ; тогды на такового гостя также слушнымъ доводомъ у права маеть довести, а гдѣ бы доводу не мѣлъ, тогды также оповѣдати людемъ стороннимъ и ожаловати, а при оном оповѣданью так стороннимъ людемъ, яко и вряду маеть кождый зъ нихъ зъ особы своее,

кого въ дому ранить, поприсегнути такъ на ранахъ яко и на шкодахъ. И кгда присягнуть таковой гость домовому господару або жонѣ и сыну, хто зъ нихъ ранень будеть; ображеной сторонѣ маеть за раны навезати и шкоды, на чомъ присягнуть, платити, а на замку также седѣти дванадцать недѣль. А гдѣ бы се у звадѣ обадва ранили такъ господарь яко и гость, а доводу бы на то зъ обудву сторонѣ не мѣли, а торгнули бы се обадва ку присязѣ; тогда жеребей кинути, и чій се жеребей напервей выйметъ, тотъ маеть на ранахъ и на шкодахъ своихъ присегнути. А гдѣ бы гость въ домъ чій прїѣхавши незваный, а тотъ бы домовый господарь принялъ его въ домъ свой за гостя, и што бы се подъ тымъ же обычаемъ потрафило на обѣ сторонѣ; такъ гостю яко и домовому пану тое жъ право на обѣдвѣ сторонѣ, яко вышей въ томъ артыкулѣ описано.

РОЗДѢЛЬ ДВНАДАЦТЫЙ О ГОЛОВЩИЗНАХЪ И НАВЕЗКАХЪ ЛЮДЕЙ ПОСПОЛИТЫХЪ.

АРТЫКУЛЬ 1.

О головщинахъ и навезкахъ людей простого стану.

Головщизна панцерному слузѣ пятьдесятъ копь грошей, путному слузѣ тридцать копь грошей, бортнику двадцать пять копь грошей, тяглому двадцать копь грошей, паробку десеть копь грошей, а жонамъ ихъ совито. А навезка панцерному слузѣ шесть рублей грошей, бортнику два рубли грошей, тяглому рубль грошей, паробку полтина грошей, а жонамъ ихъ совито, а жонца, которая мужа не маеть и не мѣла, полтина грошей.

АРТЫКУЛЬ 2.

Головщизны и навезки тивуномъ, ключникомъ, войтомъ, старцомъ, лавникомъ сельскимъ.

Тивуну, ключнику, войту, старцу головщизна сорокъ копь грошей, естли бы невольникъ въ которомъ съ тыхъ врядовъ былъ, тогда ему во врьдѣ головщизны двадцать копь грошей, а навезки рубль грошей. А пакли бы въ ключохъ або у войтовствѣ которій шляхтичь былъ; таковому предсе головщизна маеть быти водле стану шляхецкого. А навезка тивуну, ключнику, войту, старцу по три рубли грошей, а лавнику два рубли грошей.

АРТЫКУЛЬ 3.

Головщизна ремеснымъ людемъ.

Золотару, органистѢ, пушкару, гафтару, малерови, сокольнику, машталору, кравцу, гафтарцѢ, коверникутымъ всимъ головщизна по тридцати копъ грошей, а навезки по три рубли грошей, а жонамъ ихъ совито. ДойлидѢ, ковалю, столяру, псарцу, возницы, мулеру, шевцу, гончару тымъ всимъ головщиzny по двадцати копъ грошей, а навезки три рубли грошей, а жонамъ ихъ совито. Потомужъ и иныхъ ремесникомъ, которыхъ тутъ не написано, маеть быти плачно яко дойлидѢ и жонамъ ихъ совито.

АРТЫКУЛЬ 4.

О ношенью жидовскомъ.

Жидове въ коштовныхъ шатахъ зъ ланцуги золотыми сами и жоны ихъ въ золотѢ и въ серебрѢ, такъ тежъ и сребра на пасахъ и на кордахъ носити не мають; але уберъ ихъ маеть быти значный: шапки або биреть жолтый, такъ тежъ и завиванья бѢлыхъ головъ полотно жолтое, або тому подобное, ижъ бы знакъ и певное розознанье было християнина отъ жида.

АРТЫКУЛЬ 5.

Жидъ, татаринъ и кождыи бесурмянинъ на врьдъ преложонъ и хрестиянъ въ неволи мѢти не маеть.

Уставуем, ижъ отъ того часу мѢти хочемъ, абы жидъ, татаринъ и кождый бесурмянинъ на достоенство а ни на который врьдъ отъ насъ Господаря а ни отъ пановъ радъ нашихъ преложонъ не былъ и хрестиянъ въ неволи не мѢлъ. А естли бы который зъ нихъ християнина купилъ у вѢчную неволю; таковой пенези тратить, а тотъ хрестиянинъ маеть быти волень. А естлибы хлопа або жонку закупилъ, тогды маеть прійти передъ врьдъ и въ чомъ закупилъ, або тежъ и зъ суда въ заплатѢ яко будетъ выданъ, до книгъ записати; и

будеть ли сума невеликая, тогда тотъ закупъ и закупня за семь лѣтъ съ тыхъ пенязей маеть выробитися, а кгда бы сума великая была, ино с тыхъ пенязей на кождый годъ выпуску маеть быти хлопу полтину грошей а жонцѣ пол-копы грошей. Нижли маючи таковыхъ закуповъ и дѣтей ихъ въ жидовство а ни въ бесурмянство намовляти а ни обрѣзовати не мають, а который бы смѣлъ то вчинити, а было бы то на него переведено передъ врьдомъ; тогда безъ кождого милосердя таковой огнемъ маеть быти каранъ, чого врьдъ нашъ съ пильностью стеречи и о томъ вывѣдоватися достаточнѣ маеть. А мамками християнки у дѣтей жидовскихъ и тежъ кождыхъ дѣтей бесурмянскихъ быти не мають; а хтобы християнокъ ку тому приневолялъ, а то бы слушнѣ ведле права на него было переведено, таковой горломъ маеть быти каранъ. Тымъ же обычаемъ хотя бысмы которому татарину або жиду або которому бесурмянину дворъ нашъ або имѣнье зъ людьми дали; таковые мають се жидове и бесурменинъ на выслугахъ своихъ противъ християнскихъ людей якъ выступныхъ такъ и тяглыхъ заховати, абы ихъ ку подачкомъ и службамъ незвыклымъ не приневоляли. А пакли бы тые люди наши за таковымъ зневоленьемъ прочъ отошли и засѣли на земляхъ нашихъ або князкихъ панскихъ и шляхецкихъ; таковыхъ за вольныхъ мѣти хочем, нижли земли ихъ мають зостати при таковыхъ, кому дано водле данины наше.

АРТЫКУЛЬ 6.

Навезка татаромъ.

Уставуемъ, которые князи и мурзы татарове закону бесурмянского мають оселости имѣнья земскіе зъ наданья предковъ нашихъ и насъ самыхъ, и естли тые бывають на службахъ нашихъ господарскихъ и земскихъ и в ротахъ, або при гетманехъ нашихъ, и въ реестрахъ военныхъ суть написаны; таковымъ навезка маеть быти яко шляхтичу, а жонамъ ихъ совито, а головщизны сто копъ грошей кромъ седѣнья. А которые татарове форминомъ ся живять, и огородные речы справують, быдломъ торгують, кожи дубять, и якими кольвекъ речами живность собѣ заробляють; таковымъ навезки рубль грошей, а жонамъ ихъ совито, а головщизна дванадцать копъ грошей.

АРТЫКУЛЬ 7.

Человѣкъ вольный за жадень выступокъ въ неволю выданъ быти не маеть.

Тежъ уставуемъ, ижъ человѣкъ волный за жадный выступокъ въ неволю вѣчную выданъ быти не маеть, а естли бы въ сумѣ великой выданъ былъ; маеть съ тое сумы выроблятися, и выпуску на каждый годъ мужику полтина, а жонцѣ пол-копы грошей. А естлибы съ тое сумы до смерти выслужитися не могъ, а будетъ ли мѣти дѣти; тогда дѣти не мають се съ

тое сумы выробляти. А выпуску дорослымъ дѣтемъ потомужъ маеть быти, яко вышей описано. А закупнымъ людемъ тымъ же обычаемъ изъ сумы пенежное выпустъ быти маеть.

АРТЫКУЛЬ 8.

О человѣку отчизномъ.

Кгды бы который человѣкъ отчизный, отшедши отъ пана своего и заложившись за кого иншого, не далеко въ пети або въ десети миляхъ мѣшкаль; тогда вже о такового человѣка вѣчнѣ молчати маеть. Пакли бы тотъ человѣкъ отчизный отшедшы отъ пана своего и мѣшкаль далеко въ колькодесяти миляхъ, а панъ его о немъ не вѣдалъ, а по томъ бы засе пришлоъ и перемѣшкиваль поблизу; тогда хотябы въ ономъ часѣ и давность земская зашла, вольно будетъ ему того человѣка за отчича правомъ доходити, только бы давности не омѣшкаль отъ того часу, якъ ближей прійдетъ.

АРТЫКУЛЬ 9.

Хто бы на человека вольного и невольного права доходити не хотѣль.

Тежъ еслибы который человѣкъ не похажалый або челядинъ невольный за кого зашлоъ, а повѣдился быти вольнымъ, а онъ панъ, чій человѣкъ або челядинъ, просиль у въ оного пана права, а тотъ панъ ему на него права дати не хотѣль; тогда таковой маеть притягнень быти ку праву земскому. А естли тотъ панъ, чій человѣкъ непохожій або челядинъ, зыщеть правомъ ижъ его отчичъ або невольникъ, а на оного пана, въ кого тотъ человѣкъ, переведеть правомъ, ижъ въ него просиль справедливости разъ и два, а онъ не даль; тогда тотъ панъ маеть навезати оного человѣка або челядина отъ того часу, якъ въ него права просиль, за каждую недѣлю по шести грошей, а естли бы втекъ, тогда маеть платити потому, яко вышей о головщизнахъ написано.

АРТЫКУЛЬ 10.

О челядь невольную, которая втечетъ отъ пана своего.

Уставуемъ, кгда бы хто чію челядь невольную вывелъ, або вѣдаючи заказъ въ себе переховываль, а то бы на него правомъ было переведено; тогда таковой повинень будетъ ту челядь отыскати, а одыскавши тому пану отдати. А гдѣ бы не могъ одыскати, або не хотѣль; будетъ повинень тую челядь самъ цѣною платити, яко выше написано, и шкоду оправити отъ того часу, отъ которого ему тая челядь не робила, мужику и жонцѣ за каждую недѣлю по шести грошей.

АРТЫКУЛЬ 11.

О вольныхъ людехъ, которые въ голодъ продають.

Хто бы въ голодъ самъ себе або сына або тежъ которого человѣка вольного въ неволю продалъ, и листъ на то далъ; таковой листъ не маеть быти держанъ, але яко голодъ минеть, а онъ пенезей добудеть, маеть ему пенези отдати. Нижли естли бы хто челядь свою невольную продалъ; тая ведле продажи маеть вѣчнѣ держана быти.

АРТЫКУЛЬ 12.

Хто бы в голодъ челядь свою выгналъ.

Тежъ уставуемъ, естли бы хто в голодъ челядь свою невольную выгналъ або выбиль зъ дому своего прочъ, не хотечи ее кормити и переховывати; таковые вжо не мають быти невольными, але вольными. А вѣдъже тымъ обычаемъ, ижъ коли тую челядь выбьеть, тогда се они оповѣдати мають врядникомъ въ повѣтѣ або вряду мѣстскому бурмистромъ або мѣщаномъ, ижъ ихъ выбиль а кормити не хотѣль; а тые, которимъ се оповѣдають, мають обослати того пана, чія челядь, естли зознаеть, же для голоду выгналъ ихъ изъ дому не хотечи кормити, тогда она челядь вѣчнѣ маеть быти вольна.

АРТЫКУЛЬ 13.

Невольницы мають быти троякихъ причинъ.

Тежь уставуемъ, ижь неволницы мають быти троякихъ причинъ: первые которые суть здавна въ неволи, або зъ невольныхъ се родять; другіе которые полономъ заведены суть изъ земли непріятельское; третіе коли бы се сами въ неволю поддали, а хто бы, ведаючи жонку неволную, въ малженство поняль, хотя человѣкъ вольный, тогда таковой самъ и дѣти ихъ въ неволи быти мають. А естли бы се невѣдоме поняли, а одинъ зъ нихъ будучи вольнымъ не хотѣль въ въ томъ быти; тогда того жъ часу мають се втечи до права духовного, ведле которого ихъ мають розвести, а по розводѣ таковой вольный маеть зостати вольнымъ, а невольный, невольнымъ.

АРТЫКУЛЬ 14.

Если бы кто до кого слугу приказаль, а тотъ слуга зашкodikвши втекъ отъ него прочь.

Хто бы кому приказаль слугу, а тотъ слуга шкоду вчинивши тому пану своему втекъ отъ него прочь; тогда тотъ, хто его приказаль, маеть ку праву стати, а судъ маеть ему рокъ зложити, на которій маеть его доискавшися ку праву поставити. А естли жъ бы тотъ на оный рокъ, которій судьи положить, того не постановилъ; тогда онъ самъ повиненъ будетъ тую шкоду оправити, на чомъ слушный доводъ учиненъ будетъ. А естлибы се потомъ оному пану, за кого слуга втечь, пригодить ли его видѣти на торгу або поткаеть въ дорозѣ; тогда вжо онъ самъ не маеть имати, нижли того приказцы своего смотрѣти маеть. А гдѣ бы хто мѣль слугу не приказного, а онъ ему шкоду учинивши прочь втечь; тогда онъ, гдѣ кольвекъ его увидитъ або поткаеть, маеть его поймати и вести до онога права гдѣ поймаеть, а передъ правомъ маеть на немъ шкоды своихъ до доходити.

РОЗДѢЛЬ ТРЕТІЙНАДЦАТЬ, О ГРАБЕЖОХЪ И НАВЕЗКАХЪ.

АРТЫКУЛЬ 1.

О грабенъе стада свирѣпъего.

Уставуемъ, естлибы хто пограбилъ на якомъ колвекъ кгрунтѣ стадо свирѣпъе князское, панское, землянское, а держачи стадо жеребца або свирѣпу и колко ихъ уморилъ або охромилъ; таковой за жеребца князского панского землянского повиненъ будетъ заплатити осмь копъ грошей, а за свирѣпу чотыри копы грошей, нижли за каждого съ тыхъ жеребцовъ будетъ ли торгуючы што давано, тогда тую уѣну будетъ повиненъ платити за слушнымъ доводомъ.

АРТЫКУЛЬ 2.

Якимъ обычаемъ мають се заховати о испашъ и о грабежъ на испашахъ.

Тежъ уставуемъ, ижъ нихто стада свирѣпъего на дѣдизнѣ чужой на испашахъ такъ тежъ и на своей власной займовати не мають, ани въ грабежъ брати, а хто бы на чіей дѣдизнѣ стадо занялъ або грабежъ учинилъ; таковойъ маеть тому квалтъ заплатити дванадцать рублей грошей и шкоду оправити, а што бы се тому стаду стало, подлѣ уфалы вышей описаное. Бо не маеть за испашъ стада брати, бы и засталъ на испаши, але маеть освѣтчивши сусѣдови отогнать, до того пана, чіе стадо есть, и испашъ маеть обвести людьми добрыми сторонними; тогды тотъ повиненъ испашъ заплатити, чіе стадо шкоду вчинило. А вѣдъже вызволяемъ одно стадо свирѣпъе, абы на испаши не было займовано, а быдло кони волы и коровы свинье и гуси на испаши мають быти займованы подлѣ обычаю, и скоро занявши маеть обослати того пана, чіе быдло свое на поруку взялъ, а о испашъ на купу шоль; и што купа на испаши шкоды присудить, тотъ панъ чіе быдло занято, маеть платити. А гдѣ бы на обосланье того, кому се испашъ стала, быдла своего на поруку взяти и на купу ити не хотѣлъ; тогды тотъ, хто займетъ, маеть быти зъ людьми добрыми сторонними, и што тая мсторона шкоды окупують, онъ маеть въ той шкодѣ своей оставити того быдла только, што бы за его шкоду стояло, а досталь отослати до того пана чіе быдло. Нижли стадо свирѣпъе кони и каждое быдло только до светого Юрья безъ пастуха маеть вольно ходити, а по светомъ Юрьи въ тыжъ день каждый маеть около добытку своего сторожу або пастуха мѣти, черезъ все лѣто ажъ до первого дня мѣсяца Октебра. А давность отправа за испашъ не маеть дальшая быти только подлѣ стародавного звичаю до Божьего нароженья. И хтобы о испашъ присужоною, не хотечи платити подлѣ права, даль се позвати; тогды съ права, достанеть ли виненъ, маеть совито заплатити.

АРТЫКУЛЬ 3.

Хтобы подъ шляхтичомъ або подъ шляхтянкою грабежъ учинилъ.

Тежъ уставуемъ, хтобы подъ шляхтичомъ або подъ шляхтянкою грабежъ вчинилъ, кони побралъ при костелѣ на торгу або на поли, гдѣ жъ кольвекъ бы, тежъ бою не вчинилъ, або подъ слугою коня взялъ, або зъ воза выпрягъ, хотя бы оная особа при томъ не была, а былъ бы на то передъ врядомъ слушный доводъ; таковойъ оный, который грабежъ учинилъ, маеть такового навезати и шкоды, если будутъ при томъ грабежи вчинено, за доводомъ оправити.

АРТЫКУЛЬ 4.

О грабежъ коня князского, панского и шляхецского.

Тежъ князского панского, шляхецского коня изъ кожного грабежу безправного вызволяемъ. А естли бы хто безъ права князя або пана и шляхтича, хотя въ небытности его, коня пограбилъ; таковой маеть коня конемъ навезати.

АРТЫКУЛЬ 5.

Яко челядь невольная втекляя маеть быти заповѣдана.

Если бы чія челядь невольная втекла, а заповѣдана бы зъ якого перейму, и женучи за нею въ погоню въ кого ее нашолъ; тогды маеть тому, въ кого челядь зостанеть, переемъ дати, съ чого будетъ первой заповѣдалъ. А естли бы заповѣди и перейму, въ кого оную челядь нашолъ, недалъ, а тотъ бы ему не хотѣлъ тое челяди безъ перейму выдати, и взялъ поземъ кгвалтомъ, а до права о то былъ позванъ; тогды тотъ за тымъ позвомъ повинень будетъ сторонѣ жалобливой платити яко за кгвалтъ дванадцать рублей грошей. А естли бы хто чію челядь въ себе ховалъ, а тотъ по колко кротъ заповѣди и по торгу закликалъ, оповѣдаючи ее, и потомъ бы тотъ, чія челядь, въ колко недѣляхъ тую челядь свою въ него нашолъ; тогды только маеть, за страву ему отъ кожного челядника на недѣлю по два гроши давши, челядь свою добровольнѣ взяти.

АРТЫКУЛЬ 6.

О грабежъ человѣка князского, панского и землянского.

Уставуемъ, естли бы шляхтичъ чіихъ людей пограбилъ на торгу при церкви на добровольной дорозѣ; таковой маеть сторонѣ обжалованой вины заплатити шесть рублей грошей, а грабежъ зъ навезкою отдати, то естъ коня конемъ вола воломъ навезати. А пакли бы шляхтичъ або хтожъ кольвекъ пограбилъ у чіихъ людей на поли або гдѣ индей, а бою не вчинилъ; тогды маеть заплатити три рубли грошей, а грабежъ также навезати. А мужикъ мужика естли бы при костелѣ або на торгу на дорозѣ пограбилъ; маеть заплатити три рубли грошей, а грабежъ всякій также зъ навезкою платити маеть, коня конемъ, вола воломъ, а корову коровою, и каждое быдло, якое пограбилъ, таковымъ навезавши маеть отдати, або цѣною заплатити, яко нижей описано.

АРТЫКУЛЬ 7.

Цѣна конемъ рабочимъ.

За коня або за свирѣпу робочую копа грошей, а за третека жеребка отъ робочихъ свирѣпъ копа грошей, а за третячку свирѣпу полтина грошей, за лонское жеребя пол-копы грошей, за лѣтошнее двадцать грошей.

АРТЫКУЛЬ 8.

Цѣна быдлу малому и великому.

За вола осмдесять грошей, за вола стадника осмдесять грошей, за корову петдесять грошей, за яловицу сорокъ грошей, и за быка неука сорокъ грошей, за телицу пол-копы грошей, за теля лонское двадцать грошей, а за теля сеголѣтнее дванадцать грошей, за вепра кормного пятдесять грошей, за вепра некормного пол-копы грошей, за кнороза сорокъ грошей, за свинью двадцать грошей, за подсвинка десеть грошей, за порося пять грошей, за овцу петнадцатъ грошей, за барана дванадцать грошей, за скопца барана двадцать грошей, за ягня пять грошей, за козла пол-копы грошей, за козу двадцать грошей, за козеня пять грошей.

АРТЫКУЛЬ 9.

Цѣна птахомъ домовымъ.

Гусь три гроши, каплунъ шесть грошей, курица пол-тора грошей, утка два гроши, селезень грошь, голубъ грошь, утка круговая шость рублей грошей, пава або павъ три копе грошей, лебедь домовый три копы грошей.

АРТКУЛЬ 10.

Цѣна птахомъ на мысливство хованымъ.

Кречоть красный дванадцать рублей грошей, за бѣлого кречота десеть рублей грошей, серый кречоть шесть рублей грошей, соколь шесть рублей грошей, а ястребъ великій три рубли грошей, болобанъ два рубли грошей, за рабца або за кгрокгулца рубль грошей, за дремлюга пятьдесятъ грошей.

АРТКУЛЬ 11.

Цѣна збожью.

Пшеница копа петнадцать грошей, жита копа дванадцать грошей, ярицы копа десеть грошей, ечменю копа осмь грошей, овса копа шесть грошей, гречки копа пять грошей, гороху копа шесть грошей, проса копа чотыри гроши, илну копа дванадцать грошей, рѣпы бочка пять грошей.

АРТКУЛЬ 12.

Цѣна собакомъ.

За пса домового брехуна три рубли грошей, за наслѣдника и за набрехника звѣринного шесть рублей грошей, за окгара три копы грошей, за узлайника три копы грошей, за выгла три копы грошей, за щайку подъ ястреба три копы грошей, за подстрелного три рубли грошей, за пса обсочного шесть рублей грошей, за меделянского пса шесть рублей грошей, за хорта подсокольего шесть рублей грошей.

АРТКУЛЬ 13.

Если бы кого песь непривязанный укусилъ.

Уставуемъ, кгда бы кого песъ непривязаный уѣль съ чіего прищванья, а онъ бы ставши за позваньемъ передъ урядомъ къ тому прищванью се не зналъ; такому маеть судъ сказати отприсегнутися, ижъ того не вчинилъ, а гдѣ бы присегнути не хотѣль, тогды, жалобливая сторона кгда его въ томъ поприсягнетъ, повинень его будетъ навезати ведле стану его, якобы его самъ ранилъ рукою своею. Пакли жъ бы хто кому пса умыслнѣ а не отъ руки забилъ або застрелилъ; таковой будетъ оного пса повинень платити водле цѣны вышей описаное, естли бы его забилъ отъ руки кіемъ або якою бронею не пометомъ а ни стрѣлбою, таковой не повинень будетъ ничего платити.

АРТЫКУЛЬ 14.

Которое бы быдля або песъ в сусѣдстве шкоду чинилъ.

Уставуемъ, естли бы въ кого песъ домовый або быдля якою шкоду въ околицы чинилъ, а тотъ домовый господарь о томъ вѣдаючи оного быдляти стеречи а пса на привези мѣти не хотѣль; тогды таковой будетъ повинень всю шкоду въ сусѣдствѣ платити и оправовати, на што слушный доводъ удѣланъ быти маеть.

РОЗДѢЛЬ ЧОТЫРНАДЦАТОЙ О ЗЛОДѢЙСТВѢ ВСЯКОГО СТАНУ.

АРТЫКУЛЬ 1.

Хто бы въ кого лице зосталъ.

Коли бы хто лице свое и речы краденые въ чыего слуги або подданного засталъ, такъ на дѣдизнѣ его яко и инде гдѣ кольвекъ; тогды такового человѣка лицованого маеть вести до пана его, просити зъ нимъ справедливость. А естли бы ему справедливости не вчинено; тогды тотъ, при чіемъ человѣцѣ лицо зостато будетъ, повинень о то передъ врядомъ нашимъ отказывати и того злодѣя своего передъ судомъ нашимъ поставити. А естли бы оный злодѣй втекъ зъ рукъ его або оное лицо стратилъ, а передъ судомъ не постановилъ, а лица не положилъ; тогды будетъ повинень оную шкоду заплатити, на чомъ онъ присягнетъ, або слушный доводъ учинить, што ему при ономъ лица будетъ згинуло. И тежъ коли бы што въ кого вкрадено, а видитсе ему шкода отъ которого села, а шкодника своего не вѣдаеть; тогды маеть выпросити право въ томъ селѣ. А естли бы даль о то всему селу вину; тогды три мужи зъ оного села, которыхъ онъ обереть, мають присегнути, якъ в том селѣ шкодника его не вѣдають, а пакли бы о то не присегнули, тогды оное село

все оную дають, а пакли бы о то не присегнеули, тогда оное село все оную шкоду всю тому шкоднику маеть платити, а собѣ злодѣя искати.

АРТЫКУЛЬ 2.

Зводъ на злодѣя.

Тежъ уставуемъ, которій человѣкъ пойманъ будетъ на злодѣйствѣ, а приведенъ съ чимъ до замку або до вряду нашего, а тотъ бы повѣдалъ заводцу и отъ кого тое лице маеть; тогда маеть на томъ же врядѣ нашомъ того заводцу поставить, або сознаниемъ врядовымъ себе очистити, гдѣ будетъ то купиль, а на которомъ врядѣ оповѣдалъ и въ книги записаль. А естли бы тотъ заводца того обвиненого въ злодѣйствѣ передъ правомъ заступиль, а тотъ бы заступца браль се на иншій зводъ, хотечи вести отъ суда вряду нашего на иншого заступцу до иншого вряду; то ему не маеть быти доущоно, але каждый заступца до остатнего зводу маеть быти ставень передъ тымъ врядомъ нашимъ, гдѣ ся початокъ сталь зводу, а лице во вряду будетъ повинень тотъ ку зводу выкупити, хто се зводитъ. А вѣдже за выкупенье большей врядъ не маеть только по дванадцати грошей за каждымъ зводомъ; и каждому таковому, хто се выводитъ зъ маетности оного, на комъ лице зостанеть, навезка подлѣ стану всказована быти маеть. А пакли бы у того злодѣя маетности свое не было, чимъ лице во вряду выкупити, тотъ маеть врядъ лицо жалобливой сторонѣ даромъ вернути, а злодѣй яко за злодѣйство и за вси навезки маеть горломъ приплатити. А естли бы заводцы передъ врядомъ нашимъ достаточного зводу не поставиль, а зознаниемъ врядовымъ себе въ томъ злодѣйствѣ не очистиль; тогда тотъ маеть быти каранъ горломъ яко злодѣй, а шкоды, на чомъ сторона жалобливая присягнеть, маеть быти плачона зъ дому оного злодѣя. А естли бы остатній себе заводца очистиль выписомъ врядовымъ, а гдѣ бы рекъ купиль, або, ижъ то его конь або воля доморослый, сведѣцствомъ слушнымъ се выправиль; таковой яко навезокъ такъ и шкодъ никому платити не будетъ повинень, нижли естли бы тую речъ купиль, пенези свои татить. А пакли бы сторона поводовая, которая позвала, и менила коня або вола своего доморослымъ або речъ дома уробленую, якъ сукно и якую кольвекъ иншую речъ, сторона обжалованая, которая будетъ зъ лицомъ приведена, будучи тежъ не подозренная, менила быти своимъ доморослымъ або дома вробленнымъ, а подобенство къ тому стегало, хотя бы обѣдвѣ стороне выдали свѣдковъ годныхъ; тогда за подобенствомъ и за свѣдцествомъ сторона обжалованная при своихъ свѣдкахъ близшая будетъ ку доводу, ижъ то естъ доморослое, або дома вробленое, бо тому бы вжо шло о горло, а вѣдже судъ подобенства всякіе на доброй бачности мають мѣти, и въ речахъ вонтпливыхъ склоннѣйшій маеть быти ку вызволенью нижли ку каранью. А простого стану человѣкъ, которій первый або другій разъ около таковыхъ речей будетъ обвинень, тотъ ку таковому отводу немаеть быти припушонъ.

АРТЫКУЛЬ 3.

Для покою посполитого застановенье отъ злодѣйства.

Отъ того часу уставуемъ и хотимъ мѣти, абы каждый съ подданныхъ нашихъ и подданныхъ князскихъ панскихъ и духовныхъ и свѣцскихъ и боярскихъ, такъ можного стану яко и меншого, хто бы кольвекъ што въ кого на торгу въ дому або гдѣ кольвекъ коня, вола, корову и иншыя всякіе речы купиль; то маеть на то мѣти баришниковъ людей добрыхъ вѣры годныхъ, и съ тымъ истцемъ, въ кого што купить, и съ баришники прійти до вряду замку або двору нашего або до войта мѣстского въ книги врядуые записати, а тыми, естли будетъ потреба, у права себе очистити. Нижли естли бы хто потомъ тую речъ позналъ, и того передъ врядомъ довелъ, же его властная речъ; тогды тотъ, хто купиль, передъ врядомъ маеть оному, хто позналъ и довелъ, вернути, и будетъ ли мѣти, же при томъ лица много погубло, тогды тотъ, хто купиль, маеть отприсегнутися, ижъ болшей тыхъ речей не купиль а ни свѣдомъ.

АРТЫКУЛЬ 4.

О важности лица, за што злодѣй каранъ быти маеть.

Уставуемъ, ижъ каждый злодѣй зъ лицомъ приведеный и правомъ покананый при лица, которое бы стояло вышей полтины грошей, маеть горломъ каранъ быти. А што бы за полтину грошей не стояло; маеть у столпа дубцы бить быти, а лицо маеть вернути тому, чіе есть, а навезка на тое лицо зъ маетности его маеть быти плачона, а не будетъ ли чимъ мѣти навезки платити, тогды ухо тому злодѣю маеть урѣзано быти. А которое бы лицо вышей полу-копка або за полкопы стояло; при такомъ лицу маеть быти также у столпа бить и зъ мѣста высвѣдчити. А которое лице будетъ стояти за дванадцать грошей, за то также маеть бить быти; а потомъ того жъ естли бы се трафило поймати зъ лицомъ, хотя бы тое лице и десети грошей не стояло, тогды вжо маеть быти каранъ яко злодѣй.

АРТЫКУЛЬ 5.

Якъ маеть въ дому чіемъ лицо * зостати.

Уставуемъ, хто бы хотѣлъ у чіемъ дому речы краденые застати; тогды отъ вряду беручи возного маеть передъ врядомъ ознаймити, што ему згнуло, и чога передъ вознымъ въ дому его искати маеть, а въ мѣстѣ мѣстскаго вижа и къ тому людей постороннихъ вѣры годныхъ маючи при собѣ, и при нихъ въ ономъ дому тыхъ речей искати краденыхъ маеть.

А скоро бы тамъ што речей краденыхъ нашолъ и того при томъ лица зосталъ, маеть при томъ же возномъ людехъ сторонныхъ того, кого при лица зостанеть, вести до вряду нашего, а естли никого не зостанеть, одно лице знаидеть, однакожь съ тымъ лицомъ маеть вести або Ѡхати до вряду нашего и тамъ далей поступовати ведле права. Пакли жъ хто у своемъ дому крадежу искати не допустилъ, клетей и иныхъ домовъ и схованей отомкнути не хотѣлъ; тогды тотъ, хто не допустилъ, будетъ повинень тую всю шкоду сторонѣ жалобливой платити ведле доводу або присеги. Тымъ же способомъ, хто бы хотель въ чіего человѣка крадежь зостати, маеть се заховати яко вышей описано; нижли только, з вознымъ и зъ стороною оступивши домъ подданого чіего, маеть того пана або врядника, а не будетъ ли врядника а ни тивуна ино старшого, хто въ томъ селѣ будетъ, обослати, оповѣдаючи тое, абы не розумѣлъ кгвалтовного наѠханья. Естли жъ бы панъ або врядникъ его при томъ обыску быти не хотель; тогды сторона жалобливая предсе съ тыми, кого маеть при собѣ, обыскъ чинити и вси схованья трести, и нашодши съ тымъ до вряду вести маеть.

АРТЫКУЛЬ 6.

О гоненье слѣдомъ въ якой кольвекъ шкодѣ покраденной.

Кому бы покрадены кони волю быдло и иные речи въ дому, а тотъ шкоднй поднялъ бы слѣдъ тое шкоды своее, и собравшы людей добрыхъ околичныхъ сусѣдовъ водле давного обычаю гониль слѣдомъ, а тотъ слѣдъ гдѣ бы ку которому селу або въ чій домъ привель; тогды маеть послати до того села або до дому, гдѣ слѣдъ вшолъ, людей добрыхъ стороннихъ вѣры годныхъ, абы зъ села своего и зъ дому, гдѣ бы слѣдъ вшолъ, або зъ кгрунту земли села своего слѣдъ вывели. Таковое село або в чій домъ слѣдъ будетъ вшолъ, мають тотъ слѣдъ въ тое копы взяти и зъ села або зъ дому и зъ земли своее того села слѣдъ вывести ажъ до иншое границы, куды тотъ слѣдъ пойдетъ. А естли бы тое село, до которого слѣдъ приведенъ, отъ себе слѣду не вывели або отъ слѣду отбили або выгнавши быдломъ затоптали; на такомъ зостановившисе копа тая, гдѣ слѣду не отведено або отбито, мають послати по возного до вряду нашего замкового, и съ тымъ вознымъ и люди сторонные копа вся мають оную шкоду осумовати, на чомъ оный шкоднй самотреть присягнеть, и приложить до того села, абы они шкоду заплативши собѣ винного искали. А по сказанью мають черезъ возного и сторону, которіе при томъ были объявити вряду и половину пересуда дати, а врядъ маеть рокъ заплатѣ зложити, и яко рокъ выидеть; тогды врядъ оного пана листомъ своимъ напоменути маеть, абы водле права оного суду копного заплату чиниль, а не будетъ ли хто хотѣти, тогды тая шкода зъ уряду отправена маеть быти.

АРТЫКУЛЬ 7.

Хто бы шляхтича першгй разъ о злодѣйство безъ лица передъ врядомъ обвиниль.

Уставуемъ, хтобы шляхтича обвиниль о злодѣйство безъ лица и безъ каждое слушное причины; тогды таковое обвиненье оному шляхтичу шкодити не маеть, и за таковое обвиненье повинень будетъ его навезати, яко бы его раниль. Пакли жъ бы оногю обвиненья яко записованье до книгъ, або гдѣ индей поволанье, або якіе слушные причины, або знаки показаль, а тотъ шляхтичъ еще отъ того се не отводиль а ни отприсегаль; тогды таковой обвиненый будетъ повинень першій разъ того самъ особою своею отприсегнутисе, и кгда присягнетъ, навезки ему дати не повинень. Паклижъ бы того шляхтича о злодѣйство передъ врьдомъ другій разъ тымъ же обычаемъ обвинено и поволано было; тогды маеть самотреть зъ шляхтою вѣры годными отприсегнутисе, также безъ навезки. Того жъ шляхтича поволаного кгда бы третій разъ о злодѣйство у права было обвинено; маеть самъ семъ зъ шляхтою вѣры годными отприсегнутисе, а въ недостатку свѣдка або двоохъ маеть шкоду платити, а собѣ винного искати. А четвертый кротъ того жъ шляхтича естли бы у права о злодѣйство было обвинено, а знаки слушные были бы показаны, бы тежъ и лица при немъ не zostали, а сторона поводовая самъ третей его поприсегнула; тогды маеть горломъ каранъ быти яко злодѣй.

АРТЫКУЛЬ 8.

О шляхтичу лѣтъ зуполныхъ не маючому.

Естли бы се трафило, ижъ бы шляхтичъ въ лѣтехъ чотырнадцати и не большъ обвинень о злодѣйство, або приведенъ былъ о злодѣйство зъ лицомъ передъ врьдъ; тогды таковому про молодость лѣтъ его не маеть быти поличоно за злодѣйство, и не маеть быти до ката въ руки и на муку даванъ, нижли тую шкоду отецъ его або matka або кровные зъ имѣнья части его повинни зъ навезкою платити, и заплативши то почтивости его шкодити не маеть, а не будетъ ли мѣти чимъ платити, ино дати его на выслугу, поки бы то заслужиль, што зашкодилъ. Тымъ же тежъ обычаемъ можетъ се розумѣти и о дѣтехъ людей простыхъ лѣтъ недорослыхъ. А ведьже и таковой хлопецъ недорослый естли бы въ колку злодѣйствахъ и при лица былъ дознанъ, таковыхъ врьдъ маеть карати водле зданья своего.

АРТЫКУЛЬ 9.

О поволаньяхъ.

Уставуемъ, абы поволанья злодѣйскіе передъ врьдомъ оповѣданы и явнѣ высвѣдчоны и до книгъ каждого врьду записованы были, которые книги яко передъ тымъ и теперъ зовуть

чорными книгами; таковое оповѣданье и поволање врьдовнѣ записаное маеть у права вездѣ мѣстцо мѣти и пріймовано быти.

АРТЫКУЛЬ 10.

Хто бы злодѣя приличного въ себе въ дому ховаль, або вѣдомость о немъ мѣль.

Уставуемъ и сказуемъ, ижъ коли бы хто злодѣя приличного вѣдоме въ дому своемъ ховаль, або мѣшкати допустиль, або злодѣя явного отъ шебеницы своими пенезми откупиль; тогда таковой кождый, естли бы то на него слушнымъ правомъ было переведено, всю шкоду, которая бы се кому черезъ того злодѣя зъ имѣнья его стала, будетъ повиненъ платити и оправовати. Тымъ же обычаемъ естли бы кому злодѣя правомъ покнаного на смерть выданого, а онъ бы его не скараль, а потомъ кому кольвекъ отъ того злодѣя шкода будетъ се дѣети; тогда тотъ, хто злодѣя пустиль, будетъ повиненъ тую всю шкоду платити и оправовати.

АРТЫКУЛЬ 11.

О покраденье свирна або клети панское шляхецское и тежъ клети мужицкое.

Тежъ уставуемъ, кгда бы покрадено которому пану або земенину свиренъ скарбный або спижарный, а то бы на кого правомъ было переведено; тогда за таковой свиренъ будетъ повиненъ заплатити дванадцать рублей грошей, и шкоду покраденую за присегою оправити. Тымъ же тежъ обычаемъ естли бы мужикъ мужику клетъ выкраль; тогда за покраденье клети мужику три рубли грошей, и шкоду всю зъ дому злодѣйского маеть за присегою плачоно быти. А за навезку объ его злочынство, або колько ихъ будетъ, мають горломъ караны быти.

АРТЫКУЛЬ 12.

О лицо, которое найдетъ се въ дому челоуѣка неподойзрѣного.

Уставуемъ, кгда бы у челоѡка неподойзреного за замкомъ было лицо знайдено, а до тое хоромины было вкинено и не приховано; тогды таковой челоѡк, естли будетъ неподойзрѣнный, маеть зъ жоною и зъ дѣтьми дорослыми, будетъ ли ихъ мѣти, отприсегнутисе. Тымъ же обычаемъ, кгда бы лицо засталъ въ чѣмъ дому въ гумнѣ або за плотомъ; потомужъ маеть тотъ челоѡкъ неподойзрѣнный отприсегнутисе, ижъ того не вѣдомъ. А естли бы въ хороминѣ замкнено было найдено, а тое лицо было бы прихоронено, хотя бы и окно было, куды вкинуги; тогды таковое лицо маеть быти поличоно за злодѣйство, съ которимъ, кого при томъ лица зостануть, маеть быти веденъ до вряду и тамъ зъ нимъ яко съ приличнымъ далей поступовати.

АРТЫКУЛЬ 13.

О злодею, которого на злодѣйствѣ поймають.

Естли бы злодѣй былъ пойманъ на злочинствѣ а не въ дому своемъ, а тые речи краденые въ дому еще не были; таковой злодѣй самъ одинъ маеть за тое злочинство каранъ быти, а жона, дѣти и домовая челядь отъ того прожна.

АРТЫКУЛЬ 14.

О знаки злодѣйскіе на челоѡка неподойзрѣного.

Уставуемъ, кгда бы на которого челоѡка простого неподойзрѣного, которій еще при лица не былъ, знаки злодѣйскіе были описаны, а тые знаки были бы слушные, а тотъ неподойзренный былъ бы челоѡкъ добрый вѣры годный, при которомъ сторона жалобливая его поприсегнути за своего шкодника хотѣла; за таковыми знаки и присегою стороны жалобливое тотъ челоѡкъ маеть быти выданъ на муку, и естли бы се не домучиль, тогды маеть его навезати водле стану его, вѣдъже большей не маеть быти мучонъ одно разъ.

АРТЫКУЛЬ 15.

Три кротъ злодѣя приличного одного дня можетъ мучити.

Уставуемъ, кгда бы поймано злодѣя приличного, а на тотъ часъ безъ лица будетъ пойманъ; тогда такого злодѣя три кротъ одного дня можетъ мучити, только бы на которомъ человѣку не образилъ. А естли бы не домучилсе; тогда за кождымъ разомъ муки оное маеть его навезати водлѣ стану его. Пакли жъ бы у въ оной муцѣ злодѣйства на немъ домучитисе не могъ, а оною мукою уморилъ, або на чдонку образилъ; таковой будетъ повинень за умерлого головщизну а за хромоту пол-человѣка платити водлугъ стану его. Нижли естли бы тотъ злодѣй въ оной муцѣ для чаровъ спалъ, а муки не чулъ, а тые чары были бы при немъ найдены у въ устехъ, або на головѣ у волосехъ, подъ пахою, або гдѣ индей; тогда навезки ему дати не повинень, и еще таковой приличный злодѣй будетъ для таковыхъ чаровъ повинень сторонѣ жалобливой шкоду платити, на чомъ присягнетъ.

АРТЫКУЛЬ 16.

О злодѣяхъ и разбойникохъ, которые бы врядника своего поволали.

Уставуемъ, кгда бы чѣихъ колвекъ подданныхъ злодѣевъ або розбойниковъ и якихъ колвекъ злочинцовъ поймано, а они бы идучи на смерть поволали врядника своего, ижъ того злодѣйства ихъ свѣдомъ, и тымъ лупомъ зъ нимъ се дѣлили, а тотъ врядникъ былъ бы шляхтичъ; таковой маеть першій кротъ отприсегнутисе самъ одинъ. А потомъ естли бы таковыхъ другихъ и третьихъ злочинцовъ поймано, а тые также идучи на смерть того поволали и на шыбеницы не отволали; тогда тотъ отъ тыхъ поволаней маеть отприсегнутисе такъ, яко о шляхтичу естъ вышей описано. А за четвертымъ разомъ естли бы тымъ способомъ былъ поволанъ; тогда вжо безъ кожного отводу и присеги и безъ лица маеть быти сказанъ на смерть яко злодѣй. А гдѣ бы тотъ врядникъ не былъ шляхтичъ; тогда за першимъ поволаньемъ злодѣйскимъ, которіе бы то смертью запечатовали, маеть сторонѣ шкоду платити, на чомъ присягнетъ. Пакли жъ бы того врядника нешляхтича повторе таковые жъ злодѣи и тымъ же способомъ поволали, и также смертью запечатовали; таковой нешляхтичъ вжо безъ кожного лица маеть сказанъ быти на смерть яко злодѣй, и по такового за тымъ знаки слушными и поволаньи правными покананого маеть врьдъ повѣту кожного зослала, и на врьдѣ нашомъ господарскомъ поставившы казати на него фолдровати.

АРТЫКУЛЬ 17.

О человѣка неподойрѣного.

Уставуемъ, кгда бы шляхтичъ которого нешляхтича неподойрѣного помовилъ, менуючи ижъ бы его злодѣемъ былъ, и отъ него въ злодѣйствѣ ему се шкода становила, и не

маючи некоторыхъ слушныхъ знаковъ хотѣль его о злодѣйство по присегнути; тогда тотъ человекъ, яко будучи неподозренный, близшій будетъ самотреть зъ сусѣды собѣ ровными, также людьми добрыми и неподозренными, отприсегнутисе, а судъ ему того маеть допустити. А другій разъ кгда бы того жъ о злодѣйство было обвинено; тогда за другимъ разомъ обвиненьемъ отъ шляхтича маеть быти поконанъ водлѣ права и присеги яко злодѣй.

АРТЫКУЛЬ 18.

О неповоланомъ шляхтичу.

Тежъ уставуемъ, естли бы которому шляхтичу не згола але за причиною слушною дана злодѣйская вина; тогда тотъ позванный отъ того маеть се отвести присегою своею тѣлесною. Тежъ повторе кгда бы тому шляхтичу о тое жъ и таковымъ обычаемъ вина злодѣйская дана; тогда позванный самотреть зъ шляхтичами собѣ ровными маеть се присегою отвести. Третій разъ кгда бы тому жъ шляхтичу тымъ же способомъ вина будетъ дана; тогда позванный самъ-семъ зъ шляхтами маеть отприсегнутисе и правъ будетъ. А вѣдъже кгда четвертый разъ томужъ шляхтичу въ томъ же вина будетъ дана; тогда позваному до права вжо не ему маеть быти отводъ, але на него доводъ присегнути зъ шляхтою собѣ ровною саотрему, и съ права за слушнымъ доводомъ маеть быти каранъ ведле вины и учинку своего.

АРТЫКУЛЬ 19.

О забитье злодѣя при лица.

Уставуемъ, тежъ хтобы злодѣя при лица своемъ забиль, такового злодѣя забитого того жъ часу по ономъ забитью маеть оказати сусѣдомъ околичнымъ и потомъ што нарихлей зъ ураду нашего, которій наближей будетъ, вознымъ и стороною обведши до вряду привести и оказати маеть. А потомъ будетъ ли о то позванъ до права; тогда вряду ему маеть допустити отприсегнутися, ижъ его на злочинствѣ при лицу въ дому своемъ забиль. Такъ тежъ естли бы се потрафило кому на дорозѣ злодѣя погонити, а онъ бы се поймати не далъ, а въ томъ при лица былъ забить; тогда тотъ, хто гонить въ дорозѣ за злодѣемъ, маеть мѣти при собѣ сусѣдовъ або стороннихъ людей, и съ тыми привезши трупъ передъ врядомъ маеть высвѣдчитисе, ижъ его при лица забиль. А будетъ ли о то ку праву позванъ; также маеть съ тыми людьми, съ кимъ за злодѣемъ гониль, на томъ присегнути, ижъ на злодѣйствѣ при лица, яко злодѣя своего, забиль, а раннего злодѣя зъ лицомъ маеть вести до вряду нашего, такъ яко вышей описано; бо злодѣя при лица пойманого никто не маеть и одного дня въ себе держати, але того жъ часу вести до вряду. А хтобы

злодѣя черезъ день и черезъ ночь въ себе въ дому держаль; тогда пришедши до вряду первой виненъ будетъ его навезати водлѣ стану. А ранний естли будетъ пойманъ, а до вряду черезъ ночь и черезъ день держанъ, и тамъ въ дому его умеръ; тогда будетъ повиненъ головщизны платити водлугъ стану. Тымъ же обычаемъ естли бы хто злодѣя поймавши и до вряду не ведучи, въ дому въ себе або на дорозѣ, еще правомъ не поканавши, мучиль; таковой также первой будетъ повиненъ его навезати, тожь потомъ въ право зъ нимъ вступовати.

АРТЫКУЛЬ 20.

Хто бы што вкраль на дворѣ нашомъ господарскомъ.

Тежъ хто бы на дворѣ нашомъ господарскомъ што вкраль, а то бы стояло меньшей полукопья, которая бы речъ не о шію шла, и правомъ бы на него переведено або лице вынято; таковому мають уши обрѣзати. А потомъ естли бы еще што вкраль, бы тежъ краденая речъ и десети грошей не стояла; тогда вжо горломъ маеть быти каранъ.

АРТЫКУЛЬ 21.

О жонахъ и о дѣтехъ, копорые уживали речей украденыхъ.

А естли бы въ дому лицо зостато, а дѣти и жона при томъ были и тыхъ краденыхъ речей уживали; тогда они повинни будутъ тую шкоду платити и сами головами выдаваны быти, нижли не у вѣчную неволю поколь се выробять, яко тымъ которіе бы закуплены были, а горломъ тотъ самъ злодѣй маеть быти каранъ, которій украль.

АРТЫКУЛЬ 22.

О лицу важномъ, што будетъ дано до двору нашего господарскаго.

Къ тому уставуемъ, естли бы лицо принесено было до вряду нашего господарскаго князьскаго панскаго и землянскаго, а было бы тое лицо речъ важная, шаты або серебро або кони добріе, а того бы злодѣя маетность не стояла, не знесла, чимъ бы мѣль зъ дому

своего сторонѣ жалобливой шкоду платити; тогда таковое лицо важное зъ двора нашего господарского также князского панского и землянского маеть дармо вернено быти тому, чіе будеть, а тотъ злодѣй на шибеницу маеть выданъ быти.

АРТЫКУЛЬ 23.

О слугахъ безъ приказу и о тыхъ, што безъ службы мешкають.

Уставуемъ, хто бы переховываль себе якихъ людей безъ службы або слугъ безъ приказу, отъ которыхъ се мели бы шкоды або забойства дѣяти въ сусѣдствѣ, або кому жъ кольвекъ, и подъ часомъ стала бы се шкода отъ таковыхъ або раны або головщизна; тогда тотъ, хто таковыхъ переховываетъ, за переведеньемъ правнымъ, хотя бы ему не были припоручонны, винень ихъ отыскивати и сторонѣ жалобливой ку праву ставити, а гдѣ бы не поставиль, маеть шкоду всю або раны заплатити, яко вышей о головщизнахъ есть описано.

АРТЫКУЛЬ 24.

О блудяги.

Княжата панове хоруговные о блудяги мають се заховати подлѣ давного обычая, нижли мають брати отъ клячи по шести грошей, а быдло мають давати даромъ. А шляхта, которые седять у повѣтхъ, блудные клячи и быдло мають водити и давати до дворовъ нашихъ, а черезъ три дни въ себе мають ховати. А хто бы черезъ три дни въ себе блудягу ховаль, а ку двору нашому не даль, а то будеть на него переведено, и лицо въ дому его вынято; тогда маеть въ томъ винень быти яко злодѣй. А хто злодѣя зженеть отъ коней; ино згонного маеть быти дано вряднику нашому шесть грошей, а тому хто зженеть другую шесть грошей.

АРТЫКУЛЬ 25.

О покраденїи збожья всякого иле на поли зложонымъ у стыртахъ.

Уставуемъ, кгда бы хто злодѣйскимъ обычаемъ чіе збожѣе або сено бралъ, а тотъ, чіе збожѣе або сено будетъ, беручи засталъ; тогда тотъ, хто застанеть, маеть поймавши вести съ тымъ лицомъ зъ возы и съ коньми до вряду гдѣ ближайей, а тотъ вряду будетъ повиненъ съ таковымъ справедливость чинити яко зъ иншими злодѣи приличными. А естли бы тые, што по жито або по сено пріѣхали, пойматисе не дали, а въ томъ кого съ тыхъ злочинцовъ забито або ранено; тогда предесе маеть объявити вряду и трупъ або ранныхъ оказати. А будетъ ли о то ку праву пріятягненъ; тогда того маеть отприсегнутисе, ижъ при збожью своемъ забилъ або ранилъ, таковой головщизны а ни ранъ платити не будетъ повиненъ. Пакли жъ бы тые злочынуы змоцнившисе того пана самого або слугъ и подданныхъ его при его збожью побили и поранили або и забили, а то бы на нихъ слушнымъ доводомъ было переведено; таковые будутъ повинни кгвалтъ платити дванадцать рублевъ грошей и раны слугамъ и подданнымъ оправити, якого стану будетъ, а естли бы шляхтича забито, тогда маеть горломъ каранъ быти водле покананья стороны жалобливое, кому вина будетъ дана, а кгвалтъ и шкоды зъ имѣнья и маетности ихъ платити. Также кого бы поймано крадучи сноповѣе скопъ, або сенные копы, або тежъ жито упрежмо рѣжучи подъ колось; таковой, зъ лицомъ кгда будетъ приведенъ, маеть у столпа пугами битъ быти, а шкоду зъ маетности его заплатити, естли што будетъ мѣти.

АРТЫКУЛЬ 26.

О покраденью ставу и сажовки.

Уставуемъ, коли бы злодѣйскимъ обычаемъ ловлены рыбы въ ставѣ або въ сажовцѣ; таковой, кгда будетъ пойманъ и приведенъ до вряду зъ лицомъ, маеть каранъ быти яко злодѣй, хотя бы лицо не стояло шацуючы десети грошей.

АРТЫКУЛЬ 27.

О небезпечность отъ огня,

Кгда бы се трафило подъ часомъ отъ огню погрунья въ мѣстѣ або гдѣ жъ кольвекъ, або хто на водѣ стонулъ, а въ томъ часѣ што ему згинуло, которая згуба у кого кольвекъ бы се въ рокъ або до року затаеная показала; тогда тую речъ, яко важна будетъ, маеть у четверо цѣною заплатити тому, въ кого то згинуло. А естли бы се тая речъ по року або въ колько лѣтехъ показала; тогда маеть цѣною заплатити. А бутеть ли хотѣти сторона жалобливая на него и по року фолдровати; тогда можетъ яко на злодѣя, што будетъ на воли его, хто маеть, фолдровати.

АРТЫКУЛЬ 28.

Хто бы кого обвинилъ, а передъ врьдъ привель, маеть того жъ часу описатися, на которій рокъ маеть доводити.

Тежъ коли бы кого обвинивши передъ врьдомъ и до везенья або за поруку давши и рокъ отъ врьду ку доводу принявши, самъ безъ слушное причины не сталь на томъ року, и слушныхъ причинъ нестанья своего презъ посланца за часу не ознаймилъ; тогды врьдъ по вьйстью оногo року обвиненoгo маеть вольнымъ чинити, а вольное мовенье у права съ тымъ, хто его обвинивши не доводилъ, заховати.

АРТЫКУЛЬ 29.

О челoвѣка отчизногo и челoвѣка хто его выкраль.

Уставуемъ, естли бы хто вывелъ або выкраль чіегo челoвѣка отчизногo або челядника невольного, а погонень былъ на дорозѣ и пойманъ съ тымъ челoвѣкомъ або съ челядью; тогды маеть съ тымъ лицемъ ведень быти до врьду нашoгo, гдѣ приближей будетъ, а врьдъ маеть ему справедливoсть учинити. А естли бы оный къ тому се не зналъ, абы тую челядь выкраль; тогды оный, хто его съ тою челядью поймаеть, маеть на него доводити або присегу учинити, ижъ онъ ее вывелъ, а онъ маеть быти каранъ яко злодѣй, а челядь оная маеть вернена быти, чія была. Пакли бы на дорозѣ погонити не могъ, а въ дому чіемъ зосталь и припоручилъ, а онъ бы тое челяди выдати не хотѣлъ; тогды маеть тотъ панъ, у чіегo челoвѣка гдѣ тую челядь зосталь, съ таковымъ справедливoсть учинити, и найдетъ ли се съ права, тотъ ижъ се выдати хотѣлъ; тогды отъ того часу колько черезъ прируку держаль, мають тую челедь навезати и навезавши ему челядь вернути, яко о томъ вышей описано.

АРТЫКУЛЬ 30.

Хто кого обвинить въ томъ выступѣ, которихъ кривавою виною або горломъ карають.

Хто кого обвинить въ томъ выступѣ, которыхъ кривавою виною або горломъ карають, а ижъ тотъ выступъ явный не будетъ; маеть быти данъ певный часъ ку отводу сторонѣ позваной, а вѣдъже такъ, естли врядъ обачить, ижъ ку слушному се одводу беретъ. А будетъ доводъ таковая особа, которая не звыкла людей помавати, а естли на оный часъ не доведе, которій доводъ отъ вряду ему будетъ назначонъ; маеть быти онъ отпушонъ, волно обвиненному, маеть заховати зъ нимъ право о обвиненье. А естли будетъ речъ mezi равными особами; тогда тотъ, хто кого обвинить, маеть се дати посадити зъ обвиненымъ и на него, што будетъ вести, доводити. А естли бы хто на кого не довелъ, то што на него ущипливаго мовить, а тотъ бы обвиненый была особа легка, злого захованья посполитый корчемникъ, грачь (sic) подозрѣнный, або передъ тымъ поволанный; противъ таковоу, хотя будетъ доведено, не маеть тотъ, хто его помовиль, жадное трудности, хотяжъ обвинено, терпѣти. Такжо тые особы, которые зъ великого а значного жалю, што на него менять, яко родичи о забитье дѣтей, сынове о забитье родичовъ, мужъ о жону, жона о мужа, опекунъ о сироту, и дѣдичъ о таковомъ, по комъ дѣдицтво взялъ, або великую шкоду, а значило бы се, ижъ не вымысломъ потвареного помовиль, але за оболживость зъ жалю и фрасунку; таковые тежъ не мають ничего тепѣти, хотя не доведеть, а то для того, бы ся ити жалъ по жалю не двоиль. Тымъ же обычаемъ и великій выступъ, который се або маестату особѣ господарской або речи посполитой ткнуть; того выступу хотя бы хто не довелъ, а мѣль бы слушную причину, для которое бы кого въ томъ выступѣ помовиль, таковой хотя не доведеть, не маеть ничего платити *.

[Формуляри]

Даровизна речей рухomyхъ отъ мужа жонѣ правомъ доживотнымъ.

Я Н. зезнавамъ тымъ моимъ листомъ добровольнымъ записомъ всимъ вовець, кому бы о томъ вѣдати належало, теперь и на потомъ завжды, ижъ я дознавши противъ себе хути и упріймость и милость и зычливость малжонки мое милое, урожное паней Н. хотечи ей то заемною милостью и зычливостью нагородить, зъ упріймой милости мои ку ней малженской, нынѣшнимъ записомъ моимъ записую доживотье на маетности моей дѣдичной, въ повѣтѣ Н. лежачый въ селѣ Н. и всѣхъ ее принадлежностяхъ, такимъ способомъ: ижъ она помененая малжонка моя милая тые вышъменованные добра, такъ яко се въ собѣ мають, зо всеми ихъ доходами и приналежностями, поддаными, ставами, млынами, корчмами и згола зо всимъ тымъ, яко самъ теперь уживамъ, обнявши, безъ вшелякое перешкоды и импедыменту близкихъ кровныхъ и повинныхъ моихъ, спокойнѣ ажъ до остатнего кресу живота моего держать уживать маеть. До того той же малжонцѣ моей милой по животѣ маоемъ даю даруе и тымъ листомъ добровольнымъ записомъ моимъ на вѣчность записую вси речи мои рухомые, то есть: золото, сребро, пенези готовые на имѣнье уданые и мнѣ якимъ кольвекъ правомъ служачое, перла, шаты, коберцы, кони вѣдные, возники, стада быдла рогатое и не рогатое малое и великое, цынь, мѣдь и увесь спрятъ домовый, што се тылько речью рухомою назвать и меновать може, все посполитостью завираючы, што теперь зъ ласки Божое маю, и што еще зъ нею мѣшкаючы прибавлю, прикуплю, и якимъ кольвекъ способомъ набуду, отдаляючи отъ того всихъ близкихъ кровныхъ и повинныхъ моихъ, вольно теды есть и буде помененая пани малжонка моя милая отъ даты того запису моего тое маетности вышей менованое въ спокойнымъ держанью, яко вышей, ажъ до остатнего кресу живота своего тримать. А по

смерти моей тые вси речи мои рухомые, отъ мала до велика, што се едно кольвекъ по животѣ моемъ зостане, черезъ мене ей нынѣшнимъ записомъ моимъ вѣчнѣ дарованое, взять, держать, и оныхъ ку потребѣ своей уживать и оборочать, кому хотечы отдать, даровать, продать, записать, и яко хотечы по воли своей шафовать. Въ чымъ помененой малжонцѣ моей милой по животѣ моемъ ни хто зъ братьи сестрѣ близкихъ кровныхъ и повинныхъ моихъ о тые речи рухомые, презъ мене ей по животѣ моемъ вѣчнѣ дарованые и записаные, жадное трудности правное задавать и оное импедіовати не мають подъ закладомъ.

Способъ запису замѣны добръ.

Ставши обличнѣ передъ судомъ шляхетный Н. дѣдичъ Н. зъ одное стороны, и шляхетный. Н. зъ другое стороны, здоровый на умыслѣ и на тѣлѣ и при добромъ розумѣ будучы, явнѣ и презъ вызнание свое признали, и жъ межи собою учинили добръ дѣдичныхъ вѣчною и неодзовною замѣну, давши собѣ зъ обо полные добра за добра, земли за земли. Такъ, и жъ преречоный Н. даль и заменилъ добра свои дѣдичные, то есть весь Н. зо всимъ тое вси дѣдичствомъ и зо всимъ правомъ панствомъ властностью и титуломъ дѣдичнымъ, Н. зъ Н. Который Н. за его добра дѣдичные, то есть весь Н. преречона, также тежъ зо всимъ дѣдичствомъ тые вси даль и заменилъ зо всимъ правомъ панствомъ и властностью и титуломъ дѣдичнымъ, такъ и жъ преречоный Н. преречоне добра Н. то есть весь Н. зъ своими потомкаии будетъ держалъ мѣлъ обычаемъ дѣдичнымъ, посядѣ такъ широко довго и въ кругъ, яко преречоные добра або дѣдицтво, преречоные вси Н. въ своихъ границахъ зъ стародавна есть роздѣлено и ограничено зо всимъ и каждому зособна, пожитки которіе зъ стародавна къ тому Н. дѣдичству приналежали и зо всеми, ничего не вымуючи, присеглостями. И также преречоный Н. преречоные добра свои, то есть весь Н. зо всеми тое вси Н. дѣдичствомъ, зо всимъ правомъ панствомъ и властностью и титуломъ дѣдичнымъ, зо всеми потомками своими, буде держалъ мѣлъ и въ дѣдизнѣ, осядѣ такъ широко довго и въ кругъ, яко речоные добра або дѣдичство вси Н. въ своихъ границахъ и межахъ зъ стародавна есть роздѣлено и розграничено, и также весполь зо всеми и каждому зособна пожитками и прилеглостями, которіе зъ стародавна ку маетности Н. приналежитъ, ничего не вымуючы. И южъ тые преречоные замѣну чынечые дали собѣ зобополнѣ въ преречоные добра такъ одмененые истотные и въ везанье и речоное держанье презъ возные земскіе, будучи повинни и обовязани сполнѣ собѣ и потомки свои взглядомъ преречонныхъ добръ такъ замененыхъ боронить, шчитити, и зобополнѣ се высвобожать, и въ спокойяхъ отъ всихъ правныхъ трудностей и першыхъ обовязковъ записовъ позвовъ занесеныхъ, и которые занесены бытъ мають зысковъ, презысковъ которихъ кольвекъ, и все замыкаючы отъ вшелякого пренагабанья правного, и отъ всихъ особъ стану обое плоти презъ давности земскіе, яко на кототорой особѣ давность належитъ, подъ шкодами земскими або закладомъ ста гривень пенезей монеты Польское. О которые шкоды або закладъ одинъ отъ другого взглядомъ преречоное обороны позваное и потомкве его позвани до суду земского Е. або замкового Н. на першомъ року яко завитымъ стать обличне, и занехавши всихъ вымовокъ зволокъ, съ которое кольвекъ причины, або тежъ квитовъ, которіе съ права звыкли быти давани и позволяны, и всихъ инныхъ правныхъ зволокъ, и также рушенья судьи отповѣдать, и отъ суду не отходечи декретови судовому быти послушонъ, то есть заступитъ, и о вси сужонные речи досытъ

учинить буде повинень, и потомкове его будутъ повинни тыле кротъ, иле кротъ имъ ништо потомкомъ будетъ потреба.

Мужъ жонѢ, жона мужови сполне доживотье учинить тымъ способомъ.

Ставши обличнѢ передъ судомъ шляхетный Н. одтуль ажъ дотуль, и также шляхетная Н. малжонкове, здоровы на умыслѢ и на тѢлѢ, уживши пріятельское рады, явнѢ и меновите вызнали, ижъ всихъ добръ своихъ дѢдичныхъ и заставныхъ рухомыхъ и нерухомыхъ, которіе теперъ маю и по тымъ мѢти буду, зобополнѢ и сполечнѢ позволили собѢ уживанье до часу живота своего такимъ обычаемъ. Ижъ если бы преречоному Н. первой, нижли преречоной Н. придалосе умерть; теды она Н. вси добра такъ рухомые яко нерухомые преречоного Н. будетъ тримать, и оные посядѢ зо всимъ правомъ панствомъ властностью, ничего не выймучы, и будетъ ихъ уживать ажъ до часу живота своего. А по смерти преречоной Н. добра преречоные такъ рухомые яко не рухомые цалѢ зуполнымъ правомъ на потомки преречоного Н. вернесе, безъ вшелякое переказы и спору потомковъ преречоное Н. И также гдѢ бы се преречоной Н. придало первой умерть нижли самому; и теды преречоный Н. добра вси такъ рухомые яко и нерухомые преречоной Н. будетъ держать, и посядѢ зо всимъ правомъ властностью зо всеми ку тымъ добромъ речами приналежными, и буде ихъ уживать до часу только живота своего. А по смерти преречоного Н. добра преречоные, которіе кольвекъ оной Н. приналежали, на потомки преречоное Н. цалѢ вернуть се, безъ вшелякое переказы и спору преречоного негды мужа потомковъ.

Запись отъ мужа жонѢ на суму.

Я Н. одступившы свое властное собѢ потомкомъ и добрамъ моимъ належное юрысдыщый, а подъ той листъ добровольный запись мой себе самого потомки и добра мои вси лежачые рухомые и сумы пенезей добровольнѢ поддавшы, зезнавамъ тымъ листомъ добровольнымъ записомъ моимъ, кому бы то вѢдать належало теперъ и на потомъ завжды, ижъ зосталомъ винень урожоной ей милости паней Н. малжонцѢ моей истотней сумы пенезей Н. на долгу позычноного, въ каждый золотой по 30 грошей Польскихъ личечи, которое сумы пенезей, абы такъ при животѢ яко и по животѢ моемъ, оная малжонка моя Н. певна только на всихъ добрахъ и маетностяхъ моихъ лежачыхъ рухомыхъ дѢдичныхъ и набытыхъ, сумахъ пенезейныхъ и на маетностяхъ, въ сумахъ обычаемъ зоставнымъ заведеныхъ, такъ тутъ Н. и гдѢ кольвекъ будучыхъ, теперъ презъ мене маючихъ, и на потомъ за ласкою Божею набытыхъ и приспособеныхъ, на всихъ огуломъ, жадныхъ не выймучы а ни зоставуючы, записую, и утверждаю, и заразы въ моцъ держанье и уживанье подаю и поступаю. Волно есть и будетъ помененая пани малжонка моя тыхъ добръ, которіе теперъ маю и на потомъ мѢти буду, отъ даты того листу моего, такъ при

животѢ посполу зо мною, яко и по животѢ моемъ зоставившысе, держать, и того всего яко властности свое ажъ до отданья тое сумы пенезей Н. зол. Поль. уживаю, (sic) кромъ жадное перешкоды одъ мене самого. А по смерти моей дѢти близкіе крвные и повинные мои, не отдавши помененой ей иилости пани малжонцѢ моей, албо тому кому бы то она зъ великое милости свое тую суму пенезей Н. зол. Польск. отдала албо даровала, и кому бы то отъ нее и по ней належало, въ тые добра по мнѢ зосталые уступовать. И никоторое переказы и трудности ей и держачему тыхъ добръ задавать не маю и мочи не буду, и о вшемъ отъ каждого такового, хтобы трудность якую задавалъ, все огуломъ замыкаючы одъ вшелякого пренагабанья правного, и отъ всихъ особъ я самъ а по мнѢ потомкове мои боронить и заступовать, не выймуочи, своимъ властнымъ коштомъ и накладомъ.

Отъ того жъ тойже на доживотье.

Я Н. зезнавамъ тымъ листомъ добровольнымъ записомъ моимъ, кому о томъ вѣдать належало теперь и на топомъ завжды, ижъ я не будучи до того ни от кого примушоный а ни намовленный, але самъ зъ доброе воли мое, а за радою ихъ милости п.п. пріятелей моихъ и зъ милости моей малженское доживотье на добрахъ моихъ лежачихъ и рухомыхъ, въ Н. на Н. и гдѢ кольвекъ будучихъ, и сумахъ пенезныхъ гдѢ кольвекъ и у кого кольвекъ будь на заставахъ, будь за записами, и якимъ кольвекъ способомъ презъ мене маючихъ и держачихъ, и речахъ всихъ рухомыхъ: золото, серебро, клейнотахъ, шатахъ, рыштункахъ, конехъ, стадо, быдло, цынь, мѣдь, збожью озимнымъ яримъ, такъ въ гумнахъ зложонимъ, яко и на полю засѣенымъ и всимъ, што бы едно речью рухомою названо и выражено быть могло, жадное и наменное рече не выймуочи, ей милости паней Н. малжонцѢ моей записую такимъ способомъ. Ижъ естли бы Панъ Богъ впередъ на мене смерть допустить рачиль; мае и вольна буде преречоная пани малжонка моя милая по смерти моей добръ моихъ лежачихъ и рухомыхъ, ойчистыхъ и материстыхъ, спадковыхъ теперь, и на потомъ по комъ кольвекъ на мене припадаючихъ, и набытыхъ, также сумъ пенезныхъ, гдѢ кольвекъ будь на заставахъ албо за записами мнѢ служачыхъ, и всихъ речей рухомыхъ, золота, серебра, клейнотовъ, шать, рыштунковъ, кони, стада быдла, цыну, мѣди, збожья озимного и ярего, такъ въ гумнахъ зложоного, яко и на поляхъ засѣяного, и всего што бы едно речью рухомою назвать и выразить се могло, жадное и наменнейшей рече не выймуочи, спокойнѢ держать и уживать и оными вольно шафовать ажъ до остатнего кресу живота своего, безъ жадное перешкоды въ спокойномъ держанью и уживанью того всего помененой пришлою малжонцѢ моей милою, и трудности правное задаванья отъ потомковъ моихъ. А по смерти ее, теды тое засъ иаетъ вернуть на потомки мои.

Запись на вечистую продажу

Я Н. дѣдичъ, я Н. зезнавамъ и ознаймуе листомъ добровольнымъ записомъ моимъ всимъ вобець и каждому зособна, кому то вѣдать належало теперъ и на потомъ завжды. Ижъ я маючи вольность, съ права посполитого и статуту земского, добрами и маетностями своими ведлугъ воли и уподобанья своего шафовать, ку доброму и пожитечному своему оборочать, теды маетность мою ойчистую фолварки село Н. въ воеводствѣ Н. повѣтѣ Н. лежачое, зъ дворомъ зъ людми зъ боярами поддаными осядлыми, подворишными огородниками и подсуѣдками, зъ ихъ повинностями работами подводами чыншами подачками пенезными медовыми и осыпными, зъ кгрунтами зъ землями тамошними пашными и не пашными, зъ полями зъ сеножатыми зъ пущами борами лѣсами дубровами гаями, запустами зарослами вшелякими, садами пасаками зъ бортями, зъ деревомъ бортнымъ и зо бчелами и безъ пчоль, зъ ловы звѣриными пташими и бобровыми гоны, зъ потоками рѣками рѣчками болотами, съ ставищами зъ ставами зъ млынами, рудами озерами сажалками, корчмами мытами гребельными и мостовыми, и вшелякими пожитками и приналежностями, такъ яко се тая маетность село Н. сама въ себѣ въ кгрунтахъ пожиткахъ при належностяхъ и обходехъ своихъ здавна мѣла и теперъ маеть и забираеть, ничего на себе малжонки потомки кривные и повинные мои не зоставуючы а ни выймуочы, такъ ижъ менованый не менованому а менованый менованому шкодити не маеть, все огуломъ яко мнѣ служило и належало зъ титуломъ вечистымъ предаломъ, и тымъ листомъ добровольнымъ записомъ моимъ записаломъ правомъ вечистымъ негда неотзовнымъ и назадъ неворочаючимсе урожоному его милости пану Н.Н. за певную готовую суму пенезей, то есть Н. золничбы и монеты Польское, хотечи въ кождый золотый по 30 грошей Польскихъ, которую суму заразы отъ его милости одобраломъ. И жонѣ и его милости тымъ же записомъ моимъ квитую и вольнымъ чиню вѣчнѣ, въ которой маетности Н. Н. позволями допускамъ заразы его милости паиу Н. потомкомъ его милости увезанья и увойстя въ вечыстую посесью презъ возного и шляхту, которихъ собѣ его милость способить. Также вси права листы и записы на тую маетность належачую его милости пану Н.Н. отдать маю, которіе на его милость и потомки его милости вливаю, а самъ се зъ нихъ зрекаю вѣчнѣ. За чимъ его милость панъ Н.Н. и потомство его милости волны тую маетность, помененое село Н. зо всимъ яко се вышей поменило, спокойнѣ держать уживать розмножать и розшырять, пожитковъ собѣ примножать и причинять, любо кому хотечи отдать, даровать, продать, записать, фримарчить, заставить и ведлугъ воли и налепшего уподобанья своего яко властностью своею шафовать. А я молжонка и потомкове мои, отъ даты того запису моего вечистое продажи, въ той маетности вышъпомененой въ кгрунты пожитки и приналежности въ намѣйшой ихъ хути уступовать, и жадное трудности перешкоды и пренагабанья правного и неправного въ спокойное посесии его милости самъ презъ себе, малжонку, потомки, кривные повинные близкіе и далекіе, слуги, подданные и направные особы чинить и задавать не маю и не буду моглъ. А по мнѣ потомки мои не будутъ о вшемъ отъ вшелякихъ и импедиментовъ правныхъ и неправныхъ зъ екое кольвекъ мѣри отъ кольвекъ заходячихъ, также отправъ записовъ першихъ и послѣднихъ ручныхъ и зезнанныхъ, отъ вѣнъ привѣнковъ, декретовъ ексекуций отъ каждое особы его милости пана Н.Н. и потомство его милости и кождого тую маетность отъ его милости держачого, у кождого права суду и уряду и на каждымъ мѣстцу своимъ коштомъ боронити и заступовати, и тые добра очищати и освобожати, и вольными отъ каждое особы отъ всихъ импедиментовъ и тежаровъ учинить (такъ яко бы его милость панъ Н. и потомки его милости въ той маетности въ спокойной посесии зоставалъ и жадное трудности и шкоды не поносилъ) маю и повинень буду, а по мнѣ потомкове мои мають и повинни будутъ тые кротъ, иле бы того потреба указывала. Што все и каждую речъ зособна маю и повинень буду зыстити и выконать, а по мнѣ потомкове мои подъ закладомъ Н.Н. зол. Пол. и подъ нагороженьемъ шкоды за тымъ поднятыхъ, кромъ вшелякого доводу и присеги голымъ словомъ презъ его милость пана Н. и потомки его милости ошачованныхъ. О который закладъ и о шкоды, взглядемъ каждое не досыть

учиненю ея приходячыи и припадаючіи, и до учиненя досыть тому записови моему добровольного вечистое продажи и кондыщый въ немъ выраженымъ, волно буде его милости пану НН. и потомковъ его милости мнѢ самого, а по мнѢ потомковъ моихъ, позвать до каждого права суду и уряду, хоть инѢ добромъ и потомкомъ моимъ неналежного, кгородского зеиского и трибуналского, въ которіе кольвекъ повѣты воеводстве, альбо до суду коптурового, которимъ се я съ потомками и добрами моими вшелякими, отступивши свое власное юрисдиции воеводства повѣту суду и уряду, добровольнѢ поддаю и форумъ тамъ собѢ, гдѢ тылько буде позванный, назначаю. ГдѢ за позвомъ першимъ, яко на завитымъ року, ставши противко тому листови добровольному записови моему и его кондыщиямъ и лиггаментомъ ничего не мовечи, пленипотентови пленипотенцій стороны поводовое, положеню позву, хотя бы невчесне было, ани позвами ничего не жадаючы, термену ничимъ не збіяючи и боронъ жадныхъ не вносячы а ни заживаючы до того мужа кладаючисе, послугою его Королевское Милости Речи Посполитое легкатами до посторонныхъ панствъ войною эксцептами сеймовымъ вальными сеймиками повѣтовыми, вторгненьемъ до короны непріятели креста светого и моровымъ повѣтремъ не вымовляючисе, деляцїи правдивое хоробы свое и умоцованыхъ своихъ большей справы на муиммерта на виктора не заживаючы, малыхъ лѣтъ потомковъ не щитечисе, иншими припадками не вымовляючисе отъ декрету суду и уряду оного, до которого буде позванный, не апеллюючы, апеляцїи презъ припозвы не попираючы, и освѣдчаня жадного на судъ и сторону не чынечы, и вшелякихъ згола и каждое зособна менованыхъ а неменованыхъ оборонъ и добродѣйствъ правныхъ съ права посполитого походячыхъ и зъ доветеу людского найденого не заживаючы, и на помочъ собѢ не беручы, закладъ и шкоды отъ суду и уряду оного до которого буде позванный не подходячый его милости пану НН. и потомкомъ его милости и каждому тые добра держачему и о тое правомъ чинячому, заплатитъ и его милости винковать и добра очищать и весь тежаръ справы, отъ кого колвекъ взглядомъ тое маетности и ея приналежности, его милости пану НН. або потомкомъ его милости и каждому отъ его милости держачему, жадное на себе взять и за разъ за ихъ милость респендовать маю и повинень буду, а по мнѢ потомкове мои будутъ повинни. ГдѢ бымъ тежъ будучи позванный о которую кольвекъ речъ въ томъ записѢ моемъ выражено до права не сталъ, або ставши въ томъ се не усправедливилъ и далъ бымъ на себе право перевести; теды тое все, што буде позванъ, на мене на потомкахъ моихъ и на добрахъ моихъ не порядкомъ статувымъ але разомъ всказано и присужоно быть маеть, а судъ або врьдъ вшелякихъ экзекуцїи на мене и добрахъ моихъ за речъ осужоную ведлугъ права уживати буде повинень. Которіе кгда бымъ самъ альбо презъ кого кольвекъ заборонилъ; теды судъ одослать мене маеть на дальшую якзекуцїю, то есть на баницю до суду головного трибуналю Любельского, на воеводство которое кольвекъ, Кіевское, Волынское и Браславское, и въ который кольвекъ повѣтъ Луцкїй, Влодимерскїй або Кременскїй, любо на консерваты тыхъ воеводствъ напервей припадаючихъ. За которимъ одосланьемъ процесу правного презъ злое отриманье и присегу на невѣдомость зносити не маемъ и не буду могль, и отъ суду ми тое позволено быти не маеть; але баниця за спротивнень се праву посполитому на мене презъ судъ головный трибунальскїй, хочъ безъ бытности стороны поводовое, всказана и опубликована быть маеть, по которой баниции мощная экзекуция и за тую суму закладъ шкоды и презыски всказанье на мене потомкахъ и добрахъ моихъ вшелякихъ лежачыхъ и рухомыхъ и сумахъ пенежныхъ, которые тымъ листомъ добровольнымъ записомъ моимъ онарую презъ судъ и урядъ належный одправа его милости пану НН. або потомству его милости або кому бы то право отъ его милости належало, тежъ мощно учинено быть маеть. При которой отправаѢ если бы се якіе шкоды кому кольвекъ стали, будь крови розленья або забойство, того такъ на сторонѢ яко и на врьдѢ правнымъ и ни якимъ способомъ доходить не маю и потомкове мои не будутъ, и о вшемъ зо всего квитовать, кгда бы того потреба была, маю а по мнѢ потомкове мои мають и будутъ повинни. А гдѢ бы тежъ за

противнымъ всказаньемъ судовымъ пришло его милости пану Н.Н. и потомкомъ его милости, албо держачему добра мои и каждому той запись мой маючому въ декрету апелевать; теды тая апеляция яко сторонѣ поводовой отъ каждого суду на воеводство Кіевское Волынское и Браславское, або на консерваты тыхъ воеводствъ наипервей пропадаючихъ, для прудшое справедливости допуцона быть маеть. Которому то листови записови моему добровольному вечистое продажи и всимъ его кондыщьямъ и ликгаментамъ досыть чинить маю и повинень буду съ потомками моими тыле кротъ.

Даровизна вѣчистая сумъ записаныхъ и речей рухомыхъ отъ мати дѣтемъ.

Я НН. одступивши свое власное належное юрыздыщии права и повѣту, а теперешнему записови моему добровольному и всимъ его кондыщьямъ съ добрами и потомками моими подаючисе, сознавамы и ознаймуе тымъ листомъ записомъ моимъ добровольнымъ вливковымъ кому о томъ вѣдать належы теперъ и на потомъ завжды. Ижъ я маючи часто молестоване отъ малжонка моего теперешнего его милости пана Н. а бымъ вси суммы добра и права мои, которыи кольвекъ мнѣ належать, на его милость влила, забѣгаючи я теды тому абымъ потомкомъ моимъ милымъ пану Н. сынови и паннѣ НН. цорцѣ вси суммы и добра мои вцалѣ оставила, суммы мои вси и вшелякіе гдѣ кольвекъ якимъ кольвекъ способомъ и правомъ ленѣ належачымъ, то есть перше сумму Н. которую маю записаную отъ зошлого урожоного его милости пана НН. малжонка моего, на дворѣ фальварву и селѣ Н. доживотье собѣ оставивши; другую суму которую маю НН. прыселку до Н. належачымъ; третее которій ми винень НН. Н которую ми винень на листы записы свои добровольные водлугъ права справеные, о чимъ шырей одъ остатнего запису помененые, въ собѣ обмовляе тые иншые вси сумы огуломъ добра лежачые милуючи дѣти мои, которыемъ мѣла о зешлымъ урожонымъ его милостью паномъ Н. даю дарую и на сына моего пана Н. вливамъ. Также томужъ сынови моему На. Н перше суму Н зол. Пол. а особливе другую суму Н. которую На. Н. отъ пана Н. за вливкомъ права належачого. зол. Поль. которую ми винень ННН. 4-хъ суму, которую мнѣ винень НН. тое сынови моему вѣчнѣ даю и на его вливаю, до того тежъ сынови моему пану НН. кони стадо быдло вшелякіе цынь мѣдь, и што кольвекъ речью рухомою нижей быть названо, даю дарую и не выймуочы, ани оставляючи записую вѣчнѣ. А цорцѣ моей, паннѣ НН, тую суму Н зол. Пол. которую маю отъ малжонка моего пана Н. даровано зъ маетности НН. учтливой, даю дарую и на цорцу мою вливаю мѣсто посагу такимъ еднакъ зспособомъ, же бы тыхъ Н. зол. отъ отца своего тестаментомъ ей записаныхъ у брата своего а сына моего, пана Н. не брала и оного первой урядовнѣ квитовала. А гдѣ бы се цорца моя панна НН. упоминала Н. зол. Пол. зъ отчизны отъ отца ей записаныхъ; теды тылько ей сумы Н. мнѣ записаное половину панъ НН. сынъ мой маеть дать сестрѣ своей, а цорцѣ моей, а половину тую другую Н. зол. при собѣ доставити, абы сполна Н. выносила сума посагу цорцѣ моей НН. особливѣ въ золотѣ, въ сребрѣ, въ штукахъ, въ клейнотахъ, шатахъ; то я сама повинна дать цорцѣ моей, оставивши собѣ однакъ того всего такъ сумъ яко и речей рухомыхъ доживотное уживанье. А естли бы, стережи Боже, сынъ мой панъ Н. безъ потомнѣ съ того свѣта зышоль, на паннѣ НН. цорцѣ моей вливамъ и ступе, сама се зъ нихъ вызуваючысе и вырекаючысе на особу ихъ цедую. Мають и волны будутъ помененые потомкове мои, и меновите сынъ мой, вышеречоное сумы всее и каждое зособна поднести, съ подвероныхъ кгвинтовать, и оными ведлугъ воли и уподобанья ихъ и пановъ опекуновъ

ихъ диспозовать, о чымъ отъ мене и отъ жадного зъ близкихъ кривныхъ повинныхъ и иншихъ потомковъ моихъ жадное препедицыи и пренагабанья мѣть не мають, и на томъ дала.

ПОПРАВЫ СТАТУТОВЫЯ

НА СОМѢ ВАРШАВСКОМЪ УХВАЛЕНАЯ И ПОСТАНОВЛЕНАЯ.

АРТЫКУЛЫ ПОПРАВЪ СТАТУТУ ЛИТОВСКОГО НА СЕЙМѢ. ВАЛНОМЪ ВЪ ВАРШАВѢ 1587.

Сей статутъ для лѣпшой вѣры и певности есть корикгованъ за статутомъ, который на первой за волею и вѣдомостью Господаря Краля его милости Жыкгимонта Августа, подъ печатію господарскою, на соймѣ Выленскомъ всимъ станомъ есть выданъ, при которомъ ухвала сейму Городенского двѣ привыля соймовъ Выленскихъ, третій привылей сейму Белзкого, коньституціи сейму Варшавского. И на артыкулы поправки сойму Берестейского. То все у семъ статутѣ есть описано и доконано выше реченного мѣсяца Августа 12 дня.

Стефанъ Божию милостию Король Польскій, Великій Князь Литовскій, Русскій, Проскій, Жомойдскій, Мазовецкій, Флянскій, княжа Семиградское.

Чинимъ знаменито всимъ посполито, коиу того вѣдати потреба, што будучы намъ на соймѣ Варшавскомъ, всихъ землянь короны Польской и Великого Княжства Литовскаго, объясненія артикуловъ нѣкоторыхъ въ статутѣ описаныхъ, и ново причиненного порядку справедливости, якъ то имъ правомъ посполитымъ и по присяжениямъ нашимъ есть позволено, и просили насъ, абы тоєю моцю того сейму зверхностью нашею господарскою было имъ утверженно, и до статуту Великого Княжства Литовского уписанно. На што мы Господарь позволивши, и рассказали въ коньституцыѣ змѣнъ о кождомъ таковыхъ артикуловъ учинити, и въ сесь привылей нашъ слово отъ слова велѣвшы уписати, и до всѣхъ воеводствъ земель и повѣтовъ, которые ся тымъ правомъ статутомъ Великого Княжства Литовского судити, съ канцлярие Великаго Княжства Литовского выдать есьмо казали, яко тыи артыкулы такъ въ собѣ мають.

Напрод што по отѣханю Кроля Генриха постановенны были судовъ кродскихъ роки в певнихъ воеводствахъ што объясняючи и приводячи къ годности съ порадою пановъ радъ и становъ сейму належачыхъ, такъ объясняючи уставуемъ, ижъ роки кродскіе мають быть сужоны, кождого мѣсяца 1 дня, а теперъ уже початися мають мѣсяца Мая 1 дня, и также порядокъ тымъ кождого мѣсяца отправлени и сужени быти мають, звывклимъ поступкомъ от поданя позвовъ за 4 недѣли. А естли бы ся трапило свято на тотъ 1 день, ино на завтрыя по святѣ сужоны быти мають. А хто бы для кроткости часы, же бы ему до позваня 4 недѣли до позвая сповна не достало, а на роки первые позвати бы не могъ; тому и на другіе роки позвати будетъ вольно, а звлаща о выбытя спокойного держеня. А ижъ тежъ розное уваженя на рокахъ кродскихъ поступку бывало, на нѣкоторыхъ врьдехъ первого дня позваного знають, а на иншого черезъ возного до права волають по 3 дни, яко о томъ

ясный статуь есть. А такъ теперъ то объясняемъ, ижъ вже отъ сего часу каждый врьдъ кгородскый за нестанямъ стороны позваной также и поводомоѢ маеть возному наказать волати дня 1 и 2, а третого дня если не станеть, ино конечное сказаня на такомъ отъ години нешпорное чинити маеть. Але хто позываетъ, тотъ 1 дня становытися маеть, абы за его поступкомъ воланя черезъ возного шло по всѢ 3 дни. А ведже где до того часу въ такихъ речахъ звычай былъ захованъ, если што 1 дня за пестанямъ на комъ сказано, або гды до 3 дня стороны ожидано, то ровно въ речахъ прошлыхъ вже осужоныхъ при моци зостати маеть. А хто бы ся коиу 1 дня отповѣдати у права и у справедливости листомъ своимъ описаль, то ведле опису першого дня не ждучи другого и третого сужоно и сказывано быти маеть. А если бы хто въ речахъ суду кгородскому належачихъ, до суду кгородского будучи позванъ, ку праву и не сталъ; на такомъ тотъ врьдъ кгородскый и замковый або дворный, за показанямъ skutечнымъ, и всего доводу выполненымъ, то о што жалобы были сказани, присудити и отъправу ведле статуту учинити маеть и повинень будетъ. Также и въ иныхъ справахъ, которые суду кгородскому въ статутѢ описаны, гдѢ ся не дотечеть выни кривавое за що горломъ карають; тымъ же порядкомъ мають быти оправованы не отсылаючи на выволане. А гдѢ иты будетъ о рѣчь кривавую, за которую ведле статуту горломъ карають; за нестанямъ на выволаня маеть быти отсылано, и далшый поступокъ чинити. А за позванямъ о такыя речи кривавыя облычне мают ся становыти, а не черезъ прокуратора, вынявши причины нестаня въ статутѢ описанныхъ.

О приданю возныхъ.

Еще тежъ розумѣячы собѢ люде, ижъ въ томъ великую трудность и проволоку въ правахъ своихъ ѣздити посылати до врьду по приданя возныхъ, гды жъ нѣкоторымъ великое омешканя справахъ ихъ дается, а звлаца и то потребуеть борзого оказаня вознымъ; а такъ вже отъ сего часу каждому будетъ вольно, и безъ приданя врьдового, возныхъ на вшелякіе справы свои брати и кривды свои обводити. Кгдытъ каждый маеть вѣдати, якъ и на що возного береть, если ку пожитку або ку шкодѢ своей. А вед же на оправѢ речей сужоныхъ на увязаня возныи безъ листу врьдового ѣздити немають, ижъ тежъ въ статутѢ отъправы Городецкого сейму есть отписано: же возныи листы наши господарскыи и вшелякіе въ потребахъ речей посполитыхъ разношовати въ повѣты мають; пре то и теперъ тому вже досыть чинити мають безъ вымовы, а на войну ѣхати неповинны будутъ.

О поправахъ артикула 27 в розд. 4.

Ижъ въ томъ артыкулѢ описано роки земскыи судиди, роки земскыи судити 2 недѣли а не большъ. Уставуемъ если бы роки земскыи не только 2 недѣли были сужоны, але будетъ ли того потреба и до 3 недѣль, поки всѢ справы судовыи оныхъ роковъ порядне ведлугъ рестру отсудити.

Поправа артикула 23 в розд. 4.

Кгды жь людїй укывжоныхъ велика проволока справедливости збиванямъ позовь ляда причынами дѣалось, пре то якъ на наизду Городецкомъ поставленно есть.

Уставуемъ ижъ позвы такъ гродскїе якъ и земскїи камысарскїи подкоморскїи и при позве жадымы причынами збиваны быть не могутъ, опрочъ где бы сторона року позваня не довела выписомъ съ книгъ, або сознанямъ возного ведлугъ артикулу девятого роздѣлу четвертого, тако жь где бы хто имени титулу преднейшого позваной стороны, рокъ мѣсяца, въ который то стало, не позвехъ не написалъ, а въ речахъ кривавыхъ, гды бы о горло або о поцтивость ишло, маеть мѣсце, на которомъ ся што стало, описати, а гды не опишетъ, таковой позовъ неповинна сторона отказовати. А въ речахъ меньшихъ, где бы не доложилъ сполна титулу тако же о речъ самую, о што позываетъ, и жалобы недостаточне выписаль, чога бы сторона зрозумѣти не хотѣла; тогда поводова сторона повинна тако жь предъ судомъ въ своей жалобе словы шырей позванному объясненя жалобу свою и на писмѣ тые слова съ подписомъ руки писарской дати, а сторона взявшы собѣ на розмышления на день одинъ, будетъ повинна на то отказовати, а то для того, абы позванный вѣдалъ, о што маеть усправедливитись. Также гдѣ бы позвы въ литерахъ, ижъ по сродку писаня, если бы въ чомъ колвекъ незгажались, яко того много бываетъ, ижъ слова которого не доложить албо поскробеть, а ку тому гдѣ бы очевистому позваню чотырохъ недель, (sic) статочному Іпестъ недель въ рокохъ земскыхъ отъ початя роковъ другого албо третего дня, ведже не далей, тогда сторона поводова за таковыми недостаткы позовь, заплатившы вину грошъ дванадцать, судовы шесть, а сторонѣ позваной шесть, а жалобы своей попирати можетя, а сторона повинна ему будетъ о таковой позовъ отказовати.

Нѣжли если бысь то трапило позвы поправованїе и скробанїе на имени и на речы самой, о што позываетъ, такоже и на дате. А ижъ бысь таа поправа скробанаа зъ другимъ позовомъ противнымъ незгожала, и явный бы поступокъ значыль; на таковой позовъ неповинна сторона отказовати. А ижъ бы хто хитростю яко для збитя позовь и проволокаючы и сому право самъ наболей позваннымъ позвы маючіе в рукахъ своихъ не скробаль и не поправоваль.

Уставуемъ, ижъ где бы таковой позовъ на позваного непоправованый былъ положонъ; тогда сторона поводоваа маеть вознымъ того довести, ижъ ему даль позовъ цѣлый а нескробаный от дати и во всемъ згодливый, а по такомъ доводѣ, позванный неповиненъ ему отповѣдати. А иншыми никоторыми причынами позвы не могутъ быти збиваны, толко заплатити за скробаня поводовой сторонѣ копу грошей, а судовы дванадцать грошей. А ведже гды бы о позвы одинъ артикулъ збитъ былъ причынами выше описаными; тогда предъ ся на другыи артыкулы правныи сторона повинна ему отповѣдати.

Артыкуль поправки Литовского статуту на соймѢ ВаршавскомѢ.

Ижъ роки земскіи ненужоны на многихъ мѣсцахъ отъ початку часу щасливого панованя нашего. Про то хто бы до книгъ земскихъ зъ гроду не перенѣсь якого записованя; таковой еще волность маеть мѣти до року отъ роковъ земскихъ, которыи припасти мають о Святой Троицы, въ року теперешнемъ седмьдесятъ осмомъ.

А ижъ тотъ артикуль ниже написанный, на соймѢ коронаціи Короля Гендрика потверженный конституціею соймовою не былъ уписанъ. Про то и теперь задержанямъ и жаданямъ всихъ становъ панства нашего казали есмо его до конституціи теперешнего сейму Варшавского уписати, который такъ ся въ собѢ маеть.

Гендрикъ, Божію милостию Кроль Польскій, Князь Литовскій. Ку тому тежъ и то обличаючы, ижъ въ статуте права посполитого великого панства нашего продолженя справедливости, и оногo панства немѣйшого дѣялося, же того не доложено. Если бы сторона поводава о што колвекъ справовалась съ кимъ, а онъ будучи бы у позвехъ, и вникаючы сконченя права, кому иному то имена люди або и кѣгрунты якимъ же обычаемъ пустиль; тогда для прудшой справедливости людской моцю теперешнего сейму за дозволенямъ всихъ пановъ радъ нашихъ и пословъ земскихъ Великаго Князьства Литовского, тотъ артикуль, през нихъ до насъ поданный, ухвалившы въ статутъ вписать и ку вживаню привести заказалисьмо тымъ способомъ.

Если бы хто съ кимъ право зачалъ вести о имѣня люди грунты о што колвекъ, а онъ будучи въ позвехъ и не скончившы права, кому иному тое имѣня або люды грунты, съ чого позывано будетъ, въ держаня якимъ же колвекъ правомъ пустиль, теды урядъ нашъ жалобнику на ономъ имѣню, на которомъ позвы класти почато, отъправу до конца чинити маеть ведлугъ статуту, а держачый ничимъ того заборонити не маеть, але въ томъ заводци своего смотрити маеть, хто ему певное имѣня завѣль. Пакли бы тотъ, хто имѣня держаль будетъ, упорне вряду противился, а отъправы чинить не допустиль и борониль увязеня; тогда таковой противникъ отъ вряда нашего позвы нашими передъ насъ Господаря на рокъ зась завытый позванъ быти маеть, если будемъ на онъ часъ въ панствѢ нашомъ за чотыри недѣли, а если въ корунѢ Польской, тогда за осмь недѣль, на который рокъ ничымъ не вымовляючись, самъ або през умоцованого своего жалобнику предъ нами Господаремъ усправедливитися повинень будетъ. А если бы на рокъ завытый предъ нами Господаремъ ку росправѢ не сталъ и въмоцованного не послалъ; тогда вже тую речъ, о што позвано будетъ, жалобной сторонѢ отъ насъ Господаря на впадъ присужоно и мощное увязованя з рамени господарского, за листомъ и посланцомъ нашимъ въ то, о што жалоба идетъ або будетъ, дано быти маеть, и заклады съ права положоны и на власномъ имену спротивного мають быти презъ того же посланца нашего отъправованы. А гдѢ бы еще и противъ зверхности нашей господарской посланцу нашему спротивился; тогда о што вжо мандатомъ нашимъ господарскимъ, яко о власную речъ нашу, маеть быть до суду нашего позванъ, а гды бы не сталъ, тогда таковую особу зъ земли панства нашего, якъ непослушного права и зъверхности нашей господарской, выволати повины будемъ, а сторонѢ жалобной, такъ яко выше описано, мощная отъправа учинена быти маеть.

А ижь есть описано въ артыкулѣ первомъ.

Хто бы на кого што вѣль несправедливе, а не довѣль, яко той артикуль ширей обмовляетъ, тымъ самъ каранъ быти маеть. Объясняючи тотъ артыкуль маеть имъ присужонъ о кождую вину, которая кривавую заплату беретъ, и о што бысь дотыкало горла и пощивости, то есть хто бы кого виниль и позываль, не одно около ображеня маестату нашего, але тежь и о квалтъ наизду домового о разбой о голову и о што колвекъ несетъ за собою вину пощивости караня кривавого, а где бысь то показало, же невинне и без даня причыны позваль; таковой, по декретѣ а увязаню судовомъ, где будетъ отъ стороны обжалованъ и припозванъ, маеть туюже вину односити, о которую оного позваль. А где бы за преводомъ права сторона пришла ку увязаню маетности за нестаня; тогды позванный маеть сторону позвати ку вправедливеню, а справившыся того, о што былъ обвыненъ, и доведши же невинне его ку шкодѣ приправыль, маеть быти приверненъ ку имену врьдовне, и если бы чого не доставало выйменю, таковой што будетъ изымѣня взяль, албо выгналь людей быдла иныхъ пожитковъ, тое будетъ повыненъ з навязкою ворочати, за припозванямъ отъ стороны и за доводомъ слушнымъ ведле права въчынненнымъ. А ведже где бы въ таковыхъ справахъ о пощывость приходило; того всего зъ соуду достатечне выслушавши и сторонамъ на пысмѣ давши, ку сказаню ексекуціе и до насъ Господаря на сейм валный отослати маеть. А ижь тежь есть статутъ же мы Господарь не маемъ нѣкого увязеня сажати не преконаного правомъ; пре то тежь каждый съ персоны шляхецкой народу шляхецкого сажати не можетъ, вынявши на горячомъ учинку такъ домового яко и бѣлой головы тежь забойства на шляхецтве пойманого. А хто бы вязню або за якою иною прычиною персону стану шляхецкого у вязене свое брати, а на врьдъ нашъ правомъ не переконанного, важиль; оборона кождого такая, а вязеня през дворянина кажемъ взяти и на рукоемство дати, абы былъ ку праву ставенъ передъ нами Господаремъ, и вольно будетъ доводити тому за позвомъ, хто обвыневаеть, такъ тежь и обвынелій своей кривди доводити предъ судомъ за позвомъ можетъ. А где бы ся то показало, ижь его невинне сажаль; таковой маеть совыто увязеню седѣти. А где бы з вязеня не выпустиль за посланямъ нашимъ; маеть быти позванъ мандатомъ предъ насъ Господаря, яко о квалтъ права посполитого, и о то, же звѣрхность, которая намъ тылко належить, надъ себе ровнымъ привлащаль, а за тымъ манѣдатомъ яко на року завытомъ иаеть ставити, кого увязеню маеть.

А где бы его въ томъ вязеню умориль; выненъ будетъ голову платити, а за выну нашу у вежи на днѣ седѣти безъ вшелякого милосердя и фолкгы, рокъ и 6 недѣль маеть седѣти. А сели бы кривный кривному то вчиниль, въ надѣю спадку, который бы на него приходиль; таковой вынѣ статутовой досыть вчинивши отъ маетности спадку по змерлой руцѣ намъ приходячого отпадати маеть. Вшакъ же вольно пану слугу судити и карати и всякий выступокъ, яко тутъ описано.

Поправа артыкулу 9, въ роздѣлѣ 12, о подданныхъ отчизныхъ и неволныкохъ, также и о слугахъ приказныхъ, которые отъ пановъ своихъ вѣбжають.

Уставуемъ, если бы который человекъ отчизный и непохожий albo челядникъ невольный, также и слуга приказаный, отъ пана своего утѣкшы за кого зашоль, а повѣдалъ бы ся вольнымъ, а оный панъ, чый человекъ albo слуга и челядникъ, просиль въ оного пана права, а тотъ панъ на такового права дати не хотѣль; тогда таковой маеть быти позванъ до земства на рокъ завитый. А если бы той панъ, чый человекъ, зыщеть правомъ, ижъ его отчить або челядникъ и слуга приказный, а оного пана, въ кого будетъ тотъ человекъ, переведеть правомъ, ижъ въ него просиль справедливости з вознымъ и зъ шляхтою, а онъ права не даль тогда тотъ панъ маеть оного человека або челядника его самого и жону и дѣти и всю маетность его з навязкою вернути, а слугу приказаного маеть выдати. А естли бы тежъ утѣкъ; маеть всѣ шкоды за него што отходячи отъ него оного пана своего починиль, тотъ панъ, который права на него дати не хотѣль, за такового слугу, на чомъ сторона доводъ учинить, платити. А если бы позванаа сторона ставшы у права тимъ вымовку чиниль, ижъ о таковомъ подданымъ челяднику и слузѣ вѣдаться не признавалъ и теперъ не знаетъ, и на тотъ часъ, кгда въ него права прошено, на йменя его не былъ, таковой незгола отъ того маеть быть воленъ, але присягою тою отвестись маеть, а предъ сяжъ будетъ виненъ позволить на имѣнью его своего искати и взяти яко власного своего зо всею маетностью его. А где бы присягути не хотѣль; тогда виненъ будетъ за всѣхъ такъ за самого такъ и за жону и за всѣ дѣти головщизну платити, а шкоды за доводомъ сторонѣ поведовой нагородити.

О поправахъ речей сужоныхъ, вмѣсто рушения повѣту, новый артикуль.

Къ тому ижъ оказали намъ панове рады и послове земскый Великого Князства Литовского, ижъ рушения посполитого котораа въ повѣтехъ непослушныхъ вряду въ справахъ сказанныхъ некоторого пожитку и skutку не приносятъ; тогда ухвалою того сейму оное рушения посполитое ку отправамъ речамъ сужонымъ на сторону отложившы, такъ уставуемъ. Ижъ отъ того часу рушения съ повѣту для отъправы речей сужоныхъ быти не маеть, але кгда вже всполокъ съ поступкомъ правнымъ съ порядкомъ того жъ артикулу сторонѣ поведовой на противника его выполнится, и если бы возному з уряду нашего кгородского и земского посланному на отправу спротивился, а увязованя не попустилъ; тогда вмѣсто рушения всего повѣту маеть врьдъ земскый, въ справахъ суду его належачыхъ, одинъ который з нихъ судя або подсудокъ, а въ справахъ кгородскихъ врьдъ кгородскій самъ староста, а въ небытности старосты подстарстый albo судя, взявшы и зъ собою возного и двоухъ шляхтычовъ до имени оного противного вряду нашему ихати до той части, въ которую подъ тымъ часомъ презыскъ правный сторонѣ поведовой дорогу покажетъ. Бо еще до замку або до двора чіего презыскъ чый не приступитъ, тамъ имъ издिति непотреба будетъ, толко през возного и двухъ шляхтычовъ до замку або двора нашего або чыего вѣдомость пану або врьднику дать знати, за што и в што увязоватись идуть, такъ же сторону поведовую, о тое о што право идетъ або было, тако жъ и за презыскъ сумы пенязей речей рухомыхъ сужоныхъ и увязати и удержати упустити маеть въ люди въ кгрунты его ведугъ статуту и поводу права стороны поведовой, положившы совытую заруку. А где бы люди кгрунты и пашня его дворнаа сумы пѣнязей въсказанное не вышло; тогда дворъ и всякое будованя и властности шацункомъ слушнымъ увязованя и отправа быть маеть.

А ведже зложившы ему первой рокъ на выймованя двора шесть недѣль, а закладъ права положоный маеть сторона укывжонаа до кгороду на рочки кгородскіи позвати, и за першымъ позвомъ судъ маеть всказаня чинити, а потомъ и отправу поступкомъ вышь мененымъ. А где бы хто кому вряду нашему земскому и гродскому увязеия не допустиль, будь то самъ тотъ, на которого презыскъ права идетъ, або хто колвекъ иншьй его заступуючы, и въ держаня имениа его подъ часомъ перевозеия права вшодши; такового противника праву и вряду нашего сторона поводоваа предъ насъ Гоподаря маньдатомъ позвати маеть.

А мы таковыя речы на дворѣ нашомъ, где на тотъ часъ будемъ, отправовати маемъ, выймуячы отъ того речы кривавыи, кому шло о честь и о горло, таковыя речы где бы притрафили, вряду маеть до насъ Господаря отослати, а мы за мандатомъ нигде инде одно на соймѣ судити маемъ; але выпшыхъ поточныхъ речахъ, гды таковой упорный предъ нами за мандатомъ ку справѣ станеть, маемъ с права зъ суду нашего за доводомъ слушнымъ на вязаня на дванадцать недѣль сказати, и ку выконаню того вязеня отослати до замку нашего оного же повѣту албо воеводства, а такъ урядъ нашъ въ томъ вязеню жадной фолгы такому чинити не маеть. А сторону жалобливу, которой што отъ вряду нашего присужоно, заховавшы при томъ судѣ, маеть дать увязеня мощное за листи презъ посланца з двора нашего воймена сказанное и въ суму пѣнязей присужоною. Тако жъ и в заруки отъ вряду положонии на йменяхъ або маетности рухомой того спрѣтивника росказати справити, которыхъ зарукъ на насъ Господаря половица, а сторонѣ укывжонной другая половица, а къ тому всѣ шкоды и наклады того жъ укывжонного жалобника, што по спротивленю и непоступеню увязаня приняль за доводомъ его въ тотъ же часъ по сказаню дано быть маеть, а посланецъ насъ увязчого по шесть грошей отъ копы наймену того жъ не маючы прислушенства собѣ отправити маеть. А где бы за прииханямъ вряду спротивился вряду або сторону обелжыль словы, за то двою дванадцать недѣль седѣти маеть; а пакли бы вряду або кого при немъ будучыхъ зелжыль и раныль, за то рокъ и пѣсть недѣль сидѣти на днѣ у вежы безъ жадной фолгы маеть. А если бы который зъ нихъ забиль; такового маемъ судити и безъ сойму мы Господарь съ панами радами нашими, который при насъ на тотъ часъ будутъ, за мандатомъ нашимъ, яко о ображеню майстату иашого господарского. А если бы по увязаню хто таковымъ отъ насъ Господаря присожонымъ албо презъ вряду гродскый и земскый учиненый за ся держаня стороны поводовой имениа отняль, не вчинившы заплаты; тогды поступкомъ правнымъ маеть его выбити, и до суду гродского припозвати на рокъ завытый, и гды слушне доведеть выбиеть презъ увязаваня зыменя албо зачевыстого мовеня або за нестанямъ позваной строны, тогды за отнятамъ въ совытость сумы першого презыску оныи упорный власти маеть. А таковое выбитя презъ увезеня врядувое маеться розумѣти, тако жъ яко бы очевисто врядувы нашему спротивился, на такового выступкомъ вышь мененымъ и сьрогостю права якъ отъ вряду нашего а потомъ и отъ насъ Господаря сказаня и отправки маеть ити совито. А если бы хто недбаючы на росказаня наше господарское за мандатомъ нашимъ стати а сторонѣ укывжонной усправедливитися не хотѣль; такового кожного, якъ непослушника и спротивника зверхности майстату нашего господарского, маемъ его сказати зо всихъ панствъ нашихъ выволати, а сторонѣ укывжонной предъ ся наймену и маетности его оправу неотволочную учинити будемъ повинны. А ведже где бы воланыи утѣкъ ся до насъ, мѣнующы быть укывжонъ переводомъ права отъ стороны албо отъ вряду; такому поднесеня до права маеть быти съ канцлярей нашей дати до суду нашего господарского не на долгый часъ, одно на дванадцать недѣль; а такому року милитацей перекажати не маеть, але якъ позоветъ, урядъ маеть справедливость учинити и слушне права и статуту Великого Князьства Литовского поступкомъ. А гды бысь з вылзку нашего господарского показало, ижъ вряду подле права и сказати казалъ; такъ за страву и шкodu

сто копъ грошей заплатити. А до того они жъ доводовъ выслухавшы, врядъ за нестанямъ стороны на рокъ маеть сказаня чинить, абы за облудливостю и за недостаткомъ доводовъ одинъ другого отъ маетности и ку шкодѣ не приправлялъ, и ку оболженю на выволаня не приводилъ. А поводъ и отпоръ гды станеть, апеляцей сторонамъ не маеть боронити, опрочъ того, хто бы на якомъ злочинствѣ на горячомъ учынку былъ пойманъ, о выбитя шляхтича з упокойного держаня зыменя его, але заразомъ такового за доводомъ слушнымъ въ держаня судъ упустити маеть. А ведже сторона если бы собѣ до того имѣня албо грунту якого права розумѣла быти волное, и о то будетъ позване до суду земского, и того правомъ доходити, а тымъ стутутомъ нынѣшнимъ, не толко пришлыи але и пройшлыи речы, гдѣ скупку справа котораа осужонаа будучы не дошла, мають зъ урядомъ нашимъ поступовати и заховатись. А ижъ найдутся таковыя люди, которые выволанцовъ въ домѣхъ своихъ переховывають и зъ ними обцованя мѣвають, а надъ то до таковыхъ своволенствъ помогають; тогды хто бысь таковой вынашоль и будучи позванъ до права и суду нашего господарского гродского судовы не былъ переконанъ нынѣшнимъ правомъ и статутомъ, одно тыиже артикуломъ, якосъ вышъ поменило, маеть быти сужонъ и сказованъ. А то съ тыхъ причинъ таковую срогость на таковыхъ помощниковъ выкладаемъ; абы оныхъ таковыхъ своволныхъ речей никому не помагалъ и не смѣлъ помогати.

Шкрутениумъ.

Забѣгаючи тоже великой несправедливости людей злыхъ превратныхъ, абы нѣхто несмѣлъ речей зъмышленныхъ славѣ и почтивости дотѣкливыхъ на людей невинныхъ въкладати и въ книги вписати.

Уставуемъ, хтобы кого позвалъ до права о речъ кривавую, што бысь дотыкало горла и почтивости и доброй справы людской, а сторона обжалованная, выдѣчы собѣ въ томъ кривду и невинность свою, холтѣлъ бысь того отвести; таковымъ кождымъ, хто бы былъ обвинень, ставши до права на шкрутениумъ, то есть на испытваня и на невыдане речи правдивое, взяти сбѣ можетъ. И судъ кгородскій допустивши того маеть двѣ особѣ зъ врьдниковъ земскихъ присяглыхъ имъ позволившы на таковое опытане вывести, а если бы врьдниковъ земскихъ до таковой справы мети не могли, тогды врядъ самъ, кого бы розумѣлъ людей побожныхъ и ростропныхъ, таковымъ то злѣцити черезъ листъ свой маеть, положивши сторонамъ, рокъ певный, на который тые депутаты на мѣсцѣ оное, гдѣ ся то стало, зѣхати до обу двухъ сторонъ будутъ повинни, маючи при собѣ возного и шляхтичовъ кылка. А тымъ зѣхавши вивѣдане пыльное учинити въ наиблыжшихъ сусѣдновъ у шляхтичовъ у пановъ самыхъ и врьдниковъ ихъ у слугъ у поданыхъ, и въ кого же колвекъ инога хотя и въ преѣжджжаго человѣка, которому бысь притрафило на онъ часъ, кгдыся то стало, быти, толко бы у людѣй вѣрныхъ годныхъ, не выймуючи съ того жадной особы такъ духовного якого и свѣцкога стану человѣка, которые повинни будутъ маючи предъ очима своима боязнь божую и сомнѣня доброе прирекши и шлюбывши словомъ своимъ добрымъ и подъ сумнѣнямъ узнавати то, чего будутъ въ оной речи правдиве вѣдоми. А што на онъ часъ тые свѣдки з обудвухъ сторонъ свѣдоме, такъ съ поводовое яко и з обжалованное стороны, свѣдчити и зознавати будутъ, а при томъ

опытоване стороны быти мають; и то все тые депутаты, которые на таковое опытоване выйдуть, мають достаточне списати, докладаючи всего, яко часъ и мѣсцѣ и вси подобенства, а потомъ обоимъ сторонамъ на писмѣхъ подъ печатми своими и съ подписомъ рукъ своихъ на листѣхъ затворенномъ, абы стороны не вѣдали, што написано будетъ, дати мають, съ которыми съвѣдѣствомъ обое стороны на прѣшїе роки кгородскїе припозвавшия предъ врядомъ становитися мають, также судъ маеть узнати чый выводъ и свѣдѣство будетъ слушнѣйшее. А гдѣ бы ся то въ судѣ показало, сторона поводовая кого невинне кроиѣ значнѣ слушное причины въ таковой речи доброй славѣ доткльве обжаловала и въ книги вписати дала; таковой каждый за такую потварь маеть быти сказанъ на вязене у вежи на пол року, и къ тому сторонѣ за всѣ шкоды и наклады безъ доводу сто копъ грошей заплатити будетъ повиненъ заразомъ. А сели бы сторона апеловала; тогды судъ кгородскїй, списавши по достатку всю тую справу, на вырокъ до насъ Господаря на сеймъ одослати маеть. Опрочъ таковыхъ особъ, хтобы на явномъ учинку то есть на разбои на квалѣхъ невестъ также и на мужебойствѣхъ а на злодѣйствѣхъ былъ пойманъ; такового врядь и до насъ не отсылаючи ведлугъ заслуги кождо карати маеть. А кгда вже врядь до насъ таковую справу, яко ся вышей помѣнило, на сеймъ за аппеляціею отошлетъ; мы съ паны радами обоего народу то судити маемъ. А по сказаню нашомъ кгда обжалованый воленъ будетъ; тогды таковую жъ жалобу и оповѣданіе, што будетъ поводовая сторона на обжалованя до вряду принесла и въ книги вписати казала, маеть сказати съ книгъ вынести и скасовати, такъ яко бы наменшїй знакъ иноти (sic) оной справы въ книгахъ не зостала. А ижъ бы всѣмъ ку вѣдомости приходило, про то абы на врядехъ нашихъ такъ кгородскихъ яко и земскихъ, при собраню шляхты тыи артикулы читано и въ статутъ вписаны, и тымъ порядкомъ абы сужоно и отправовано было, про то и мощную того сейму тое жъ даня утзвердивши далисьмо сесъ листъ подъ печатью нашею и съ подписомъ руки нашей. Писанъ у Варшавѣ на сеймѣ валномъ корунномъ, дня 3-го, мѣсяца Марца року 1578, кролеванья нашего второго.

КОНСТИТУЦИИ СЕЙМУ ВАРШАВСКОГО РОКУ 1570 ОСМОГО.

Стефанъ Божїю милостию Король Польскїй, великїй Князь Литовскїй, Прусскїй и Рускїй, Жеиондскїй, Кїевскїй, Волынскїй, Флянскїй и Семигородскїй и иныхъ сторонъ Дедичъ.

Ознаймуемъ всѣмъ вобецъ и кождому зособна, кому бы то вѣдать пореба, иже мы ведлугъ повинности нашей королевской, опатруючи потребы короны Полской той, надъ которую насъ Богъ приложити рачиль, а о томъ мышлячы абы въ ней такъ домовый врядь якъ обеспеченство отъ неприятелиа было, иже бысми дома добрый порядокъ постановившы спадней неприятелиевы отпоръ дати могли и кривдъ явныхъ, которыи терпятъ речь посполитая сполнаа народу Полского и Литовского, за посегнянемъ и оторваня замковъ и земель презъ неприятелиа, поветовать, зложили есмо сеймъ валный всѣмъ станомъ тутъ до Варшавы, на которомъ за радю пановъ радъ нашихъ обоего народу и зезволенямъ пословъ земскихъ, напрудъ ведлугъ конституции давной предъ постановленямъ нашимъ учиненой и рекцесовъ сеймовъ прошлыхъ около справедливости, на которой рядъ весь домовый належить, и которой вси добрыи обычаи въ каждой речи посполитой походятъ, постановленя нижей описанїи учинили.

АРТЫКУЛЬ 1.

Порядокъ до обирая судей.

Въ каждомъ воеводствѣ и земли, на которомъ мѣсту гдѣ ведлугъ старого звычаю обирають особъ судовыхъ, назначаючи мощно нынѣшнего сойму день и часъ той: впершый понедѣлокъ по нароженю панны Маріи въ томъ нынѣшнемъ року, а потомъ на каждый рокъ того же часу, до обирая судей судовъ валныхъ постановленныхъ трибуналу коронного, а Познанскому и Калискому, а Радіеве Плотскому воеводству, въ среду Сендомырскому и Раценжу, Мазовецкому въ Варшавѣ, Равскому въ Болемове, Львовской, Премыской, Синоцкой, землямъ въ Вышни, а Холмской въ Холмѣ и въ Галичу судіи обирати мають, ведже Холмская въ Холму напродь, а потомъ Галицка въ Галичу обходитись тымъ порядкомъ мають, воеводство Подляское въ Дорогичинѣ, а въ земли въ Добринской въ Липнѣ въ понедѣлокъ предъ святымъ Балтromeомъ, часъ до того жъ назначаемъ и въ иныхъ воеводствахъ и зеиляхъ, гдѣ судіи земскыи обирають, а до тыхъ судовъ валныхъ судіи обирани быти мають.

АРТЫКУЛЬ 2.

О выбираню судей.

На которыхъ сеймыкохъ вышей менованныхъ каждое воеводство обирати сполне мають и будутъ повинни межи собою особу одну годную богобойную цнотливую, права и звычаевъ судовхъ оного краю умѣтного и осѣлого: а з воеводствъ большихъ, то есть Познанского, Семыкгородского, Сендомырского, Калиского, Плотского по дву, з Рускаго также двухъ, съ которыхъ одинъ въ Вышни, а другой такойъ разъ въ Холмѣ а въ Галичу, яко вышей описано, изъ Мазовецкого тры, только тотъ разъ одинъ, а потомъ по два; з Равского дву, съ Подляшского дву, а з землѣ Волынской Добринской по одному, Зовцынскоѣ, и Заторскоѣ также одного, до тыхъ же судовъ постановеныхъ коронныхъ обирати мають. А тыхъ судей обыране маеть быти, кого кольвекъ годного быти найдуть. А кгда би который таковой былъ обранъ съ тыхъ, которыи на иныхъ судехъ сидять, а естли бы ся притрафило справа зъ рушеня або апеліяца отъ которого з нихъ, тогда тотъ на той часъ на судѣ въ той справѣ вотовати маеть и выйти, кгда иные вотовати будутъ, повинень будетъ. Также обраніи судіи до другихъ толко судовъ тривати мають, а иныи на иныхъ иесцахъ до того часу и суду або трибуналу валного обранти быти мають часу и дня обыраня тыхъ судей вышей означоныхъ. А жадень з алектвъ повторе на судѣ не маеть быти обыранъ до лѣтъ чотырохъ, опроче того где бы ся въ которомъ воеводстве на того же вси згодили, а жадень абы тому не былъ протывній, а иже бы ся того подняль, упросили.

Тыжь если бы тежь въ котормъ воеводстве для которой справы причини яко колвекъ алекція не дошла, або смерть або хороба которого електа закročила, зыншихъ воеводствъ обрани судіи и справы оного же воеводства отпраовати будутъ, неоглядаючися на небытность судей тыхъ, если бы съ которихъ воеводствъ обрани не были.

АРТЫКУЛЬ 3.

Присяга судій.

Тамже предъречоніи судѢ въ воеводствахъ и въ земляхъ обрании, зѢхавшыся на часъ и мѢсце судовъ назначоное, мають при судѢ земли оное и при вряде судовомъ и старостиномъ ротою судіи земского въ статутѢ описанною присягнути, того доложивши, ижъ практикованя жаднихъ причинъ зъ нѢ с кимъ чинити не мають, а ни престрокги а нѢ ради давати, а нѢ подарковъ давати, и тежь бы ся о то не стараль, абы на тыи былъ суды обранъ.

АРТЫКУЛЬ 4.

Яко судити мають.

Судити мають справедливе з рейстру по воеводствомъ, яко вотують, не отстреляючися отъ права посполитого, яко которая земля уживаетъ, Бога и справедливость его святую предъ очима маючи. А судіи декретъ съ письма ѳеровати будутъ, на котормъ два албо три судѢ подписатись мають. А где бысь трафила розность або ровность вотъ, мають заразомъ двай и три знову презъ вотованя пустити, и при той сторонѢ замкненья зоставити маеть, котораа за собою доводовъ правныхъ большей будетъ мѢла, а потомъ болшаа сторона замыкати маеть. А ижъ вси справы пановъ духовныхъ, которыи кольвекъ въ земствѢ в кгроде въ урядѢ подъкоморскомъ ведлугъ права писаного сужоны быть мають, и будутъ з рушеня або апеляціи якимъ колвекъ инымъ обычаемъ припали, або припадати будутъ, предъ тымъ же трибуналомъ подле права посполитого отпраованы быть мають. Про то до тыхъ самыхъ отпраованя панове духовныи шесть духовныхъ судей с посродку обрати мають, которыи присягою обязаніемъ тымъ же при томъ трибуналѢ въ тую же роту на евангелію быть мають, съ которымъ до тыхъ же толко справъ духовныхъ шести свѢцкихъ, тежь онихъ же судей с посродку высажонныхъ присяжныи быти и тыи справы судити мають; а тымъ подае права судячи колко разовъ презъ вотованя пущаючы, яко найпервей замкненьямъ учинити большую часть съ тыхъ дванадцати мають. А где бы была розность вотовъ; тогды маеть быти отослана на сеймъ для декрету, котораа згодность або ровность депутатовъ тыхъ, где бысь до другого сейму на поправу з года не дошла, тогды тотъ способъ трибуналу маеть зостати, докулся што лѢпшого черезъ вси станы не найдетъ.

Десятины по именяхъ шляхецкихъ, тымъ же спобомъ, яко и теперь суть, нѣчого не взрушаючы до угоды, котораа маеть быть на соймѣ, откладамы, а вже таковой декретъ, або декрета того трибуналу, таковыя важности быти мають яко и соймовыи. А если бы хто хотѣль притивитись декретовы такъ и справу особѣ ожаловати на соймѣ, або за переводомъ предъ насъ Господаря принесь; тогды таковой каранъ быть маеть яко неслушный взрушитель декрету. А ижъ панове духовныи скаржатъ же за ихъ освѣдченямъ судомъ остатнего стопня права, а не подле права противъ имъ и именяхъ презыски превожоно; тогды старостове отъ ексекуцій и таковыхъ презысковъ суперседовати мають до узнаня нашего презысковъ на соймѣ.

АРТЫКУЛЬ 5.

Што судити мають и якъ.

Судити мають справы вси и каждый зособна отъ судовъ земскихъ въ справахъ до роздѣленя добръ вейцовыхъ през рушеня апеляціи отосланя лимитаціи и иншымъ якимъ колвекъ обычаемъ, и вси иншыи, которыи колвекъ на соймѣ албо за дворомъ нашымъ королевскимъ такъ и урядовъ яко зъ урядовъ зъ стороны учиненя ексекуціи и декрету, або декрету суду валного трибуналу коронного, того остатнего стопня правного въ тыхъ речахъ, которыи судовы того трибуналу судити належитъ и сужоны бы были, и иного обтяженя зъ судовъ або з урядовъ старостахъ и врядниковъ ихъ, причиненя справедливости учиненыхъ тыхъ всихъ правъ, которыи будутъ на судехъ, остатнего стопня права будетъ в земтсвѣ або въ кгородѣ пересужоныи и до места старостего для чыненя ексекуціи отосланя, где бы подлугъ тихже ремесу або отосланя безъ вшелякихъ отволокъ ексекованы не были, такожь справы которыи отъ которыхъ колвекъ трибуналовъ остатнего стопня права прошлыхъ воеводствахъ уфаленныхъ припадали, и иншыи вси справы которыи колвекъ такъ зъ давныхъ якъ и новыхъ позвовъ припадати будутъ. А тамъ вже предъ тымъ судомъ вси стороны въ своихъ справахъ судовыхъ роковъ, и роки будутъ мѣли водле ихъ апеляцій и рушеня позвовъ припозвовъ, такъ завытыхъ яко и не завытыхъ з отосланя лимитацій, и иншихъ вшелякихъ стопнехъ правныхъ, яко тутъ на соймѣ або за дворомъ, также и на судехъ отъ остатнего стопня права которыхъ колвекъ воеводствахъ мѣти мѣли, жадныхъ не выймуючы, водле ихъ позвовъ припозвовъ контроверсій декретовъ апеляцій и иншихъ понктовъ правныхъ, жадного не выймуючы, и всихъ тыхъ акцей справы жадной сторонѣ справедливости не убближаючи а ни уймуючи.

Артикуліе поправки статutowыя на соймѣ Берестейскомъ, року 66.

Артикулы поправки статutowыи, которыи з волею Божею и вѣдомостью Господаря королевской его милости, Великого Князя Жикгимонта Августа, съ потребъ правъ

земскихъ панства королевской его милости Великого панства Литовского, за зволенямъ пановъ радъ нашихъ ихъ милости того панства духовныхъ и свѣцкихъ, также князей пановъ врядниковъ его королевской милости, пановъ пословъ земскихъ и всихъ становъ сойму, на соймѣ великомъ валномъ Берестейскомъ поправлены, которыи ихъ милости панове рада и вси стани на соймѣ Берестейскомъ поправившы презъ старосту Жомоидского маршалка земского Великого Князьства Литовского державцы Плотенского и Тельшевского пана Яна Ходкевича ку его королевской милости листи до Люблина прислать были рачили, где господарь его милость тыхъ артикуловъ оглядавши и ихъ ухваливши, моцу сейму Берестейского до статуту правъ новыхъ вписати росказати рачиль, уможняючи то, ижъ хотяй бы и въ статуте што тымъ артикуломъ ниже описаннымъ было противного, тогды вже тыи артикулы презъ въ статутѣ описаныхъ справахъ такихъ никоторыи моци въ жадного права мѣти и держаны быти не мають, але тими артикулами ниже описанными зо всѣми станы Великого Князьства Литовскаго и всей земли того панства належачими радити и справоватся мають.

АРТЫКУЛЬ 9.

Въ роздѣле 3: около неданя чужоземцомъ достоинствъ врядовъ и осѣлостей.

Тежъ таки мы Господарь обещуемъ и шлюбуюемъ подъ присягою нашею, которую чинилисмо Великого Князьства Литовскаго всѣмъ станомъ обывателемъ его, што жъ въ томъ панствѣ Великомъ Князьстве Литовскомъ и всѣхъ ему прислухаючыхъ достоинствъ духовныхъ и свѣцкихъ, городовъ и дворовъ волостей и кгрунтовъ, староствъ, держаней, врядовъ земскихъ и дворныхъ и поживаня вѣчности и жаднымъ обычаемъ людемъ а ни заграничникомъ того панства давати не маемъ, але и всѣми потомки нашими Великими Князьми Литовскими маемъ и повинны будемъ давати толко Литвѣ, Руси и Жемуиды, родычомъ старожитнымъ Великого Князьства Литовского. А еднакъ же если бы хто съ чужоземцовъ або заграничниковъ заслужився намъ Господарю въ той речы посполитой Великого Князьства Литовского поточныи и славныи послуги чинили и оказали; таковымъ людемъ якого они будутъ народу мы и потомки наши Великіе Князи Литовскіе на сеймехъ валныхъ съ тутошныхъ мѣсть Литовскихъ за радою и позволенемъ всѣхъ радъ нашихъ пановъ, и тѣ жъ за позволеніемъ всѣхъ становъ земскихъ сойму Литовскому валному належачыхъ, осѣлостей вѣчныхъ и дочастныхъ ведлугъ годности и заслуги давати будемъ. А однакъ же тыи сами и потомство ихъ будучи обывателми препущенными сего панства Великого Князьства Литовского службу земскую тому жъ панству до жадныхъ достоинствъ и врядовъ духовныхъ и свѣцкихъ не мають приходити, а ни отх насъ Господаря припускати або становити, толко зьдавна съ продковъ своихъ уроженцы Великого Князьства, Литва, Русь и Жомоидъ яко выше доложено есть. И если бы одержалъ иншого албо обчого народу человекъ албо потомокъ который колвекъ уряды духовныи и свѣцкіе противко сему статуту, а напомѣненный того пустити не хотѣль; тогды таковой не одно достоинство и урядъ але и имена и маетность свою всю тратить на насъ Господаря Великого Князя Литовского*.

Артикулы справъ судовыхъ зъ статуту Польского презъ пановъ коронныхъ ухвалены и постановлены.

Вынявши справы судовъ Польскихъ належныхъ, которыи ся ткнуть пощтивости, а которыи судовы нашему на соймѣ належати будутъ, и где бы хто зъ справы простой справу, которая ся ткнетъ пощтивости, чиниль, на судъ за дворомъ кого позваль або вызваль; тогда гды будетъ узнана презъ насъ на соймѣ быти справа простая, и маеть таковой вызивачъ вину сижена у вежы и сто гривень попасти и шкоды ведле конституціе, а справа маеть быти отослана до права належачого. А еднакъ же въ артикулахъ, которыи ся тикають пощтивости, на судахъ и рокахъ гродскихъ спеляціа маеть быти до судовъ валныхъ остатнего стопня права трибунальского, вынявши тежъ справы скарбовии ведле конституціи роковъ 1562 и 1566 учиненіи, и выкупна добръ кролевскихъ, которыи судовы нашему зоставуеми. А если бы хто старосту або державцу позваль о кгрунты нашѣ, которыхъ державца або староста четвертую часть даетъ, або подъ ревизею и мостраню (sic) подпали або подпадали, тако жъ которыи въ старыхъ сумахъ есть записаны; о таковыи добра маеть судъ отослати на соймъ, для узнаня нашего, а намъ самымъ о добра нашѣ ведле статуту чинити и доходити волно завжды будетъ. Тако же о невыданя четвертой части и о добра безъ права взятіи на соймѣ маемъ, вынявши теже справы права Майдеборского, Немецкого и Хелмского, которыи за остроженя речы въ статуте описаныхъ судовы нашему належати будутъ зъ строны презысковъ на тотъ часъ одержаныхъ, противъ мѣстамъ, такъ тежъ мещане противъ шляхты, то ся заховати маеть до узнаня нашего, яко около презысковъ духовныхъ есть описано.

АРТЫКУЛЬ 6.

Выведованя.

Вывѣдованя справъ, которыи ся ткнуть пощтивости, мають быть за припозванямъ строны презъ сторону на земскихъ або на гродьскихъ рокахъ судовъ того повѣту, гдѣ бы таковой учинокъ пополненъ былъ, што первой будетъ по обведеню того пополисного учинку выправована, а то для того куды сторона сторону позоветъ на соймъ, абы тамъ вже обидвѣ сторонѣ были зъ вывѣданямъ готовымъ до рихлого отправованя справъ. А ижъ бысь справы тыкаючи пощтивости на сеймѣ завжды отсудити и отправовати могли; тогда отъ початку сейму, который на назначоный день листы своими припозиціею зачинатися маеть завжды и по припозиціи и отправованю при послахъ земскихъ, вотъ сынаторскихъ, ти день цалый день подле дня маемъ мѣти волный до суженя тикаючихся пощтивости справъ а потомъ поколь одно сеймъ будетъ, маемо отправовати тыи помѣненіи справы, на каждую среду пятницу и субботу не омешкаючи о нихъ справъ сеймовыхъ належачыхъ, а звлаща жаднымъ правомъ и квалтъ суженя подле конституціи Любелской, року 1569.

АРТКУЛЬ 7.

Мѣща судомъ.

Великой Полщи Петрикову, до которого тыи воеводства належати будутъ: Познаньское, Калиское, земля Волынская, Лечиньское, Береское ино Влацславское, земля Добринская, Мазовецкое, Плотское, Равьское; въ малой Полщи Люблинь, до которого тыи воеводства належати удуть; Краковское, Сендомирское, Руское, Подолское, Любелское, Подляшское, съ тымъ докладомъ, ижъ тые же судіи судивши великой Полски воеводства въ Петриковѣ, мають зась ся изихати на часть нижей назначоный до Люблина, а такожъ и тамъ осудити мають малой Полски воеводства.

АРТКУЛЬ 8.

Беспеченство судовъ и сеймиковъ.

Предъ который то судъ особа жадная которого же колвекъ стану и заволяня, котораа бы акцеи правовой не мѣла, входити не маеть, аже кого зъ рейстру заволяють, до sprawy своей приступати и до кгдаху входити не маеть, толко самочвартѣ наибольшей входити маеть то есть самъ съ прокураторомъ а два пріатели. А если бы который упорне вшоль, або въ дому судовомъ воланя чинилъ; тогды маеть на немъ сказана вина двоякаа чотырнадцать гривень, которую заразы подъ таковою же виною не отходячы отъ суду положити судовы повинень будетъ, яко противъ непослушному ексекуція речы осужоныи, и такъ маеть при вотованю, абы жадень не зосталъ о прочъ тыхъ, которіе до того суду присягли. Тежъ жадень такъ насеймику обыраня судей яко и на мѣсце, где суди будутъ справовани, аби не смѣлъ пріѣждати и приходити зъбройне и не з жадними иншими бронми кромѣ меча корда шабель шпаки, а хто бы сиѣлъ стрѣлбою, и або з якою иншою бронею вшелякою пріѣхати, абы зъ нею ходити; таковой абы пятмадесять гривень былъ каранъ выною завыте неотходячы отъ суду або отъ сеймику, подъ выною чотырнадцятма гривнями, або если бы отъсланъ на ексекуцею ведле sprawy до мейсца старостего. А где бы хто на сеймику обыраня судей або судіи, або тежъ во трохъ недѣль предъ зачатіемъ суду нашего, або тежъ во трохъ недѣль по отсужоню, яко быти протывному; (sic) не иначе одно яко бы той на сеймѣ при насъ учинилъ.

АРТКУЛЬ 9.

Часу судовъ.

Суды на прудъ початись мають въ Петръковѣ въ понедѣлокъ близкихъ по светомъ Мартине, въ понедѣлокъ близкій по проводной недѣли, а кончится мають покол ся не скончатъ; а единако же абы зыншыхъ судовъ нижшыхъ стопневъ подъ тымъ часомъ улженя судовъ валныхъ трибуналу остатнего стопня права отправовались. А Мазовецкы суды до остатнего стопня права, которыи первой судять, якъ ся зачали скончитись мають, декрета и справы тыхъ судовъ въ Петръковѣ печатю земскою кгородскою, а въ Люблинѣ печатю земскою Любелскою мають быти печатованы, тако жъ яко ся звыкло при судѣхъ королевскихъ.

АРТЫКУЛЬ 10.

Утверженіе декретовъ.

А декреты тыхъ всѣхъ судовъ остатнего стопня воеводствахъ о сужоньи, которыи и на потомъ осужоньи на тои валномъ судѣ трибуналу будутъ, опатруеми и утвержаеми такимъ варункомъ, яко суть опатроніе суди новыи на тотъ одинъ разъ за Короля Жигмонта Августа ухваленіи декретомъ сеймовымъ Варшавскимъ остатнего дня Марца року 1564 учиненымъ, яко тотъ декретъ сеймовый въ собѣ самъ обмовляетъ въ тыи слова. Ижъ который колвекъ на сеймъ, або тежъ предъ врьдъ, або тежъ передъ насъ за дворомъ якимъ колвекъ обычаемъ былъ позванъ отъ кого же колвекъ ку скоженю; таковой сказни подлѣ ради и нацеи и ухвалы сейму пройшого Петръковского учиненное отъ позвовъ и отъ речы волень быти маеть и есть. А если бы еще на то хто упорный быти хотѣль, а приповѣдался на таковыи позвы, и на нихъ если бы што въ не послушенствѣ содержалъ; таковыи не мають мети нѣякои волности и быти не можетъ ку жадной шкодѣ нѣкому а нѣ презъ урядъ старости и екзеквованы быти мають. А если бы тѣжъ за приповѣдаіемъ до суду чымъ позванный на таковой позовъ стануль, тымъ не отходячы самъ або прокураторъ его будетъ повинень положить вини сто гривень, половица сторонѣ а другая до скарбу нашего быти маеть. А гдѣ бы досыть за помѣненіи речи неучиненной; таа справа маеть быти отослана, гдѣ добра стороны поведовой лежить, до остатнего дни и скутечного выконченя винь, а прокураторъ маеть быти сказанъ до вежѣ на тый день сидѣти на днѣ тамъ, гдѣ бы таковые речи черезъ насъ были сужоны.

АРТЫКУЛЬ 11.

Повинность суду земского.

Прихилиючися до права посполитого и звычайевъ давно захованныхъ, гды жъ тотъ судъ отправовати маеть, што напередъ тымъ при судѣхъ нашихъ королевскихъ отправовано

бывало, мається до того суду з'їхати судя и подьсудокъ писарь оного воеводства, въ которомъ отправовани будуть, а тимъ присягши таемнимъ а и въ томъ судовымъ всю тую повинность на собѣ относить мають, которую нижели предъ тымъ при судѣхъ сеймовыхъ або дворныхъ и конуы судей нашихъ иншихъ за пробацією декретомъ обирати и отсылати мають, еднакъ же вотованя на тыхъ судѣхъ мѣть не мають.

АРТЫКУЛЬ 12.

О позвехъ предъ тотъ судъ.

Позвы мають быти подъ титуломъ нашимъ королевскимъ а подъ печатю той землѣ, въ которой позванный осѣлость маеть, а кладеня маеть быти на немъ 2 недѣли предъ рокомъ.

АРТЫКУЛЬ 13.

О записахъ и протастаніяхъ.

Записы сознаня освѣдченя и реляціи вшьелякіе такъ мають быти важными и предъ тымъ судомъ сознаня, якъ сеймовии або земскіи.

АРТЫКУЛЬ 14.

О ексекуціи декретовъ

Старостове и урядникове ихъ вшьелякіи декрета повинны ведле приекзековати подъ вынами описанными.

АРТЫКУЛЬ 15.

Опатрєня судей.

Тыжь судіи отъ кождого декрету, за кимъ выйдеть, по 15 грошей брати мають, а отъ екстриктовъ плаченя маеть быти ведлугъ статуту, а панове духовныи депутатомъ своимъ опатрєня дати мають.

АРТЫКУЛЬ 16.

Поправа трибуналу такъ есть.

А трибуналу того посполитого корунного поправа завжды маеть быти волна за заволенямъ съполнымъ на соймѢ.